

近代中國史料叢刊第二十七輯

沈雲龍 主編

劉中丞（霞仙）奏疏

劉蓉著

文海出版社印行

聖中
南義

10/26/1911

光緒十有一年
思賢講舍校刊

劉中丞奏議卷一目錄

署四川藩司到任謝 恩疏

補授藩司實缺謝 恩請 覲疏

瀝情乞退疏

報由川赴陝起程日期疏

籌辦漢南軍務大概情形疏

附調蔣若采等員隨營赴陝疏

附刊刻關防疏

會奏援軍挫衄情形疏

奏漢郡失陷現籌勦辦情形疏

附調副將唐星照募勇赴陝疏

附請飭李雲麟暫駐興安疏

籌辦川省鹽釐疏

附請飭臬司牛樹梅等設局勸辦陝捐疏

附請飭山西派委司道勸捐疏

附調在籍主事余煥文等隨營疏

奏調實缺人員襄理營務疏

陳改駐甯羌調軍進剿疏

附請由李京堂單銜奏報軍情疏

查明漢郡失守情形疏

附催調唐星照來陝疏

附陝省武缺就近酌委拔補疏

陝西通志卷之二十一 職官

劉中丞奏議卷二

湘鄉劉 蓉著

署四川藩司到任謝

恩疏

同治元年正月二十日

奏為叩謝

天恩恭報

微臣

到任日期仰祈

聖鑒事竊臣於咸豐十一年十月十三日接奉督臣行知咸豐十一年九月十九日內閣鈔出十五日奉

上諭劉蓉著賞給三品頂戴署理四川布政使欽此旋因臣服制未闕呈請終制經督臣據情轉奏復於同治元年正月十三日奉到行知咸豐十一年十一月初二日內閣奉

上諭前因四川軍務未竣需才孔急特將劉蓉賞給三品頂戴署理四川在政使茲據駱秉章奏轉據該員呈稱墨經入仕恐悖禮經請俟服闋後接篆等語情詞懇至自難重違所請四川布政使著毛震壽暫行兼署劉蓉俟明年正月服闋後該督卽飭赴任欽此茲臣於本年正月十四日服闋十九日准兼署藩司毛震壽將

敕書印信文卷移交前來當卽恭設香案望

闕叩頭祇領任事伏念臣蓬華下士湘楚諸生自揣凡材未敢妄希平祿仕遭時多故因而濫廁乎戎行無補捐埃頻叨保敘方慙報稱無似虛邀車服之榮何期

寵遇頻加更

畀屏藩之寄感深鼇戴愧處士之虛聲曲遂烏私廣

皇仁之錫類凡此

恩施之異數皆非夢想所敢期

錫命自

天悚惶無地查四川古稱天府地本沃區自頃軍興日形凋替
吏治不勝其蠹弊人心漸卽於澆漓餉糈之轉運方殷庫帑之
度支尙絀舉凡安民察吏理財用人皆當務所宜先實藩司之
專責臣材茂迂拘深懼弗克勝任惟有勉竭愚慮益凜冰兢務
潔己以奉公期正身而率屬庶幾剔除宿弊效薄報於毫芒澄

敘官常酬

鴻慈於萬一所有微臣感激下忱及接印到任日期謹繕摺恭

謝

天恩伏祈

皇上聖鑒謹

奏

補授藩司實缺謝 恩請 覲疏 同治元年三月初八日

奏爲恭謝

天恩陳請

陛見仰祈

聖鑒事竊臣本年三月初五日接奉督臣行知同治元年二月十三日奉

上諭劉蓉著補授四川布政使欽此當卽恭設香案望

闕叩頭謝

恩伏念臣以菲材罔識時務迺荷

殊寵遽列大藩攝任以來甫逾旬月涓埃無補兢惕方深忽奉恩綸俾除今職斯近時未有之遇實

聖主非常之知而臣才短意長任大責重辰昕秉筆午夜捫心思稍罄其智能冀仰酬夫

高厚凡諸安民察吏理財治軍務挈大綱圖收實效惟際戎馬

倥傯之會籌餉維艱當民生凋敝之餘撫循不易每竊愧歎恐負

恩施臣惟有事事稟商督臣勉竭駑駘力肩艱鉅不避嫌怨罔憚勞辛凜楊震四知之箴期諸葛小心之慎必使逆氛埽盪全蜀乂安吏治澄清民風不變庶足以昭

聖朝蕩平之治答

大造陶鑄之殷臣以草茅新進重任初膺深懼弗克稱職伏求皇上俯准臣赴京

陛見跪聆

訓誨俾得藉爲遵循之軌亦以稍伸瞻慕之忱所有微臣感激

下情謹繕摺恭謝

天恩伏祈

聖鑒謹

奏

瀝情乞退疏

同治元年七月二十日

奏爲瀝陳下情籲

賜罷黜以安愚分恭摺仰祈

聖鑒事竊

臣

以陋質伏處草茅本無用世之心詎有濟時之略

咸豐三年偶隨友朋辦理團練旋赴軍營馳驅戎馬之場周旋

鄂楚之會積時既久未建寸功而

臣

弟蕃遠殉蒲圻之難心摧

意沮負骨以歸咸豐六年欽奉

文宗顯皇帝諭旨飭赴羅澤南軍營襄辦軍務維時臣父年力

衰邁弟葵又復多病侍養無人實亦不忍復出咸豐十年復奉

諭旨命臣募勇六千赴援皖浙時臣新遭父喪自維苦塊餘生

心力凋瘁不堪膺茲重任方赴湖南省城求撫臣據情代奏適

撫臣奉

旨督辦四川軍務奏調臣隨同入蜀臣自知才識凡庸不堪世

用而屢迫

朝命未敢固辭迺爲半歲之約期於秋間遄返蓋謂幕府本無

專職進退得以自由冒禮一行特借以解其抗違

詔旨之愆非有僥倖功名之意嗣茲墨經從事遠涉三巴亦未
嘗少出智謀稍有裨益綿州之捷蓋將士血戰之功督臣調度
之力臣不過磨盾草檄代司筆札之役至於行軍機宜非能有
所贊畫督臣歸功幕僚猥以辱諸薦牘蓋非臣所及知而抑非
臣之本志也不期

皇上過采虛聲遽賞臣三品頂戴署理四川藩司聞

命震驚罔知所措既屢求督臣奏乞

天恩收回

成命而督臣以謂當

國步艱難之際非臣子退讓之時且值

聖主初基舉行曠典不可不勉承

德意援摭古誼敦勸再三

臣

亦竊自思維古聖帝明王之用人

有以漸而進者亦有超然待以不次之位者故唐虞之世三載考績黜陟幽明而皋夔稷契遽作六官之長三代選法多循舊章而伊尹傳說呂望之倫崛起草萊遂登輔相至於漢唐英主延攬豪俊超越等倫雖所舉未必皆賢其用意亦各有在臣誠不能追媿前哲然嘗博覽詩書粗通經術其心其志不敢有愧古人顧時局之多艱慨江河之日下過不自量思效愚忠是用慨然受職而不辭視事以來於今六月雖循分供職幸免愆尤而誠不足以動人望不足以孚眾吏治之弛廢尙未改於前觀

民氣之凋殘或且甚於曩歲餉已絀而兵不得息竈日增而食無可籌由是釐金捐輸次第舉辦民力既盡尙爲竭澤之漁苛政未除更獎催科之績事非出於不得已情實迫以難堪默自省循方增慚乍頃見蔣琦齡所陳十二策中慎名器一條益爲愧汗悚惶臥不安席臣誠無狀不能少效涓埃仰酬高厚謬竊大位自致煩言迺以曠代之

殊知轉成

聖朝之過舉中懷跼踖五夜徬徨若復貪戀

恩榮不急引退將致上貽

聖明之累下增頑鄙之譏遠媿樊英近慙殷浩伏求

皇上天恩立賜罷黜俾遂初服以重

朝廷之名器以釋

微臣

之重負區區私願實用感銘或謂毀與

無關得失用舍出自

朝廷臣雖被人論列而

聖恩寬大未卽施行不宜冒昧陳情自取咎戾不知黜陟者

皇上之大權去就者臣子之大節使

臣

尙自信才堪應變力可

匡時卽含垢包羞固宜隱忍以圖功委蛇以求濟今泣任半歲
厥效茫然成效要歸亦可概見冒禮躁進旣已自失於前勇退
急流庶或補救於後且臣前日冒昧一出固思共濟時艱少抒
素抱非有希榮慕祿之心今旣自覺其無能卽不容一日尸

其位既自知其非義卽不能一夕安於其居夙昔讀書粗聞大道豈可自乖素守遠昧初心在

皇上始以臣爲可用而姑試之繼知臣之不肖而亟罷之一舉一錯廓然至公無傷

日月之明益彰

天地之大而臣得以苟全素履退處山林當更砥礪廉隅博習經術或者學業終有成就晚節得以保全感戴

鴻施更無紀極所有微臣懣情乞退緣由理合恭摺陳奏伏乞

皇上聖鑒再臣自慙奉職無狀屢求督臣代達下忱未蒙轉奏情迫意切冒昧自陳不勝惶恐謹

奏

按此疏具草求制府駱公代奏未許不得已自繕拜發摺弁行一日矣駱公聞之乃馳檄追還原疏代爲陳奏同治元年八月十四日內閣奉

上諭駱秉章奏藩司瀝情乞退據實代奏一摺據稱四川布政使劉蓉瀝陳到任六月於民生吏治挽救毫無默自省循方深慙忤因見蔣琦齡所陳中興十二策中有慎名器一條益爲愧悚請立賜罷黜代爲陳奏各等語劉蓉以湘楚諸生迭經胡林翼駱秉章保奏受

兩朝特達之知不次超擢原與各路軍營濫保驟進者不同姑

無論川省軍務方殷不宜遽行乞退卽以朝廷用人而論黜陟賞罰一秉大公如果其人才出眾不妨破格錄用若以後不能稱職該省督撫既可隨事劾參朝廷見聞所及亦必加以擯斥此中權衡操之自上非臣下所能干預該藩司卽無所用其引嫌所有駱秉章代劉蓉陳情乞退之處著毋庸議劉蓉惟當如常供職盡心地方公事以圖報稱勉爲名臣固不必務退讓之虛文也欽此

報由川赴陝起程日期疏

同治二年八月初十日

奏爲恭謝

天恩兼報

微臣

起程日期恭摺仰祈

聖鑒事竊臣於同治二年七月二十八日奉四川督臣行知六月二十九日欽奉

上諭前經諭令駱秉章酌量調派劉蓉前赴漢南督勦著駱秉章仍遵前旨卽飭該藩司督帶嚮導桂字等營趕緊起程前往並著專摺奏事一俟行抵漢南卽行迅速馳奏等因欽此正在料理起程旋於八月初一日復准督臣駱秉章知照七月二十九日承准議政王軍機大臣字寄同治二年七月初二日奉上諭前因漢南兵勇統領乏人節經諭令駱秉章調派劉蓉赴陝當此陝南軍務萬分喫緊恐事權不屬呼應不靈是以特授劉蓉爲陝撫該撫身荷厚恩膺茲鉅任自應感激圖報迅速馳

赴漢南整飭諸軍將興漢一帶賊巢尅期攻燬迅掃妖氛至漢
回一事仇鸞已深劉蓉到後總當握其要領持平辦理不可稍
涉偏激以副委任等因欽此當卽恭設香案望

闕叩頭謝

恩伏念臣才不逾人學惟自守值時艱而馳驅戎馬遭殊遇而
特畀屏藩

訓以名臣方懷慙於責實膺茲重寄復拜
命於便蕃

寵任逾隆悚惶彌切查陝西爲自古形勝之區巡撫有統轄文
武之責况值漢回構釁羣盜如毛非飭吏治無以奠民生非開

誠心無以孚眾志而臣識闇才拘慮深略短自慙力小懼重任之弗勝顧念時艱欲疏辭而不敢計惟有勉殫心力務矢公忠

仗
九重赫怒之威同伸敵愾拒百二雄關之險悉鞏

皇圖庶幾大局粗安

宸衷仰慰所有四川藩司篆務現經督臣駱秉章檄委鹽茶道啟芳接署臣於初六日將經手事件交代清楚募選親兵一千名卽於八月十二日自成都起程擬由保甯一路馳赴漢南督率諸軍力籌勦辦誓殲凶醜效薄報於涓埃迅掃欃槍答

鴻慈於萬一所有

微臣

感激下忱及由川起程日期理合恭摺

具報叩謝

天恩伏乞

皇太后

皇上聖鑒謹

奏

籌辦漢南軍務大概情形疏

同治二年八月初十日

奏爲籌辦陝西軍務次第先將大概情形恭摺

奏聞仰祈

聖鑒事竊

臣

迭據探報髮逆大股現在漢中府城附近數十里

四面環紮又復分股與中旗餘匪蔓延沔陽一帶藍朝柱

一股尙踞洋縣又據藩司毛震壽函稱張第才一股已由西鄉石泉漢陰等處竄往鎮安曹燦章一股現竄蓋屋分股屯踞槐壩回逆經荊州將軍多隆阿連破堅巢屢受懲創惟西安省城附近尙有回匪焚掠鳳翔被困業已經年各等語查多隆阿督師入秦以來肅清同州軍威已振現在籌攻沙河老巢可期得手臣奉

命由蜀入秦自應先靖漢南以次而北漢中被圍五月糧食盡尤須迅籌進擊力解重圍前經四川督臣駱秉章派出援剿之嚮導營候補道張由庚現已進次距漢中三十里之雲峯寺果毅副前營參將劉鶴齡已抵石光坪桂字營總兵朱桂秋亦

進紮錦雞嶺均距漢郡不遠其湘果右軍記名提督甘肅肅州
鎮總兵何勝必中軍記名提督蕭慶高已由南江通江先後進
發計日均抵漢境毛震壽所統之果健營易佩紬一軍聞亦移
紮兩河口其由鄂派往之健銳營因候補京堂李雲麟告假回
旗暫紮興安尙未前進

臣奉

旨後遵卽選募親兵星馳前往相度機宜分路攻擊統計所部
會合各軍萬有七千餘人而髮逆大股號稱二十餘萬以之攻
瑕擣隙則兵力不爲不多以之合圍聚殲則亦尙嫌其少該逆
久頓堅城凶鋒已鈍大軍進剿勢將解而東趨或仍由西鄉洋
縣回竄鄭西或更斜趨商洛均未可定李雲麟疊奉

諭旨飭催不拘假限迅赴漢南現尙未據報到營相應請

旨飭令迅速馳抵軍營卽由西鄉會剿以資扼擊將來該逆敗而東竄卽可責成李雲麟迅率所部督同梁作楫之軍跟蹤躡剿使該逆喘息不定當可迅圖殲滅其竄赴鎮安之張逆一股界連孝義商州及湖北之鄖西一帶臣已飛咨署撫臣張集馨及鄂省督臣撫臣嚴密防剿至中旗餘匪徘徊褒沔之間不與各逆合隊現在四川派防之武字定武兩軍足資控禦若將來仰仗

天恩漢郡圍解川中門戶可以無虞卽可調此兩軍尅期會剿以通褒沔驛路臣俟漢南肅清善後事宜料理周妥擬卽馳赴

蓋屋勦辦曹逆再赴西安省城會同荊州將軍多隆阿西安將軍穆騰阿等專辦回匪務期分別良莠辦理持平上以彰

聖主捷伐之威下以拯生民水火之厄臣惟有竭盡心力宣播

皇仁以期仰副

朝廷眷顧西陲之至意至於賊情詭譎朝夕變更容臣隨時斟酌

妥辦再行馳

奏所有現在規畫大概情形理合恭摺由驛具

奏伏乞

皇太后

皇上聖鑒訓示謹

奏

附調蔣若采等員隨營赴陝疏

再臣現由川赴陝督辦軍務所有行營經理餉需支應軍火以及辦理營務各事宜在在需員勢不能由陝揀調自必仍就川省派往以期迅速而收臂助茲查有四川補用知府蔣若采試用知縣羅鳳岡永甯縣縣丞寇守智候補府經歷汪兆鏞試用縣丞陳錫鬯又湖南候補同知陳元盛已革知府銜候選同知戴齡均經臣札調隨同赴陝分別委用理合附片陳明伏乞

皇上聖鑒謹

奏

附刊刻關防疏

再臣此次繕發摺件係借用四川藩司印信將來一切文移應行蓋用木質關防以昭信守現倣刻木質關防一顆其文半滿半漢曰陝西巡撫行營關防卽於八月初六日交卸後開用除咨部查照外理合附片陳明將來奏報軍務可否卽用木質關防印發伏乞

聖鑒訓示謹

奏

會奏援軍挫衄情形疏

同治二年九月十七日

奏爲確查援陝各軍先勝後挫實在情形並將失律將領嚴參

以肅戎行恭摺會奏仰祈

聖鑒事竊查漢南援軍失利業經臣秉章先將大概情形馳奏

在案時臣蓉業於十二日由成都起程臣秉章當卽飛咨知會

並函屬詳查我軍因何失利詳細實情以憑會辦臣蓉於八月

二十七日行抵巴州迭據探稱援軍十六日接仗之後陰雨連

綿十九日天色晴霽記名提督蕭慶高率湘果中軍攻油房街

何勝必率右軍攻中所營新補陝安道張由庚所部嚮導營循

左路漢山旁鈔中所營總兵朱桂秋率桂字營由右路鈔油房

街知府易佩紳率果健營攻右路李家街甫近賊卡油房街中

所營之賊如浪翻潮湧而至我軍用連環鎗礮轟斃賊千餘中

有黃衣賊目數人賊陣已亂蕭慶高何勝必長驅直進連拔梅花椿數重距賊巢不過咫尺不意襄沔之賊由新集左路鈔入北岸之賊復由右路鈔來嚮桂健三軍力不能支左路勢尤汹湧嚮導一軍先潰桂健兩軍隨亦奔北該逆復出馬隊數千四面包裹我軍困在垓心血戰逾時始獲潰圍而出退至營盤則兩路包鈔之賊已距營門不遠我軍復分兩路抵敵斃賊數百時已昏暮遂各收隊此十九日先勝後挫之實在情形也是夜賊眾多未歸巢潛伏四面山澗桂健兩軍見勢不利卽於是夜退紮法慈院青石關等處賊知我軍勢孤遂於五更時由右路繞出各軍營盤之後我軍出隊進擊行不數里賊已蜂擁迎拒

四面合圍竭力死戰傷亡相踵至午後始突圍退至營盤而繞
出山後之賊已由後營放火於是湘果中右及嚮導三軍遂盡
棄帳房輜重且戰且走退紫青石關一帶此二十日各軍力竭
陸續退守之實在情形也先是臣蓉奉

命督師卽慮各軍心力不齊輕進致敗於起程之先四日曾經
檄飭諸軍逼營漢郊堅壁勿戰俟臣蓉到營後規度進剿乃各
軍尙未接到前檄因見漢郡城圍緊迫糧食垂盡急於一戰以
解城圍漢中地勢平衍賊匪馬隊便於馳騁我軍皆係步隊又
值久雨四旬泥淖深至尺許不利衝擊賊旣十數倍於我軍知
其師無後繼四面包鈔眾寡不敵致此挫敗然合一萬七千餘

眾果使同心合志卽或不能制勝何難固守營壘以遏鴟張乃
傷亡至三千餘人陣亡營官至七八員皆忠義精銳之士近年
楚軍赴援各省屢克大敵頗著聲威實少有如此挫衄之甚
者而漢中城固亦遂相繼失守興言及此痛憤填膺除由臣秉
章馳檄川東添調勁旅臣蓉派員回楚增募新兵以期重整旗
槍大張撻伐臣蓉暫駐巴州趕辦鍋帳軍裝分致各營俟所調
果後九營到齊卽行統率前進惟此次失律將領若不予以嚴
參無以肅軍律而作士氣查十九日之戰陝安道張由庚所部
先潰總兵朱桂秋知府易佩紳當事勢危急之時不能力戰及
至敗潰之後並不知會各軍拔營遁實有應得之咎該三員

均應請

旨卽行革職惟張由庚平日尙能撫馭士卒此次實因傷溼病足未能親自督陣情尙可原易佩紳在漢中軍營年餘備極艱窘尙能竭力支持仰懇

天恩俯准將張由庚革職畱任以觀後效並准易佩紳畱營効力以贖前愆記名提督蕭慶高何勝必狃於常勝進攻過銳於派隊時竟有空壁出戰者亦屬未能持重應請

旨一並摘去翎頂以示薄懲至各營官或有臨陣退縮觀望不前者應俟臣蓉詳細查明分別懲辦其陣亡之總兵賀蘭桂蕭

慶泗何玉林解洪德副將李凱章參將徐祥泰黃星堂遊擊黎

松鶴守備蕭積蕊千總張大興升用同知蕭積玉等血戰捐軀
均請

旨交部從優議卹以慰忠魂其餘傷亡員弁兵勇容俟詳細查
明照例辦理所有援陝各軍失利退禁據實嚴參各情理合會
銜由驛馳

奏伏乞

皇太后

皇上聖鑒訓示謹

奏

奏漢郡失陷現籌勦辦情形疏

同治二年九月十七日

同治二年九月十七日

奏爲漢中郡縣失陷賊勢蔓延現籌扼要堵截募勇聚糧徐規
進勦謹將布置大概情形恭摺馳奏仰祈

聖鑒事竊漢南援軍失利現經臣查明實在情形會同四川督
臣駱秉章分別奏參在案九月初二日據布政司毛震壽稟報
八月二十日援軍敗退之後僞啟王由南岸回踞漢郡東關二
更時分越城放火城遂不守旋據代理西鄉縣知縣陳爾第稟
報郡城失後南鄭縣知縣周蕃壽殉難守城將弁兵勇四散潰
逃該逆旋撲城固縣城亦於二十四日失陷等語查漢郡被圍
半載忍飢待援卒陷於賊滿城士庶豈有孑遺聞之實深痛憤
溯自羣賊竄擾漢中屢糜

聖慮始派李桓督辦適以病辭繼派李雲麟前征忽遭母喪展轉耽誤賊勢愈張臣奉

命督師倉皇就道方冀仰仗

威德立解倒懸不謂臣未出疆聲威先挫遂使名城瓦裂逆焰
 鳴張凡此事機之不順若有非人謀斫能及者然推其所以致
 敗之由實有數端何者漢南賊眾二十餘萬西自略陽東至洋
 縣綿亙二百餘里所謂率然之勢進剿之法宜分三路一由甯
 羌以攻褒沔一由西鄉以趨洋縣一由南通逕搗漢中三路同
 時並舉則賊勢分而首尾不能相顧今僅以一軍獨進使賊得
 招集羣凶四面包裹此處於必敗之勢者一也大凡以少擊眾

之道總須先得地利憑藉虛聲而又出奇以制之漢中地屬平原無山林爲之障蔽我之師徒多寡營壘布置賊可一望而知孤軍遠出師無後繼則賊膽愈壯士氣先餒况又以步卒當騎隊用所短以敵所長此處於必敗之勢者二也軍行以糧爲先人情爲食是亟近派各軍援陝大都視爲畏途以彼中米粟無多又遭逆蹤蹂躪川北一帶糧食本少比值秋潦歉薄價值彌昂兼之山徑崎嶇轉運尤苦每夫負米二斗日行不過二三十里或值水潦載途怨咨盈路統計運米一石需費至十餘兩之多臣前在川藩任內特請督臣奏設糧臺代籌運費以示體卹然軍士每食陽芋包穀或竟日不得一飽士有飢疲之色日聞

嗟歎之聲而欲責使負盾前驅枵腹出戰此處於必敗之勢者
三也此三敗者臣與督臣駱秉章早慮及之故於三四月間既
經奏派張由庚朱桂秋率師赴援而復檄使暫紮邊境須俟鄂
師西上會合夾擊及至石逆就俘蜀境稍靖又復添派蕭慶高
何勝必兩軍然猶戒以勿得輕進冀俟鄂軍到後仍爲三省會
勦之謀迨聞漢中城圍孔亟

皇上焦勞倍至而李雲麟假期已滿杳無來音不得已檄催前
進亦計楚軍久著聲威姑使冒險以出不謂事機敗壞果至如
斯雖人謀未盡協宜亦實由時勢迫而致之耳現值軍威挫損
賊勢猖狂不得不急圖挽救而補救之法亦惟力鑒前車覆軌

避短用長仍圖三路進剿之規庶期轉敗爲功卒操勝算惟餉源乏竭無鉅款可資轉輸精銳銷亡非倉卒所能召募旦夕慮此焦灼殊深比接各處探報襄沔西鄉一帶賊氛密布並據毛震壽稟稱八月初九日中旗髮匪竄近略陽代理知縣劉希寬督團禦之於閣道嶺被賊兩路夾撲力竭陣亡並聞徽成階文均有賊蹤竄越是不獨已陷各城一時難於收復卽附近興漢州縣亦有岌岌可虞之勢現據各營稟報近日漢郡賊眾四出日向通江南江毗連之龍池場黃官嶺紅廟塘天明寺二郎灞彭灞高家嶺一帶擄糧裹入意圖窺伺該處山谿小徑處處可通萬一闌入川疆則川軍勢須回顧漢南軍務益復無從措手

臣現督飭諸將收集殘卒分隘嚴防並檄毛震壽將兩城潰卒悉數妥爲資遣易佩紳所部八營亦飭大加裁汰以免虛耗餉糈一面函催李雲麟迅率所部水陸各軍由鄖陽逕趨西鄉會商分途勦辦之略一面派員回楚募勇三四千名部署訓練以期迅成勁旅惟由蜀抵湘往返八九千里計須臘底乃可取齊兼聞苗逆擾及裕州鄂邊戒嚴李雲麟之能否會師西鄉尙難預定則將來三路進勦之謀仍覺虛懸無著臣擬俟所調果後九營到後親自統率進駐青石關激勵諸軍先固川疆門戶徐爲相機勦之計並檄署漢中府知府楊光澍設法採運米糧以供各軍日食伏乞

皇上敕下湖廣督臣官文湖北撫臣嚴樹森迅催李雲麟裹帶
行糧沂流西上以符三省會剿之議以定三路進兵之規現值
中旗髮逆竄近階文周達武曾紀鳳兩軍祇可嚴防川界襄沔
一路尙屬無兵可籌將來臣與李雲麟分道犄角勢未宜相距
太遠一切進止機宜尙須熟商妥籌以期穩固萬一李雲麟又
復回顧楚疆不能來陝會剿則臣不宜更以孤軍獨進致賊得
左右包繞仍蹈前日已覆之轍惟當咨商督臣酌畱四五千
人分防青石關而自率萬餘人改由廣元趨甯羌以圖襄沔期
步步爲營節節痛剿尙有可圖之功且係通驛大路米糧可用
驟馬馱運較之南通僻徑稍覺便於轉輸此臣現籌布置進剿

之大略也

臣

本庸材過蒙

栽植甫膺重任遽履艱屯一切籌餉籌兵皆不能不仰恃乎蜀所幸督臣駱秉章忠誠懇至各司道與臣同寅日久心志成孚於所擬籌餉事宜度必能竭力籌辦臣苟得專意治軍不以餉項乏缺爲慮則殫竭智力不憚艱辛終亦必有殄除凶殘廓清疆宇之一日惟臣旣身任封圻於陝西通省事宜責無旁貸而道路梗阻聲息苦不相聞伏祈

皇上敕下署撫臣張集馨於一切應辦要務實心整頓竭力經營勿存五日京兆之見或司庫稍有存款仍卽撥濟臣軍荊州將軍多隆阿忠勇絕倫勳名夙著所有勦辦叛回事務自可獨

力承當如其兵力尙厚或更分撥馬隊千餘名駐紮畱壩以遏
該逆北窺之路亦可少戢凶鋒將來臣或改趨襄沔仍可約會
夾擊先將驛路疏通實於通省機局裨益爲大伏候

聖裁至南鄭縣知縣周蕃壽督勇守城殫心勞慮臨難之際大
節凜然應請

特恩優加褒卹以勵頑懦而慰忠魂代理略陽縣知縣劉希寬
禦賊捐軀應請

旨交部照例賜卹其餘文武各官容俟查明下落再行據實具
奏所有漢郡失陷現籌扼要堵截徐規進剿大概布置情形理
合恭摺由驛馳

奏是否有當伏乞

皇太后

皇上聖鑒訓示飭遵謹

奏

附調副將唐星照募勇赴陝疏

再查江西袁州協副將唐星照忠勇奮發紀律嚴明前在川中
屢著戰績堪勝統將之任該副將籍隸衡陽經臣札飭就本籍
衡湘一帶招募勇丁二千名分作四營選派營官百長統帶來
營以備調遣惟係實缺人員相應請

旨敕下江西撫臣沈葆楨湖南撫臣惲世臨催令趕緊募選成

軍迅速起程其所需鎗礮軍裝各項倉卒製辦恐難適用應請
由湖南軍需局撥發該副將承領以利軍行而資攻剿理合附
片陳明伏乞

聖鑒飭遵謹

奏

附請飭李雲麟暫駐興安疏

正封摺間接據署興安府知府謝復榮稟報前聞李京堂雲麟
有由鄖陽進剿張逆再赴漢南之議迄今未聞到鄖鄂省所派
援陝之義勝三營現今兩湖督臣調回又據布政使毛震壽稟
稱湖北管帶水師駐紮興安之候補知府周有全連得襄陽道

歐陽正鏞來牘言苗逆擾近南陽襄江戒嚴飭令返棹回楚等語查湖北苗逆逼近邊陲事勢如果緊急自不能不回顧疆圉惟興安地屬要區所屬州縣如漢陰紫陽石泉各處均與洋縣相距不遠若無得力將領駐紮防剿將被該逆次第蠶食現值援軍新挫之餘兵力斷難兼顧查李雲麟所部係奉

特旨援陝之師卽不能與臣併力會剿亦當令暫駐興安徐規進步萬一鄖襄實在喫緊卽請暫移梁作楫一軍與之對調分防庶屬縣可期瓦全大局不致決裂謹復附片陳奏伏乞

皇上聖鑒飭遵謹

奏

籌辦川省鹽釐疏

同治二年九月十七日

奏爲籌辦川省鹽釐應由井竈抽收謹條析大概情形請

旨飭辦責成以裕餉源而資接濟事竊臣於巴州途次接准四

川總督臣駱秉章咨開同治二年八月二十日承准議政王軍

機大臣字寄同治二年七月二十一日奉

上諭毛震壽請於川楚借地抽釐以裕秦餉所陳艱窘各狀尙

屬實在情形不得已而籌及川鄂兩省借地抽收鹽貨兩釐以

爲接濟之策或當有濟卽著官文嚴樹森駱秉章按照所奏竭

力籌辦嚴樹森籍隸秦中陝餉但有可籌之法諒無不盡力辦

理四川臬司牛樹梅候補知府蔣若采亦各籍隸陝甘並著駱

秉章飭令隨同辦理以冀有成等因欽此查陝西南北兩山概屬瘠區鳳翔亦半係山地獨西同兩府地勢平衍民物殷繁惟向以商賈爲生但藉居積致富故雖素稱聚財之區實少生財之法年來回逆滋擾又值髮捻鴟張遠近騷然死亡相繼所在州縣斷絕人煙廬舍成墟旣無可捐之富戶商賈裹足更無可抽之釐金凡屬近年籌餉之法概皆無從設施瑛棨之一籌莫展毛震壽之師久無功推其所由亦未嘗不因軍餉太絀之故現值官軍潰敗之後重製軍火鍋帳遣散潰卒召募新軍需費尤鉅

皇上洞見陝省艱窘情形

諭令川鄂兩省竭力籌辦除鄂省貨釐經臣恭錄

諭旨咨商兩湖督臣官文湖北撫臣嚴樹森酌量增抽盡力辦理外至川省鹽釐一項查閱藩司毛震壽原奏據稱川省辦理抽釐或傍關或就廠查明官鹽餘鹽分別抽取擬請酌加其半專顧陝省軍餉等語亦係仍照現辦章程酌量加增臣在川藩任內一年有餘訪查情形知各廠鹽筴之利井竈實居其源而商販特承其流蓋川省鹽出於井井資於竈井以水之鹹淡定鹽質之厚薄竈以鍋之大小定鹽筋之多寡其按引配鹽者名曰官鹽協濟楚省者名曰餘鹽官鹽則有行商坐賈之分餘鹽則無論何項客商皆可販運而井竈則乘鹽之或滯或銷以低

昂其價值故有虧本之商人從無歇業之竈戶向來辦法僅抽官鹽餘鹽從未議及井竈臣嘗擬倣唐臣劉晏就場起課之意倡爲按鍋計鹽按鹽定釐之議未及舉行緣井竈散處四鄉稽查不易惟照州縣編聯保甲之法派委官紳分別地段查明竈戶姓名開列籍貫懸諸門首注名某戶有竈若干有鍋幾口核計每日所出之水所煎之鹽約可賣銀若干卽可按其數目以定抽釐之多寡每十戶令出具連環保結官紳不時稽查如有一家偷漏責使九家連坐初辦頗費曲折而辦成之後卽可一勞永逸較之傍關就廠專取之於商販者更可收實效而無窒礙此就井竈抽收之法也溯查湖南抽釐章程每百貨資本銀

百兩約計抽銀三兩嗣因協濟江南大營軍餉添設東征局又議加抽釐銀三兩共計每百兩抽銀至五六兩之多而商販踴躍並無阻礙卽湖北所收每百兩亦約計抽銀三四兩不等現在下游水陸各軍卽恃此項接濟查上年川省舉辦鹽貨兩釐核計所抽不及一兩較湖南北所抽之數多寡已屬懸殊茲則取諸從未議抽之井竈於商販毫不加增而各井竈戶因鹽致富享利已久如能曉以大義獎以商學度無不樂於從事統計川省各廠井竈秦人十居七八蜀人十居二三今旣就竈戶注明籍貫卽可分別秦蜀兩商辦理如所抽係秦人資本者卽歸陝餉所抽係蜀人資本者卽歸川餉則於變通之中仍寓兼顧

之義實於秦蜀兩省均有裨益總之陝西糜爛已極無款可籌非藉資於鄰封別無良策但理財貴乎有法而行法全在得人該藩司原奏欲圖遠略難計近功不在事之成不成須問事之辦不辦實爲扼要之論四川督臣駱秉章公忠體

國出於至誠現經欽奉

諭旨必能竭力籌辦臬司牛樹梅秉性誠篤籍隸陝甘旣奉

旨隨同辦理自屬義無可辭臣伏查署四川藩司啟芳明白精

細現在總理藩條專司會計鹽道是其本任尤覺熟悉情形署

四川鹽茶道吳鎬練達深穩井竈係所統轄呼應亦較靈通相

應請

旨添派啟芳吳鎬隨同督臣督率舉辦遴委廉幹官紳詳定章程各分地段次第舉行惟事涉創始極費經營而大利攸關人所共競則劣紳之從旁撓阻奸商之暗中把持亦將嘖起煩言紛紜多故非任事者關懷大局竭力主持不存畏難苟安之心不避流俗怨謗之口實難期其有成當茲時局艱難軍食匱竭籌餉之事難於籌軍如能歲籌二三百萬以實軍儲不惟秦蜀實資其利我

國家將永賴之將來該司道不避勞怨辦有成功尙祈

皇上逾格優獎賞以勸忠勤蕭何饋餉之功嘉劉晏轉輸之績皆所以贊成

帝業佐助

中興伏祈

敕下四川督臣飭派籌辦委任責成此舉有益於

國無病於民臣之區區愚忱亦非獨爲陝西一時計也所有籌

辦川省鹽釐應由井竈抽收以裕餉源而資接濟緣由理合附

驛馳奏是否有當伏乞

皇太后

皇上聖鑒訓示飭遵謹

奏

附請飭臬司牛樹梅等設局勸辦陝捐疏

再臣前在川藩任內會同臬司牛樹梅設局委員勸辦陝甘山西等省捐輸計先後收捐銀十餘萬兩陸續撥解陝省及漢南軍營業經四川督臣駱秉章附片

奏明在案現在陝西軍務喫緊籌餉維艱井竈鹽釐試辦尙須時日惟續行勸辦山陝捐輸可資接濟查川省上年辦理湖廣江西等省捐輸爲數均至五六十萬之多山陝富商甲於他省何至反形短絀比嘗細加訪察始知各處富商尙多漏未書捐亦有資本甚豐書捐太少之戶現經臣擬就章程四條咨商督臣駱秉章飭派署鹽茶道吳鎬會同署藩司啟芳臬司牛樹梅妥籌辦理並檄飭籍隸陝西之四川升用同知梅錦堂署成都

縣知縣霍爲棊太平縣知縣吳培棠商人二品職銜陳鴻啟隨
同襄辦庶期集成巨款藉濟急需值所遇之多艱冀藉資於羣
力合併附□□□□□

聖鑒飭遵謹

奏

附請飭山西派委司道勸捐疏

再陝境疊遭蹂躪籽柚一空專仰給於鄰封誠屬萬不得已之
計川省接濟援陝各軍爲數已鉅鄂省亦有援陝之師餉項軍
火均應由該省籌撥所費亦殊不貲而臣所部兵勇月需口糧
現又製辦軍火派員回楚募勇以期澈底整頓一切需用經費

本地無可綢繆省城不能接濟兼之漢中城固潰散之卒數逾
三萬既屬不能得力而欠餉至五六十萬之多或遣或留需款
尤鉅臣自受任之後晝夜焦思無可籌畫惟山西素稱繁富又
屬完善之區近年撥供

京餉協濟鄰封爲數已覺不少查該省地丁錢糧河東鹽課入
款頗鉅出款亦多或有不足則隨時取給捐輸故常覺充然有
餘山陝地屬毗連不得不借圖挹注又去年回逆滋事西同鳳
各屬富戶多半遷居山西蒲解平陽各府縣迹雖同於轉徙家
仍擁夫厚貲亦應誼切梓桑共相輸助惟委員勸辦必須董率
得人查山西藩司鄭敦謹持躬廉慎辦事認真冀甯道王溥老

練精細籍隸陝西合無仰懇

天恩敕下山西撫臣英桂派委該司道專司其事遴選廉幹得力之員分途勸辦一俟收有成數隨時撥解行營但餉項尚有來源則軍威不難再振伏乞

皇太后

皇上聖鑒飭遵謹

奏

附調在籍主事余煥文等隨營疏

再臣行抵巴州延攬紳耆徧加訪察查有在籍禮部主事余煥文品正學純通達時務前任陝西淳化縣知縣唐正恩性情敦

樸任事實心該二員世居川陝交界地方於地利民情最爲熟悉而余煥文辦理團寨事宜井井有條才望尤著相應請旨准臣咨調赴營以資相助而備差遣伏祈

聖鑒飭遵謹

奏

奏調實缺人員襄理營務疏

同治二年九月十七日

奏爲軍營襄理需人援例奏調實缺人員仰祈

聖鑒事竊維募兵在乎選將治軍貴乎得人任用苟得其人軍事自有起色轉敗爲功轉危爲安全係乎此臣現劾失律之將弁汰懦怯之勇丁又復添調勁旅增募新軍期成節制之師用

捷鴟張之寇調度一切襄理需才陝西官員賢否臣尙未履任無從周知又值道路阻隔札調亦難卽至不得不就素所深悉者就近

奏調查現任四川資州直隸州知州黃濟才識明敏諳悉戎機思慮既極周詳籌畫尤能慎密以之總司營務定能經理裕如惟查咸豐十一年六月吏部議定章程嗣後直隸督撫及各路統兵大臣如因督帶兵勇需人奏調他省有印之官者務於奏調摺內聲明請

旨飭下該管上司查明委無處分虧空方准給咨前往如查有脫卸苦缺規避處分虧空未完交代未清等類無論有何才能

聖中丞奏議卷一
概不准派令前往等因奉

旨通飭在案茲查該員任內並無處分虧空以及脫卸規避情事與例尙屬相符合無仰懇

天恩俯念

臣營襄理需人

敕下四川督臣速卽委員接署卽令該員交卸來營聽候差遣俾臣獲收指臂之助實於軍務有裨理合援例聲明恭摺具奏伏乞

皇太后

皇上聖鑒謹

奏

陳改駐甯羌調軍進剿疏

同治二年十一月二十二日

奏爲漢南賊蹤紛擾楚軍扼守川疆及各州縣防剿情形現籌改駐甯羌俟調集各軍分路大舉以靖逆氛恭摺由驛馳奏仰祈聖鑒事竊漢南自援軍挫退賊勢蔓延業經臣將扼要堵剿布置大概情形陳奏在案嗣據探報僞端王藍成春僞扶王陳得才僞遵王賴文光等分踞漢郡城固兩城僞啟王梁成富分踞新集黃官嶺一帶其左隊僞天將馬士榮倪隆淮右隊范大頭等分竄西鄉前踞褒城之易矮子分竄畱壩等處藍朝柱仍踞洋縣分股竄陷佛坪張第才自鎮安竄陷山陽李雲麟前軍小挫現督各軍勦辦計可得手中旗一股自八月攻陷略陽後擾

及鳳郡經西安將軍多隆阿派兵擊敗與曹逆合股回竄甘肅之兩當徽縣延擾西河秦州禮成曹逆敗竄餘黨半合中旗半由甯陝廳界竄合藍逆此兩月以來各路賊匪紛竄之情形也臣自抵巴後嚴飭各統將分守川隘並檄漢南州縣激飭團練扼要堵截旋據代理西鄉縣知縣陳爾第稟稱該縣城池自上年五月被賊轟陷卽在堰口駐紮本年九月初四至初十日該逆連次攻撲勢不能支退紮司上汛十月二十八九日該逆由峪口老寨子等處竄入陳爾第派管帶蔣正光督隊迎勦生擒長髮老賊何大興彭金福二名奪獲賊旗數桿該逆由山後竄去等語又據石泉縣知縣陸堃稟稱九月二十二日該逆竄

踞茶鎮知府周有全率同千總劉發親督水軍身先士卒晝夜
鏖戰擊沈賊船一隻燒燬二隻斬獲長髮多名該逆復由陸路
麇集陸壑密飭附近團寨俟礮船於四更時候駛至茶鎮北岸
轟倒該逆所樹木檔各團寨卽四面舉火開礮應之聲震山谷
該逆不測我軍虛實昏夜狂奔自相踐踏周有全舍船登陸追
至老龍洞膀被鎗傷不退該逆由高川繞熨斗壩竄去遂將茶
鎮收復十月初九日該逆折回高川於馬家寨伐木紮箒意圖
偷渡經陸壑派守備蕭祿等督帶獵勇隨同周有全擊燬賊箒
該逆仍卽竄回又曹逆餘黨由甯陝竄該縣兩河口均經團練
擊退各等語此外如定遠廳之羅陣壩大市川紫陽縣之臘溪

場漢王城漢陰廳之雪窩均有賊股分竄擄糧該地方官督率團練堵禦尙能扼截此漢南一帶州縣派團防勦之情形也至川援各軍分駐青石關梅子壩一帶九月初九日賊自新集來撲我軍出隊迎擊小有斬獲十月十四日果健一軍裁撤該逆進逼法慈院意圖乘隙竄入蕭慶高何勝必等派兵先扼花石梁該逆偵知有備登時退去十九日新集之賊繞赴梅子壩逼圍朱桂秋營盤我軍開礮轟擊該逆抵死不退回自辰至酉以火蛋轟斃紅衣賊目數名又密派左右兩營出隊橫截而出該逆始行敗退我軍追至關家砦斃賊數十名生擒千餘名自是賊亦不復來犯矣青石關一帶地勢高峻八月卽已降雪十月以

後冰霰堅凝寒風刺骨各處米糧不能轉運營中往往斷炊不得已退紮川陝交界之西河口大壩等處以就糧運該逆見我軍不戰而退莫測所爲亦遂退駐新集油房街老巢於是黃官嶺法慈院紅廟塘牟家壩等處均無賊蹤此又援軍扼守川疆之情形也伏查該逆自踞漢郡以後其餒益張其黨愈盛實計二十六七萬人密布分屯綿互二百餘里然眾雖多而不整諸酋爭相雄長急則相救緩則相圖故其勢尙非難破之賊以臣竊自度量尙得精兵三萬人籌備半年之餉必能殲醜類而振國威今駐巴已逾兩月未敢遽爾前進者實緣兵力尙單餉糈無出不得不持重以待之查從前川援四軍合易佩紳之果健

八營共一萬七千餘眾今既將果健嚮導兩軍裁撤存者不過九千餘人湘果兩軍向稱精銳前次之挫自總兵副參游以至千把陣亡者二百三十餘員銳氣太傷驟難復振果後九營四千餘人近始陸續到巴合臣所募親兵各營統計一萬六七千人以之共當一路則聲勢頗壯而以分作兩路則亦尙嫌其單從前漢中城固防兵不下三萬餘人合之川援名軍數近五萬祇以孤軍遠出一蹶難振今兩載既爲賊踞主客之勢今昔懸殊而漢南各路潰軍均已一律遣散誠不宜更以一路獨進致蹈前日已覆之轍此所爲審顧而遲回者也臣前陳三路進兵之策一由西鄉以趨洋縣一由南通逕搗漢中一由甯羌進規

襄沔自西鄉出者向恃鄂援一軍今梁作楫之凱字營及周有
 全之健捷水師均經該省調回李雲麟毅健一軍又因會剿山
 陽未能尅期抵漢則西鄉一路尙屬無兵由南通出者現有湘
 果桂字各軍而道途險阻米運艱難且慮該逆左右包鈔故暫
 尙宜防而不宜剿臣竊詳度地利熟審兵機惟有仍查前奏親
 率所部及果後九營進紮甯羌徐規剿辦以取建瓴之勢頃據
 周達武飛函馳報南岸之賊忽竄出漆樹壩鐵鎖關距甯羌僅
 數十里想因南路防兵厚集避實擊虛又伺西路之隙等語查
 該逆既趨甯羌自應迎頭截擊且慮中旗與之合股尤宜兼顧
 並籌現已檄飭參將劉鶴齡知縣黃鼎等先率所部千餘人進

紫黎坪以防竄越臣亦卽督率各軍陸續由廣元進發一切進
止機宜容俟到甯羌後規畫陳奏此現籌改駐甯羌徐規勦辦
之情形也至於悉師大舉亦惟仍循前者三路之規查太平城
口一帶前經四川督臣駱秉章調參將唐大有之二千人前往
防堵比又檄飭川東鎮唐友耕添募二千與綏定府知府唐炯
協守計臘底准可到防李雲麟會勦山陽之後計亦不過春初
可由興安進趨石泉一帶該軍到後臣擬咨商駱秉章派撥唐
友耕等四千餘人與李雲麟所部五千餘眾會趨西鄉以圖洋
縣是爲東路進勦之師新調四川藩司江忠濬前在皖省本有
楚勇二千聞將率以入蜀計亦不過正月可到該藩司久歷戎

行頗嫻兵略俟抵蜀後臣擬咨商駱秉章飭令逕赴南通會同

何勝必蕭慶高朱桂秋各軍仍由青石關逕搗漢中是爲南路

進剿之師至臣所調唐星照曾傳道兩軍現經奏請

飭催臣亦派弁回南敦促計亦不出春仲當可募集新軍前赴

臣營卽由甯羌進規襄沔是爲西路進剿之師此三路總於來

春正二兩月先後取齊則三月以內可期大舉倘賴

皇上威福諸軍併力要不過兩三次大戰卽可掃盪逆氛惟城

太南通各軍本以防守川疆爲主若非臣與李雲麟兩軍悉集

計可尅期會師卽亦未宜先撤藩籬其中緩急先後之宜臣總

當與駱秉章統籌熟商而後決策定計事有迹若迂緩而效反

神速者誠不宜見小利急近功兵法所謂巧遲不如拙速皆出於理與勢之自然臣既奉

命督師責無旁貸值此餉項支絀早完一日軍務即可少籌一日餉糈而揆度事勢有不能不堅忍以待時持滿而後發者用敢直陳以紓

聖慮至於賊情變幻日暮改觀臨機應變之方又當隨時酌定非可預期而逆計也至興安一府以石泉爲屏障茶鎮一處又興漢之咽喉知府周有全督帶礮船扼賊下竄石泉縣知縣陸堃聯絡團練並力堵剿均屬著有微勞除周有全一員業經署撫臣張集馨奏保外合無仰懇

天恩可否將升用同知直隸州石泉縣知縣陸塋
賞如知府銜守備蕭祿以都司升用都司銜千總劉發以守備
仍歸湖北補用以示鼓勵之處伏候

聖裁其餘出力員弁紳團容俟擇尤彙案保獎所有楚軍扼守
川疆及漢南各州縣堵剿情形並臣現擬改道甯羌剿辦俟調
集各軍分路大舉各緣由理合恭摺由驛馳奏伏乞

皇太后

皇上聖鑒訓示遵行謹

奏

附請由李京堂單銜奏報軍情疏

正繕摺間接據候補京堂李雲麟咨稱十月二十四日業將山陽縣城克復旋卽親率飛捷營追至竹林關瓦房灘等處去豫境僅百餘里因念西路事急當將商州一帶交總兵藍斯明勦辦李雲麟於二十六日回抵山陽由鎮安所屬之七里峽米糧川取道蜀河前赴興安以圖進剿等語查李雲麟所部毅健及義勝澄漢隴軍合計不過五千餘人獨當東路與賊勢眾寡懸殊臣方慮其兵力過單擬咨商四川督臣駱秉章令川東鎮唐友耕所帶振武軍與之會合惟振武僅止四營其增添之軍尙未募齊驟難出境會師此時李雲麟自未便以孤軍深入查興安以石泉爲門戶茶鎮爲咽喉臣擬咨會李雲麟暫駐石泉茶

鎮扼賊下竄一俟諸軍取齊約期共進以期慎重惟將來川省
援軍分西南兩路進剿則東路更形喫重鄂省前派駐紫興安
之水陸兩軍均經陸續調回現在逆捻張總愚大股既經擊退
應請

敕下湖廣督臣官文湖北撫臣嚴樹森於該省各營抽調一軍
仍駐興安專防該逆回竄鄂省之路以免疎虞而期聚殲再
赴甯羌與李雲麟相距較遠文移往返動須月餘所有東路軍
情應請暫由李雲麟單銜奏報以免遲誤是否有當伏乞

聖鑒飭遵謹

奏

查明漢郡失守情形疏

同治二年十一月二十二日

奏爲遵

旨查明漢中城固失守情形遣散潰卒並將滋事勇丁失律將弁分別參辦恭摺奏祈

聖鑒事竊臣於同治二年十月二十九日在四川巴州營次承准議政王軍機大臣字寄同治二年九月二十日奉

上諭漢中城固失守情形據張集馨所奏何以毛震壽與川將所稟互爲歧異究竟該城是否爲賊所踞漢郡人民曾否潰圍而出盧又能何以開門出走現往何處迅速查明等因欽此查漢南軍務之壞不壞於賊股之多而壞於遊勇之雜漢中城固

之陷不陷於賊蹤之驟至而陷於兵勇之先逃推原其故由於賊股紛集任事者急不暇擇不籌餉源所自出但思添勇以自強餉日絀而勇日增所收者又多游惰奸猾之徒漢中則有副將盧又熊之眾萬餘人及訓導魯炳塏副將徐邦導都司穆懷德護理漢中鎮漢鳳營游擊陳天柱等所部各軍城固則有代理知縣張開鑒所部保捷營已革知州袁昌鵬所部靖逆營及副將王其發白鳳鳴游擊楊發祥都司胡尙瀛等所部奇勝定洋振威定南建威靖南各軍其在青石關一帶與川軍會合進剿者則有知府易佩紳所部果健一軍統計不下三萬餘人各軍名目至二十餘項之多積欠月餉至五六十萬之巨臣受

命之始卽慮將來散勇之難甚於勦賊蓋因勇數太濫而欠餉太多既不可驟繩以法又不能概結以恩則威惠皆窮於用也盧又能自同治元年十一月到漢中後小有斬獲動輒冒功脅賞旋與團民爭鬪擅殺前任山東青城縣在籍知縣高化鵬經城固縣文運熙驗明在案本年二月髮逆分撲該營立卽潰退六月以後在城按戶搜糧居民不堪其擾八月二十日川援各軍挫退護漢中鎮陳天柱登陴痛哭誓眾固守是夜盧又能率眾二千餘人奪門而出居民見賊匪入室猶誤認爲勇丁搜掠之常城遂不守陳天柱被執罵賊不屈而死候補知府署南鄭縣知縣周蕃壽亦全家殉節盧又能行至漢岸無船可渡其黨

四散盧又熊亦不知實在下落此漢中失守盧又熊開門出走之實在情形也城固各軍向惟保捷一軍駐紮城內其餘均紮城外漢中失陷之後零星騎賊漸至知州黃傳紳與在籍候選知縣王佶等議令白鳳鳴所部入城協同守禦而靖逆奇勝兩軍爭搶而入各營無賴之徒藉口無鹽紛赴公局滋鬧奪去局存銀錢隨至當舖捲擄衣物而城外各營亦紛紛入城搜括彼此攘奪均於二十一二三日陸續潰逃有逕投入賊中者賊初至僅四五騎逮二十四日大隊始至此城固失守之實在情形也當賊未入城之先兩城百姓乘亂逃出者甚多惟老弱殘病者多不得出賊亦但以飽掠爲事不甚殘殺當時川將與毛震

壽各據傳聞之說具稟是以彼此歧異伏查川援各軍既經挫退漢中城固勢本難支但賊匪尙未撲城勇丁率先逃散甚至劫掠居民乘機肆搶其行徑與賊無殊實堪痛恨臣以此等兵勇本無敵愾之心徒增地方之害潰逃之後萬不可復加收錄因嚴飭各州縣勿許再畱其有聚集各鄉場地方者亦經派員陸續遣散果健一軍視各軍較爲得力惟其中品類頗雜勇怯相半又欠餉至二十六七萬時復譁譟誼鬧亦有估買掠割之事臣訪聞後知其驟難整頓因檄易佩紳相度事勢緩急分起裁撤量給盤費其次欠餉最多者令其作爲捐項分別多少賞給六七八九品功牌頂戴以慰安之乃易佩紳辦理太驟其營官

胡得和平日不洽勇心開導又不得法致各勇藉詞鼓譟與差
弁周宗健同被戕害易佩紳因所禁法慈院逼近賊巢恐其眾
句結內犯遂於十月十四日拔營前來巴州眾口紛紛以索給
欠餉爲詞臣一面派隊彈壓戢其不逞之志一面傳集該軍各
營官曉以利害責以大義並查出倡首滋事之勇目陳良棟羅
占標等拏獲正法梟示營門又就其中挑出精壯可用者精選
六七百人另立營官管帶其餘三千餘眾悉數分別道路遠近
量給川資遣回本籍於是漢南各軍勇丁一律遣撤完竣竊維
治軍之道以申明紀律爲先馭眾之方以選擇將領爲急將領
非才則兵徒多而不能制紀律不嚴則兵雖強而不可用臣非

不知賊眾我寡正宜厚集兵力而併舉漢南數萬之眾悉去之者亦以軍政久弛士氣日靡勢非一時所能振刷况經屢潰之後動藉欠餉爲詞既難倚爲腹心更慮患生肘腋是以決計遣撤今幸內患既弭軍令稍伸臣乃得壹意籌軍專心討賊惟各將領均有管帶之責既不能固守城池又復任聽勇丁搶掠潰逃不能約束禁阻實屬咎無可辭副將盧又熊情節較重應請旨卽行革職並

敕下陝西四川湖北各省一體嚴拏務獲就地正法以昭炯戒副將徐邦導副將陝西略陽營遊擊王其發副將用四川督標都司白鳳鳴都司穆懷德四川儘先遊擊楊發祥儘先都司浮

圖關汛千總胡尙瀛南鄭縣訓導魯炳塏四川太平縣拔貢賴
春山守備顏作棟張宜華千總童正國已革直隸州知州袁昌
鵬均請

旨一並革職拏問惟代理城固縣候選知縣張開鑒本由原籍
湖南領咨赴京會試行次河南遇捻匪阻隔折由襄樊繞至漢
南適值城固知縣文運熙病勢垂危藩司毛震壽以行營無員
可委權令代理接辦未幾城池遂失情較可原應請革職畱營
以觀後效候補知府易佩紳業經

奏參革職應毋庸議至護理漢中鎮總兵漢鳳營遊擊陳天柱
守義不屈大節凜然應請

旨從優照總兵例賜卹以慰忠魂其餘兩城大小文武各官容
俟查明實在下落再行具

奏再臣訪聞白鳳鳴於城固城外劫奪逃難商民銀兩行至白
家坡地方遇賊被執現在存亡莫卜即使遇害亦不得濫邀
卹典所有遵

旨查明漢中城固失守情形並遣散敗潰勇丁將失律各將領
嚴參懲辦緣由理合恭摺馳奏伏乞

皇太后

皇上聖鑒施行謹

奏

附催調唐星照來陝疏

再臣前次

奏調江西補用總兵袁州協副將唐星照令在衡湘本籍募勇二千來營調遣查該員先經四川督臣駱秉章札調赴川現准駱秉章咨接據該總兵九月來稟稱母老多病懇請在籍侍奉未能遵照募勇入川等情移咨前來查該總兵所稟自係發於至情但漢南軍務喫緊需才孔殷統將尤難其選該總兵受恩深重目擊時艱自應移孝作忠力圖報稱且該總兵兄弟三人現在胞兄唐應聘等在籍侍奉不患無人即使將母情切亦可於漢南肅清之後軍務稍鬆再行乞假省視臣駐巴已近五

旬專俟該總兵等新募生力之軍會合進取用靖賊氛自未便
遽允所請以致延誤事機伏祈

敕下湖南撫臣憚世臨責以大義催速唐星照迅卽遵照前奏
招募成軍兼程來營以備調遣而資攻剿毋得再行推諉更致
耽延臣爲統將需人起見理合附片陳奏伏乞

聖鑒飭遵謹

奏

附陝省武缺就近酌委拔補疏

再漢中城固失守後各營將備多無下落自應確查究辦惟係
軍營所出之缺應請畱於軍營卽就將來尤爲出力人員內揀

選拔補用昭核實而示鼓勵查陝省拔補武職各缺例由陝甘
督臣核補給委現值甘省路途梗塞往返需時請由臣營就近
酌核拔補給委以重營務而免虛懸除咨陝甘督臣暨固原提
臣外謹附片陳明伏乞

聖鑒飭遵謹

奏

劉中丞奏議卷一終

劉中丞奏議卷二目錄

籌辦營田以資戰守疏

附派紳士李宗沆等清查叛產疏

附調楊寶臣來陝差委疏

陝省需材孔亟疏

酌定援軍餉額分任責成疏

附請頒發空白執照疏

謝頒賞
文宗御製詩文集疏

陳勦辦先後事宜疏

附糧運艱難疏

請暫做滇捐以濟軍餉疏

附酌擬增廣條款

收復漢郡城池疏

官軍大破上元觀連克城固洋縣兩城疏

劉中丞奏議卷二

湘鄉劉蓉著

籌辦營田以資戰守疏

同治二年十一月二十二日

奏爲酌擬清查叛產籌辦營田以資戰守而規久遠恭摺先陳大略請

旨飭遵事竊維慮患不嫌於過深立法要期其可久陝省回逆之變蔓延數十州縣生靈荼毒戶口空虛仰賴

聖主德威師武臣力西同境內肅清鳳翔城圍亦解雖有零星小股不難次第剿除惟逆回獷悍性成積釁滋大且土著歷有年所斷難盡絕根株現雖懾於兵威逃竄斂迹而事定之後必

議罷兵誠恐覬覦復生禍機更作若仍重兵久駐又苦籌餉無方溯查古人贍軍之法蓋多講求營田之利如諸葛亮之於漢中鄧艾之於兩淮棗祇之於許下羊祜之於荆襄以及荀羨與石鼈之利嵇煜置懷義之屯要皆兼藉耕種之力以爲頻年戰守之資卽如近今雍正乾隆年間平定苗匪原任大學士臣鄂爾泰總督雲貴奏請以逆苗叛產設立碉屯控制苗頑後逾百年頗臻靖謐近因日久弊生田畝則偷賣兼并屯兵則顧募頂充舊制全失苗患復興然從前經營之難規制之善固慮患之至深而立法之可久者也臣竊謂今日制回之策與制苗同頃據石泉縣知縣陸堃稟稱回逆叛產約計不下數百萬畝請飭

地方官招佃承種並於各紳富捐借以贖產田房作抵等語該令所陳自係爲籌備軍餉起見但連歲兵戈紳富遷徙即使可復故業未必蓄有重資抵借之謀誠恐所得無幾而地方官招佃承種亦苦散漫難稽徒飽胥吏之私無裨軍儲之實臣竊反復籌思惟循先代營田之規兼倣我

朝旗租之制規畫務極精詳庶幾可垂久遠但逆回叛產與逃戶絕業界限必須劃清辦法方有頭緒逃戶暫時招種將來仍可給還逆產概行入公用資官軍口食至於轉當抵押鞫難清冒佔侵欺諸弊疊出清查之法頗費經營非得廉潔明幹之員親歷勘查難保必無侵漏應請

敕下署撫臣張集馨迅速揀派司道大員總司其事分遣得力員紳會同各地方官確實查明回逆滋擾地方叛產絕業共有若干分別村莊畝數詳細註明毋得稍有含混查明之後應如何酌定章程容俟臣等詳悉妥籌再行舉辦既裕贍軍之費乃圖遏亂之方所有籌議清查叛產擬辦營田兼倣旗租之制以資戰守而規久遠緣由謹恭摺附驛具奏伏乞

皇太后

皇上聖鑒訓示飭遵謹

奏

附派紳士李宗沆等清查叛產疏

再清查田畝弊竇易滋以叛產與民田向無畛域之別自逆回滋擾之後不獨回戶逃竄卽漢民亦多流徙欲清查其疆界必諮訪於里鄰由是奸民或相隱匿以共圖侵漁弱民或被強占而無由控訴故假手胥吏不如任用士紳以其情意易通則弊端易祛也伏查前廣東候補道李宗沆老實諳練膽識俱優戶部主事劉餘慶沈毅有爲實心任事該二員皆在陝西本籍情形熟悉鄉望夙孚以之襄辦清查必能通達下情杜絕流弊相應請

旨飭派李宗沆劉餘慶會同地方官將清查叛產籌辦營田各事宜妥爲舉辦除移咨署撫臣張集馨分飭查照外謹附片陳

明伏乞

聖鑒飭遵謹

奏

附調楊寶臣來陝差委疏

再爲政首在得人用人必須責實任事固需才識成務尤在性情以臣見聞所及才識超邁之士已不易求性情真摯之倫尤爲難得如臣所請籌辦營田一事反復累日任此者實難其人蓋非廉潔則擾累必多非嚴毅則侵欺必甚非樸誠自矢則假手胥吏亦不能親歷周勘况當創辦之初必身心俱到而後利弊瞭然必辛苦備嘗而後條理精至此非真有性情念切民瘼

者不能也伏聞前任寶泉局監督降調戶部郎中楊寶臣踐履篤實血性過人有一介不苟之操具百折不回之氣食貧處約而志益堅耐苦習勞而力不倦其於算學尤屬專精若令查辦營田必能認真經理且西北形勢首重秦中圖秦根本必先漢上將來漢中收復誠得如該員者爲之守必能勤撫卹而勸農桑起瘡痍而致殷富臣與該員無一面之識而心折其爲人聞其現住京師合無仰懇

天恩俯准將前任寶泉局監督降調戶部郎中楊寶臣發往陝西交臣差遣委用出自逾格

鴻慈臣爲慎選賢才共濟時艱起見謹附片陳奏伏乞

聖鑒飭遵謹

奏

陝西需材孔急疏

同治二年十一月二十二日

奏爲陝省需材孔亟敬舉所知以備

簡用恭摺奏祈

聖鑒事竊維陝省吏治之廢弛仕風之頹壞早在

聖明洞鑒之中自比歲漢回構禍邑里成墟積白骨如邱山鞠
華屋爲茂草士紳流徙比戶逃亡昔時富饒繁盛之區悉成焦
土揆爲綏定安輯之計端賴賢才而近世士大夫役志紛華縈
情利祿雖其賢者亦不免先私計而後公家厭瘠區而圖樂地

時趨所尚浸已成風陝省情形糜爛至此欲求培養元氣力挽頽風非真有憂

國奉公之忱臥薪嘗膽之志不足以振凋敝而蘇困窮臣自受命撫秦旦夕凜凜既自慙才力之絀亦慮少心志之孚圖報既殷求助彌切而同志之侶實不易得大都德厚者苦乏措施之方則雖念切恫瘝而無以自達其志才優者或無貞固之守則雖侈談康濟而祇以自顧其私求其才德兼優體用賅備者實亦罕見苟得其人不敢不急以進諸

朝廷期備

簡用伏見鹽運使銜山西候補道黃輔辰貴州進士歷官吏部

司員近二十年以道員分發山西上年告假措資回籍道經四
川適聞貴州苗教滋擾廬舍成墟謀歸不遂流寓成都省城其
子翰林院編修黃彭年至行醇篤雖屢經薦辟而志在養親不
求仕祿臣嘗造其寓館見其父子同甘淡泊而畱心時務相與
講求經世有用之學孜孜不倦臣實敬之伏查黃輔辰爲人心
術正大吏事精能其剛方貞潔之操久爲寅僚所共信而綜理
庶務井井有條每與談及時事之艱難生民之休戚詞氣懇切
出於誠悃今雖年逾六十而精力尙強謀慮甚周當此需材孔
亟之時未便任其恬退合無籲懇
夫恩破格錄用可否

簡放來陝以資臂助之處出自

逾格鴻施臣為整飭吏治急需賢才起見是否有當伏乞

皇太后

皇上聖鑒施行謹

奏

酌定援軍餉額分任責成疏 同治二年十一月二十二日

奏為遵

旨籌辦並酌定援軍額餉分任責成以符三省會剿之議恭摺

奏祈

聖鑒事竊臣於同治二年十月十四日在巴州營次承准議政

王軍機大臣字寄同治二年九月初十日奉

上諭前因李雲麟奏請於至漢以後由陝省派員籌備軍餉當經諭令劉蓉張集馨妥辦茲據張集馨奏漢南軍餉糧米已由川省派員採買接濟似可不必另設糧臺及製造等局轉致推諉等語時勢艱難委一員必增一員之費添一局必滋一局之弊張集馨所奏係爲覈實起見尙屬可行卽著劉蓉查照辦理並知會李雲麟以免歧誤等因欽此查川省派兵援陝前經委員在於通南各處採買米石以供諸軍日食其銀兩卽在川省應發各軍月餉項下扣還並非設立糧臺可比而該處米糧稀少須由巴州以下近河一帶採買接濟運道旣已險遠山徑又

復崎嶇每米一石合運腳需銀至十餘兩之多是以前旋辦旋停皆因艱於運費所致近日湘果桂字各軍均因糧盡引退而川省添調之果後九營亦已陸續到齊兵力愈集需米愈多正苦運腳無出臣方與督臣駱秉章往返咨商籌款津貼冀免飢潰之虞似此情形川軍食米尙恐難繼何能供贍他軍且李雲麟軍距川界將及千里所需米糧應就近由興安各屬採買接濟以省轉輸之勞卽將來會師合剿亦有未便概責川省供支之處何者漢南軍務疊奉

諭旨飭令秦楚蜀三省會剿所需軍餉自應由三省會籌臣前在川藩任內曾經詳定川省所派四軍由川省撥餉李雲麟所

部各軍卽由鄂省接濟漢南一軍應由陝省供支業經督臣駱秉章分咨陝西湖北各督撫在案頃據湖廣督臣官文湖北撫臣嚴樹森咨到會奏釐捐各摺彙內稱鄂省月協多隆阿軍餉三萬五千兩李雲麟健毅六營梁作楫凱字五營月需銀三萬餘兩並接濟軍火軍裝合計每歲需銀八十萬兩上下亦既竭盡心力等語川援四軍新挫之後精銳銷亡經臣函商督臣駱秉章請就四軍月餉之內聽臣裁汰募補以資整頓旋准駱秉章覆稱所撥每月八萬之餉雖值艱窘萬分仍應照常接濟昨准咨來覆奏摺彙亦有援陝諸軍之餉每月八萬有奇仍須按時撥解等語是川鄂兩省援軍均係自襄行糧該督撫等體

國公忠毫無畛域之見但使前言克踐臣亦何敢多求現查李雲麟所部健毅六營三千三百人仍由湖北給餉梁作楫之凱字營早經鄂省調防鄖陽而李桓所募之義勝軍月餉虛懸無著臣頃咨商官文嚴樹森等以凱字營既經調回其義勝三旗卽請仍由鄂省給餉以符定議現尙未准咨覆查凱字五營二千五百人義勝三旗僅一千二百人以此易彼月餉不及其半查照官文等原奏月需三萬餘兩之語實屬有減無增想該督撫關懷大局誼切鄰封必不至遽廢前諾惟李雲麟新募之隴軍正後奇右飛捷親兵及澄漢水師等營所需口糧軍火度鄂省力難兼顧前經臣札飭署興安府知府謝向榮無論何項務

須設法接濟然不過暫救目前終非持久之計查興安商州各屬爲鄂秦水陸要衝向來商賈輻輳其間富室亦復不少近值賊蹤竄擾情形自異曩時惟旣駐有重兵則釐金捐輸兩事亦當尙有可辦之處查新授陝安道何丙勳強毅老成升用知府張黻華明敏精細堪以委辦相應請

旨飭令何丙勳督同張黻華馳赴興商一帶將釐捐兩項妥籌舉辦辦有成數隨時撥解李雲麟行營以供隴軍澄漢等營月餉之需至臣所募親兵千名比又添募籐牌手劈山礮手演習一營以爲破擊騎賊之用前經陸續札調袁州協副將唐星照知府銜候選直隸州曾傳道等由南募勇四五千名約於臘底

春初均可齊集所需月餉軍火約計在四萬五千兩以外雖經
臣設法勸捐竭力籌畫究之望梅止渴卒無確實可靠之款晝
夜籌慮焦灼如焚應請

敕下湖廣督臣官文湖北撫臣嚴樹森四川督臣駱秉章按照
該督撫自行奏定月餉六萬八萬之數隨時撥濟該省派撥各
軍勿使稍有缺乏並

飭署撫臣張集馨督率藩司迅速籌款每月撥銀二萬兩解赴
臣營餘卽由臣自行籌辦庶期餉有定額責有專司用符三省
會勦之議臣亦得以速規進取仰慰

宵旰塵念之勤所有遵

旨籌辦並請酌定餉額分任責成緣由理合恭摺由驛具奏伏

乞

皇太后

皇上聖鑒訓示施行謹

奏

附請頒發空白執照疏

再臣前疏陳籌備秦餉之法業蒙

聖慈俯念臣軍窘乏分飭照辦在案近接四川督臣及司道來函均稱去秋八月以後淮漕上運楚岸滯銷川省鹽務漸就疲敝所議抽收井竈鹽釐此時驟難舉辦等語至於山陝捐輸爲

數亦屬寥寥鄂省貨釐陝捐兩項疊准該督撫來咨均謂無從設法山西勸捐能否辦有成數亦未可定漢南軍事方殷餉源已竭臣所募一軍將成坐困之勢實懷飢潰之虞查陝西辦理米捐減成折收章程經前撫臣瑛榮奏奉

諭旨飭部議准臣擬遵照定章就近於四川各府屬繁富之區選派員紳勸諭商富量力輸助或可隨時運籌藉資接濟查川省比歲派辦捐輸業經一律完竣臣今倣照新章勸辦於川省初無窒礙之處而督臣駱秉章深悉臣軍匱乏情形關懷尤切必能分飭地方守令不致掣肘阻撓相應請

旨敕下戶部國子監頒發空白從九職銜照三千張並配搭各

色職銜照封典照共三千張五品六品七品八品及從未各色
實官職照共二千張貢監照共三千套由驛遞交臣行營俾得
隨地設局廣爲勸捐稍裕兵食庶期藉收飽騰之效謹附片陳
奏伏乞

聖鑒施行謹

奏

謝頒賞

文宗御製詩文集疏

同治二年十一月二十

奏爲恭謝

天恩仰祈

聖鑒事竊

臣於同治二年十月初一日在巴州營次接准兵部

咨開同治二年七月二十九日據軍機處片交奉

旨頒發

文宗顯皇帝御製詩文全集由驛遞到臣營當卽恭設香案望

闕叩頭謝

恩祇領竊以道隆皇古炳羲畫以垂經運啟中天紹堯文而出
治自昔丕顯丕承之謨烈端賴善繼善述之績成洪維

文宗顯皇帝勅齊秉哲

抱蜀澄心

治無曠於萬幾

學尤精於六藝推本

彝訓發爲

文章

御極而

念切祇承

履端而

箴先持敬

序

聖訓則典謨千古飭臣工則吁咈一廷

褒答直言邁文景求言之詔

嚴恭修己有禹湯罪己之詞

聖訓發爲文章御極而念切祇承履端而箴先持敬序

臨雍而義析中和鴻都化洽講席而
論宣德禮

虎觀儀隆至於

喜雨喜晴莫非

寅畏之意

書事書戒悉本

辛勤之懷

發號施令罔不藏文之至者化民成俗必由學

業莫隆焉欽惟我

皇上光昭

嗣服

學懋

紹衣是訓是行溯

敷言於有極之綱之紀監

成憲以無愆爰

命儒臣敬謹編次共成十卷永式萬年魏乎煥乎唐虞之際斯

為盛

作者

述者詩書所稱何以加臣起自草茅未窺

祕笈屆茲運會同荷

榮頒持誦迴環倍增兢惕懍

訓飭因循之諭益心矢夫靖共讀

開誠痛戒之章如面聆夫

教誨惟恪遵

先皇謨誥用勵愚頑庶仰答

聖主鴻慈稍圖報稱所有

微臣感激下忱謹繕摺恭謝

天恩伏乞

皇太后

皇上聖鑒謹

奏

陳勦辦先後事宜疏

同治二年十二月二十四日

奏爲官軍進紮甯羌謹將勦辦先後事宜恭摺由驛馳奏仰祈
聖鑒事竊臣前在巴州業將漢南賊勢情形及現擬改趨甯羌
徐規進勦緣由馳奏在案旋於廣元營次接奉十一月初三日
上諭漢中賊勢極爲猖獗劉蓉當剋日進勦並知照多隆阿撥
兵合擊會商勦辦以期早日殄除不得再有遲誤等因又奉初

八日

上諭漢南賊勢如此彼猖劉蓉何以尙無入陝消息著卽恪遵
疊次寄諭星速前進扼紮青石關一帶一面牽制賊勢一面知
會李雲麟兩路進兵次第恢復被陷郡縣方爲不負委任至川

北防務駱秉章業已預爲布置諒可無虞劉蓉身爲陝撫責有攸歸豈得專顧川邊置陝事緩急於不顧等因欽此跪誦之下仰見我

皇上軫念秦疆急圖掃盪之意臣自受

命撫秦旣歷數月尙未遣一旅之師進搗漢南坐視逆匪猖獗不惟無以對

朝廷抑且無以謝百姓而

詔旨寬容未加譴責默自省循尤增愧悚顧臣前所以未能遽進者適值援師敗潰之餘賊勢乍張不能不先以固守川疆爲急而添製軍械籌備糧運遣散潰卒裁汰孱兵事事經營日不

暇給今漢南防城之三萬餘眾既遣撤而無存湖湘之新募四千餘人尙迂滯而未集雖陸續增募親兵迄今不滿二千其所恃以進剿之師卽係川省防堵之師軍火餉糈無一不資於蜀如不圖固川防致使逆氛闌入則援軍既須回顧餉項無可轉輸漢南軍事益復無從措手數月以來所以勞慮焦心與四川督臣駱秉章往復熟商期以固川爲圖陝之計良以陝省既無可抽之兵又無可籌之餉事事仰給於川不能不委曲以求濟此則微臣黽勉從事之苦心不得不婉陳於

聖主之前者也今幸各路防兵布置已定各軍營務整頓粗完臣得專意進兵已飭果後親兵各營進紮甯羌臣亦督催糧運

即日進發頃接探報漢郡各賊方事修葺城垣其油房街黃沙驛新集一帶亦皆添造木城自係聞大兵改由西路進剿亟爲負隅抗拒之計中旗與曹逆圍攻秦州未得逞志復竄踞略陽之郭家壩等處我師進趨漢南實慮該逆伺我後路查此賊徘徊襄沔略陽之間窺蜀竄隴幾及一年久爲三省邊防之患近與曹逆聯結其黨愈多臣現會商建昌鎮總兵周達武派兵併力夾擊期先將此股剿滅以免後顧之慮幸而一鼓殲除則昭廣一帶防兵亦可撤赴漢南以厚兵力此現籌辦先後之宜也漢南賊勢如毛號稱三十餘萬臣所部各營合計僅逾萬人用少擊眾雖矢志於聚殲亦須防其旁竄前籌三路進兵之策

祇及西南東路而未及北路者以多隆阿軍聲甚壯克復蓋屋
之後必能遵

旨派兵逕趨畱壩該逆亦必不敢北竄也現據探報該將軍所
部各軍已由鳳翔逕趨汧隴李雲麟一軍因商州情形緊急奉
旨責令東追是東北兩路均已空虛臣以孤軍獨進眾寡懸殊
該逆無所牽制勢將糾合羣賊併力抗拒臣即使勦辦得手非北
趨腹地臣即東走興安臣所部兵力不敷萬難兼顧應請

敕下西安將軍多隆阿迅即遵

旨派撥曹克忠一軍前赴畱壩會師合剿以收兩路夾擊之效
並

飭李雲麟於商州解圍之後仍卽折回茶鎮以資堵截而防竄
逸所有官軍進劄甯羌現籌勦辦先後事宜理合恭摺由驛馳
奏是否有當伏乞

皇太后

皇上聖鑒訓示施行謹

奏

附糧運艱難疏

再軍行必先籌糧人情急於謀食餉項偶乏已覺難於支撐米
粟不充必立見其誨潰故聖門論政足食在足兵之先而去食
在去兵之後臣自早歲從戎經歷數省勞辛艱苦亦旣備嘗而

糧食之艱從未有如川北一路之甚者乃知漢臣諸葛亮統師北伐屢以糧盡引還地勢使然今古一轍查川北城太通南昭廣江平各廳縣荒山瘠土穀產不饒本年秋潦歉收民已艱食通南一帶山高徑仄每夫一名僅能負市斗米二斗由縣城達西河口等處防所遠者六七百里近者亦四五百里巴州產米較多由巴至南計水程三百餘里河狹灘高每船一隻裝米不過二三十石時須盤灘起載且係逆流挽運約十餘日始能趕到廣元一帶河道行船較大山路亦覺稍寬而武字定武長勝各軍駐防經年不獨廣元米糧搜買一空卽附近昭劍等處亦已無可採辦勢須由重慶順慶保甯各屬收買計水程遠者千四

五百里近者千里七八百里不等自朝天關達甯羌州陸程尙
百四十里沿途添設短站節節轉運統計每米一石運腳至十
餘兩之多米價應由勇丁月餉扣還而運費則苦於無著臣前
在川藩任內詳請督臣駱秉章委員於南通各縣採運厥後屢
辦屢停皆因艱於運費所致然軍士從征日久斷難枵腹荷戈
約計防剿各軍除駐防城太之振武軍由署綏定府知府唐炯
自行籌辦接濟外其通南廣元各路連兵勇長夫合計日需市
斗米一百六七十石漢南各屬悉被賊擾米糧毫無可籌均應
由川採運接濟兵家所謂千里齎糧士不宿飽一有缺乏飢譟
堪虞臣與駱秉章往返函商通籌熟計不得不籌墊運腳以卹

軍士而利遄征該督臣體

國公忠署藩司啟芳等亦深顧大局現先由司庫籌墊運腳銀八萬兩飭委成綿龍茂道鍾峻出省督辦該道才識明練極耐艱辛趕赴順保各屬責成地方官分途採辦酌量道路遠近按月分解辦理已有頭緒查糧臺出力人員前准部議不許越級保升奉

旨遵行自係慎重核實之意惟川省此次辦理米糧萬分喫力該委員及地方官紳設法轉運共濟時艱實非尋常糧臺出力可比合無籲懇

天恩俯念軍米緊要將來漢南事竣該委員及各州縣官紳採

運接濟無誤軍行可否由臣會同四川督臣駱秉章擇尤酌保
用示獎勵而昭激勸之處出自逾格
鴻慈所有米運艱難由川省派委大員督辦緣由理合附片由
驛具

奏伏乞

皇太后

皇上聖鑒飭遵謹

奏

請暫做滇捐以濟軍餉疏

同治二年十二月二十四日

奏爲軍餉萬分難籌現擬做照滇省暫開捐例並酌擬增廣條

款恭摺奏乞

天恩俯准先行試辦以濟急需事竊查漢南逆燄之張援軍餉
精之匱業經臣疊次陳奏非大軍分途進搗無以策全功非精
項寬籌有餘無以厚兵力計臣所新募楚勇來春當可到齊而
所陳籌備秦餉之法亦既屢更其端卒無可靠之款如川省井
竈之釐鄂省山陝之捐既皆格於時勢卽昨所請陝省米捐減
成章程就川舉辦一層現准四川督臣駱秉章咨稱川省擬於
明年再辦捐輸一次恐陝捐礙難並行等語臣前疏期於來春
二三兩月大舉破賊今餉項匱竭絕無一綫可恃之源將藉何
項以贍軍用何術以克敵晝夜焦灼無計可施且陝南遍地賊

氛粒米無從摻括川北各屬產穀殊少現值援師漸集錢米兩價翔貴異常兵勇月領餉銀因此益形折耗各軍坐困已無宿飽之期若再懸欠月糈何能驅以赴敵是需餉之急未有甚於此時者矣陝南財賦之地既付劫灰鄰封協濟之謀又成畫餅即使肅清漢郡淨掃逆氛而西同鳳各府菁華早被逆回蹂躪人民逃散土田荒蕪雖多方招徠撫綏尙恐未能復業竊推朝廷憫恤災黎之意卽比年維正之供尙應議緩議蠲安忍於鋒鏑溝壑之餘再加朘削更事誅求以戕元氣而殘民命然而養兵之費日引月長束手仰屋何從取辦是籌餉之艱又未有甚於此時者矣伏查滇南一省僻在邊隅自漢回互鬪以來庫

款告罄尙荷

皇仁准其暫開捐例以濟時艱而紓民力矧關中形勝之地屏蔽中原拱衛

神京宜圖固於苞桑庶永安於磐石值茲戎事孔棘需餉尤繁倘不先事綢繆通融籌畫萬一貽誤大局雖悔何追竊維釐金必待商賈流通捐輸尤須閭閻殷富今陝省情形如此不但凋敝之區無從舉辦卽稍爲完善之處究亦不無徵索之煩計惟暫開捐例稍可補苴謹採訪輿論酌量變通隱以鼓舞羣情冀其聞風踊躍於以廣登進之路卽以遂報效之忱人樂輸將非同抑勒合無籲懇

皇上天恩俯准做照雲南章程暫開捐例並酌增推廣條款另繕清單皆於仕途及京局無礙而於陝省軍餉有裨伏乞

敕部議准庶幾銖積寸累藉資士飽馬騰臣當此亟謀進兵艱於籌款之時實有左支右絀迫不能待之勢若候

命下然後遵行誠恐收捐濡滯緩不濟急是以不揣冒昧一面繕摺具

奏一面遴派妥員分駐川省之保甯湖北之荊州山西之蒲州設局試行庶使各省及各路軍營報捐人員各就近便易於上免以期暫繫軍心果能源源而來當可稍裕兵食再此次實因陝餉無出鄰封難期協濟不得已而爲此謀應請

敕下各省不得援以收捐俾得專濟陝餉一俟稍覺寬裕仍卽
奏請停止以示限制至所酌增條款倘可通行無礙俟陝捐截
止或請歸併捐銅局辦理於

國帑不無微補臣爲軍餉萬分難籌所有請照滇省暫開捐例
並增廣條款先行試辦緣由謹繕摺附驛具

奏伏乞

皇太后

皇上聖鑒訓示施行謹

奏

附酌擬增廣條款

謹將酌增條例恭繕清單敬呈

御覽

計開

一被兵省分士子有遷徙他省者或因本省停科或因道路梗阻不能回籍鄉試雖可加捐貢監赴順天歸皿字號應試每因道途遼遠資斧艱難不能往赴北闈卽謂本省軍務平定原可補行鄉試而懷才抱器者不能及時觀光未免向隅擬請凡流寓士子無論何省如有願在流寓省分就近應試者分別恩拔歲副貢生均照捐貢常例加倍呈交實銀係廩增附監均照捐監常例加倍呈交實銀赴陝餉局交納發給貢監執照於照內

註明准其在流寓省分應試其籍貫仍填原省並取具其流寓
省分服官之同鄉官印結聲明並無冒名假託匿喪情弊並執
照齋赴學院衙門呈請驗明錄科如在十名以外卽准入場做
照順天鄉試皿字號另編字號取中一名三十名以外取中二
名五十名以外取中三名如流寓省分現有父兄服官者仍應
迴避准其赴鄰近省分考試一俟本省軍務平定道路疎通卽
將此照註銷仍回原籍應試如此變通辦理既不占流寓省分
原額而該士子等得以隨地觀光藉抒抱負是於捐例之中仍
寓嘉惠士林之意

一坐補原缺人員原定章程必須引

見後方准坐補查州縣以上等官從前分發或補缺之初曾經引

見嗣或俸滿亦經赴部迨後告病開缺尙未回籍卽醫治痊愈經本省督撫驗明奏請起用定例必須引

見者原以視其人之是否尙堪起用也第此項人員有補缺時曾經引

見者有甫由俸滿等事赴部者今病痊旣經本省督撫驗看屬實如必須奔走道途似不足以示體卹擬請嗣後甫經告病旋即病痊人員經督撫驗明堪以起用其缺尙未序補有人飭令仍回本任准其捐免引

見州縣繳銀二千兩同知直隸州繳銀二千五百兩知府繳銀三千兩均赴陝局交納實銀准其免于引

見坐補原缺如其缺已開另補有人減半交銀亦准免其引
見俟坐補原缺仍前後接算歷俸已滿十年八年照例送部引
見以重地方而符定例

一補授實缺人員有赴部引

見時捐升改捐者有甫經補缺卽行捐升改捐者將來到省卽以現捐之官補用此項人員甫經實補卽謀另捐其中或因地方僻陋或因地方現爲賊擾藉捐升改捐爲巧避之途擬請嗣後甫經補授實缺人員如未經到任之先加捐改捐均將請捐

離任銀數照正項酌加三倍始准離任以就現捐之職而杜規避

一分發軍務省分人員不准改捐無軍務省分查道府有表率之責自不應准其隨意改捐至州縣佐貳佐雜等官長於治理而不嫻於軍務者用非所長轉覺無以自効擬請各省分發州縣以下人員未經奉有辦理差使准其改捐無軍務省分照尋常改省例加倍交銀其未經領憑赴省者此項銀兩仍赴部交納業經領憑到省卽赴陝餉局交收

一軍功候補人員向歸候補班酌量補用軍興以來此項人員較多補缺已形壅塞擬請照各項班次捐本班前銀數交納准

其歸候補班前補用

一奉

旨補缺後記名請簡人員新定章程不准報捐免補本班原以杜取巧而防躁進惟查未經記名人員如候補試用同知直隸州知府等官向例准其加捐升階一經捐陞卽歸現捐之官補用如保歸記名之員不准報捐免補本班必俟其補本班缺後方准記名請簡設使本班補缺無期是徒有記名之名較與未經記名之候補試用人員尙得加捐升階者轉增周折擬請嗣後奉

旨補缺後記名請簡各項人員均准其按照保升官階三班銀

兩加倍交足實銀卽准其免補本班以所保記名升階補用仍俟其到省一年後始准進單請簡如此變通辦理似於勞績人員有所鼓勵不致有躁進取巧之弊

一新定章程非克復城池斬擒逆要不准請保免補免選及候補班查文員帶隊打仗各路軍營不乏其人其衝鋒冒險實與武弁無異惟克復城池固屬罕遇其有雖未斬擒逆要而屢次帶隊殺賊甚多戰功卓著如不准其免補免選則此後立功無可獎勵似未足以鼓舞士心擬請嗣後如有文員實係屢次躬冒矢石帶隊殺賊多名查有實據其中雖無逆要仍准核實請保免補免選暨候補班並令該員照保升官階交足三班銀兩

即准其免補免選本班以所保升階補用如係保候補班者照分發三成交銀准歸候補班補用此項銀兩俟赴陝餉局交納後由陝局具詳咨照吏部再行核准不得在各省及各路軍營呈繳以免往返撥解轉致耽延仍於陝餉有名無實

一管理局務暨糧臺軍營文案新定章程不准請保翎支原以杜冒濫而重異數惟軍書旁午支放紛紜非敏幹之才鮮能勝任其襄理軍事履險相隨與身在行閒者同一勞瘁擬請嗣後管理局務暨糧臺軍營又案人員已歷二三年之久辦事妥協如有保舉花翎藍翎准其照尋常外省官員報捐翎支之例酌減六成交銀給與陝餉局實收彙案咨部准予

賞戴以昭激勸

收復漢郡城池疏

同治三年正月二十日

奏爲官軍躡中旗逆匪分路進兵迭獲勝捷乘勢收復漢郡
城池旋將中旗中後兩隊破斬過半恭摺由驛馳奏仰祈
聖鑒事竊臣率師改由廣元進紮甯羌規取褒沔擬先剿中旗
股匪以靖後路業經恭摺馳奏在案旋於臘月二十六七日接
據各營稟報中旗逆匪已由郭家壩竄擾略陽逕趨甯羌屬之
戴家壩意圖逕撲陽平關以犯川疆當經臣飛飭總理果後營
營務升用知府劉嶽曙及建昌鎮總兵周達武候選知縣曾紀
鳳等派兵分布燕子礪舒家壩各處並設伏於陽平關左右俟

其到關而掩擊之二十九日該逆率眾行至朱家埡遙見我軍
旗幟駭而卻走我軍整隊尾追該逆旋即折回戴家壩竄赴大
安驛烈金壩一帶正月初二日我軍追及該逆不敢接戰望風
狂走僅截獲其尾隊三名餘悉竄向胡家壩蹤跡颯忽周達武
曾紀鳳等遂各收隊而還初三日竄至元壩子初四日竄至廣
元屬之梨坪查梨坪爲入川要衝經臣派撥果毅彝字兩營駐
紮防守旋慮其兵少力薄添派候補府經歷張星管帶所部長
字營前往協守不意張星逗遛不前果毅彝字兩營又分紮燕
子巖紅山兩處兵力太單該逆大隊掩至正在派隊堵剿賊隊
已由紅山右面山梁直上山頂鈔出果毅營之後守備鄧洪超

等力不能支營壘被撲陣亡兵勇三十餘人管帶彝字營候選
知縣黃鼎督勇力戰始克收隊臣聞信後當卽自派親兵四營
英毅軍三營飭總理營務戴炳奎帶赴旺蒼壩星馳扼截該逆
偵知大兵已集旋即退走黃官嶺紅廟塘一帶先是臣接四品
京堂李雲麟臘月二十六日來咨稱得賊中間謀訶知該逆聞
我軍三路會剿之謀意甚恟懼並聞李雲麟已抵石泉臣軍已
抵甯羌大兵陸續雲集諸逆酋會同計商分作兩路下竄連日
辦備乾糧口袋火把各件刻期同走等語臣當卽飛飭駐紮西
河口之湘果兩軍何勝必蕭慶高等迅由青石關出師一面嚴
防中旗偷竄一面派隊逕搗漢中又札飭駐防城太之參將唐

大有率所部振武軍隨同李雲麟進擊西鄉並飛咨西安將軍
多隆阿分撥勁旅迅由甯陝廳截出以遏奔衝而收前後夾擊
之效初四五六等日沔縣褒城畱壩之賊已陸續移入漢中何
勝必蕭慶高督率各軍冒雪越嶺分派副將蕭德揚毛尙陞遊
擊李遂勝總兵鍾玉勝蕭餘勝等由闡天坡進剿法慈院副將
劉厚基蕭舉臣總兵譚獻定參將彭基秀等由梅子壩直趨新
集場總兵曾克勝唐友勝副將毛芳恆周東興同知直隸州蕭
德綱等由石鼓坪鄭家坪兩路直搗牟家壩何勝必蕭慶高各
率親兵與總理營務卽選訓導劉占鼈卽選府經歷柳良材等
分起督率隨後策應初十日蕭德揚等率師直薄法慈院該逆

不意風雪中官兵驟至倉皇失措我軍乘勢撲入斃賊四五百
人生擒數十名奪獲騾馬數十匹救出被擄男婦三百餘人餘
賊奪路狂奔十一日午刻曾克勝等已抵牟家壩該逆偵知法
慈院業已攻破先自惶亂各將領冒雪猛撲該逆拌死抵拒我
軍愈進愈猛賊勢不支當被殲斃千餘人生擒二百餘人救出
難民男婦三百餘人奪獲騾馬器械甚多於是各軍乘勝賈勇
逕趨油房街蕭德揚等亦率師由右路來會諸軍併力氣勢愈
張當卽衝入賊巢立將諸壘踏平斬馘千計撲水落河者又二
千餘人生擒四百餘人何勝必蕭慶高等以旣破油房街則漢
郡唾手可得當卽麾令諸軍涉淺渡河而派赴新集之劉厚基

等亦已將該處賊壘踏破遙見油房街火起卽從上游渡江四路齊進直薄城根維時該逆頭隊業已竄動後隊踞城者已無固志又值官軍四集彼此不復相顧副將楊德勝總兵唐友勝等由南關奪門而入何勝必蕭慶高與署漢中府知府楊光澍營務處劉占鰲柳良材等隨卽麾眾入城四路掩擊搽斬千餘人生擒八百餘人救出難民千餘口當將城池收復餘賊均向東北兩門循山奔逸時已初更候矣次日黎明隨派蕭德揚蕭餘勝毛尙陞李遂勝等追躡下竄之賊適接探報中旗前隊業已竄往城固與僞啟王陳得才合股其中隊逆匪正在黃官嶺紅廟塘一帶往來游弋於是何勝必蕭慶高各派三營前赴法

慈院牟家壩迎頭截擊又各派馬步三營一由高家嶺兜剿一由黃官嶺紅廟塘一帶壓擊十四日辰刻蕭德揚蕭餘勝等馳抵仰天窩李家溝果見賊眾萬餘由紅廟塘竄來我軍卽由山梁壓下該逆揮戈抗拒鏖戰一時之久殺斃紅衣騎賊千餘人老賊三百餘人賊始紛紛下奔何勝必等督隊行至牟家壩正在涉淺渡河適值該逆敗竄前來隨卽麾隊截擊斃賊二千餘人生擒僞檢點陳東海焦有秋等老賊五十餘名救出裏脅男婦八百餘口奪獲鎗礮三百餘件騾馬三十餘匹餘賊拌命奔赴兩河口適遇馬隊總兵曾克勝唐友勝等由高家嶺擺隊而來該逆腹背受敵驚惶無計我軍兩路夾擊又斃賊千餘人撲

河死者尤多餘賊折向法慈院一帶狂竄我軍盡力追擊沿途
斬馘屍骸枕藉該逆不遑喘息悉向下游遁去何勝必蕭慶高
等仍率所部於十五日跟蹤追剿誓將此股殲除其尾隊方在
朱壩攻撲銅寨果後營副將蕭品元胡致琪參將李志高李連
勝等在袁家河聞信卽分隊繞路進剿行近朱壩里許該逆分
股迎敵各營奮力前擊鎗礮環施擒斬百餘人奪馬四匹餘悉
拌命狂奔各營尾躡其後十四日及之於木家壩該逆慌亂紛
逃我軍兩路夾擊乘勢掩殺斃賊約數百名奪獲馬十餘匹旗
幟器械甚多餘黨四散連日搜斬殆盡現在大軍悉由漢中進
趨城固期節節掃盪而前惟聞髮逆頭隊業已下竄石泉漢陰

一帶興安以下苦無攔截之師前經臣疊次咨商湖廣督臣官文湖北撫臣嚴樹森派兵嚴防此路頃聞該逆有東竄之意又由八百里飛咨該督撫迅派勁旅嚴堵鄖襄並咨河南撫臣張之萬嚴扼商雒邊界但冀鄂豫兩省均有迎頭截擊之師使該逆不能遽爾前進臣與李雲麟督率各軍躡之於後當可悉數破滅所慮糧運艱難賊蹤颺疾各有鞭長莫及之勢則徒深焦憤而無如何耳此次各將領冒雪衝鋒收復郡城斬馘甚眾實屬著有微勞已革保升提督甘肅肅州鎮總兵何勝必已革保升提督蕭慶高督隊疾馳深知愧奮應請先沛恩施開復原官仍交軍機處記名遇有提督缺出請

旨簡放其餘出力文武員弁請由臣查悉核實會同四川督臣駱秉章分別奏請

獎勵以昭激勸四川候補府經歷張星違臣調度逗遛不前致有槩坪之失應請

旨卽行革職以示懲創守備鄧洪超疎於防範應請革職畱營以觀後效至漢中各城殉難人員現飭署漢中府知府楊光澍收殮遺骸妥爲安厝一面招集流亡加意撫卹其各文武存亡下落容俟詳悉查明分別辦理所有官軍躡勦中旗逆匪分路進兵乘勢收復漢郡各緣由理合會同四川督臣駱秉章恭摺由驛馳奏伏乞

皇上聖鑒訓示謹

奏

官軍大破上元觀連克城固洋縣兩城疏

同治三年正月二十七日

奏爲官軍大破上元觀賊壘連克城固洋縣兩城現籌分路進剿恭摺由驛馳奏仰祈

聖鑒事竊臣前在大安驛業將官軍躡剿中旗股匪乘勢收復漢郡城池旋將中旗破斬過半及我軍乘勝追剿情形恭摺奏報在案旋據蕭慶高何勝必等稟稱十五日寅刻追至二郎壩該逆尾隊正在起行我軍疾馳及之殺斃五六百人生擒一百三十餘人奪獲鎗礮刀矛旗幟三百餘件餘賊分兩路狂奔一

向盤壩一趨上元觀我軍亦分兩路追之會馬隊自娘娘廟過河繞出賊前截殺千餘人其竄盤壩者經代理城固縣知縣張開鑿帶團埋伏寡婦橋太王廟一帶該逆竄入伏中張開鑿施放號礮伏兵四起殺斃數百名生擒十餘人餘悉狂奔上元觀查上元觀爲偽啟王陳得才黨與盤踞之地外列壁壘十餘座麇聚逆眾甚多該逆旣與竄合氣燄甚張何勝必等偵知情形於十六日黎明將所部分四路前進先令前隊誘敵而親率勁旅及先鋒馬隊設伏於林木深處我軍旣進該逆亦卽分隊來迎兩陣對擊約逾半時之久各前隊佯爲退卻賊果蜂擁撲來旣近樹林伏兵突出四面兜擊斃賊極多該逆紛紛敗潰我軍

乘勝截殺又斃千餘人趁勢猛撲賊壘拋擲火蛋當將諸壘概行焚燬斬馘三千餘級生擒四百餘人其餘多向城固逃竄救出難民男婦二千三百餘口奪獲米糧甚多我軍連日追勦冒雪忍飢至是始獲一飽此十六日大破上元觀賊巢之實在情形也城固地勢遼闊該逆先將橋梁折毀無船可渡何勝必等督飭各營趕於上游搭造浮橋連十八日酉刻工竣適劉嶽曙飭派果後九營亦於是日行抵柳良鋪與湘果兩營隔河而營當卽商定於薄暮發隊分南北兩岸前進蕭慶高帶領總兵會克勝副將毛尙陞蕭德揚劉厚基蕭舉臣並城固縣知縣張開鑒等由浮橋渡河以攻其西何勝必帶領總兵唐友勝蕭餘勝

譚獻定副將周東興毛芳恆等由上游浮橋渡過北岸沿河而下以攻其南而飭同知蕭德綱總兵鍾玉勝副將楊得勝參將彭基秀等伏於城固下游迎截東南兩路竄匪劉嶽曙亦分派總兵劉維耕副將蕭品元李盛貴胡致琪參將謝景春李用敬李志高李連陞遊擊鄒三元劉節高等由賈斗二山分攻東北兩門派撥既定約於初更偃旗息鼓併力前進直抵城外賊壘該逆不意我軍驟至意頗驚惶我軍奮力攻撲一湧而進施放火箭噴筒當將附城一帶賊壘延燒該逆冒煙突火不敢入城悉向河邊南岸繞竄東下蕭慶高等督隊掩擊斃賊約四百名各軍直逼城根奮力攻打城上礮石雨下頗有傷亡力戰不退

四更向盡何勝必等激勵諸軍誓以必克各弁勇奮不顧身扛梯爬城呼聲動地城中百姓亦大呼應之我軍趁勢搶上城堞賊眾驚惶或跪伏乞降或拌命奔走各營陸續畢登四圍鈔殺約斃賊三千餘名生擒千餘名奪獲偽印六顆騾馬一百四十餘匹鎗礮刀矛之類無算救出難民四千餘口餘賊紛紛向東門奔竄當被派由南岸進剿之四營隔河截住該逆改竄東路又值派伏北岸之隊沿河截擊盡力窮追旋由潛水鋪涉淺渡河立將賊隊衝散遺棄軍械甚多沿途斬馘屍骸枕藉直追至捷順橋七里鋪天色大明始行收隊此十八夜克復城固縣城之實在情形也洋縣爲藍逆竊踞已逾二年逮藍朝柱竄往盩

屋畱其黨僞都統黃楊潘李諸逆目踞守旋與髮逆構隙互相
攻擊死傷萬計去歲冬臘兩月髮逆糾黨十餘萬掘地道晝夜
環攻歷六七旬卒不能克蕭慶高何勝必等既復城固卽飭所
部就下游趕搭浮橋分南北兩岸並進臣亦添派營務處戴炳
奎率親兵英毅各營前往助剿二十一日浮橋搭就卽於是夜
三更派曾克勝蕭德揚蕭德經蕭德綱李遠勝鍾玉勝彭基秀
等各率所部由南岸遠道設伏以防該逆突竄西鄉之路蕭慶
高帶領劉占鼇毛尙陞楊得勝劉厚基蕭舉臣等何勝必帶領
柳良材唐友勝蕭餘勝周東興毛芳恆譚獻定等戴炳奎帶領
李萃林黃宗信王謨劉玉興蕭祥勝王九齡等均由城固東下

專攻北岸一路二十二日卯刻各軍馳抵洋縣數里該逆方開城貿易因見官軍突至收眾入城閉關堅拒我軍四面環攻該逆亦悉眾登陴開礮轟擊相持三時之久未能得手何勝必等以其城堅礮利知不可以力取也遂飭各營作速收隊退紮距城二十餘里之捷順橋一帶而密派各營精細勇丁帶同素與賊營貿易之鄉民扮作販賣煙泥油鹽等物前赴洋城發賣該逆自以髮逆大隊猛攻數月未克之城見官軍不逾萬人意頗易之又見我軍已退不復設備開城往來貿易如故黃昏以後各勇丁混入城中密約四更復舉火爲號何勝必等密飭各將領銜枚疾趨分東南北三路而進既抵城根時甫三鼓各營潛

就憩息逮四更吹笳鳴號在城各勇舉火應之各營壯士梯上
城堞喊殺之聲四路並作該逆謂我軍已盡入城自相踐踏各
軍四圍擒斬屍骸山積餘賊竄出東門我軍乘勝跟追南岸諸
營亦渡水截擊追殺二十餘里殘賊不滿二千悉向華陽一帶
竄去是役斃賊四千餘人救出難民五千餘口奪獲偽印九顆
騾馬八十餘匹鎗礮刀矛旗幟無數米糧多至萬石遠近飢民
笈負囊挑紛紛而集各將領見皆鵠面鳩形不忍阻止頃刻而
盡此二十二夜克復洋縣之實在情形也比探城固敗竄之賊
多趨西鄉一帶業飭蕭慶高何勝必等會同果後九營跟蹤躡
剿藍逆餘黨既竄華陽勢將逕趨盩厔以圖合併又探曹燦章

一股頃在鳳縣所屬黃牛鋪一帶被陶茂林擊敗亦竄郿縣臣現飭派親兵英毅各營前往剿辦免使該逆勾結又復蔓延惟興安以下文報久梗迄未得其實在消慰容俟探悉情形相機辦理此次諸軍晝夜奔馳不避艱險五六日內連克堅城實屬異常出力而湘果兩軍奮勇先驅勞績尤著應請先沛恩施以示鼓勵總兵銜湖南補用副將蕭德揚毛尙陞總兵銜四川補用副將劉厚基蕭舉臣升用總兵唐友勝總兵銜儘先副將毛芳恆四川儘先卽補總兵曾克勝湖南卽補副將楊得勝等八員均請交軍機處記名遇有總兵缺出請旨簡放毛尙陞並請

賞加勇號記名總兵蕭餘勝譚獻定鍾玉勝等三員均請

賞給三代一品封典副將銜湖南卽補參將周東興儘先參將

彭基秀均請以副將儘先卽補並

賞加勇號四川儘先卽補遊擊李遂勝請免補參將以副將儘

先卽補並

賞加勇號卽選同知直隸州知州蕭德綱請以知府不論雙單

月儘先前選用並

賞戴花翎卽選訓導劉占鼇請免選本班以知縣不論雙單月

儘先前選用並

賞加同知銜卽選府經歷柳良材請免選本班以知縣不論雙

單月儘先卽選並

賞加知州銜代理城固縣候選知縣張開鑾前因城固失守經
臣奏參革職畱營此次督團進剿隨同克復尙屬深知愧奮應
請開復原參處分免繳捐復銀兩至記名提督何勝必蕭慶高
指揮諸軍當機立應用能連克兩城該二員官階較大應何如
獎勵以昭激勸之處出自逾格

鴻恩其餘在事出力文武員弁容俟臣查核後會同四川督臣
駱秉章開摺分別奏請

獎敘除飭地方文武妥籌善後事宜另摺陳奏外所有官軍大
破上元觀連克城固洋縣兩城名緣由理合會同四川督臣駱

乘章由驛馳

奏伏乞

皇太后

皇上聖鑒訓示施行謹

奏

劉中丞奏議卷一終

劉中丞奏議卷三目錄

收復西鄉賊勢東竄情形疏

附陳收斬部將以申軍律疏

覆奏奉信旨查辦事件疏

已革道員捐助軍餉請從優獎勵疏

陳漢南被賊州縣困苦情形疏

附畱補用知府劉校書辦理善後事宜疏

附陳寬免署漢中府知府楊光澍處分疏

附請緩設漢郡州縣驛站疏

陳分路追勦布置情形疏

附請將刑部主事管洪等先行獎勵疏

附請豫籌接濟追師月餉疏

官軍追剿曹藍各逆獲勝疏

附請給降人袁子龍等卹典疏

附擒斬藍逆情形疏

官軍追剿曹逆疊獲全勝疏

附查明藍逆伏誅餘黨盡殲疏

附陳多隆阿傷病情形疏

劉中丞奏議卷三

湘鄉劉 蓉著

收復西鄉賊勢東竄情形疏

同治三年二月十七日

奏為官軍收復西鄉賊勢全數東竄現籌布置防剿情形恭摺
田驛馳奏仰祈

聖鑒事竊臣前至漢中業將克復城固洋縣兩城及分兵追剿
情形馳奏在案嗣據各營稟報前由城固敗竄之賊多趨西鄉
一帶於是湘果兩軍派紮洋縣南岸之曾克勝蕭德揚李遂勝
蕭德綱唐友勝鍾玉勝蕭德經彭基秀等直循南岸而進其紮
洋縣北岸之劉占鼇毛尙陞楊得勝劉厚基蕭舉臣柳良材蕭

餘勝周東興毛芳恆譚獻定等即從北岸修整浮橋以濟何勝
必蕭慶高亦會同戴炳奎等隨後策應適駐守太平之參將唐
大有接到臣檄亦派都司林光福游擊陳湛亭等帶八成隊來
會太平縣巡檢毛錫麒軍功張由序等帶領團練於二十三日
先次南山該逆分股由甘家坪鈔我後路都司蔣正光代理西
鄉縣陳爾第等帶團接應彼此併力小有斬獲該逆偵知我軍
四路咸集力不能支二十五日寅刻曾克勝李遂勝等馬隊先
至十里鋪遙見村落中火光照耀知係賊隊將遁遽分三路衝
入賊眾慌亂紛紛向下游狂竄我軍乘勢跟追截殺尾隊八百
餘人生擒百餘人城中諸賊趁我軍跟追紛擾之際繞路下竄

各軍當於卯刻入城搜捕餘匪一面分隊馳追該逆竄抵白家壩經李雲麟派防之都司戴茂林截殺數十人餘眾竄至渭門地面我軍追及殲其尾隊二三百人果毅軍鄧洪超龍升廷等斬獲先多是處水勢湍急該逆前隊先將浮橋燬斷以遏追兵我軍覓船不得遂各收隊而還伏查此股逆匪實計二十六七萬人盤踞漢郡各州縣本圖久踞以窺蜀疆自上年十月以來金陵圍急洪逆屢趨赴援而各酋意見參差彼此爭相雄長亦不思顧護渠魁逮臘月初聞我師三路會剿之謀轉相傳述謂臣所部川楚兵勇已二百一十營多李兩軍尙在其外該逆震於虛聲始共懼而合謀圖竄直赴金陵預製布囊用騾馬裝運

糴米而盡棄其婦女以行蓋自賊中逸出者所供情詞大都如此賊中僞厯以正月初五爲除日初六以後喪沔諸逆陸續竄動初議分爲三路一出紫陽一趨石泉一走甯陝而齊集於襄樊此聞石泉興安一帶經李雲麟預爲嚴備各路團練亦多據隘設防遂相率併趨甯陝一途故前隊已越商州而後隊尙在城固西鄉一帶臣本期於二月內調集楚軍運備糧米卽於三月內三路大舉破賊不意糧運未通新募之軍未集該逆先已蠢動又爲中旗及藍曹餘孽所牽未能疾馳兜剿雖派主簿李百魁總兵劉玉興等率英毅六營尾躡其後而是否可以追及究未可知李雲麟兵力本薄祇可專顧興安一路多隆阿亦爲

蓋屋牽掣但能嚴護省城此所以共視逆匪東趨竟成鞭長莫及之勢現據探報僞天將馬仕榮尙在安康北境游弋而蔡逆二順一股又由鄖西回竄洵陽之蜀河李雲麟分軍扼之此賊多係川匪其志總圖回竄臣現咨商四川督臣駱秉章請畱蕭慶高何勝必兩軍駐紮興安相機防剿則陝境靖而川疆亦固駱秉章素顧大局計必不存畛域之見至臣所新募楚軍三千人已由常德行抵夔州之萬縣比檄令卽由城口廳取道甄坪逕趨商州邊境扼要堵剿而飭候選知縣黃鼎守備龍升廷等率五營逕赴蓋屋併力攻擊各營月餉現尙借資於川亦冀堅城速下則多隆阿可以全力專剿逆回大張撻伐而藍逆旣除

則川北之邊患漸可消弭亦兩得之道也劉嶽昭已

簡放雲南臬司其所部果後九營應卽飭令回蜀聽候雲南撫臣賈洪詔調遣隨征臣現將漢南善後事宜布置粗有頭緒所慮經費支絀恐無以起斯民於溝壑仰慰

聖主子惠元元之意擬於發摺後逕赴西安接篆與司道熟商補救整頓之方規畫便宜仰紓

宸廑所有官軍收復西鄉賊勢東竄現籌布置防勦事宜理合恭摺由驛馳奏是否有當伏祈

皇太后

皇上聖鑒訓示飭遵謹

奏

附陳收斬部將以申軍律疏

再此次克復城固洋縣及南鄭西鄉各城所獲落難婦女約計萬五六千口之多半卽興漢兩郡附近所掠半屬廣西江西湖南湖北安徽江蘇河南等省攜來之人流離情形殊可矜憫城克之後各勇丁竟敢不顧軍律任意收畱而花翎副將黃宗信花翎都司張祖懷張得新亦輒恣意妄行張祖懷且有戕害西鄉文生馬逢皋之事竊惟用兵所以戢暴安民該副將等坐視地方殘破士女仳離旣無忱惕惻隱之心猶敢干犯營規肆其淫虐以致各勇丁紛紛效尤深堪痛恨比經臣查實訊明立即

恭請

王令將該副將黃宗信都司張祖懷張得新及各勇弁十餘人就地正法以申紀律而警凶頑並飭地方官紳暫將落難婦女妥速安置查其尙有父兄者早爲送還無可依歸者徐爲擇配期不致流離失所以廣

朝廷矜卹之仁理合附片陳明伏乞

聖鑒謹

奏

覆奏奉 旨查辦事件疏

同治三年二月十七日

奏爲遵

旨查明先行查辦各員據實覆奏仰祈

聖鑒事竊臣於同治二年十一月十二日在四川巴州營次准兵部火票遞到議政王軍機大臣字寄同治二年十月初五日奉

上諭愛仁奏請將交查各員分別解晉畱陝審辦一摺據稱本擬俟晉案辦竣後親赴富水關商雒一帶查勘地勢現因商雒等處賊蹤出沒潼關一帶道路難行請將閻丕敏施鵬翼型汪耀奎盧殿標李祝齡張維義解晉審辦周蕃壽等六員分交劉蓉查辦等語現在秦晉道路通塞不時愛仁病體亦未全愈著劉蓉按照該尙書所請將閻丕敏等七員並全案卷宗派員解

赴山西交愛仁審辦至南鄭縣知縣周蕃壽定遠廳同知王義
樟游擊閔長申商州知州曹熙並前署藩司王承基前署鹽道
韓泰華均係應行查辦之員劉蓉於行抵漢中時卽將周蕃壽
王義樟閔長申等三員先行查辦按律定擬等因欽此旋准兵
部尙書臣愛仁鈔錄原參摺件咨送前來除閣丕敏等七員業
經臣分咨署撫臣張集馨派員解赴山西交愛仁審辦外其定
遠廳游擊閔長申同知王義樟二員查據原奏稱元年五月初
閒川匪大股由太平等縣竄入陝南定遠廳由定遠直撲西鄉
縣該廳僻處山叢路極窄狹如長峽鎮土埡子燕子礮到魚洞
等處均有一夫當關之險向設游擊都守等官領兵防守如能

與地方官合力堵禦何至長驅直入乃閔長申王義樟先以防
守土堙子爲名實則搬出城外洞寨爲躲避之計迨五月初九
日川匪竄至定遠廳官民搬運一空賊匪穿城而過十三日已
駛至西鄉縣城該撫不將文武員弁揭參治以棄險不守之罪
猶以半日之間卽行收復請將王義樟仍畱本任閔長申置之
不問賊於十三日攻撲西鄉縣該縣令巴彥善督率民團嬰城
固守相持至八晝夜之久無兵救援以致淪陷等語臣自到漢
中後詢該士民該御史所參各情均屬實有之事惟王義樟在
陝服官二十餘年人尙正派其在定遠官聲亦好前撫臣瑛榮
不加參劾請畱本任自係爲愛惜人才起見第事前不加防範

賊至又謀規避若不予以處分無以垂戒將來而巴彥善之死守孤城亦無由昭其大節應請

旨將前署定遠廳同知王義樟卽行革職以示懲創至游擊閔長申聲名本屬庸劣防務毫無布置現據署定遠廳同知汪兆侗稟稱該營兵弁勾通附近漁渡壩平落各處匪類於上年十二月十三日藉點團爲名圍住廳城勒減錢糧求將該廳地丁銀兩以一半歸定遠營游擊支用等語是否出於該游擊指使雖未可知然營弁敢於聚眾要挾則閔長申之毫無約束亦可概見現經臣檄調來營查辦應請

旨將現署定遠廳游擊閔長申革職拏問治罪如其別有指使

情節卽請歸案併究至署南鄭縣知縣周蕃壽虛報勇數冒領口糧挾制鎮道聲言帶勇出城勦賊實爲自己逃遁地步各層查周蕃壽才具明幹當賊蹤分擾之際銳然以守城自任陝安道張守岱爲人端謹長厚而短於才見周蕃壽慷慨有爲亦遂以兵事委之布置謀畫一切聽用其言周蕃壽果於任事無所瞻徇實無挾制之事其失在於過信盧又熊以其自詡戰功久經行陣以爲真屬將才聽其濫收游勇虛張數目自上年二月髮逆圍撲郡城盧又熊棄營奔潰退紮城內日索食米八十五石城中百姓按日供支六月以後糧食乏缺周蕃壽以方資其力防守危城爲之按戶搜糧逮七八月城中餓死者日以千計

至嚙糠粃糞敗革鬻割死者之肉以充飢而盧又熊營中方以米粟餵養馬匹踐踏滿地或以出糶升米索價千文八九百文不等周蕃壽旋亦深知其不可恃然已無可如何及至事急盧又熊竟率其眾開門出走至今城中遺老恨之刺骨而於周蕃壽無怨詞以其志在守城事雖失而心固無他也周蕃壽於七八月間就署後先鑿一井城破之夕盡驅其妻妾子女投井中而自出坐堂上被賊刺三創剖腹剝腸以死則其與城存亡之志實皎如日星之不可誣所有被參各情應請旨免其置議仍由臣另摺奏請建立專祠從優賜卹以彰殉城死事之烈所有遵

旨將王義樟閔長申周蕃壽三員先行查辦按律定擬緣由謹
附驛據實覆奏是否有當伏祈

皇太后

皇上聖鑒飭遵謹

奏

已革道員捐助軍餉請從優獎勵疏

同治三年二月十七日

奏爲已革道員捐助軍餉懇

恩從優獎勵以昭激勸恭摺奏祈

聖鑒事竊已革陝西陝安道張由庚前經四川督臣駱秉章檄
令統帶所部嚮導營赴援漢中去歲八月油房街之役援軍潰

敗漢郡不守奉

旨將張由庚等分別革職畱營嗣經臣檄飭移紮梅子壩兩河口等處扼守要隘十一月據稟所患足疾久未痊愈不能騎馬督陣誠恐再有貽誤負咎滋深現值防務稍鬆請假回籍醫調並將所部各營遣撤等語比經臣查驗病狀屬實當即咨商駱秉章補發該營積欠月餉銀兩飭將所部各營分別妥爲裁撤旋據該革員稟稱自領到欠餉後即經傳集各營將弁勇丁諭以師久無功糜費不少今得撤遣歸農以後無可報効之處應將餘欠月糈捐助軍餉稍效涓埃幸各弁勇欣然樂從今特捐繳銀三萬兩少濟軍需並據呈明該革員世受

國恩無以自效不敢仰邀議敘希圖開復等情稟稱前來伏查該革員爲人質直伉爽任事實心本屬可用之才此次捐助餉糈至三萬兩之多雖出於各弁勇好義奉公之忱然非張由庚信義夙孚斷不能使士卒樂於從命臣前駐紮巴州正屬該員本籍詢悉平日居家孝友貲產並不豐饒而且積有債負此次刻己爲義尤爲人所難能雖該革員情殷報效本無希冀之心而我

國家義重激揚宜有褒嘉之典相應籲懇
皇上特恩將已革鹽運司銜陝西陝安道張由庚賞准開復原官仍以道員畱於陝西儘先補用可否並

賞加布政使銜以昭激勸之處出自逾格

鴻恩臣爲獎勸公誼激勵末俗起見是否有當伏祈

皇太后

皇上聖鑒訓示施行謹

奏

陳漢南被賊州縣困苦情形疏

同治三年二月十七日

奏爲瀝陳漢南被賊州縣困苦情形懇沛

恩施分別豁免地丁錢糧並籌辦撫卹事宜恭摺附驛陳奏仰

祈

聖鑒事竊查漢南自同治元年鄧逆由陽平關闖入是爲秦亂

之始嗣值藍逆西上髮捻東來各屬城池先後淪陷生靈荼毒禍變日滋當各城未陷以前該逆分擾鄉村擄掠焚燬凶焰所及遍地成焦間有僻居山寨賊蹤未到之區尙復斂貲齊團捐糧助餉分斗升之餘粒資士馬以前驅然而筋力漸疲骨髓皆竭未耕之土任賊芻牧其中已熟之禾資賊飽掠以去蓋藏既盡新穀不登而城鄉居民仍復忍饑待斃矢志同仇雖至力竭精疲城垣垂壞往往閤門就義舉室自焚計自兩載以來各屬士民死於飢死於疫死於火而後死於賊者所在皆然至於漢中則被困爲最深而受害爲尤酷緣該郡城壁甚固遠近居民紛紛遷入其中謂可恃以無恐不虞髮逆之圍困既久盧勇之

搜括尤殘倉廩久空囊殮遂絕由是羅掘雀鼠茹草而炊甚或
剝割齒骸資人爲食蓋當孤城未破之先死者已十八九矣城
中生齒數逾十萬其後潰圍逃出者不過三數千人死喪之威
至是而極及夫髮捻盤踞狐鼠縱橫以冠蓋之名邦成豺狼之
巨窟彌望千里慘絕人煙猶復屠割馬牛攻撲峒寨奧區僻壤
靡境不尋以飢疲待盡之民當勢燄方張之寇非遭裏脅卽被
屠戮劫餘之丁其能有幾臣自甯羌率師以來顛沛情形皆所
目擊一路之屍骸枕藉肢體皆殘四鄰之村落成墟炊煙早絕
閒有孑遺之老悉成鳩鵠之形採草蓼以充飢剝樹皮以爲食
襁褓載道婦稚提筐皮骨支離非復人狀念臣奉

命討賊既歷歲時不能捲旆疾馳拯民水火仰稱

朝廷使令之意坐使吾民顛連困苦遂至於斯慙負蒼黎慟填胸臆現在欲籌綏輯則無家室之可歸欲謀賑施則無倉儲之可撥輾轉傷惻莫知所從竊維我

皇上子惠元元之至意必不忍棄此遺黎聽其坐斃爰檄署漢中府知府楊光澍分飭各屬州縣設立撫卹善後總局遴派廉幹官紳專司其事鄉村場市亦設分局務先籌辦米石設法賑給窮民日施薄粥暫延殘喘並令購覓蘿蔔油菜籽種播殖田閒計不兩旬即可採其苗葉藉佐羹餐一面多種雜糧徐資接濟伏查漢屬田產夙號膏腴近值賊蹤蔓延遂成荒棄春耕在

卽種作無人卽業主尙未流亡而播種苦無資本現擬於川省
附近州縣招募農夫令其自備牛種籽粒耒耜器具分赴各縣
量力授田薄其租稅其一切清查地段撥佃納租事宜均令在
局官紳妥爲經畫或值田主回籍卽將原業給還如其實係逃
亡便可作爲官產按畝註冊明定章程卽以秋後收納之租預
抵今日賑濟之資現先籌款挪墊暫爲設法通融如有二三富
家力能分潤量可捐輸無論錢米雜糧勸其周卹鄰里卽由局
紳籍記賑給數目查照米捐章程核實彙請
獎敘要期多方擘畫務盡一時權宜庶幾起溝壑之殘生緩須
臾而勿死垂危餘命尙戴

皇仁所有各州縣應徵新舊錢糧實屬無從徵比相應籲懇
聖慈准予豁免惟被難較有輕重

恩施亦應區分如南鄭褒城沔縣城固洋縣罹害最久應請豁免同治二三年錢糧其西鄉甯羌佛平畱壩略陽等處受禍較淺應請豁免同治三年錢糧至鳳縣城池未經失守而鄉村頗遭蹂躪應請將本年應徵錢糧展緩分作三四兩年帶徵以紓民力至各屬殉難紳民或臨陣而捐軀或罵賊而不屈以及貞女烈婦從井投繯舉家同盡貞魂毅魄不應聽其沈埋臣亦飭局詳加採訪一俟查悉彙報再行另案請

旌庶期存者得遂其生死者不沒其節所有查明漢南各州縣

困苦情形籲請豁免錢糧並籌辦撫卹事宜理合恭摺附驛陳奏是否有當伏乞

皇太后

皇上聖鑒訓示施行謹

奏

附畱補用知府劉校書辦理善後事宜疏

再漢南籌辦善後撫卹各事宜在在需員差委加以土田荒蕪堰溝淤塞亟須設法疏通以期水利復興藉資灌溉現值春水將發而人戶十室九空方就川省招徠農人未能卽至非委幹員先爲修理將至廢時失業查有回川措資道銜畱陝補用知

府劉校書向在安徽軍營効力人極誠篤穩練經臣檄調隨營辦理糧運頗耐辛勞該員籍隸崇慶州素悉修理堰土之法現經臣委令會同署漢中府楊光澍籌款承辦並綜理一切善後事宜惟查該員係由捐升同知指發陝西補用克復安徽霍山案內保補缺後以知府補用嗣於壽州捐輸案內報捐免補本班以知府仍畱陝西歸候補班補用例應給咨赴部引

見現值漢南善後各事需員甚切合無仰懇

天恩可否俯准俟補缺後再行送部引

見之處出自逾格

鴻施謹附片陳

奏伏乞

皇上聖鑒飭遵謹

奏

附請寬免署漢中府知府楊光澍處分疏

再查署漢中府知府鄜州直隸州知州楊光澍於同治元年經前撫臣瑛棨委赴漢南勦辦賊匪旋經毛震壽調赴行營充當營務處是年八月漢中府知府李定南病故維時省城道途梗塞無員可委毛震壽就近檄令楊光澍接署仍畱當營務處責以籌餉籌兵之事該守親歷城鄉設法勸諭無不任勞任怨而採辦軍米接濟各營甚費籌畫川援湘果兩軍得免飢潰者實

賴該守多方轉輸之力自郡城被圍該守復躬親行陣屢次救
援祇以眾寡不敵未能衝入本年正月十一日隨同何勝必蕭
慶高將郡城收復業經臣恭摺具

奏在案現飭綜辦善後撫卹各事宜均能悉心籌畫晝夜奔馳
不辭勞瘁洵屬誠樸耐苦練達有爲知府中不可多得之員查
府城及所屬州縣被陷例應查議惟該守究係奉調在營與在
城防守者實有區別且一切善後各事正須該守籌款舉辦核
其從前勞績功過尙足相抵合無仰懇

天恩可否准予寬免處分抑或將其革職畱任之處出自逾格
鴻施臣爲愛惜人才起見是否有當謹附片具

奏伏乞

皇上聖鑒訓示飭遵謹

奏

附請緩設漢郡州縣驛站疏

再查漢中所屬甯羌畱壩褒城沔縣鳳縣五廳州縣均係川陝通衢大道向設驛站爲摺報公文來往必由之路近值賊匪竄擾道路梗塞五廳州縣又失其四經四川督臣駱秉章前撫臣瑛棨先後奏明請

旨飭將驛遞由川楚兩省改道行走在案現在各廳州縣以次收復自應仍舊安設驛站以重郵政惟查自滇髮各逆肆擾以

來時經兩年之久棧道橋梁各被焚毀山石滾落途路壅塞必須先行設法修理始能疏通而各廳州縣所領發商生息修理棧道經費銀兩均因城池失守逃亡無著無從催收應用其夫馬工料又係由徵收地丁內扣留支發現經臣查明被賊情形瀝懇

恩施分別豁免地丁錢糧所有應發驛站工料更屬無從取資兼之村落成墟人民逃徙招集歸來者均係流離困苦之餘加意撫卹尙虞不逮焉能更資其力摺報公文重件設有貽誤關係匪輕惟有據實奏懇

天恩仍准查照前次奏案暫行改道馳遞一俟居民復業籌有

修理款項撥給承領之時再爲照舊安設遞送庶驛站得以整飭而民力亦藉獲休息除分咨外理合附片陳奏伏乞
聖鑒飭遵謹

奏

陳分路追賊布置情形疏

同治三年二月二十九日

奏爲通籌現在兵力遵

旨分路追剿並布置一切情形據實覆陳仰祈

聖鑒事竊

臣

現准議政王軍機大臣字寄同治三年二月初六

日奉

上諭前因張集馨多隆阿李雲麟先後奏陳收復漢中畱壩賊

匪分股東竄疊經諭令多隆阿嚴防陝省隘口湖北河南各督撫迎頭堵截茲據劉蓉奏收復漢中並賊匪東竄情形與張集馨等所奏大略相同本日已明降諭旨將出力總兵何勝必蕭慶高並逗遛之府經歷張星等分別獎懲其餘出力文武准其查保矣該逆因蘇州克復意圖回援金陵率眾東竄行走甚疾川軍甫抵漢中城固而逆蹤已及漢陰石泉勢必由山陽商雒以趨豫省一由興安一帶以窺鄂疆若令竄出山險則平原曠蕩勢必紛擾蔓延堵截更難得手劉蓉務宜督率諸軍星夜東下乘勢追擊一面飭令李雲麟迎頭扼截毋稍鬆懈並著官文嚴樹森飭令襄鄖在防將士嚴扼要隘仍添派勁旅馳往策應

以厚兵力以陝西商雒交界地方卽著張之萬添籌兵勇
鼓舞鄉團扼山險毋令賊蹤竄入以期與陝省追師前後夾
擊前因豫省兵力較單諭令僧格林沁親督援師或酌派馬隊
先赴該省助剿恐一時未能遽到張之萬務當先期豫爲布置
不可專待援師稍形鬆懈仍一面飭令張曜迅將張總愚股匪
殄除勿任與漢中股匪合併是爲至要陝省商雒一帶爲入豫
門戶著多隆阿添派兵勇與藍斯明一軍迎頭扼截毋任逆蹤
闖入豫省劉蓉追剿此股賊匪務當盡力追躡如該匪竄入楚
豫卽著越境窮追與楚豫防兵聯絡夾擊不得稍分畛域畫疆
自守致令滋蔓難圖如楚豫不能堵截任賊長驅視其竄擾何

省唯何省督撫是問倘前截而後不能追唯劉蓉李雲麟是問將此由六百里各諭令知之欽此跪讀之下仰見

聖慮周詳委任責成之至意伏查漢南踞匪合股東竄其前隊扶端各逆酋陸續由山陽竄往商南浙川一帶後路馬啟各逆聞漢陰有兵防禦皆由安漢交界之鐵鑪壩龍王溝北趨鎮安旋於本月初二三等日折由穆王坪至安康屬之葉家坪規溝等處蟻聚蜂屯橫互一百八十餘里圖伺間直犯興安李雲麟恐其擾及完區飛調各營於漢陰安康交界之區扼要分紮以備截擊並飭總辦團防之在籍戶部主事蔣常垣刑部主事管湧督同浙江候補知縣黃加耀候選訓導曠瑛各帶安漢兩邑

民團五千餘人據險助剿該逆探知我軍守禦嚴密卽分黨數萬由紫溪河折而東趨圖出景家莊茨溝口一帶旁鈔興郡李雲麟飛調前駐石泉之游擊楊桂芳帶毅健左右兩營移駐漢陰扼守西路而抽撥隴軍奇右正後兩營與毅健後營由松樹壩一帶迎剿東路部署既定初八初九兩日管湧黃加耀等率眾千餘人擊賊於規溝場殺斃百餘人奪獲器械多件賊勢稍挫李雲麟亦於初十日率隴軍奇右暨毅健兩營於松樹壩之北分路設伏誘賊出巢生擒數十名該逆盡聚於茨溝口意在恃眾衝突十三日我軍直逼該處都司劉太富率隴軍奇右營奮勇先進游擊金殿安率毅後營繼之飛捷一營繞由高山壓

下分途策應鏖戰兩時之久劉太富陣斬騎馬黃衣賊目一名各勇奮力直前挫其前鋒斬馘百數十名生擒五十餘名各營乘勝同進呼動山谷賊之後隊六七千人盡皆披靡鎗礮轟斃暨自相踐踏者不可勝計奪獲礮械百數十件馬逆前隊卽於是日全股退竄各營併力齊進沿途斬馘二百餘名追三十餘里至東溝口前一日預約西路兵團於是夜乘賊不備偷襲茅溪賊營該逆自相驚擾卽時越嶺而逃我軍於十四日早整隊追擊斬獲甚多於是馬逆一股四萬餘人皆狂竄而北維時啟逆餘黨及石逆中旗一股尙游弋於葉家坪一帶去我軍西路防兵尙百餘里李雲麟飛飭西路各營開赴規溝場乘勢進擊

該逆聞東路賊敗不敢戀戰於十八九日由黑水河地方分道竄入鎮安於是興安以西全境肅清而蔡逆二順一股意圖由蜀河偷渡回川經澄漢水師與歸化營扼要嚴防該逆搭造浮橋屢次撲渡均被水師奮勇擊退逆志既不得逞遂退踞距蜀河二十餘里之吳家寨都司賈吉齡選壯士百二十餘人夜劫其營殺斃悍賊百餘人奪獲器械百餘件該逆驚潰退蔡雙河口一帶此兩旬來興安北路截剿髮逆川匪之實在情形也現在髮逆大股多由鎮安竄出商境而蔡逆之眾約二萬人又由鄖西上犯洵陽若不先將此股殄除誠慮乘虛竄擾又成蔓延之勢臣前咨商四川督臣駱秉章畱湘果兩軍暫紮興安冀資

堵勦嗣聞蓋屋克在旦夕頗慮敗殘餘孽潰而四溢不能不密
爲防範且曹燦章與洋縣餘黨竄合之後游弋於佛坪之松花
坪墮口石等處繞入老林時窺甯陝亦不可不力圖搜勦以絕
根株因飭湘果各軍暫於畱壩華陽洋縣石泉茶鎮各處抽兵
駐守並令各軍協勦曹藍餘逆故前赴興安者尙祇四營李雲
麟慮後路疎虞單騎兼程日馳二百餘里臣商畫並攜地圖
指陳蔡逆已入穀中可期必滅之狀臣以機不可失遂與定計
期先勦此股而後行伏思髮逆下竄自應盡力窮追爲夾擊聚
殲之計况奉

諭旨嚴切敢不極力圖維以期迅殄逆氛仰紓

宸廕頃與李雲麟熟商擬以該京堂所部各營分爲兩路一由
洵陽之蜀河進一由安康之傅家河進而派英毅六營由鎮安
逕趨山陽三路並進以取建瓴之勢則聲勢更爲聯絡將來馬
啟各逆如遂併力東竄則李百魁劉玉興之英毅六營旣可由
山陽跟追卽現紮商州之藍期明一軍亦可分路並進是爲尾
追之師李雲麟全軍俟將蔡逆破滅卽可由水路順流下駛襄
樊相機邀擊是爲攔截之師再得楚豫各軍迎頭堵剿三路夾
擊逆勢定就窮蹙查此賊裹脅之眾多係德安黃州襄陽各府
之人未必甘心從逆如就襄樊併力截擊勢將解散大半今賊
適由此路竄走此其機勢之可乘者也所慮山陽鎮安洵陽商

南等處屢經賊擾米糧無從採買軍行每多滯濡現擬由興安
境內設法轉運而山路崎嶇人民逃散籌辦實覺維艱兼之餉
項乏缺無可轉輸用是日增焦灼耳臣前派黃鼎之彝字等營
前赴整屋會剿以期迅克堅城旋准多隆阿來咨整屋兵力已
厚功在垂成無庸前往因飭黃鼎等折赴甯陝與湘果營駐紮
茶鎮之師專剿曹藍餘孽此賊飄忽靡常急則竄入老林緩則
窺伺腹地不趁此時撲滅終爲秦蜀兩省之憂至劉嶽昭之果
後九營前發摺後卽准駱秉章來咨稱黔匪竄入綦江飛飭該
軍星夜馳往剿辦現已拔回蜀境矣所有通籌現在兵力遵
旨分路追剿一切布置情形謹會同四品京堂奴才李雲麟恭

摺由驛馳奏伏祈

皇太后

皇上聖鑒訓示施行謹

奏

附請將刑部主事管滂等先行獎勵疏

再在籍刑部主事管滂戶部主事蔣常垣浙江候補知縣黃加
耀候選訓導曠瑛督辦鄉團保衛地方此次各帶安漢兩邑團
丁屢次接戰使逆匪不敢犯境實屬著有微勞而管滂黃加耀
二員始終奮勉戰功尤著應請先沛

恩施以示鼓勵管滂蔣常垣均請以員外郎仍歸原部補用黃

加耀請以知州仍歸浙江儘先補用曠瑛請以知縣歸部卽選其管滂黃加耀二員並請

賞戴藍翎以示優異其餘在事出力紳團容俟查明核實彙請獎敘臣爲激勵鄉團起見是否有當伏乞

皇上聖鑒施行謹

奏

附請預籌接濟追師月餉疏

再自軍興以來逆匪滋擾各省當官軍破擊敗竄之餘鮮爲越境窮追之舉近雖屢奉

諭旨嚴飭不許稍分畛域而往往未能恪遵以行非必任事者

盡懷畫疆自守之見也賊既出境則去省必遠各營口糧軍火
大抵皆缺爲將領者卽欲銳意窮追而坐視餉糈匱竭藥丸盡
罄雖勇者不能無逡巡卻顧之思迨省城之轉運旣通而賊蹤
之飄忽已遠及至鄰封聞警調將徵兵羽檄交馳遠近騷動卽
使師旅速集大都已在兩三月之間於時殘孽之喘息已定州
縣之蹂躪已多故賊勢卽極窮蹙而得此間隙裏脅漸眾羽翼
旋豐其勢又將復振此賊勢之所以屢蹶屢張乍熄乍熾如滋
蔓之難圖以至於今也比歲頻煩

詔旨之勤勿許稍存畛域之見各省督臣撫臣非不懍遵

聖諭而勢力嘗苦於無及事機恆不能無失臣竊以爲欲行督

責之令宜定功過之衡擬請

敕旨通飭各省督撫嗣值剿辦逆匪得手之際度其勢將竄往何省卽行飛咨該省督撫預先酌派追兵多少先令該省籌備一月口糧軍火以待隨時隨地力爲接濟日後卽將此項餉銀作爲該省協濟之款一月以後仍由本省源源解運或彼此各任其半庶將卒無所藉口剿辦不至失機其或追剿不力以致賊蹤蔓延則派兵之督撫宜任其責如因餉糈不繼以致貽誤戎機則被賊之省分應執其咎惟嚴功過之準庶弭推卸之端又或鄰省防兵已集布置已周自度可以了辦竄匪卽由該省先行咨覆無庸派撥追師越境協剿但能各嚴邊界之守自可

藉絕窺伺之萌至於統兵將領或有不遵鄰省督撫調度以及
觀望逗遛老師樂餉各弊卽由該省督撫咨會奏參如此分別
責任明定章程庶各督撫無畫疆自守之譏逆蹤亦無越境幸
免之患似於軍務較有裨益至於殘破已甚瘠苦已極之省分
猝遇大股逆匪竄入境又當協數省之餉徵數省之兵以圖
之未可以一律論矣臣愚昧之見是否有當伏祈

皇上聖鑒訓示飭遵謹

奏

官軍追剿藍曹各逆獲勝疏

同治三年三月十七日

奏爲官軍追剿曹藍各逆疊獲勝捷擊散全股現飭各路兜剿

謹將籌辦情形恭摺奏祈

聖鑒事竊臣前於二月十九日曾將通籌現在兵力遵

旨分路追剿並布置一切情形由驛奏報在案曹燦章與洋縣
餘黨竄合之後游弋於佛坪之松花坪渣口石等處經臣飛飭
彝字營黃鼎折往追剿去後旋據甯陝廳同知龔衡齡稟報該
逆嘯聚萬餘眾擄糧裹人勢甚猖獗黃鼎於十八日馳抵文王
坪探知賊已竄踞甯陝廳屬之黃草坪八斗坪金雞河兩河口
一帶該員卽於是夜親率正營及副前左兩哨由黃官宇踰雪
宇嶺以襲其後而派候選訓導張玉文率副右後各哨由金雞
河下流直撲黃草坪以攻其前分派既定乘月疾趨張玉文行

抵黃草坪天猶未曙督令兵勇過河暗將守卡老賊搜殺直撲賊巢拋放火彈燒斃賊約數十人餘賊悉赤身奔出爬山竄去我軍追至二里坡山梁賊眾三四百人沿山腳鈔我後路張玉文卽飭各哨伏鎗以待迎頭截擊斬馘三十餘人生擒僞先鋒一名反奔落河者甚眾方追勦閒場內大股掩至我軍稍卻維時黃鼎已由雪宇嶺馳至山梁急令各哨派隊站據山脊施放鎗礮並飭參將曾新茂帶隊下山衝擊而兩河口接應之賊亦蜂擁而來相持三四時之久天色昏暮始各收隊該逆遂於是夜潛由兩河折竄雞公梁洵陽壩七里觀以出江口黃鼎飭令士卒裹帶乾糧於二十二日輕騎疾趨進獲老賊一名訊供曹

逆僞部係東南西北乾坤六大營經我軍在八斗坪襲擊之後
派莊余兩僞都統及羅王李余各僞統領十六人糾集精悍悉
合洋縣餘黨由刺溝七里溝分紮洵陽壩上下各路約四十里
黃鼎自以深入賊巢利在速戰遂分派張玉文羅應旒帶副前
左後哨從刺溝進攻而自率正前右哨從七里溝進並撥親兵
籐牌正左後各哨從山梁壓下參將會新茂游擊趙雲鳳左右
圍鈔副將黃友忠從中衝擊賊方早炊猝不及防我軍四面圍
攻殲賊六七百名因見拋棄旗幟多有統領莊字樣知賊目已
誅軍心益奮分合圍鈔連環更進一路勦洗賊壘三十餘處賊
眾千餘人堵立橋頭我軍由七里觀向前衝撲數十次陣亡四

名受傷九名卒不得近黃鼎親督藤牌隊猱伏而進每牌一面以一鎗兩矛附之呼殺一聲牌卽駛進河岸賊騎驚墮河中者十餘匹橋口賊矛如蝟藤牌抵及或拍或壓矛路甫開牌卽衝入左擊右刺墜橋落水者幾如堵牆隔河軍士拋射火箭火蛋大呼進擊賊勢不支始爬山涉水敗而四潰我軍乘勢擊斃賊六七百名連破賊巢三四十處追至福安寨山腳悍賊千餘拌死抵拒曹逆衛隊又由山口橋樓繞出我軍之後意圖包鈔都司宋得勝守備田得勝李玉山歐陽勳參將陳攀仙千總李秉忠等分路接戰互有殺傷正相持間忽見守備劉國富陣斬余僞都統提其首級從山梁馳呼而下賊遂大敗乘勝掩殺直抵

洵陽壩時已昏黑縱火然燒上下街房火光之中賊叢如螳東
西四竄均經我軍圍殺殆盡搶獲偽印兵符數十件騾馬三百
餘匹旗幟刀矛無算救出難民三四千人該逆前隊不敢回顧
連夜由腰竹溝楊泗廟等處小路零星奔竄此十八至二十二
等日追剿曹逆疊獲勝仗之實在情形也二十五日蓋屋克復
之後藍逆率老賊潰圍分起由新口峪奔板房子圖竄金雞兩
河與曹逆及其餘黨合股不知曹逆等先已敗逃轉出我軍之
後初一日夜黃鼎偵知該逆將乘雨來襲我軍營盤且已行踰
琵琶嶺遂密派各營分伏於七里溝刺溝一帶約俟賊隊過半
而後擊之時逾四鼓該逆前隊已至洵陽壩宋得勝盛茂歐陽

勳等乘其後隊方下刺溝突出鈔擊擒斬僞都統一人僞先鋒
數人該逆首尾截斷爬山逃竄者數百人棄械投誠者一百餘
人詢悉藍逆尙在前隊黃鼎卽督各營躡追白子至未不遑飲
噉直追九十餘里及之於懶板橙曾新茂趙雲鳳等由山梁攻
其右田得勝李玉山王宗勳等過河攻其左黃友忠陳攀仙劉
國富進搗中路黃鼎張玉文羅應旒分帶親兵督隊接應賊亦
分三路來迎我軍再接再厲賊眾屹立不動而右面之賊遂各
搶上山梁劉朝漢曾新茂奮力直突鎗矛交舉斃賊二十餘人
賊拋擲石塊扼險死拒勇丁受傷者十餘人黃友忠陳攀仙策
馬躍上陣斬數十人生擒老賊十餘人賊猶死戰不退張玉文

督籐牌駛進羅應旒率正營親兵繼之副後哨及親兵急鈔其
後賊始反奔我軍得勢直衝斬馘甚眾該逆爬據懸崖滾石如
雨屢衝屢撲勇丁傷亡頗多時近昏黑黃鼎見賊勢已蹙督令
後隊四面圍攻焚燒號火數十處以逼之期必擒藍逆而後收
隊不意時將四鼓大雨如注火具盡溼各勇丁衣服沾濡不能
站立迨至天明賊已盡棄軍械輜重散竄老林矣四山搜捕擒
獲老賊數名訊據供稱藍逆身受鎗傷夤夜遁去餘皆爬山越
嶺而逃此初二等日破勦藍逆擊散全股之實在情形也伏
查曹逆燦章與洋縣餘黨合併之後始圖救援蓋屋繼則窺伺
甯陝聚黨已逾萬人其勢且將復熾而藍大順率其殘孽由蓋

屋突圍而出意圖與之合併幸黃鼎彝字各營先將曹逆大股
勦除過半使其計不得遂復將藍逆窮追痛勦正可乘勢窮力
竭之際收擒渠殲醜之功乃因天雨淋漓竟使元兇漏網憤恨
殊深北山概係密菁深林向爲奸宄窟藏之所藍曹諸逆竄入
其中若不趁此撲滅終爲秦蜀兩省之患昔年教匪之亂歷數
歲而不克蕺事皆因巖壑奧邃不便進兵之故臣現督飭湘果
中軍蕭慶高會商黃鼎就甯陝鎮安一帶分道搜捕務期擒獲
首逆一面派委曾被裹入賊中之四川候選訓導廖溥明趁逆
勢窮蹙之際持檄前往誘令來降如能盡率醜類以出亦可爲
迅拔根株之計免致曠延時日糜餉老師至竄擾蜀河之蔡逆

一股現經李雲麟派撥諸軍分路進攻並派澄漢水師嚴防白河以杜該逆竄川之路臣亦催速湘果右軍何勝必拔隊東下由麻坪河進軍堵剿會圍兜擒倘可如算不難尅期掃盪所有商州一路原派英毅六營已遵

旨飭赴鄂豫越境窮追現調由南新募之鎮西三營雄毅兩營馳往該州駐紮既以防藍曹各逆分竄之路亦以遏捻匪窺伺之萌用固邊疆而臻嚴密惟彝字營馳驅深山窮谷之中晝夜奔走米糧乏缺至宰殺奪獲騾馬以充食實屬異常艱苦此次疊將藍曹全股擊散不無微勞可否俟事竣後容臣擇尤保獎以示鼓勵之處出自

聖主鴻施除將傷亡弁勇照例辦理外所有追剿藍曹各逆疊獲勝捷暨現在籌辦情形理合恭摺馳奏伏乞

皇太后

皇上聖鑒訓示飭遵謹

奏

附請給降人袁子龍等卹典疏

再臣上年駐師巴州有通江縣軍功林中虎自洋縣逃歸來營投稟據稱藍逆部下頭目袁子龍孫仲元劉安山屢欲歸正無隙可乘現因藍逆出擾蓋屋潛與該軍功密議來歸願將洋縣佛坪華陽三城獻出並先將藍逆銀鑄偽璽一顆交令呈繳爲

信臣當逐加確詢知藍逆竄蓋屋被圍之後髮逆僞扶王屢次逼令袁子龍等投歸伊黨袁子龍頗明順逆之分且知其勢不久支急思棄邪歸正核其情詞尙屬懇切其僞印做蝌蚪篆文鑄受命於天既壽永昌八字縷刻甚工其爲藍逆僞璽無疑當卽繕發札諭給予袁子龍等功牌頂戴飭將所部改立爲歸義軍並令薙髮復冠服改樹旗幟仍舊固守城池待大軍到日出城就撫交由林中虎專遞去後林中虎旋接回信據稱已按照官軍營制製造旗幟號褂並造清冊各件俟髮逆解圍卽請出降等語正月十八日我軍攻克城固髮逆卽於十九日解洋縣之圍臣因繕札令袁子龍出城就撫派湖北興國州增生呂岱

雲持往傳諭不意袁子龍竟爲其黨黃大純所戕呂岱雲旋亦
遇害先是袁子龍等密議來歸以黃大純狡悍多反覆未與同
謀降議既定始以微詞諭意黃大純當亦應允十九日解圍之
後袁子龍持臣札諭告其黨曉以去逆效順復爲

大清良民之意賊眾莫不欣然聽命黃大純因見札內未列伊
名遂疑袁子龍賣已旋以言激怒其眾矯藍逆令執而殺之呂
岱雲不知事已中變於二十一日縋城傳諭黃大純遽叱令跪
呂岱雲抗詞不屈遂亦被戕洋縣克復之後有四川拔貢生候
選知縣馮榆自城中逸出爲臣具述情狀並及袁子龍之真心
投誠呂岱雲之慷慨就死不禁爲之愴惻伏查呂岱雲以一介

書生投身虎穴知事無濟毅然一死大有烈士之風應懇

皇上特恩准將呂岱雲追贈訓導卽照訓導例賜卹以慰忠魂
至袁子龍本雲南昭通人與藍逆相從已久及能明於順逆之
分決計投誠事雖未成志殊可憫合無並乞

天恩准贈千總卽照千總例賜卹以旌其志俾賊黨聞之知反
正投誠者雖無功而就死猶蒙

朝廷鑒其微誠特被褒揚之典亦足以堅慕義嚮化之心除將
銀鑄偽印飭存司庫外理合附片陳奏是否有當伏乞

聖鑒訓示飭遵謹

奏

附擒斬藍逆情形疏

正封摺間接據署興安府知府謝復榮稟報藍逆於初六日竄至安康所屬之紫溪河地方踞場擄糧該守立即移會管帶團勇之在籍主事管滂率同擬保把總楊炘文童楊宗泗管正綿等各帶獵勇三百餘人預往各路埋伏另派百餘人至陳家臺誘賊出戰佯爲敗退該匪追至長溝伏兵突出截其歸路殺賊頗多紫溪河各賊湧出救援巢內空虛街後伏兵從北面藥王砦掩至直撲其巢該逆譁然四散各團勇四面截殺內有賊目身穿繡金九龍藍袍乘轎奔走我軍追及當卽生擒餘賊趕來救護各勇因將該逆亂刀砍死割取首級並陣斬悍賊五名生

擒長髮老賊張朝陞一名當將賊級令其辨認據供穿繡金龍袍左眼下皮有肉瘤者卽藍大順面方麻黑微鬚者係林僞統領面長白色無鬚者係王僞都統其餘藍八藍九藍五等均被戕斃並據報稱此起逆黨業已全數撲滅呈請

奏獎前來伏查藍曹各逆經官軍疊次追剿之後其勢本極窮蹙無如鄉村殘破無從購辦米糧追躡之師往往不能速及非得各處團練各就附近要隘控剿兜捕勢難盡絕根株此次管勞等督團協剿竟將首逆殲除餘黨捕滅實屬著有微勞惟據外間傳說藍逆面貌有眼下並無肉瘤之語是否係屬藍朝璧正身應俟查詢明確後再行奏請

獎勵曹逆餘孽現探游弋於安康鎮安邊境業飭兵團協力圍
剿自可次第殲除至蔡逆一股黨羽尙多然合李雲麟及湘果
兩軍之力計亦無難埽盪臣現擬逕赴西安與多隆阿熟商剿
回事宜及協濟餉糈之法俟諸務籌畫既定卽赴潼關商州一
帶察看情形布置堵剿方略合併附片陳明是否有當伏乞

皇太后

皇上聖鑒訓示飭遵謹
奏

官軍追剿曹逆疊獲全勝疏

同治三年四月初二日

奏爲官軍連日追剿曹逆疊獲全勝現飭四面兜圍以期悉數

殄除恭摺奏祈

聖鑒事竊臣於三月十七日在畱壩行營曾將彝字營追剿曹藍各逆疊獲勝捷擊散全股各情形由驛奏報在案旋據記名提督蕭慶高轉呈甯陝廳參將謝正球同知龔衡齡稟報曹逆前隊復由穆王坪回竄楊泗廟太山廟一帶當卽派隊馳赴賈家營堵禦適僞統領游飛熊羅飛虎曾玉順朱和順等四人赴營投誠謝正球深慮賊情詭譎揀派外委張榮先李文喜協同湘果營探弁王宗虎黃三超等前往察看該逆灑淚哀求情詞甚屬懇切當將賊目帶回飭令先繳刀矛器械旗幟大小擡鎗擡礮等件查點七百餘人訊據供稱曹逆大股尙有萬餘與洋

縣餘孽二千餘人合隊刻在腰竹溝高觀場等處盤踞趕辦乾糧意欲折竄江口及金雞兩河相機行事不趨西安卽竄川境等語此十三日謝正球受降賊眾詢悉賊蹤之實在情形也十四日彝字營黃鼎探悉該逆大股繞竄閣老坪等處急率所部馳赴江河截擊並出隊由傅家河踰嶺而下而賊已連夜竄至兩郎八里坪遶出江口之後黃鼎因查蒿溝一路未經賊擾糧食尙多且當孝義子午峪之衝預料曹逆必出此路十六日會同訓導廖溥明帶正營四哨從牛郎溝踰嶺下抵蒿溝以截其前而派張玉文帶副營前左右三哨同江河團練從沙溝口七畝坪壺盧溝三路以分擊其腰尾復派副營後哨扼嶺溝口山

梁均皆居高臨下距賊四五里而營十七日辰刻賊出隊千餘衝撲我軍蒿溝營壘黃鼎令各哨嚴陣以待俟其撲近始行截擊該逆衝至山腳我軍齊聲一呼三路並進賊退山口抵死擄拒刀矛交擊回合數次勇丁陣亡八名受傷九名黃鼎督率親兵籐牌從山梁鈔下賊始返奔我軍乘勢掩殺百餘人生擒四十餘人奪獲旗幟器械三百餘件直追至文公廟山梁大雨如注始行收隊其沙溝口一路賊出隊五六百人直衝秦嶺營盤張玉文督同副前哨及團紳尹貢生等帶隊埋伏兩面深林之中賊甫下梁伏兵齊出截殺四十餘名生擒僞先鋒隊長各一名奪獲騾馬各二匹賊遂墜坡落澗而遁其七畝坪一路賊出

隊將踰山梁副左哨帶隊從上壓下賊遂返奔我軍追至大莊
坪擒殺李偽統領一人獲其逆婦及老賊十餘人遺棄糧食器
械甚多賊向兩郎一路竄去此十七日彝字營三路攻剿獲勝
之實在情形也十九日該逆憤於屢敗悉出精銳二三千人半
著紅衣分四路進撲蒿溝隘口自文公廟蜂擁而來密布如林
曹逆親身督隊由中路直衝至前哨營壘參將曾新茂游擊趙
雲鳳出隊迎戰回合數次賊由右面鈔出數百人將前哨隊伍
圍包黃鼎檄令親兵同正左哨馳下左面山梁正後哨從右面
鈔出刀矛交擊陣亡勇丁四名受傷三名賊徐退至山腳副將
黃友忠執旗衝出賊始反奔廖溥明督率籐牌親兵同後哨直

衝而前賊以千人踞高梁死拒不退礮石如雨陣亡勇丁六名
受傷五名籐牌隊抵死上衝斃賊二十餘人搶上山梁賊眾由
高崖顛仆而下跌斃六七十人其後面山梁之賊亦遂紛潰我
軍三路鈔殺斬獲二百餘人焚燬賊巢十餘處擊殺偽西字左
營統領彭姓及偽先鋒數人奪獲火藥四箱而偽西字中營一
股已被我軍圍鈔黃鼎豎立投誠免死旗幟大聲招呼偽統領
陳占雄卽率其先鋒百長共五百餘人捲旗棄械來降當卽資
遣四百餘人挑畱精壯一百四十名使作前鋒立功自贖黃鼎
因見賊情解體揮軍直逼文公廟老巢賊據重卡死拒不退廖
溥明照繕招降札諭射入賊隊曹燦章見逆黨時復出降屢戰

屢敗接讀札諭據鞏痛哭哀動左右廖溥明當先呼諭竟被擲石擊傷頭面賊遂乘勢撲出黃鼎憤督親兵大旗奮力衝擊擒殺悍賊五名賊遂敗退入卡時已昏暮收隊而還共計奪獲大旗四十餘面擡鎗二桿劈山礮一尊刀矛二百三十餘件是日張玉文聞蒿溝鎗礮轟動亦督副前哨由沙溝進截其腰焚燒賊巢四處殺賊十餘人該逆退據兩面山梁地勢陡絕不可上遂令副前哨扼險相持而飛馬趕至七畝坪督隊會同團紳直衝文公梁賊踞上峯拋擊礮石歐陽勳由下施放火箭將卡棚焚燒團首尹貢生首先上梁鎗斃偽百長一人老賊四人各奔勇趁勢搶上賊遂奔回老巢我軍乘勝進據賊卡此十九日彝

字營兩路攻剿獲勝之實在情形也伏查曹逆游弋安康鎮安之間業飭彝字營湘果中軍會同該處團練圍剿謂可次第殲除不意該逆偵知官軍四集潛由老林乘虛上竄其狡黠實異尋常幸得黃鼎一軍跟蹤尾追疊加剿擊合計投誠解散者不下二千餘人其勢窮蹙已極惟山路叢雜曲徑旁通實難防其竄越而米糧缺乏官軍苦於覓食之艱現飭彝字營會同團練分路扼守絕其虜掠之路一面飛催蕭慶高由閣老坪七畝坪兩路進擊協力夾攻其鄂縣所屬之澇谷口一路又經穆圖善派兵防剿似此檻獸釜魚計不難殄滅淨盡所有官軍連日追剿曹逆疊獲全勝並現飭四面兜圍以期悉數殄除緣由理合

恭摺由驛馳

奏伏乞

皇太后

皇上聖鑒訓示飭遵謹

奏

附查明藍逆伏誅餘黨盡殲疏

再臣等因署興安府知府謝復榮稟報在籍主事管滂等督團將藍逆殲除惟據稱該逆面貌眼下有肉瘤之語核與所聞不符是否係屬藍朝璧正身當經附片陳明應俟查詢確實後再行奏請

獎勵在案旋據署漢陰廳通判瞿樹鎬稟稱藍逆疊經兵團分
路追殺勢既急迫忽生詭計先令僞都統王包包穿所服繡金
九龍蟒袍假冒己名乘轎奔走使兵勇全力注意此賊卽自率
僞巡捕藍三順等遁至葉家坪希冀脫逃旋經管滂督率練勇
跟追與舉人張承燮所部武安營併力夾擊遂將該逆及其餘
黨全數殺斃管滂帶有向日伺候藍逆之王老么麻花二人在
眾屍中指認首級送至廳城瞿樹鎬亦提出前獲之藍七順並
李雲麟傳到夙識該逆之湘果營守備孟學文等公同辨認僉
稱確實無訛現准李雲麟派弁解送該逆首級前來查視兩顴
高聳眉豎而長與所傳該逆面貌實相符合其爲藍朝璧正身

無疑其詳細情形業經李雲麟據實陳奏無庸贅敘除將該逆首級傳由四川遞至雲南昭通地方用昭炯戒仍確查出力官紳兵團彙請獎敘外所有查明藍逆伏誅餘黨剿捕淨盡緣由理合附片具奏伏乞

皇太后

皇上聖鑒訓示謹

奏

附陳多隆阿傷病情形疏

再臣前在漢中接准西安將軍多隆阿來咨知二十四日攻克盤屋之後該將軍頭眼受傷鎗子未出深慮難期痊愈當卽專

函馳詢病狀一面由漢中起程赴省期與商度勦回籌餉各事宜旋於鳳縣途次接到該將軍覆函言傷病甚屬沉重恐遂無以報

國等語尤切憂念二十六日臣由武功馳赴整屋相視則該將軍神氣消索肌膚羸瘦握手經時瞪目不能發一語念其親援桴鼓慷慨誓師之情深爲愴惻當與幫辦軍務西安副都統穆圖善等籌商派撥諸軍分道征勦事宜往復數四僉以該將軍病體垂危各將官依戀主帥未忍遽離左右是以尙未定局現接穆圖善二十九日來函言該將軍比日傷病稍減容俟稍遲妥籌定議具奏合先附片陳明伏乞

聖鑒謹

奏

劉中丞奏議卷三終

劉中丞奏議卷四目錄

奏報到任日期疏

官軍疊破賊壘克復場鎮疏

會奏統兵大臣因傷出缺疏

附請俟多軍出境卽行出省督剿疏

官軍生縛渠魁肅清陝南疏

蔡逆被剿西竄派兵堵擊情形疏

附覆陳奏報情形歧異疏

逆匪合併逼近省城布置堵剿情形疏

附陳布置湘果各軍疏

附請飭鄰省照常撥餉疏

附請飭山西撥濟火藥疏

會奏暫畱赴鄂後起馬步會剿疏

逆匪被剿奔竄尅日督軍剿辦疏

附陳探報情形疏

附畱曹克忠一軍駐守汧隴疏

附覆奏曹克忠所部各營未便抽調疏

酌撥倉糧協濟甘軍疏

附請緩解工程銀兩疏

會奏官軍進逼賊壘督剿獲勝疏

附請更正米方多爾濟卹典疏

附請簡放金順副都統實缺疏

覆陳查明偽扶王竄擾情形疏

附請飭撥多營火藥疏

附請飭直隸山西山東協濟餉項疏

劉中丞奏議卷四

湘鄉劉 蓉著

奏報到任日期疏

同治三年四月初七日

奏爲恭報

微臣

到任日期叩謝

天恩仰祈

聖鑒事竊

臣

荷蒙

恩命簡放陝西巡撫本年三月十四日由漢中起程茲於四月初一日馳抵西安省城初三日准署撫臣張集馨飭委西安府知府呂雋孫護撫標中軍參將何九皋齎奉

王命旗牌及關防文卷等件移交前來當卽恭設香案望

闕叩頭祇領任事伏念臣材原蕪劣質本樗庸荷

九重特達之知膺三輔疆圻之寄感

隆施之逾格實夢想所難期關中地本名區古稱形勝自遘逆
回之亂遍遭焚掠之災村舍則千里爲墟人民則十室九絕烽
煙未靖旣休養生息之無期倉庫悉空覺勞來撫綏之乏術仔
肩甚重措手維艱計惟有勉竭迂愚躬崇節儉勸農積粟以裕
軍食之源嘗膽臥薪以勵屬僚之志庶期官箴克肅民氣潛蘇
東固潼商之防西嚴汧隴之守務內修而外攘期物阜而民安
於以薄效捐埃仰酬

高厚所有

微臣

到任日期除循例恭疏題報外理合繕摺具

奏恭謝天恩伏祈

皇太后

皇上聖鑒再按察使張集馨交卸撫篆後現已飭回本任合併

陳明謹

奏

官軍疊破賊壘克復場鎮疏

同治三年四月十二日

奏爲湘果彝字兩軍追剿曹逆疊破寨壘克復大莊坪文公梁等處村場大獲勝捷恭摺奏祈

聖鑒事竊臣於月之初二日曾將官軍連日追剿曹逆疊獲全勝現飭四面兜圍情形由驛奏報在案旋據記名提督蕭慶高

候選知縣黃鼎先後稟報該逆由古桑墩腰竹溝竄來卽盤踞大莊坪文公梁八里坪兩郎東嶽廟一帶意欲仍循新場一路逸出蕭慶高因該處路徑紛歧彝字營駐紮蒿溝僅能扼其東路其餘均有閒道可乘於是飭令各營繞由四畝地前進先防分竄洋縣佛坪石泉之路該處無糧可覓祇得攜帶包穀洋芋督率而進三月二十四日馳抵大莊坪適甯陝營參將謝正球領率團勇亦抵該處二十五日時甫黎明該逆蜂擁而來排列於卡邊山頭先是蕭慶高查看該處山勢崔巍溪溝皆環繞曲折該逆截修卡牆約高丈餘道路又復險仄我師不能齊進當派劉厚基率右營由藥鋪大路蕭德綱率中營由沙溝蕭德揚

率左營由七畝溝口毛尙陞率前營由七畝梁右蕭德見率副
中營由七畝梁左分道前進自率劉占鼇督親兵暨曾克勝馬
隊往來策應並令謝正球管帶兵團由梁子山隨後助剿剛抵
賊卡該逆卽施放鎗礮列隊於兩邊山巔冀圖鈔襲蕭慶高飛
飭各營連放劈山鎗礮數輪轟斃守卡賊二十餘名該逆拌死
抗拒相持兩時之久蕭慶高懸賞督催四面環攻誓以必破賊
卡踏平各壘然後歸隊各勇爭相衝殺以門板負攆礮石並用
擡鎗火箭火彈衝射轟斃悍賊約百餘人各勇攀山緣石喊殺
震天立將前卡攻破賊眾且戰且退我軍趁勢猛撲擊斃悍賊
三百餘人各營左右包襲賊勢不支紛紛奪路奔竄斃賊五六

百人餘賊悉向八里坪逃竄我軍追殺十餘里當將大莊坪克復生擒五百餘名解散難民四五百人奪獲騾馬三四百匹旗幟軍械多件我軍陣亡弁勇三十餘人此三月二十五日湘果中軍克復大莊坪踏破賊壘之實在情形也蕭慶高因該逆踞寨已久滾木檑石造備亦多我師從下仰攻衝撲不易飭令各營趕造護身木牌以擋礮石選派奮勇攜帶火彈火箭傳諭有能爬入山寨者予重賞初四日天色始霽分派各營偃旗息鼓以出既抵寨卡該逆尙無聲息因麾各勇搶上千金山該逆不意我軍驟至勢甚倉皇蕭德揚乘其失措由天池山梁左面馳驟而前用火彈火箭拋射燒斃悍賊十餘人各勇鎗礮齊施刀

矛繼進斃賊百餘人生擒僞統領先鋒六名該逆猶拌死抗拒
正相持間適劉厚基從天池梁山脊蕭德綱由天池梁左邊各
率所部前來兩面包襲殲斃悍賊四十餘名逆勢稍卻各勇乘
勢銳進斃賊二百餘人墮巖死者甚眾賊始奪路而下而毛尙
陞謝正球已督飭兵團將柳樹溝卡攻破左右截殺斃賊又二
百餘人東嶽廟諸賊見寨壘已失悉向兩郎奔竄維時各寨之
賊方將分路包鈔劉占鼇同蕭德見由雨泥溝截出先鋒馬隊
彭緒慶同龍聲洋從沙嶺撲來左右夾擊斃賊又約三百餘人
生擒僞先鋒八人其近兩郎各寨礮石如雨幾有難於施手之
勢蕭慶高因見逆隊已不相聯復飛飭各營用木牌猱伏而上

該逆將木石亂擊各勇旋撤旋進四面圍攻鎗礮之聲響震山谷我軍得勢衝撲斬馘二千餘人奪獲騾馬五百餘匹立破大小寨壘十餘處自此場上之賊不復戀戰各勇一齊趕殺當將兩郎場克復殘逆悉向秦嶺緣山而奔日已傍晚我軍始行收隊此初五日湘果中軍克復兩郎東嶽廟黑龍等處村場大獲勝仗之實在情形也先是該逆於文公梁八里坪一帶循巖沿澗修築石卡周圍里許截斷山腳層牆疊壁殆逾堅城左右山巔列布大營十餘處曹逆踞爲老巢爲據險固拒之計黃鼎以與湘果營相距百里而遙約剋期同進以殺其勢而文公梁又不可以力爭也乃於是日派訓導張玉文帶副左右後三哨從

嶺溝口繞出文公梁之後而自同候選訓導廖溥明帶正營四
哨分路從兩面山梁鈔下副前哨直攻中路約以火箭爲號四
路進擊黃鼎行抵梁卡賊眾數百鎗石滾木紛如雨下籐牌衝
抵卡門賊方死拒前面一路黃鼎施放火箭相持張玉文飛分
三路從背鈔出左右兩面山梁隊伍一齊衝下斬馘數十人餘
賊進退無路悉皆捲旗棄械跪地乞命黃鼎飭令差弁押往後
隊薙髮遣散乘勢揮隊分路進攻連焚賊巢二十餘處追斬數
十人賊悉退入石卡據險死拒左右兩面賊壘各出隊千餘站
立山梁我軍從中路衝撲回合數次卒不得進黃鼎督令正營
四哨從左右兩路鈔下賊陣稍動親兵大旗乘勢衝入籐牌副

營四哨齊爬入卡擊殺偽統領先鋒數人斃賊百餘人左面隊
伍乘勢搶上賊壘拋擲火包燔燒右隊亦趁勢撲入賊營團首
武生伍春聯貢生尹步吉帶團二百餘人從沙溝馳下列隊山
梁賊遂大敗我軍三路追擊連踏該逆大營五座木城石卡十
餘重斬馘一百餘人拋棄旗幟器械騾馬狼藉徧地直至紙廠
地方曹逆親督死黨將賊隊堵回據廠下堅壘屹立不動而廠
上山巔大營諸逆出隊站梁麕集五六層張玉文督率各勇直
撲下游賊營廖溥明督隊由嶺繞出賊梁之後立將賊營焚燒
前次投誠之偽統領陳占雄揚旗大呼招降棄械來歸者約一
二百人黃鼎復派隊排列山腳正左哨同籐牌分路爬越而上

礮石如雨籐牌冒石直衝士卒隨之軍功李玉春首先上梁連受石傷挺矛直上噴筒火箭齊施賊遂棄營爬山越嶺而奔我軍追殺約七八十人立將賊營焚燬張玉文望見賊營火起督隊吶喊副將黃友忠策馬直衝親兵大旗排矛駛進四面撲近軍功黃冕爭先拔柵上牆賊遂大奔陣斬逆弟曹六都統及僞先鋒一名悍賊七八十名直追至八里坪街場連踏賊營六座擒殺老賊百餘人救出難民二百人投誠者又二三百人陳占雄率其降黨當先大呼直逼曹逆所踞老巢分路將街場圍鈔軍功徐占彪先搶入場曹逆見事勢已亟率僞統領先鋒數十人穿場奔出徐占彪持矛追及場頭中澇口河岸僞楊統領回

身迎拒被徐占彪挺矛刺斃曹逆踉蹌上馬未及旋轡徐占彪迎脇一矛戳墮下馬羣賊拌死救護悍黨數人掖之以行維時我軍追及者爲數無多對河兩岸之賊業已鈔至以勢孤不敢前進及我軍後隊趕至則該逆之去已遠餘賊折橋憑河死拒水深路絕無從繞追當就賊巢中搜獲甯陝廳江口主簿及甘肅秦州三岔鎮州判關防印信各一顆偽軍機大臣銀印一顆曹逆偽印一顆偽都統統領印三顆金冠蟒袍及銀製鞍鐙各數事火藥硝磺旗幟器械糧食騾馬無數我軍受傷僅十餘人此初五日彝字營攻克文公梁八里坪一帶焚燒賊巢殺傷首逆之實在情形也伏查曹逆疊經我軍擊敗之後復聚黨至萬

餘之多始圖仍循新場一帶逸出繼則築壘修卡綿亙百餘里
爲扼險久踞之計幸我軍奮勇爭先兩路齊進合計焚燬巢壘
克復場寨不下三十餘處旣破老巢幾殲元惡餘賊不過五六
千人其勢窮蹙之至現在竄踞寨壘尙有數處業經嚴催各軍
四面兜擊似此釜底游魂計日可收聚殲之效惟彞字營勇丁
僅逾千人馳驅深山窮谷之中歷時兩月之久兼值山路崎嶇
人民逃散無從購買米糧各弁勇宰割騾馬雜採野菜以食或
竟日不得一飽其艱苦實異尋常卒能忍飢耐勞跟蹤躡躩屢
獲勝捷使該逆喘息不遑前此藍逆由藍屋潰竄之時圖與曹
逆合併賴該軍截勦於七里溝刺溝懶板橙等處擊散全股以

故藍逆窮蹙卒爲團練所殲綜計前後勞績實非平常出力可比合無籲懇

天恩俯念該軍備厯艱辛准予先行獎敘五品銜候選知縣黃鼎請以同知直隸州知州畱於陝西儘先補用並請

賞戴花翎候選訓導張玉文請以知縣歸部卽選並懇

賞戴藍翎副將黃友忠請以總兵補用花翎參將曾新茂陳攀仙請以副將儘先補用花翎遊擊趙雲鳳請以參將儘先補用藍翎守備劉國富請以都司儘先補用並

賞換花翎把總李玉山軍功徐占彪均請以千總儘先拔補並賞戴藍翎其餘在事出力員弁容俟事竣後擇尤保獎臣爲激

勵軍心體恤將弁起見是否有當伏候

聖裁除將奪回關防印信暨偽銀印飭存司庫外所有官軍追
勦曹逆焚燬賊巢殺傷首逆各緣由理合恭摺由驛馳奏伏乞
皇太后

皇上聖鑒訓示施行謹

奏

會奏統兵大臣因傷出缺疏

同治三年四月十五日

奏爲統兵大臣因傷出缺現將身後一切派員妥籌料理情形
恭摺會奏仰祈

聖鑒事竊臣 蓉前於晉省之便繞赴盤屋察看多隆阿受傷甚

重病勢垂危莅省後卽與奴才德興阿暨在省司道豫商布置各事宜不時派弁前往看視嗣接穆圖善等來函均稱病勢較前輕減臣等方冀日有起色得以轉危爲安詎十四日酉刻據幫辦營務候補知縣舒之翰等稟報十一日該大臣遷移附營之孫家堡後頗有轉機忽於十二日夜子刻病轉增劇十三日未時遽爾溘逝聞信之下驚悼難名伏思多隆阿轉戰數省忠勇絕倫惟能親冒矢石是以將士勇於用命上年陝回倡亂精華地方悉被蹂躪幸賴多隆阿督師前來節節掃盪始得境內肅清不意因攻盩厔小城竟爲賊鎗所中遽爾不起聞鼓鼙而追憶實悼惜以同深臣等現派卸署按察使候補道官銘前往

隨同穆圖善將其身後一切妥爲經畫擬俟棺殮既畢卽將靈柩搬移來省以便經理喪事俟其子雙全到秦再爲料理啟程護送回籍該大臣宣力有年功烈丕著所有應得卹典計必渥荷

特恩優加

異數無庸臣等更爲陳請惟陝省回氛迅掃功在地方應請於省城建立專祠按時致祭以慰忠魂其所部各軍現經臣咨咨催穆圖善恪遵疊次

諭旨分派姜玉順蕭河清等帶領馳赴鄂豫兩省助勦髮捻巨股以靖逆氛除將餘存各營會商穆圖善妥籌布置外所有多

隆阿因傷出缺緣由理合會銜馳奏伏乞

皇太后

皇上聖鑒謹

奏

附請俟多軍出境卽行出省督勦疏

再多隆阿靈輓已於二十二日由蓋屋料理行抵省城穆圖善亦率領所部姜玉順等馬步二十一營陸續來省駐紮距省二十里之灞橋地方云因南山一帶路徑仄小擬並出潼關大路分三幫起程前進查多隆阿舊部本多梟悍桀驁之倫不可盡束以法自該將軍淪逝之後眾心肆然附近居民頗多遷避當

哀鴻甫集瘡痍未起之餘誠不可再增驚擾現經臣商請穆圖善督催各營迅速拔發俟其次第起程臣亦隨卽出省或逕趨潼商或先赴鎮安容俟酌量緩急情形再行奏報謹先附片陳明伏乞

聖鑒謹

奏

官軍生縛渠魁肅清陝南疏

同治三年四月二十三日

奏爲官軍連日分路追剿曹逆生縛渠魁並將餘匪按捕淨盡陝南一律肅清恭摺奏祈

聖鑒事竊

臣

於十二日曾將彝字湘果兩軍追剿曹逆疊破寨

壘暨殺傷首逆各緣由奏報在案。壘據記名提督蕭慶高候選知縣黃鼎先後稟報該逆自我軍克復大莊坪文公梁等處村寨之後時值雨雪迷漫我軍驟難進攻該逆遂將兩澇八里坪各寨攻破大獲糧食沿山修築石卡密紮營座以禦官軍。初六日蕭慶高分派弁勇以一營由兩郎以五營由澇西坪分路前進該逆憑卡施放鎗礮我軍負木牌擋禦用劈山擡鎗轟擊數輪立斃守卡賊十餘人奪卡而入該逆見我師已逼卡下負嵎益固滾木檣石紛擲如雨蕭德見劉厚基督率援攻並用火箭噴筒射入寨內燒賊數十名該逆不肯稍卻亂石拋擊更密於前我軍陣亡多名受石傷者不計其數相持約半時之久適蕭

德揚蕭德綱從後路攀巖而來兩面夾擊該逆抵禦不住或墮崖而走或跪地乞降各勇一齊搶上寨內悉數殪之其墮崖者經毛尙陞從平溝馳撲而來左右截殺斃賊百餘人中峯壘之賊見各寨已失整隊蜂擁來援蕭慶高同劉占鼇率親兵由澇左撲截彭緒慶同龍聲洋率馬隊由澇右遶出兩路鈔襲斃賊三百餘人甯陝營參將謝正球率團首伍官聯等各帶練勇從中澇直出四面兜剿殪賊無算各壘之賊退入寨內惟以礮石下擊負嵎不出蕭慶高飛飭各營分起攻擊傳諭棄械者免死當招降二百餘人焚燬大小巢穴十餘處適彝字營黃鼎率隊前來會商圍攻大寨攻撲三時之久勇丁被礮石傷亡者頗多

正催進間倏天雨如霰各勇均已疲乏始商令於寨下暫行休息蕭慶高以功在垂成未便收隊回營致該逆奔入老林勦辦又形棘手於是激勵士卒懸立重賞親督各軍冒雨鷲立是夜三更後僞都統梁老大帶隊迎衝經蕭德揚悉數生擒正法初八日黎明各勇拌死搶上將寨攻破斃賊四五百人生擒僞巡捕都統數人解散千餘人弋獲曹燦章之妻魏氏藍大順之妻潘氏張僞統領之妻周氏藍四都統之妻游氏帥僞統領之妻王氏解散裹脇難民婦女數百人奪獲輜重馬匹甚夥寨內之賊擒斬無遺訊據逆婦與各逆供稱是夜四更後有逆黨百餘人由石巖無路處用繩索縋下天明後卽不知曹逆所在等語

蕭慶高隨派蕭德揚蕭德綱由老扒右手劉厚基毛尙陞由老扒左手曾克勝蕭舉臣由銀洞溝山梁謝正球由老鷹巖前進自率親兵隊由老扒山梁隨後策應十一日追及於紙廠梅坪地方該逆炊煙正熱不意我軍驟至接浙而奔截殺八百餘人生擒者千計並獲偽統領先鋒董黃陳李孫楊等逆目十餘人餘逆爬山狂奔我軍乘勢窮追適鄆縣知縣張杰督團由山口截來前後夾擊殪賊又不下數百人其由澇谷口奔出者經姜玉順督率各營迎前截殺逆目黃大純孫仲元等計無復之各率其黨先後詣該營乞降其餘長髮老賊悉向老林逃竄當經蕭慶高督飭弁勇四山搜捕凡駱峪澇峪紙廠蔡家坡一帶山

洞藏匿之賊擒斬無餘此初六至十二等日湘果中軍由兩郎
澆西坪追擊曹逆屢獲大勝揆捕餘黨之實在情形也其黃鼎
一軍以初七日督隊由八里坪進兵攻打廟溝口砦壘該逆拋
擲滾木檣石勢不得近山巔之賊約千餘人又將鈔出我軍之
後黃鼎急派副營右後兩哨飛從八里坪後分路上梁截之斬
馘四十餘人賊始奔回老林黃鼎自帶籐牌親兵前左兩哨以
攻其前張玉文督隊攻其後廖溥明率正右後哨分將鎗礮左
右環擊商令江口主簿李家楨貢生尹步吉等各帶團練烏鎗
手三路壓梁而下立破賊卡甫抵寨門礮石如雨黃鼎肩脇連
受石傷軍功黃冕爭上寨門復被檣石擊傷胸面而後面一路

亦拔賊卡兩重哨長盛茂田得勝等各受鎗傷陣亡勇丁數人
我軍愈憤擡礮小鎗連環轟擊斃偽巡捕一人偽先鋒四人老
賊七八十名該逆負固死守擲石下擊加以天雨泥滑不利仰
攻遂將隊伍分扼四圍要路以困之天色將曙該逆纒人下告
偽統領陳占雄願舉寨納款投誠黃鼎訊知曹逆責夜縋逃之
信一面派人料理投誠賊眾一面帶同陳占雄引隊跟追四山
按剿雲霧漫迷而太平峪一帶老林擊散之賊多或三四百人
少則數千百人潛伏林中凡十餘處均經洗剿殆盡廟溝口不
左右兩面山梁尙有賊踞寨壘兩所各屯數百人黃鼎派令哨
長李玉山徐占彪分往宣諭投誠於是偽梁都統及王統領先

後焚巢率眾來降共計雜髮遣散者一千二百五十四人旗幟
刀矛如數繳毀黃鼎隨接蕭慶高函商澗峪口一路既有姜玉
順帶隊扼堵該逆不能竄颺應分軍一由兩郎掃盪而右一由
八里坪掃盪而左以擒首惡而靖餘孽黃鼎當派黃友忠帶正
副隊伍五成由刑家嶺太平峪高關峪風峪一帶按勦而下期
與湘果各營會合而自率張玉文帶五成隊由鐵鎖橋子午峪
一帶廖溥明帶親兵協同團練由蒿溝鐵牌溝一帶按勦而前
連日解散零星殘匪十餘股共計七百五十六人十三日黃友
忠行抵煤廠太平峪山梁有賊七八百人麇聚其間當卽分隊
圍鈔斬殺甚眾並令投誠之陳占雄搖旗招呼悉棄器械跪地

乞命均經薙髮遣散此彝字營由八里坪進擊連日分路追剿
解散之實在情形也各路逆黨搜捕既盡而逆首曹燦章卒未
能獲訊據生擒賊供或稱已被我師殲於梅坪或稱吞服金環
自盡或稱刎頸自斃然遍尋賊屍辨認卒無實在下落最後得
一賊供稱該逆以按剿既急密約親信黨羽百餘人薙髮向東
潛遁意圖竄伏老林俟官軍退後逃入川疆再圖大舉等語於
是蕭慶高傳諭各營無論該逆竄入何地誓必擒斬渠魁而後
旋師一面飛移盤屋郿鄠各縣趕派團丁嚴防要隘一面懸立
千金重賞挑選各營精銳勁卒各數十名一由甘田峪以截其
前一由黑龍溝黃草坪以躡其後而自率親軍就各處深巖潛

整挨次接求十四五等日蹤尋無獲十七日行次周家溝倏聞該處玉皇廟山窩有官軍數百人屯聚一區劉厚基率勇突至該逆驚惶失措仍敢據隘抗拒適蕭德揚率隊踵至四面圍攻當將曹逆生擒餘逆奪路奔竄又經蕭德綱毛尙陞曾克勝謝正球等一齊趕至前後夾擊擒獲僞統領先鋒二十餘人訊明正法餘黨搜斬淨盡無得脫者伏查此股逆匪自滇省起事以來蹂躪四川陝西甘肅各地方已五六年嘯聚黨羽三萬餘眾蔓延南山老林之中此勦彼竄大爲川陝肘掖之患茲幸湘果彝宇各軍忍飢耐寒連月攻勦得以俘獲元兇肅清全股洵足快人心而伸

天討現經蕭慶高檻送曹逆來省除由臣會審明確恭請
王命凌遲處死並將首級傳示受害各地方用昭炯戒外竊查
湘果中軍以川省援剿之師自漢陰折轉履險擊賊前後克復
大莊坪東嶽廟兩郎黑龍溝中澗口八里坪雨泥溝千金山等
處村場數十餘處踏平寨壘八十餘所冒雨追剿不遺餘力閱
月累旬跋涉窮谷周歷約七八百里之遙用收合圍聚殲之效
陝南軍務以次肅清實屬異常辛苦懋著勤勞所有在事尤爲
出力人員相應奏乞

恩施先予獎敘儘先提奏總兵蕭德見記名總兵劉厚基蕭德
揚毛尙陞等四員均請

賞加提督銜升用總兵謝正球副將彭緒慶均請

賞給三代一品封典卽選知府蕭德綱請以道員歸部儘先選用同知銜候選知縣劉占鼇請以同知直隸州知州儘先選用候選訓導廖溥明請以知縣儘先選用卽選從九龍聲洋請以府經歷縣丞儘先選用至儘先題奏提督蕭慶高官階較大可否

特加賞賜以示優獎之處出自逾格

鴻施其餘在事出力員弁容俟臣會同四川督臣駱秉章查明彙案保獎以示鼓勵所有官軍連日追剿曹逆生縛渠魁並將餘匪搜捕淨盡陝南一律肅清各緣由理合恭摺馳奏伏乞

皇太后

皇上聖鑒訓示謹

奏

蔡逆被勦西竄派兵堵擊情形疏

同治三年四月二十三

奏爲蔡逆被勦西竄謹將官軍追勦暨派調各營堵擊情形恭摺奏祈

聖鑒事竊

臣

前因蔡逆股匪盤踞洵陽之蜀河雙河一帶當於

藍逆伏誅後咨催四品京堂李雲麟迅率所部進攻茲准該京堂咨稱該軍於三月十二三等日辦齊米糧後陸續拔營二十日齊抵蜀河先是該逆因雙河口迤北之龜山寨爲與郡商富

避亂之所財貨充物其中該逆於官軍未到之前盡力圍攻既聞大軍東下攻撲尤急開挖地道三處將次穿透李雲麟因此寨資財既厚儻爲所得則賊糧愈充勦辦愈難得手卽於二十二日密飭隴軍歸化營緣山夜行遶出賊後一面飭隴軍正後暨毅健中前營進紮三官廟一帶二十三日夜歸化營兵抵焦山乘賊不備戮力衝殺擒斬老賊百餘名焚燒賊壘兩座遂解龜山之圍奪獲賊糧百餘石該逆不知虛實遂於二十四日五鼓時全股東竄是時前面三營見賊已動卽出隊迎擊後路各營亦續至截勦賊因我軍由蜀河齊進前後夾擊無路可奔遂悉其悍黨萬餘抵死抗拒自辰至酉鏖戰五時之久殺賊數百

名我軍亦間有傷亡二十五日該逆東竄鄖西關防鋪一帶二十六日我軍由圓樹埡龍家河兩路躡剿該逆料官軍必將追逐豫伏悍賊數千於四山破過民寨之內我軍急不能攻遂行收隊二十七日該逆前隊逼近甲河意圖搶渡李雲麟卽派左右兩營前往堵禦一面將藍逆授首全股撲滅並投誠免死各緣由廣張告示以解眾心而散脇從現在賊中頭目情頗渙散長髮老賊投出者甚眾僉稱該逆因聞藍逆授首之信自知勢孤急謀回川傳誓賊眾謀與官軍決一死戰儻能得志仍圖由甲河一帶渡江經二竹以趨夔萬併於尖山寨關防鋪一帶修築卡壘以禦官軍李雲麟移師往勦因連日大雨火攻不利未

能出隊四月初五日天色晴霽遂親率飛捷正後五營由仙河龍家河兩路進剿而先飭都司劉太富由藍河潛襲其後該逆率眾分途抗拒勢甚猖獗鏖戰兩時之久因見官軍伏兵繞出其後該逆始紛紛敗退我軍乘勢掩殺追過二十餘里始行收隊該逆卽於次日五鼓冒雨東竄據逃出之人供稱蔡逆探悉興安上下俱有重兵其勢不能偷越圖由鎮安竄由甯陝老林會合曹逆竄佛坪趨褒沔南出昭廣以逞回川之謀等語並據鎮安縣知縣王兆慶稟報蔡逆經李京堂擊敗之後狂奔西竄現已闌入該縣大小心川並將小心川附近一寨攻破懇請派兵截剿前來伏查李雲麟一軍僅能追剿一面而該逆擁眾近

三萬之多設使竄過漢江則川陝之蔓延滋甚再四熟籌惟有將該逆逼趨鎮安合圍痛剿鎮安野無可掠賊所裹脇之黨半多該縣之人毆之還鄉勢將不戰自散則擒渠之效指顧可期現經臣移行湘果中軍蕭慶高彝字營黃鼎卽移得勝之軍分扼江口一帶截其上竄之路而以湘果右軍何勝必之師由麻坪河橫趨而邀擊之復飭候選知縣劉精管帶由南新募來陝之雄毅兩營馳紮鎮安東路會圍堵截仍催李雲麟各軍相機進攻迅收夾擊之效曹逆股匪現復殄滅淨盡該逆之勢愈孤其膽益落儻仗朝廷威德諸路如算計不難聚而殲旃至駐防商州之藍斯明

一軍現經穆圖善遵

旨派赴河南該州毗連楚豫防務未可稍疏臣現派委候選從九鄆太愚督率副將洪輝堂等由南新募之鎮西三營馳往換防扼要堵禦以昭嚴密而固邊陲所有蔡逆被剿西竄現派各營堵剿情形謹會同候補四品京堂奴才李雲麟恭摺馳奏伏乞

皇太后

皇上聖鑒訓示謹

奏

附覆陳奏報情形歧異疏

再臣欽奉四月初七日

諭旨張集馨前奏曹燦章股內偽統領游飛熊等赴甯陝廳投誠又折回該廳之腰竹溝續又由洵陽竄至鄠縣之澇峪口賊眾增至二萬餘人等語何以與本日劉蓉摺內所奏各情參差不符澇峪口是否卽澇谷口並著劉蓉仍遵前旨查明具奏等因欽此查曹逆於三月初由佛平竄往安康鎮安之間圖與蔡逆合股旋因官軍四集懼而上竄蔓延於穆王坪楊泗廟腰竹溝高觀場洵陽壩金雞兩河等處前後絡繹該逆偽部向分乾坤東西南北六大軍各設偽都統以轄之每軍各置偽統領十餘人分領其眾其具稟赴甯陝廳投誠之偽統領游飛熊等特

其部落中之分支小股眾不過數百人經該廳署參將謝正球就賈家營地方點驗遣散而大隊仍由楊泗廟腰竹溝等處狂竄旋屬聚於八里坪文公梁一帶踞爲老巢游氛四布遂及於鄆縣所屬之東流水澇峪口等處澇峪卽係澇谷而洵陽壩地屬甯陝與腰竹溝相去不遠非洵陽縣也前署撫臣張集馨彙報賊情但據該廳縣探稟情形具奏未及詳晰聲敘是以與前奏稍有未符致勞

宸廑謹附片查明覆陳伏乞

聖鑒謹

奏

逆匪合併逼近省城布置堵剿情形疏

同治三年五月初九日

奏爲髮逆後股被剿回竄現與蔡逆合併逼近省城謹將堵剿布置情形恭摺奏祈

聖鑒事竊臣前因蔡逆敗竄鎮安曾將分布剿辦事宜由驛奏報在案旋據候選主簿李百魁稟報該員率所統英毅六營越境追剿髮逆既踰荆紫關入浙川境內適值偽啟王梁成富偽天將馬仕榮倪隆淮中旂范立川等大股被僧格林沁派兵擊敗仍圖回竄荆紫關四月初七日我師馳抵馬家巖正值該逆在村內炊食因見官軍驟至嘯眾抗拒我軍排隊吶喊而進鎗礮齊施回合數次總兵劉玉興蕭祥勝各率隊奮力猛撲該逆

始行奔竄我軍趁勢急追沿途殺賊百餘名衝散逃出者數百
名奪獲旗幟鎗礮各數十件騾馬三十餘匹我軍受傷二十四
名十一日馳抵趙家川賊卽橫竄金家坪鄖西屬之紅廟子八
道河等處李百魁派參將王九齡蕭玉田李成一率中營由大
路繞進陳賢元袁泰興率後營由城牆了小路直鈔紅廟子之
後蕭祥勝劉玉興由後路策應於是金家坪之賊悉退踞紅廟
子排列抗拒正相持間袁泰興等從後鈔出該逆駭奔我軍兩
路齊進斃賊數十名生擒十六名蕭玉田直抵八道河該逆憑
卡以拒竄夜潛逃各營越卡躡追維時該逆前隊已將鄖西縣
城圍攻三晝夜之久十四日我軍由長岡嶺分三路並進適統

領湖北撫標凱軍梁作楫由縣南來援四面夾擊當將東北城外賊館焚燬十數處隨即搶上後山悉將賊壘平燬斃賊甚多該逆勢不能支豕竄狂奔我軍四面追殺共殲賊一千餘人生縛一百餘人救出難民二千餘人奪獲器械馬匹無數我軍亦傷亡數十人賊眾悉向土門一路奔逸城圍既解李百魁派隊尾追鈔至王家觜廖家坎等處截殺賊數百名梁作楫亦派凱字前左各營會同追至土門匯河地方始行收隊此四月以來英毅軍追剿髮逆獲勝立解鄖西城圍之實在情形也蔡逆自被李雲麟擊敗之後由雙河一帶竄赴大小心川李雲麟當派所部五營裹帶行糧取道鹽店峽跟蹤追剿初八日擊之於關

防鋪初九日擊之於二天門初十日擊之於戴福嶺連日接仗
壘有斬擒十二日我軍齊抵茅坪分毅健前後兩營進紮十八
盤逼賊而壘該逆偵知官軍不多遂於十六日傾巢而出將該
兩營重重圍裹彌漫山谷蔡逆親率悍賊徑撲前營我軍據壘
開礮轟擊自午至酉斃賊二三百人屍積濠邊賊不稍退李雲
麟急調歸化歸義各營疾馳赴援是夜四鼓月色方明都司戴
茂林蕭紹榮同樊遇春等各率本營之眾偃旗息鼓從山溝中
分三路暗襲賊隊大呼突入賊眾惶擾都司賈吉齡帶領所部
由將臺嶺衝擊而下銳不可當於是山頭之賊自相踐踏墜落
崖谷者不可勝計兩營知援師已至亦從壘中奮勇殺出內外

夾擊斃賊約近千人該逆悉數敗回老巢此李雲麟追剿蔡逆
疊獲勝捷之情形也臣前於擒斬曹逆之後以蔡逆盤踞大小
心川意圖西竄當卽咨行記名提督蕭慶高知州黃鼎等以所
統湘果中軍彝字營分紮漢陰甯陝江口三處嚴防該逆上竄
之路並飭候選知縣劉精帶所部雄毅軍駐紮鎮安東路而檄
湘果右軍由麻坪河橫趨以赴之該逆徘徊旬日方逡巡卻顧
而不敢前適聞啟逆回竄土門潛相勾結於是梁成富馬仕榮
倪隆淮范立川諸賊目遂由上津竄赴小心川與之合股羣逆
既會凶焰乍張臣比飛檄李百魁率英毅六營繞赴山陽以資
截擊而咨商穆圖善速飭姜玉順所統十營趁赴鄂之便卽由

鎮安掃盪而前詎意該軍弁勇以彼處路徑仄小米糧艱貴悉由潼關大道聯隊以行該逆既偵知此路空虛而上游業已有備遂謀由鎮安旁竄孝義以期繞赴漢南遂其窺伺川疆之計二十六日由崖渥河悉眾西竄劉精率所部雄毅軍八百人迎擊於何家寨眾寡遠不相敵鏖戰逾時陣亡勇丁一百一十九人藥丸垂盡賊至愈多卒以敗潰該逆遂由大坪出鳳凰背北趨孝義行走剽疾五月初三日已出大峪口踞距省五十里之尹家衛一帶地方臣當檄記名總兵彭基品楊得勝李萃林等率所部親兵二千並咨商署西安將軍奴才德興阿撥金順所帶馬隊二起前往迎擊初四日各派八成隊分三路前進該逆

悉眾迎拒排列峪口其旅若林我軍恃銳猛進衝撲數四賊陣
堅不可動該逆既據上峯其眾十倍於我我師列在平地勢本
單薄賊知師無後繼輒布長圍左右包繞十餘重守備李續傑
奮勇衝突登時陣亡百長陳宏勝劉義和及各弁勇帶傷死者
四五十人幸金順馬隊突至內外夾勦始將該逆擊退初六日
彭基品等仍復整隊前趨自辰至午該逆負嵎不出我師直逼
其壘始分三路出巢相持良久互有殺傷終以賊黨太多又據
地勢上游未能得手臣飭彭基品等就距省二十里之鮑背地
方築壘扼拒一面飛飭湘果中軍彝字營由漢陰江口出子午
峪擊賊之右檄李百魁率英毅六營由山陽出藍田口擊賊之

左擬俟諸路畢集兵力稍厚卽爲一鼓克敵之計該逆於昨初八日潛竄鄆長交界之秦渡鎮梁家橋一帶據生擒逆匪閻欣隆等供稱該逆現謀逕犯省垣如不得逞卽仍回竄漢郡圖擾川疆等語伏查僞啟王梁成富本屬著名渠魁馬仕榮係屬陳玉成餘黨范立川係屬石達開餘黨均皆驍悍善戰雖經敗挫黨與仍復繁多茲又勾結蔡逆其燄愈張若不趁早殄除勢將蔓延爲患除催調湘果英毅各營並咨商穆圖善將近在潼關一帶之後起赴鄂兵勇飛調來省協力勦辦以靖逆氛外現在省城人心安堵如常臣仍督飭司道嚴密稽察城門照常啟閉堪以仰慰

聖懷所有髮逆被剿回竄現與蔡逆合併逼近省城謹將一切堵剿布置詳細情形恭摺由驛馳奏伏乞

皇太后

皇上聖鑒訓示謹

奏

附陳布置湘果各軍疏

再臣前奏請以湘果兩軍駐紮興安原以防髮逆被剿回竄之路今扶逆陳得才等既已東竄隨棗德安一帶經鄂豫大軍協力剿辦必可迅期掃盪無復反顧之憂啟逆與蔡逆合竄秦中將來一經痛剿勢必仍趨漢南圖竄川境臣現以兵力太單急

約蕭慶高所部來省會勦擬撥何勝必之湘果右軍逕紮漢中
分防城固洋縣華陽褒沔一帶並咨請李雲麟分軍扼防石泉
甯陝漢陰各隘以遏該逆下竄之路而派澄漢水師梭巡漢江
以防偷越儻諸路併力同心當可將該逆逼入南山痛加勦洗
終收擒渠殲醜之效除分別咨會辦理外理合附片陳明伏乞
聖鑒謹

奏

附請飭鄰省照常撥餉疏

再陝省自大兵進勦髮回各逆向賴鄰省協餉以資接濟近因
軍務漸次肅清各省均已停解此次髮滇各逆竄近省城飛調

各路官軍不久即可雲集而司庫萬分支絀一空如洗深恐餉
糈匱乏難期枵腹荷戈比所以不敢多置防兵皆由餉無來源
之故一聞警報束手仰屋現與藩司林壽圖等百計籌商徒深
焦灼可否仰懇

皇上天恩飭下鄰近各省仍行照常酌撥隨時協濟前來以應
急需而全大局不勝懇切待

命之至謹

奏

附請飭山西撥濟火藥疏

再陝局製造火藥向因本地不產硝磺須由山西各屬採買既

費周折彌增繁費每至前竭後空刻當防剿喫緊需藥浩繁而局存新舊各藥自經多隆阿軍營屢次提用後節復運解雷正縮曹克忠陶茂林等營內兼供商雜各隘防軍之需應用既多先後儘數起解省局現遂無存即使趕緊製造而硝磺刻難採辦實屬緩不濟急或致有誤軍機查晉省現屬完善之區素篤鄰封之誼計惟就近借撥尙可藉應急需應請

敕下山西撫臣沈桂芬迅飭蒲州府支應局籌撥火藥五萬斤配搭火繩卽行委員分起運解兼程來陝以濟要需臣一面督飭局員趕卽採買趨辦以期應用不匱謹附片陳奏伏乞

聖鑒施行謹

奏

會奏暫畱赴鄂後起馬步會剿疏

同治三年五月初九日

奏爲暫畱赴鄂後起馬步各營會剿髮滇兩逆以期迅殄賊氛
恭摺會奏仰祈

聖鑒事竊查髮逆僞啟王等勾結蔡逆逕由鎮安孝義一路竄

出山口逼近省城節經派兵堵截連日接仗情形業經臣劉蓉

具奏在案伏查該逆等均因挫敗情急合謀狂竄抵死突奔其

勢頗爲兇悍非厚集兵力四面兜圍難以迅期殄滅而省垣存

兵僅止撫標親兵二千餘人實屬不敷分布奴才穆圖善部下

金順所帶馬隊兩起前經奏畱西安茲復欽奉

諭旨西安省垣現已安堵如常無須多兵防守所有金順馬隊
仍著穆圖善飭令前赴都興阿軍營等因欽此欽遵之下適值
該逆紛竄省防頓形喫緊奴才德興阿等屢次會商深恐兵力
太單未能嚴密扼剿致滋蔓延因將金順所帶馬隊畱陝助剿
迭經合力堵戰尚未奏功緣此項馬隊爲數僅四百名連撫標
各營仍覺未能敷用查奴才穆圖善派赴鄂省之孟宗福黃金
山等步隊六營甫經陸續起程由潼關取道而進去省亦尙未
遠因思該軍赴鄂原係剿辦髮匪現值僞啟諸逆闌入陝省腹
地自應就近截畱會剿以期迅蕩妖氛庶襄郿無西顧之憂而
東路鄂軍亦可專力攻剿無復牽掣之慮於秦鄂軍情兩有裨

益且姜玉順蕭河清藍斯明等管帶各營均已先期馳往計日
 即可抵鄂楚北增此兵力亦足以資調遣奴才等再四籌商意
 見相符已飛調孟宗福黃金山等步隊六營趕緊折回星馳赴
 省以便協籌勦擊迅掃狂氛奴才穆圖善疊奉
 諭旨催速赴鄂已定期初六日起程前進茲值局勢稍異又不
 得不暫為停畱現在省中城守事宜均經臣等逐一妥籌布置
 人心尚屬安靜臣等忝膺重寄責有專歸奴才穆圖善志切同
 仇義難膜視自當殫竭血誠同心協力斷不敢稍涉疏虞上煩
 宸廑所有會商暫畱赴鄂後隊馬步各營會勦髮滇兩逆以期
 迅殄賊氛緣由理合合詞具奏是否有當伏乞

鄂中兵義卷四

三

皇太后

皇上聖鑒訓示施行再

奴才

穆圖善一俟會剿得手省防情形

稍鬆卽仍遵前

旨帶兵赴鄂斷不敢少事遷延致滋咎戾合併陳明謹

奏

逆匪被剿奔竄尅日督軍剿辦疏

同治三年五月十九日

奏爲滇髮兩逆被剿奔竄連日追擊獲勝現籌分路截擊並尅日親督各軍剿辦情形恭摺奏祈

聖鑒事竊臣前因蔡逆句通髮逆後隊竄逼省城業將堵剿布置情形由驛奏報在案旋據探報該逆經我軍屢次進擊之後

狡逞計窮零星潛竄分擾子午鎮一帶初八夜大股亦遂西奔
總兵彭基品卽派中前左三營躡尾接追而自率親兵各哨疾
趨長安之杜曲鎮以防北犯復知會記名副都統金順督率馬
隊縱橫鈔截初九日追及逆蹤於灃河東岸之興隆鎮金順派
隊三路鈔進奮呼衝突該逆紛紛敗潰陣斬六七百名追至灃
河該逆泗水奔逃淹斃不計其數解散裹脇難民五六百名生
擒一百餘名該逆復在灃河西岸排列抗拒鎗礮對施馬隊暫
駐東岸該逆大股卽踞紫河邊之秦渡鎮餘黨布列十數村正
在打糧造飯適彭基品統帶親兵馬步各營渡河疾進見該處
樹木叢翳出其不意麾軍四面喊吶殺入該逆驚惶失措首尾

不復相顧或傍南山或趨梁家橋四散狂奔我軍乘勢鈔擊傷斃多名左營楊得勝生擒長髮老賊五名中營王謨奪獲旂幟多件因日晚未便深追暫紮距鄆縣七里之吳家寨是夜探聞該逆已竄踞鄆縣西南兩關意圖攻撲縣城彭基品當傳令於五更拔隊前進黎明馳抵東關該逆正在城外嘯聚因見我軍猝至急將隊伍分布排向西南一路縣互十餘里勢若長虹彭基品察看地形立調楊得勝王謨謝正球左宏達等帶領親兵馬步各隊三面夾鈔彭基品大呼陷陣兵勇銳氣百倍鏖戰半時該逆力不能支紛紛敗入澗峪口傷斃悍逆二百餘名投誠三十餘名救出難民六十五名生擒十九名楊得勝並擒獲僞

先鋒陳訓兒僞二帥孫昌齡二名奪獲號衣器械無算鄆縣城危立解其尸股傍山西竄者復經金順馬隊由牛東一路迭次衝殺約斃賊七八百名黃衣帽賊六名生擒一百餘名解散被裹難民數百名該逆合股竄踞澇峪口適臣檄調之彝字營黃鼎已由江口馳抵鄆縣是夜與彭基品商同五更出隊分股邀截偃旂息鼓而進該逆驟不及防遽緣山向西奔竄我軍趁勢掩殺數十餘人沿途拋棄米糧衣物無數追至距澇峪口三十餘里之千戶村該逆前後擁擠一齊搶上山梁旋見我兵人數不多馬隊又少麾動全股捨命撲下我軍三路衝殺回合多時該逆見不能取勝暗分一支從林中鈔出我軍首尾受敵爲之

小挫兵勇互有傷亡暫退二里休息片時彭基品激厲諸軍賈
勇復進賊見我軍銳氣更振立即敗竄又追逐五六里至南集
賢村地方始行收隊而金順馬隊亦於是日早晨由北路索家
莊直前追勦該逆正踞蓋屋之祖庵馬隊即從東西北三路奪
門而入鎗箭齊施該逆由南路逃出我軍追殺數里共斃賊二
百餘名救出難民百餘名該逆遂遠竄終南鎮分踞田峪口慈
峪口等處此連日追擊獲勝之大概情形也伏查滇髮兩逆竄
合之後醜類猥多依蔽山谷又懲於藍曹兩逆之敗不敢竄入
南山老林我軍爲數尙單此擊彼竄殊難遏其兇鋒現經臣檄
飭英毅六營會同黃鼎所部從渭河北岸逕趨鄠縣遶出賊前

先扼大散陳倉斜谷各口迎頭截擊斷其竄越隴蜀之路而飛
催蕭慶高督湘果中軍迅由甯陝出子午峪趨鄠縣躡賊之後
適值穆圖善派赴湖北之後起六營亦由潼關折轉西安可期
會師由盩厔前進臣現期於二十日出省親督各軍相機扼剿
以期迅殄逆氛而飛咨李雲麟逕率所部進駐漢中分扼華陽
佛坪畱壩各路以杜該逆由間道竄漢窺川之狡謀至臣衙門
日行事件暫委藩司林壽圖代折代行照例辦理所有連日追
剿逆匪獲勝現籌分路截擊並臣尅期帶印出省親督各軍剿
辦情形理合恭摺由驛馳

奏伏祈

皇太后

皇上聖鑒訓示謹

奏

附陳探報情形疏

再頃據探報髮逆僞扶王一股被河南官軍擊敗竄往鄖西眾約二萬人意圖與僞啟王合股已於十二三日由漫川關竄至鎮安地界距鳳凰背不遠等語當卽飛飭派防商州之鎮西軍及由麻坪調來之湘果右軍前往堵截猶恐賊眾我寡復飛咨李雲麟由洵陽派兵會剿現據湘果右軍營官唐友勝稟報該營正在拔向正安之際忽於途次得探卒回報該逆等竄抵鳳

鳳翔忽被鎮西軍鄆太愚雄毅軍劉精等率師突至出賊不意業將該逆大股擊敗狂奔回竄鄂境等語查偽扶王陳得才業已竄往下游當無敗竄鄂西之事此起逆匪究係何股除俟查明並將接仗詳細情形具奏外理合附片陳明伏乞

聖鑒謹

奏

附畱曹克忠一軍駐守汧隴疏

再適接記名提督河州鎮總兵曹克忠咨據代管隴防各軍總兵陳德隆稟稱張家川回逆賊首楊春阿渾穆別仔等突於五月初九日傾巢而出並邀集龍山鎮馬家堡等巢精壯於是日

黎明由闔家店萬坪等處衝至對營嶺上屯踞陳德隆當飭各營嚴備按隊不動該逆忽分四路下嶺衝突陳德隆布置各營齊出八成隊伍分三路迎擊鎗礮齊施回合數次該逆敗回嶺上我軍直抵山腳遙見嶺上騎馬悍逆約二三千人沿山步賊又在四五千之數緣坡包溝而進而清水大路上亦有四五百逆騎遶襲馬鹿鎮街後陳德隆當卽分撥一軍據列要隘以防後路而親督各隊直衝上嶺該逆負嵎抗拒屢戰不退鏖戰數時之久始行紛紛奔逃自相踐踏由闔家店原路遠竄而去我軍追殺二十餘里殲斃賊首一名騎馬悍賊五六十人步賊百餘人生擒四名奪獲騾馬百餘匹均各馱帶火藥乾糧馬草等

物並獲鎗礮軍器多件其後路之賊亦經我軍擊退各等情稟報移咨前來查回逆屢經痛剿猶贍敢乘虛突進意圖攻踏營盤以遂其回竄狂逞之計雖經迎折其鋒而隴防刻難稍緩其曹克忠所帶各營急切未便抽換之處情形自更彰著所有隴防官軍勦賊獲勝緣由理合附片陳奏伏乞

聖鑒訓示謹

奏

附覆奏曹克忠所部各營未便抽調疏

再臣前奉

諭旨曹克忠駐守汧隴一帶係爲豫防甘肅逆氛回竄秦中而

設能否另派勁旅防守抽出該總兵所部赴都興阿軍營調遣
著劉蓉酌度具奏等因欽此適該總兵因病就醫來省臣即與
面商該處情形刻下攻剿平涼各軍多在北路進紮鳳翔一面
太覺空虛非汧隴嚴駐重兵難免乘虛回竄之慮現值蔡髮兩
逆竄擾腹地需兵孔急別無勁旅可以抽防且逆蹤已及郿縣
界中與鳳翔岐山扶風各縣僅隔渭河一水當此天氣炎亢淺
灘處處可渡而該逆意在西竄儻由寶雞闖入秦州各屬山內
或北犯鳳翔逼窺汧隴則該處均有腹背受敵之憂臣與再四
籌商此軍萬難抽動現邀該總兵力疾遄征馳赴鳳翔一帶以
便兼顧汧隴相機調度扼要分防定於二十日隨同臣部前往

所有該總兵未能抽赴都興阿軍營調遣實在情形理合附片
陳奏伏乞

聖鑒飭遵謹

奏

酌撥倉糧協濟甘軍疏

同治三年五月十九日

奏爲酌撥邠乾等州縣倉存麥豆協濟援甘兵勇口糧以資軍
食恭摺奏祈

聖鑒事竊准幫辦甘省軍務署固原提臣雷正綰咨所帶兵勇
入甘進剿奏請在於陝省北山州縣勸捐糧石解運協濟以資
軍食誠恐道路較遠緩不濟急咨令先由陝省在於鄰甘各州

縣籌撥京斗倉麥四萬石轉解涇州糧臺暫濟急需俟北山捐辦之糧一有成數卽行劃扣等因伏查雷正綰督帶兵勇入甘勦辦回逆正在得手之際未可令其軍糧缺乏陝省自當力爲接濟以期士飽馬騰惟陝省現在市價昂貴計採買四萬石加以運腳等項總計需銀不下四十萬兩司庫搜羅如洗實在無此鉅款可以撥給而西路鄰甘之鳳邠乾各府州所屬常平倉糧除賑飢募勇及供應各營軍糧陸續動用外所存無多長武縣倉僅存小麥三十餘石倉儲匱乏已可概見通盤核計實難如數撥給臣與司道再三籌畫因事關軍食不得不儘數騰挪顧全大局現飭查照陝省舊章如倉麥不敷卽以莞豆搭放卽

在於附近甘省之邠州三水淳化永壽隴州等各州縣各撥倉
麥一千石乾州倉麥二千石共計七千石又撥長武縣倉存莞
豆三千石共湊足京斗糧一萬石飭令運送涇州糧臺以濟急
需如陝省北山捐糧辦有成數儘歸甘省軍餉毋庸扣還以資
接濟除飛飭各州縣趕緊解運並咨部立案暨移咨陝甘督臣
熙齡固原提臣雷正綰轉飭涇州糧臺接收轉解不准推諉歸
於甘省作收造報外所有自陝運涇腳價應卽由陝造銷以免
混淆據軍需局司道具詳前來理合恭摺具

奏伏乞

皇太后

皇上聖鑒謹

奏

附請緩解工程銀兩疏

再臣前准戶部咨欽奉

上諭陝西欠解工程銀兩限本年四五月間掃數解齊不得再有帶欠致干重咎等因欽此欽遵當經行司籌解去後伏查前項工程銀兩最關緊要凡在臣工尤宜激發天良趕緊設法籌解何敢稍事遷延自取咎戾惟陝省入款向以地丁爲大宗軍興以來庫款早已空虛元二兩年民欠錢糧業經奏請豁免本年新賦又經展緩卽有照舊開征之處亦因兵差

絡繹民力未紓完解更屬無幾而捐輸釐金毫無征收司庫萬
分支絀所有援甘各軍營餉需軍火器械均由陝省協撥而本
省防剿經費旂綠各營餉乾米折以及製造鎗礮藥丸帳房等
項在在需費爲數甚鉅均屬無款動支卽使移緩就急節節騰
挪而用款日增入款日減臣與藩司通盤籌畫日夕焦思實有
顧此失彼之虞因思陝省本年地丁多有緩至秋後征收惟有
督飭司道察看情形設法催征儻能收有成數卽當儘先委解
據藩司林壽圖具詳前來合無仰懇

天恩俯念陝省殘破已甚庫款如洗准將應解工程銀十五萬
兩緩至本年十月間俟地丁征收有項卽行陸續委解理合附

片陳明伏乞

聖鑒謹

奏

會奏官軍進逼賊壘督勦獲勝疏

同治二年六月初四日

奏爲官軍進逼賊壘分路督勦疊獲勝捷現籌兩路夾攻分兵扼堵以期聚殲恭摺會奏仰祈

聖鑒事竊照蔡啟諸逆竄踞盩郾地界

臣蓉於五月二十日帶

兵出省

奴才

穆圖善卽於二十一日率

師會勦均經先後奏報

在案

臣

等旣抵鄠縣探悉蔡逆率悍黨踞盩屋所屬之店子頭

樓觀臺黑水峪西駱峪

田峪口一帶僞啟王及鄭馬諸逆分踞樓觀臺黑水峪西駱峪

等處均皆傍山依谷聯營三四十里其勢漸趨而西臣等慮我師驟進則逆蹤將疾趨寶鳳無兵以截其前也乃議畱鄠數日而飛咨記名提督曹克忠率新募來陝之喻正祥龔子雲兩營並撥李百魁之英毅六營黃鼎之彝宇兩營歸其統轄使迅由岐寶繞赴郿縣攔頭堵截二十四五等日該營陸續抵郿臣蓉遂率湘果右軍馬步五營奴才穆圖善率由潼關折回之衝勇六營及副都統金順馬隊一起進紮南集賢邵家村一帶逼賊而壘二十六日奴才穆圖善帶同馬隊馳赴店子頭樓觀臺一路察看賊情值該逆正在演隊當卽奮力迎勦陣斬馬步賊百餘名生擒僞統領甘潤任一名奪獲騾馬十餘匹救出難民數

百名餘逆悉潰二十七日黎明我兵分路出隊直抵店子頭賊壘揚旂誘敵自卯迄巳該逆猥伏不動正擬收隊還營該逆突出二萬餘眾狼奔而來半列山腳半匿林中相持良久倏分三路來撲我軍亦分三路應之中路總兵楊得勝蕭德經副將文星明等三營先與遇於平林奮前接戰陣斬偽都統蔡信一名金順亦卽麾動騎兵馳往鈔擊斬馘頗多而總兵彭基品所帶中營偏在一隅賊黨環集薄之游擊何萬春奮力衝突被礮子貫腦而亡參將王謨坐騎亦被轟斃軍勢稍卻維時左路總兵孟宗福黃金山提督劉定邦副將劉均成程興烈參將王培森等正在帶隊鏖戰陣斬百餘人儘先協領米方多爾濟衝鋒過

猛中鎗墜馬記名副都統蘇彰阿面帶鎗傷不退黃金山怒馬
衝擊手刃悍賊七八人終以該逆鎗礮太利精銳之士往往帶
傷亦遂收隊稍憩右路之賊先分兩路旁鈔湘果右軍副將李
遂勝急令各營分道迎擊斃賊二百三十餘名陣斬紅衣賊目
八名逆勢不支且戰且卻副將彭基秀等因見中路喫緊麾勇
直前助戰而中路諸賊見右路賊隊敗退遽分悍黨萬餘人潛
由大路繞出我軍之後總兵鍾玉勝唐友勝立率馬步各營橫
出截擊回合數次賊勢稍卻鍾玉勝縱馬衝入賊隊被洋鎗穿
脇而入猶復負痛力戰往來突擊奴才穆圖善遙見中左兩路
之賊悉趨右路愈聚愈多遂親督衛隊親兵及金順馬隊大呼

馳突橫衝而前總兵謝正球唐友勝等亦率騎兵左右夾擊賊始大敗奪路回奔我軍追殺五六里約計斃賊千餘名奪獲騾馬三十餘匹鎗礮旗幟無數各營均以天氣酷熱正在收隊還營忽見樹林中湧出逆匪數千人反撲而來總兵蕭餘勝周東昇彭基秀等各率所部賈勇迎勦各營亦回軍併力環擊賊勢披靡始向大路奔北唐友勝鍾玉勝又率馬步突出截擊刺殺黃衣賊目一名各營趁勢掩殺追斬二百餘人旗幟鎗礮丟棄滿地救出難民甚多此二十七日會勦蔡逆獲勝之情形也曹克忠於二十六日率所部及英毅彝字各營由郿縣槐芽鎮進紮蓋屋所屬之青花鎮沿途截勦零匪小有斬擒二十八日五

鼓曹克忠帶同英彝兩軍出隊探賊虛實黎明抵兩河口坡適
遇騎馬賊三四百人魚貫而來我軍奮勇前擊將該逆截爲兩
段團團圍斃斃七八十名生擒三四十名首逆僞祿天義宋
先富亦被拏獲當卽訊明正法餘黨向陳家堡一帶竄走我軍
追斬五六十人奪獲騾馬三十九匹直追至西溝嶺始行收隊
是夜遙見東路火光火起知係該逆出竄曹克忠亟飭令黃鼎
李百魁各率所部並親督喻正祥龔子雲等分路前進二十九
日黎明行抵蓋屋城南二十里之南樓村雙廟兒一帶見該逆
尾隊正在該村有甫經收拾啟行者有自西村趨程至此憩息
者有驅趕牲畜裝運輜重絡繹就道者曹克忠自率馬隊由北

而東將該逆截斷各步隊一湧而進斃賊二百餘人餘逆向東
竄走馬隊疾馳追擊至西駱峪新口峪等處又斃賊二百餘人
其藏匿山下各村及林木深處者悉被步隊搜殺淨盡奪獲騾
馬牛隻三百餘匹刀矛旗幟不計其數此二十八九等日截斃
啟逆獲勝之情形也臣等伏查該逆聯營三四十里非兩路夾
攻則此擊彼竄轉成蔓延之勢而非節節逼近使諸逆歸併一
路亦無以收聚殲之功諸逆中以蔡逆爲最悍而啟鄭各黨爲
稍弱頃經臣等函約曹克忠由東路步步爲營緊逼前進比接
黃鼎李百魁稟報已於初一日進紮大坪啟逆部下僞天將葉
有光等多率所部來營投誠等語蔡逆自二十七日挫敗之後

已將店子頭老巢退出移踞樓觀臺一帶臣等現擬移營逼之亦冀漸逼漸緊與曹克忠所部相去不過十里之地彼此聲息相聞然後尅期並舉奮迅一擊仰仗

皇上威福或可速收掃盪之效現飭西鳳營參將德勝督率兵勇民團扼守煎茶坪黃牛堡各處隘口並派漢中鎮總兵余福象督率撫標兩營蔡武功所屬之大莊一帶以防該逆偷渡渭河之路一面咨催李雲麟蕭慶高何勝必等分防漢南各路要隘即使該逆敗竄南山亦當無從偷越至此次陣亡之儘先協領米方多爾濟擬保參將儘先游擊何萬春奮勇捐軀相應籲懇

天恩從優賜卹以慰忠魂除飭鍾玉勝蘇彰阿趕緊醫調鎗傷以期速痊並將傷亡弁勇照例彙案辦理外所有官軍分路督勦疊獲勝捷現籌兩面夾攻分路扼堵緣由理合會同署西安將軍奴才德興阿恭摺合詞會奏伏乞

皇太后

皇上聖鑒訓示謹

奏

附請更正米方多爾濟卹典疏

再查此次陣亡請

卹之米方多爾濟係呼倫貝爾廂藍旗尼哈保佐領下驍騎校

卽補總管曾蒙

賞給巴圖隆阿巴圖魯勇號摺內填註儘先協領職銜係屬錯

誤伏乞

聖恩賞賜卹典卽

飭更正合併陳明謹

奏

附請簡放金順副都統實缺疏

再頭品頂戴記名副都統金順爲人忠實無僞樸勇有謀此次
逆蹤竄入腹地該都統不避艱險每戰必先其馭軍亦嚴明有
法臣蓉前在省城署西安將軍奴才德興阿數與臣商及擬奏

請該員署理左翼副都統冀資其力以整頓營務不知曾否出
奏奴才穆圖善等伏查該都統在多隆阿軍營出力最久屢經
多隆阿以副都統保奏疊奉

恩旨交軍機記名遇有缺出請

旨簡放今其同功一體之人悉蒙補授實缺獨金順一人不免
向隅之歎臣等竊維酬庸褒績在

朝廷自有權衡而進賢舉能雖臣下難安緘默合無籲懇

皇上天恩可否將金順簡放副都統實缺以示鼓勵之處出自

逾格

鴻慈臣等爲激勵將士起見謹合詞附片陳奏是否有當伏候

聖裁謹

奏

覆陳查明偽扶王竄擾情形疏
嗣治三年六月初四日

奏爲遵

旨查明覆奏仰祈

聖鑒事竊臣前奉五月二十二日

上諭梁逆由鎮安一路竄出大峪口不過數千敗匪而德興阿
劉蓉前奏匪眾二萬餘究竟匪數若干是否句結蔡逆合股近
日西安情形若何曾否與賊接仗著劉蓉趕緊查明具奏等因
欽此旋又奉五月二十五日

上諭昨據張之萬奏偽啟王梁成富一股遊駛商州境內與浙川相距不遠茲據劉蓉奏偽扶王陳得才與啟逆合股已至鎮安經官軍擊敗回竄鄂境等語此次竄鄂之賊究係何股與張之萬所奏殊出兩歧著劉蓉查明迅速具奏等因欽此伏查蔡逆自被李雲麟擊敗之後游弋於鄖西鎮安交界之大小心川幾及一月臣方期與李雲麟會師殲諸鎮安境內因飭湘果中軍分扼石泉漢陰甯陝杜其竄漢窺川之路而飭湘果右軍由麻坪河橫趨以赴之迨聞啟逆梁成富由鄖西敗竄土門卽虞其闖入陝疆急檄李百魁率英毅六營繞出山陽攔頭截擊並咨商穆圖善飭姜玉順所部十營趁赴鄂之便卽由鎮安掃盪

而前詎意李雲麟以無糧之故折回興安姜玉順以孝義一路
山徑崎嶇米糧奇貴改由潼關大道聯隊以行迨啟逆與蔡逆
句結之後於四月二十六七日由大小心川合竄鎮安維時李
百魁之軍已抵山陽何勝必所部亦踰麻坪相去均在百里以
內皆以無糧可裹不能率師前進頃據生擒賊供蔡逆初無窺
伺西安之意因有回民三人投入其中告以附省一帶新麥方
登防兵又少於是該逆捲旗疾趨不七日而已竄出大峪口蔡
逆之眾本二萬餘人啟逆黨與數亦逾萬中旗鄭逆等股又近
萬人合計總在四萬以外今該逆聯營三四十里擊柝相聞則
其多少之數可約略而計也啟鄭多新裹之眾能戰者不過三

千惟蔡逆悍黨實以萬計查穆圖善所部六營與臣之湘果四營皆所稱精銳百戰之卒而日昨之戰彼此略足相當非有馬隊衝突實亦難於取勝臣屢接李雲麟來函稱蔡逆狡悍善戰非藍曹諸逆之比昨見其布置進止具有成法而敗北之後部伍整齊旗幟不亂乃信其言之不謬也至臣前據探報僞扶王大股竄入鎮安地界意圖勾結啟逆經鎮西等軍擊敗竄鄂之奏緣湘果右軍於五月上旬行抵孝義經臣檄令速赴鄂縣會剿十五日接該軍營務副將李遂勝稟報據孝義廳同知呂紳面稱探聞僞扶王大股由鄖西竄至鎮安圖與啟逆合股已去鳳凰背不遠現派隊前往堵截等語臣聞信後立即札飭該軍

又派防商州之鎮西軍速往迎勦並飛咨李雲麟由洵陽派兵
截擊旋於十九日據湘果前營總兵唐友勝稟稱該營拔赴鎮
安途次遇見各百姓扶攜老幼紛紛搬回據稱扶逆竄至鳳凰
觜現被官軍擊敗仍舊回竄鄖西欣欣相告隨派探卒前赴鳳
凰觜一帶查問果無賊蹤聞係鎮西雄毅等軍擊退現已追出
陝境是以該軍各營陸續折回仍赴西安聽候調遣等語臣適
拜發帶兵出省之摺當將大概情形附片陳奏並聲明陳得才
已竄下游此起逆匪究係何股容俟查明具奏在案現據各路
差弁還報前竄鎮安之賊實係各處游匪聚黨成羣假冒扶逆
名色到處擄掠遠近居民驚惶遷徙轉相告語以爲大股麇至

其寶並無著名頭目一聞官軍進剿遂已紛然竄避如鳥獸散
現在鎮安山陽商州商南境內一律安謐惟鄖西浙川各州縣
有無賊蹤未得詳悉等語查鎮安毗連鄂豫兩省常爲賊蹤出
沒之區歲受挈家遷避之苦哀鴻甫集風鶴忽驚以故游匪乘
機訛言易起而地方探報之詞鄉村傳播之語往往出自風聞
難爲實據張之萬所奏梁逆游駛商境或者尙屬從前情形抑
或卽係此次傳聞之誤均未可定至西安省城情形安堵如常
城門照常啟閉商賈仍前流通堪以仰慰
宸廑所有遵

旨查明覆奏緣由理合縷晰附驛陳奏伏乞

皇太后

皇上聖鑒訓示謹

奏

附請飭撥多營火藥疏

再臣前因防剿喫緊軍火缺乏曾附片奏請協撥山西火藥以資接濟奉

旨允准在案頃准山西撫臣沈桂芬咨稱蒲郡支發局因屢次撥解並無製存軍火省局亦存儲無多擬先籌撥火藥一萬斤火繩一千丈盤委弁起解尙有不敷再行陸續解往等語值此大兵雲集杯水車薪殊難爲繼茲據軍需局司道詳稱陝省自

同治元年四月髮捻各匪竄擾及本省回逆滋事以來奉調各路大兵暨招募勇丁所需軍火器械甚多司庫萬分支絀節經藩司於無可設法之中竭力騰挪飭局購料製造無如全秦蹂躪殆徧物缺價昂每因籌款維艱以致緩不濟急現值滇髮二逆回竄陝疆會剿之師既集需用之項尤繁加以雷正綰陶茂林曹克忠各營紛紛催促一時驟難供應竊思湖北協濟前西安將軍多隆阿大營軍火器械餘賸尙多今多隆阿舊部各軍奉調回鄂僅畱後隊六營在陝會剿其存畱糧臺及荆紫關轉運局軍火等項未便遠道撤回轉增糜費應請畱於陝省接濟各營以資補救具詳請

奏前來臣覆查無異相應請

旨敕下荊州將軍穆圖善轉飭多營糧臺將現存各處軍火器械查明數目造冊移送陝省軍需局以便按數提撥藉顧急需於軍務實有裨益謹附片陳明伏乞

聖鑒謹

奏

附請飭直隸山西山東協濟餉項疏

再查陝省軍興以來經前撫臣瑛榮奏奉

諭旨飭令山西每月籌解餉銀三萬兩直隸山東每月各籌解一萬兩均皆按月分解潼關道庫統歸多隆阿支發在案嗣因

回務肅清多隆阿又因傷開缺部下兵勇分赴鄂豫該三省協濟銀兩亦遂停撥臣以陝境粗安雖屬窘乏萬分亦不忍再竭鄰封之力更爲挹注之謀茲值滇髮兩逆接踵頻來徵兵購糧需費彌鉅現所截留多部六營之餉卽應由陝供支其餘各軍嗷嗷待哺司庫之一空如洗地方則干里成焦反復圖維實有朝不謀夕之勢臣與藩司林壽圖晝夜憂思無從措手惟有仰懇

聖慈俯念陝省艱窘情形

敕下山西撫臣沈桂芬直隸督臣劉長佑山東撫臣閻敬銘查照從前月餉三萬一萬之數從五月起仍舊源源協濟庶幾少

瞻飢軍藉甦涸轍實於大局有裨伏祈
聖鑒施行謹
奏

劉中丞奏議卷四終

劉中丞奏議卷五目錄

會奏官軍屢勝賊勢漸蹙疏

附請賞給降人葉毓廣頂戴疏

附陳西路截剿獲勝情形疏

請將漢中府知府楊光澍仍畱署任疏

會奏官軍攻克堅堡逆匪敗竄南山疏

附請飭將軍穆圖善督兵赴鄂會剿疏

奏報籌解工程銀兩疏

官軍剿匪屢捷餘孽狂竄階州疏

附請調曹克忠馬步赴甘疏

附請開缺調理疏

遵 旨傳諭臬司赴甘招回疏

附請飭都興阿自行採買皮貨疏

附奏漢鎮余福象暫行開缺疏

附請補漢中鎮員缺疏

會奏覆覈改正獎敘出力員弁疏

會奏獎敘克復山陽出力員弁疏

劉中丞奏議卷五

湘鄉劉 蓉著

會奏官軍疊勝賊勢漸蹙疏

同治三年六月二十六日

奏爲官軍兩路逼剿連日獲勝逆勢漸蹙現籌添兵合剿以圖聚殲恭摺會奏仰祈

聖鑒事竊照蔡逆自上次剿敗將店子頭老巢退出之後遂過田峪河移踞焦家巷鹿馬村說經臺樓觀東西各堡等處臣等亦卽移營環壘進逼該逆旣得地利所駐各堡皆有水圍環繞外樹木柵數重極爲堅固我軍屢誘不出一經逼近逆巢則鎗礮環擊犀利異常臣等知其志在堅守未可猝以力

勝也乃謀逐日出隊巡哨絕其糧路以困之六月初七日黎明探悉該逆出攻南北淇水二堡奴才穆圖善立即督率親兵並副都統金順馬隊及臣蓉所部驍騎營湘果右軍先鋒營騎兵馳往援剿該處稻田居多水深泥滑馬隊未能直進遂偃旗繞出賊前斷其要路逆眾五六千人列隊抗拒彼此鎗礮齊施鏖戰良久奴才穆圖善率金順等奮力馳突賊勢不支紛紛敗卻我軍催隊驟進殺賊四五百名陣斬紅衣賊目五名生擒百餘名訊明正法解散脅從六百餘名奪獲騾馬軍械旗幟無算湘果先鋒營張步霖等先由左路橫衝而前乘逆眾敗退隨後掩殺斃賊七八十名鎗礮旗幟丟棄滿地餘賊數百名正被截逼

乞降忽右路羣賊六七千突出援應我軍恐被包鈔遂縱馬突圍而出乘勢生擒二十餘名逆眾驚潰歸巢嗣是該逆不敢擁眾晝出每於夜間趁月肆掠奴才穆圖善偵知其情輒於五更時親督各起馬隊突出邀截每值該逆飽掠歸時屢被擒斬每日或數十名或十餘名不等奪獲騾馬麥麩亦多曹克忠於初四日移營棗林村逼近啟逆之壘初五日午刻該逆馬步二千餘人裝運糧食自南而北曹克忠自帶親兵密傳英毅彝宇兩營馬隊及葉毓廣降眾飛馳邀擊將該逆截爲數段逆眾拌命抵拒我軍奮力截殺立斬長髮老賊七八十名生擒二百餘名奪獲騾馬二十餘匹刀矛旗幟多件帶傷餘逆及被裹難民奔

遁脫逃者甚多初八日五鼓曹克忠復督各部分路出隊齊抵黑水峪河溝西岸以葉毓廣爲前導直抵賊堡葉毓廣等下馬爬牆上堡砍斃守堞賊數人我軍各騎正在衝突詎該逆潛伏悍賊於黑水峪口及堡之前後一見我軍齊進卽分三路圍裹前來我軍奮力衝出幸天色未明該逆不辨彼此自相攻擊葉毓廣率隊衝入賊中三進三出戳斃二十餘人我軍馬隊亦乘勢衝擊斃賊十餘人生擒十名奪獲大小旗幟八十餘件刀子器械無數臣等以兩軍相去尙遠不便夾擊而曹克忠自葉毓廣來降之後詢悉賊中虛實啟逆勢弱其眾又多攜貳臣因函商曹克忠先由西路節節進逼適所調隴防三營亦已陸續前

來曹克忠遂於十八日四更親督所部新舊六營暨葉毓廣降卒八百人進紮黑水峪西岸築壘甫畢遙見該逆馬步蠢動愈集愈眾分南北兩路衝撲而來南路啟逆一股馬賊三百餘人步賊一萬餘人由黑水峪前渡河逕衝曹克忠營盤北路則蔡逆所派馬賊五六百人步賊七八千人由下游迤北渡河直壓龔良臣等營盤當經曹克忠派撥本部馬隊並洪殿元王得勝葉毓廣各軍疾馳向北以禦蔡逆之黨而飛調英毅彝字八營前來會剿曹克忠自率親兵暨周有貴喻正祥龔子雲各部由南路上游攔截以禦啟逆正欲渡河卽被我軍轟退約斃賊百餘名逆眾亦遂不敢逕渡曹克忠因見下游蔡逆之眾與

我軍鏖戰良久急率各營馳往助勦而逆勢兇猛雖被我軍壓退三次仍敢拌命前進先後十數回合未肯稍卻維時英毅營李百魁彝字營黃鼎率部飛馳而至我軍佯退逆眾追撲前來我軍同聲發喊鎗礮齊施刀矛並進奮力衝殺殲賊四百餘名奪獲騾馬四五十匹旗幟器械甚多我軍亦有傷亡逆勢不支遂皆紛紛東潰是夜三鼓曹克忠遣人渡河密探捉獲老賊數人訊知啟逆有移巢之舉正可乘勢追擊遂派各軍以四成守營六成渡河馬隊在前步隊在後於十九日黎明齊抵東岸果見逆眾望東狂竄惟偽天將羅啟發一股尙未出巢曹克忠卽率各騎衝出前路包鈔周有貴王得勝由後面掩殺斃賊三百

餘名龔良臣率所部直前追勦一時逆堡接連焚燬火光燭天我軍冒火前進洪殿元喻正祥龔子雲葉毓廣隨同奮力衝突黃鼎李百魁率隊踵至飛騎衝出將逆眾鈔回三次後軍乘勢截殺共計殲斃一千餘名生擒二百餘名奪獲騾馬七八十匹大小擡鎗刀矛旗幟無數羣逆亡命東奔過就峪河其逃竄不及者或鑽入山口或四散狂奔其中被裹難民乘閒逃散者不可勝數十九日奴才穆圖善親督馬隊繞過焦家巷察看賊情途遇鄭逆攜糧股匪追殺數十名救出難民多名查悉啟逆移踞界上寺之西老堡餘黨亦分紮於焦家巷各村堡之中所在皆滿比經臣等會商賊旣歸併一處我軍亦宜步步進逼便爲

兩路夾擊之計因函約曹克忠率師過黑水河移紮就峪河之
西岸臣等亦卽移駐田峪河之東岸以逼之二十二日奴才穆
圖善率所部各營移紮豆村一帶臣馨所部各軍亦移紮店子
頭龍過寺一帶均靠河岸而軍該逆見我軍驟逼趁其築營未
畢出黨六七千人半列河岸半列山邊故作撲營之勢而以馬
隊數百詐效官軍裝束馳驟而來繞出湘果新後營之後李遂
勝急令總兵唐友勝馬隊由山邊樹林鈔繞阻其歸路而撥步
隊吶喊撲殺該逆旣知有備紛紛退走我軍追至河干適馬隊
橫截而前勁弩齊發射中執旗賊三名登時墜馬餘逆悉潰我
軍回營趕築牆壘逆眾復出馬隊分路來犯我軍亦分路應之

其奔向右路之賊經總兵蕭餘勝鍾玉勝率師擊退其進撲左
路之賊亦經總兵周東昇彭基秀等鎗礮連轟立斃先鋒賊馬
一匹隨督隊乘勢掩殺及抵河邊正與伏賊相遇我軍賈勇截
擊斃賊二十餘名唐友勝復率馬隊追殺過河陣斬騎賊七名
射斃賊馬五匹帶傷者不計其數羣賊敗退入巢我軍陣亡三
名受傷四名陣斃戰馬三匹此連日移營進逼東西夾攻獲勝
之情形也伏查啟鄭諸逆旣與蔡逆歸併一處其勢倏似較強
盛然欲爲聚而殲旃之計正在此時臣等現駐田峪東岸若曹
克忠之軍更逼進就峪西岸彼此夾河而軍則相去不過十餘
里聲勢益相聯絡惟賊旣踞險又其眾尙兩倍於我未可全操

勝算其或一擊而走則裹糧追勦又已不勝其勞故臣等反覆
熟商以爲不如增兵合勦之爲長策也南山路險糧乏該逆非
窮蹙萬分必不肯自趨絕地臣現咨調蕭慶高之湘果中軍由
洋縣取道佛坪前來會勦而咨催李雲麟迅率所部全軍分駐
華陽江口四畝地各隘以杜紛竄至北路渭河一帶實多水淺
可涉之處奈福象所部防兵究嫌單薄萬一該逆偷越岐扶則
鳳寶均覺空虛可慮臣現咨商固原提臣雷正綰甘肅提臣陶
茂林等抽撥曹克忠之隴防四營移紮鳳翔預爲攔頭截擊之
計網羅旣布該逆雖極狡悍亦當無可竄越惟聞漢中米糧奇
乏蕭慶高非裹帶十日行糧難以前進而曹克忠因黑水峪河

水暴漲不能移師進紮屢搭浮橋均遭衝沒故至今兩軍相去
尙在三十里以外計俟旬日以後諸事如算當可併力痛剿以
殲羣醜而紓

宸廛所有官軍兩路逼攻連日獲勝現籌添兵合剿以圖聚殲
緣由理合會同署西安將軍奴才德興阿合詞恭摺馳奏伏乞

皇太后

皇上聖鑒訓示謹

奏

附請賞給降人葉毓廣頂戴疏

再臣等頃奉

諭旨啟逆僞將葉有光等率部投誠賊勢並未大衰難保非別
有詭謀計圖一逞著飭令黃鼎等分別真僞斟酌辦理不可墮
其術中等因欽此仰見我

皇上慮事精詳圖敵周慎之意臣等前接黃鼎李百魁會稟尙
未詢悉情形是以前摺僅敘大略茲查葉有光卽葉毓廣係廣
東嘉應州人在啟逆部下號爲驍將而頗識順逆之分嘗與啟
逆意見不合近聞官軍許開自新之路遂率所統八百人自拔
來歸曹克忠察其詞意懇切因卽收置麾下獎以忠義給予頂
戴以後出隊卽派令身當前敵葉毓廣感激曹克忠推誠委任
之意衝鋒陷陣每戰必先曹克忠親見其手刃老賊十餘人其

勇敢竟爲諸軍之冠葉毓廣又復函致啟逆部下頭目曉以順
逆於是僞開朝勳臣瑄天福韋發謨僞香天燕黃義發僞總檢
陳文元僞莫天安陳兆書僞兆天燕陳玉林僞枚天燕譚金華
等曾受僞官顯職者十餘人先後來降其他渠魁約期出降者
尙多僞天軍主將余懷慶爲啟逆所覺執而殺之嗣是防範甚
密然亦竟不爲止啟逆自知眾心離析勢孤氣餒始移壘與蔡
逆合併此皆葉毓廣頗明大義身先倡率之所致也臣等伏思
國家用人不拘一格但肯真心效順奮勇立功卽何妨優予品
秩以獎歸義之忱合無籲懇

皇上天恩可否賞給葉毓廣四品翎頂抑或卽准以都司補用

以示鼓勵而廣招徠之處伏候

聖裁臣等爲解散賊黨起見謹合詞附片陳奏是否有當伏乞
聖鑒施行謹

奏

附陳西路截剿獲勝情形疏

正封摺間接准曹克忠二十四日咨稱該鎮於是日五鼓自帶
親兵馬隊各營將弁及黃鼎李百魁所部營哨官弁並葉毓廣
降眾一同策馬前赴就峪河岸一帶勘視紮營地址因透迤渡
過東岸直薄賊巢盤旋逾時該逆猺伏不出迺率眾沿河而下
將近渭河倏見馬步賊隊四五百人散列黑峪河東岸當即馳

往鈔殺斃匪十餘人生擒二十三人奪馬五匹解散難民百餘人餘黨紉潰正擬收隊回營忽報蔡逆親率馬隊五六百人已抵河岸曹克忠當率各將弁策馬渡河開鎗迎擊蔡逆躬自抵拒進退馳突彼此回合六七次我軍知係蔡逆親來莫不奮勇爭先馬隊包繞旋轉鎗矛環擊竟將蔡逆閃落馬下逆黨拌命擁護總兵王得勝棄馬奮前擒拏突被飛矛刺傷左骹參將周朝旺躍馬而前亦被鎗斃坐騎羣賊環擁蔡逆退竄我軍盡力窮追殲斃悍賊六七十名生擒三十餘名奪獲騾馬五十餘匹刀矛旗幟多件追近賊巢然後收隊而還曹克忠還營後將生擒各賊逐一提訊中有逆目兩名一爲蔡逆之弟僞號蔡八帥

主一爲蔡逆表兄謝玉春據供蔡逆因官軍緊逼意圖偷渡渭河竄往岐鳳一路今親來察看灘水淺深是否須搭浮橋不意忽與官兵相遇幾被擒獲等語當卽悉數正法臣等伏查黑渭夾灘縣長六七十里平原散漫處處可以偷涉該逆之圖越渭水以趨岐鳳早在意計之中惟臣等兩軍旣駐東西兩路時須兼顧北路之防實慮照料難周是以疊次咨商固原提臣雷正綰等抽撥隴防四營移駐鳳翔預作準備以資攔截而期周密除再行咨催移撥並約會曹克忠兼顧嚴防外所有西路截剿獲勝情形理合附片會

奏伏祈

聖鑒飭遵謹

奏

請將漢中府知府楊光澍仍畱署任疏

同治三年六月二十六日

奏爲漢中地方凋敝特甚已革署知府人地實在相需籲懇

天恩俯准仍畱署任以順輿情恭摺奏祈

聖鑒事竊臣前因漢中撫卹善後各事宜需員籌款舉辦查惟

署知府鄜州直隸州楊光澍人地相宜雖府城及所屬州縣失

陷例應查議然該員係奉調在營與在城防守者實有區別且

核其從前勞績功過尙足相抵經臣於二月十七日附片奏懇

天恩可否准予寬免處分三月十三日欽奉

諭旨楊光澍著免其查議仍革職畱任以觀後效等因欽此臣
時正由漢中起程當卽飭令楊光澍將一切善後事宜竭力籌
辦以起瘡痍而靖地方數月以來頗著成效頃於盤屋營次接
准吏部咨開該部奏查同城知府失守城池隨同克復按照章
程祇准量予免罪仍應照例革職今該撫請將楊光澍革職畱
任核與奏定章程不符應請免其查議仍照例革職畱營効力
以觀後效所有該撫奏請畱任之處應行撤銷奉
旨依議欽此等因知照前來臣伏查漢中自髮捻川滇各逆竄
擾以還於今兩載爲日旣久受害尤酷臣前瀝陳地方困苦情
形尙未盡其什一雖經分飭各州縣設立撫卹善後總局先籌

米石施粥給賑一面淘挖堰渠招墾田土祇緣經費支絀無從籌款百計圖畫卒無以起斯民於溝壑幸賴楊光澍任事實心又能勤求民隱使上下聯爲一氣凡閭閻顛沛流離之狀士女此儻疾苦之情無纖微不以上聞其於修堰清產招佃布種勸捐籌賑以及雇賃耕牛借給籽粒一切瑣細之故苟有可便吾民利吾民者亦無不代爲籌策多方計畫以故各邑襁褓之士紳疲癯之耆老無日不集於楊光澍之門楊光澍亦無時不與之款接殷勤不啻聚父子弟昆相與共謀室家之事今各縣流徙之民以撫卹而漸集鄰封佃耕之戶以招徠而漸來卽各處飢疲困餓鵠形菜色之倫亦稍稍有生人之氣誠不宜更易生

手盡隳前功漢中所屬十二廳州縣其受害以南鄭城固洋縣
褒城沔縣爲最酷而西鄉畱壩甯羌州次之臣嘗訪察各牧令
中惟署南鄭縣知縣方其正廉能勤慎甚洽輿情餘或人尙樸
厚才識未充或初任地方情形不熟或術疏而無以澤物或量
隘而未能推誠當茲凋敝之餘難得循良之選方賴楊光澍表
率勸勉使所屬牧令漸摩治理共知仰體我

皇上子惠元元之至意誠未可遽使離任致窮黎失所依歸屬
員無所策勵查新授漢中府知府劉瑩已於五月初間來陝臣
熟察其爲人廉慎小心辦事結實亦屬可用之才惟初歷外任
於漢中府現辦事宜均不熟悉臣與藩司林壽圖往復熟商暫

未令其赴任冀得楊光澍一手經理慎始圖終使此糜爛之區漸復元氣在張集馨循例參劾本無成見卽部臣之援例奏駁亦秉至公惟臣前駐漢郡五旬之久旣已目睹一切情形當此整飭吏治撫卹殘黎之時苟有能盡心民事補救地方者不敢不據實

奏聞破格陳請合無籲懇

皇上天恩俯念要地需才仍准將已革道銜候補知府楊光澍改爲革職畱任仍署漢中府知府篆務實於吏治民生大有裨益臣與楊光澍素無一面之識祇以漢中府地方緊要人材難得不能不爲民請命是否可以仰邀

寬典出自逾格

鴻恩冒昧瀆陳伏祈

皇太后

皇上聖鑒訓示施行謹

奏

會奏官軍攻克堅堡逆匪敗竄南山疏

同治三年七月十八日

奏爲官軍陸續招降賊眾攻克堅堡三面合圍該逆敗竄南山
追斬甚多現籌督兵分路勦以靖逆氛恭摺會奏仰祈
聖鑒事竊照啟鄭諸逆與蔡逆合併之後凶燄雖張而我軍節
次移師進逼營壘環布逆勢轉蹙臣等以逆黨中裏脇甚多未

可以一律駢誅也乃各繕諭帖曉以利害各就營壘附近處所
 投遞賊眾見官軍四面環逼屢次挫敗糧食垂盡又絕擄掠之
 路眾志已離及見諭帖許其自新又見葉毓廣投誠之眾果皆
 安然無恙於是先後自拔來歸雖經蔡啟兩逆稽察防閑時加
 屠戮而亦竟不為止六月二十七日總兵鍾玉勝收降偽都統
 王洪興等五百餘人係屬蔡逆之黨七月初二日記名提督曹
 克忠收降偽天將王克昌彭學進等四千餘人係屬啟逆之黨
 初三日總兵黃金山招降中旗偽帥鄭永和等五千餘眾並將
 所踞南淇水二堡獻出奴才穆圖善以其為數太多離營又近
 慮有意外之虞遂列隊親自受降查點五千六百四十餘人係

屬石達開餘黨初四日曹克忠又收降僞天將羅啟發徐昌先等八百餘人於是啟逆黨羽存者不過三四千盡被該逆勒入焦家巷堡內蔡逆又派其親信悍目箝束而禁制之防邏加嚴用法尤酷凡查得密謀出降者皆縛之樹上使萬矛叢刺或生剝其皮聽其呼號宛轉以懼羣賊之心而蔡啟兩逆亦自此堅壁不出矣維時臣蓉所調湘果中軍記名提督蕭慶高已率所部由洋縣前來記名提督何勝必亦率親兵由棧道而至臣蓉與奴才穆圖善會商定於初六日黎明出隊以何勝必之湘果右軍及劉楨之雄毅軍進擊樓觀東堡說經臺玉華宮之賊以曹克忠所部六營及新舊降卒進搗塔峪堡魯馬堡之賊以總

兵孟宗福黃金山等六營進攻大玉西堡以蕭慶高之湘果中軍及彭基品之親兵五營由東北兩路進攻焦家巷老巢並檄飭李百魁之英毅軍由西路前來會剿而以黃鼎之彝字營由小路繞上塔峪坡踞高臨下以爲奇兵臣蓉自率驍騎會同奴才穆圖善衛隊暨副都統金順馬隊往來策應分派既定各軍依期分路而進是日黎明李百魁率師先至逕攻焦家巷老巢之西該逆出三四千人列隊抗拒曹克忠見逆勢兇悍遂飭總兵王得勝參將洪殿元兩營畱堵魯馬堡援賊而自率親兵馬隊及參將周有貴之定中營並葉毓廣等新舊降卒飛馳策應各營喊聲大舉鎗礮刀矛一齊湧進逆勢不支曳旗退走我軍

追殺五十餘名將近堡前該逆所派第二重隊突出接戰我軍
佯退將近一里之遙出其不意回旗衝擊適金順馬隊與蕭慶
高步隊亦皆奮迅而前兩面夾擊斃賊二百餘人而王得勝洪
殿元之軍亦進攻魯馬堡曹克忠復帶隊還往助之將堡外木
城拔開兩道正在衝擊焦家巷西堡逆隊又來援應曹克忠率
所部奮力禦卻之維時蕭慶高督率所部攻其北面逆眾出卡
迎戰我軍奮勇猛撲拔毀梅花樁十數重以火彈火箭鎗礮環
擊轟斃長髮老賊二百餘名該逆且戰且出我軍分路邀截鎗
礮齊施刀矛相接又殲斃百餘名生擒數十名總兵蕭舉臣劉
厚基等率師奪卡直衝英毅軍亦賈勇突進該逆抵敵不住繞

濠狂走我軍大呼乘之總兵劉玉興追近堡前顧見刀矛林立
劉玉興手刃數人鞭馬衝進堡門伏矛中其腹際登時落馬我
軍奮前搶護該逆亦急將堡門扃於是堡外之賊二千餘眾
無路奔逃悉爲我軍殲除淨盡賊目僞巡部一人僞都統四人
亦悉殪焉濠溝爲之填塞嗣復再四衝突牆上礮石如雨精銳
之士帶傷甚多隨復百計引誘該逆堅伏不出而彭基品之親
兵各營進攻東路者由田峪東岸渡河前隊甫抵焦家巷遙見
說經臺之賊搖動白旗由南路從後包鈔各營急以後隊作前
隊並將前隊折回列陣以待鎗礮刀矛連環迭擊斃匪數十名
鏖戰兩時之久賊不能支敗上山坡樹林之中不敢回巢臣等

因見賊堡林立前後左右相爲犄角非先破其旁壘則兵力分而難於兼顧於是奴才穆圖善親督所部逕搗大玉西堡該逆鑿於焦家巷之敗死守不出我軍恃銳猛攻該逆拌命抵禦礮石檣木沸粥滾油環拋倒灌我軍帶傷者已數十百人攻撲兩時未能得手奴才穆圖善憤氣填胸嚴督諸軍前進敢退者斬忽降將鄭永和自告奮勇情願拌死力攻因傳諭其眾曰我輩均係應死之人將軍憐而生之立功贖罪正在今日遂奮身負盾先登降眾繼上總兵黃金山攻其西提督劉定邦攻其北亦同時緣梯搶入逆眾惶急登屋拋瓦抗拒我軍亦躍上屋梁手洋鎗擊而墜之於時堡門尚閉我師三面擁入四路搜殺堡內

之賊無復噍類其由南面跳牆而逸者三百餘人又被衛隊親
兵圍而殲之生擒僞巡部僞都統六人僞震天福楊必南僞智
天燕余忠厚何必達任占鼇等均卽訊明正法西堡旣克復率
師會攻樓觀東堡先是何勝必劉精於黎明後分路進剿該堡
諸逆初伏不動列隊兩時賊見我師厚集於西而此路兵力稍
單遂相率擁眾出巢我軍分頭迎擊鏖戰良久遊擊周萬祥都
司龍鳳彬等衝鋒陣亡總兵唐友勝臍受矛傷何勝必坐騎亦
中鎗子均能堅持不退迨至回合十數次斃賊多名逆始敗退
回巢何勝必隨將說經臺迤南之香林山廟宇焚燬並將三明
洞攻克亦遂收隊少憩逮我軍大隊馳到分路進攻蕭慶高奮

率所部由西北兩路施放火彈火箭鎗礮轟擊各勇砍開木城
拔毀梅花椿數重總兵彭基品楊得勝蕭德經等亦由東北隅
奮力猛攻正在緣梯搶上堡牆不期東南兩面之賊分隊來援
礮石益厲都司朱得二龐大洪蕭孝林守備陳貴和周世英千
總周玉田等十餘員均以奮力先登中鎗而亡雖逆黨死者尤
多而我之銳士健卒帶傷不少臣等知其難以力勝乃令徐徐
撤隊以伺其隙憩息良久該匪終匿不出當大隊移攻東堡之
際忽聞西南隅鎗礮聲騰蓋魯馬堡之賊又復出隊搦戰曹克
忠等率眾迎敵遠則鎗礮攻擊近則刀矛砍刺計殺賊一百餘
名生擒三十餘名逆眾亦遂退匿堡內其塔峪踞匪經參將龔

良臣喻正祥龔子雲各軍逼近亦率馬隊一湧而出龔子雲奮力迎擊骸被鎗傷仍復負痛前進黃鼎率彝字營從山上衝下前後夾擊曹克忠督馬步隊由北而南繞出鈔截殲斃二百餘名生擒五十餘名奪獲騾馬三十餘匹旗幟器械甚多我軍亦有傷亡黃鼎當列隊塔峪坡半山之初卽有悍賊四五百由林壑持矛而出我軍四面兜剿約斃一百二十餘名生擒八十四名奪獲大旗五十餘面刀矛二百餘件忽山腳一路擁出騎賊百餘其上林木深處亦擁出步賊一二千人齊向各營猛撲張玉文整隊不動俟其撲近刀矛猛進加以噴筒火彈鎗礮轟擊立斃二十餘人該逆退走不及墮坡落澗自相踐踏者多我軍

乘勢掩殺二百餘人其對面山梁踞賊亦經副將顏明亮楊定春等上下夾攻奮勇衝撲將該逆所據山梁一律掃盪斬馘二百餘人奪獲大小鎗礮百餘件刀矛旗幟尤多惟顏明亮骸被鎗傷勇丁亦有傷亡此初六日各軍分路進剿克壘獲勝之情形也臣等以該逆經此大創慮其乘閒宵遁雖軍士鏖戰竟日之久疲乏已極要不可不嚴加巡防乃以湘果中軍六營卽就小村砦一帶排列駐紮而函致曹克忠以所部六營與英毅彝字各軍均不回營卽就魯馬堡焦家巷一路停紮巡邏達旦一面傳飭各營卽於初七日拔隊移營進駐就峪河東田峪河西以逼之奴才穆圖善亦飭所部六營從大玉東西兩堡一字排

列左連蕭部右連曹部彼此交相聯絡晝列戟矛夜傳刁斗不使稍畱罅隙該逆不次乘夜出隊撲營均經我軍擊退初八九十等日各路營壘以次築成臣蓉復向西安調取大礮五尊冀可藉以衝陷賊堡則諸軍趁勢以登免致損折精銳爲益良多初十日礮位運到卽函約曹克忠於十一日派隊排列塔峪堡焦家巷一帶遙作進攻之勢奴才穆圖善亦飭所部列隊大玉堡之北以相牽制俾湘果兩軍及親兵雄毅各營得以全力攻撲樓觀各堡臣蓉與奴才穆圖善仍卽率同金順馬隊往來策應是日黎明蕭慶高何勝必彭基品劉精等各統所部四面排列專俟礮力轟塌堡牆卽行併力衝入不期該堡土性堅凝礮

子著處僅穿一孔於牆壁初無大損該逆旋用甌石補葺瞬息完好衝擊三時之久雖羣子飛入堡內擊斃多人而堡牆屹然無恙堞上諸賊環立如故臣等憤恚已極當卽傳飭諸軍搬取雲梯爲四面環攻之計一面整飭隊伍奮力同仇布置既定蕭慶高激勵各營一鼓直前拔毀濠外梅花樁數層逕抵堡下該逆拋擲火彈蜂擁突出我軍刀矛齊進斃賊四五十人該逆旋卽折回我軍趁勢趕殺又將其木城砍開何勝必亦卽由南路逼進牆腳牆上礮石交加我軍不避危險將梅花樁全行拔毀奮力猛撲忽西堡突出馬步援賊二千餘人前來接應何勝必親督親兵後隊禦卻之於是彭基品劉精等奮督各勇步步圍

逼該逆拌死兇拒我軍裏創復進鎗礮輒石之下死者頗多中
軍都司劉智武中鎗陣亡參將劉世俊洞穿胸背百長朱遠陸
吳相全等均帶重傷其餘弁勇傷者已數百人眾志不爲稍卻
共將濠外梅花樁悉數踏平礮燄蔽天呼聲動地正在緣梯登
堡之際忽然雷電交作大雨傾注諸將不肯虧此一簣之功猶
思賈勇奮登無如梯溼牆滑鎗礮火繩均皆沾雨不然而賊藉
樓房遮蔽轉可肆其擊射臣等赤立雨中徧體濡徘徊良久
無策可施雨勢又益滂沱祇得率師而返此十一日各軍環擊
東堡之情形也臣等伏思兩次猛攻均不得手賊益將堅壁以
老吾師若復憤圖再舉徒傷銳氣計不如用長圍坐困之法因

傳飭諸軍並函致曹克忠於各營壘數十武之外掘挖長壕深
廣均以二丈爲率自西而東灣環包繞並於壕外樹立木柵鱗
次櫛比以遏奔衝一面派兵分塞田峪就峪兩口絕其汲道以
困之是夜該逆仍出撲營經黃金山等擊退斬馘頗多十二日
各軍皆依令以行該逆自我師移營進逼之後勢已窮蹙又見
挖修長壕益切惶恐臣等慮其乘月宵遁乃飭各軍均派四成
隊巡哨嚴防奴才穆圖善亦陰令降將鄭永和率其眾伏西面
空處以防偷越更定後倏焉大雨傾盆濃雲昏黑巡哨之總兵
蕭德經楊得勝王謨文星明等正趨樹林深處避雨忽見樓觀
各堡之賊捲旗銜枚紛紛潛竄我軍吶喊撲出逆眾驚惶無措

奪路爬山自相踐踏擒斬甚多騾馬器械拋棄尤夥其踞說經臺之僞將軍李春年僞都統蔣洪順任洪興等先經約期出降是夕投出千餘人分赴劉精何勝必等營呈繳鎗礮器械據供該逆本期西竄寶鳳不意官軍三面圍剿無路逃生祇得冒雨翻山分路竄走約與諸賊日會於新場再定去向等語何勝必當卽派總兵蕭餘勝等前左後各營偕雄毅軍由田峪口馳出邀截其焦家巷蔡啟諸逆正率其黨乘雨圖竄就峪口曹克忠疑其仍來撲營卽飭所部及英毅彝字各軍並葉毓廣等降眾嚴陣以待該逆阻不得前乃折回塔兒峪小路九如溝等處越山潛遁

奴才

穆圖善聞信後立即親率劉定邦黃金山等步隊

及金順馬隊冒雨馳追三更已抵塔峪正值逆眾爬上山梁我師隨後掩擊吹笳吶喊該逆驚潰四竄刀砍矛刺墜巖落澗者不計其數時值大雨如注鎗礮不能遠擊山水瀰漫攀登不易黃金山衝上山腰手刃悍賊二十餘名奴才穆圖善麾軍繼進曹克忠亦督率各營奮力跟追到處搜斬兩軍合計斃賊千餘人奪獲騾馬旗幟鎗礮之屬尤多至十三日辰刻始各收隊維時蕭慶高彭基品等率師由就峪口跟蹤追勦既踰東瓜嶺行五六里抵西南溝遙見逆眾攀援林木越嶺紛竄各軍爭先追逐將逸入林中潛伏溝內之賊斬擒殆盡而山上悍逆排列鎗礮拌命抗拒各軍一鼓作氣奮力前突把總余占彪郭清海衝

鋒陣亡我師益憤總兵楊得勝參將王謨龔南山徒步先登大呼陷陣各營齊聲吶喊前進以鎗礮火箭噴筒連環仰攻逆眾紛紛奔潰我軍趁勢掩殺斃賊六七百名生擒三百餘名解散新裏之眾三千餘人奪獲騾馬器械難以枚舉各將領仍復盡力窮追於時何勝必所派由田峪口馳出邀截之師甫行十餘里抵陽河溝卽與賊隊相值其悍黨排踞山巔扼險以待隨就山內砍伐巨木橫塞隘道運石設卡阻我進擊之路李遂勝劉精蕭餘勝等奮督所部吶喊前進攻破卡隘逕用鎗礮仰攻山上木石滾下弁勇陣亡者數人我軍賈勇猛進鎗斃偽巡部一人斬馘二百餘人墜崖死者尤多逆勢不支越山狂走我軍追

至川碕子地勢陡峻該逆復回頭站隊圖爲困獸之鬪適蕭慶高彭基品等率師由山坳繞下更成夾擊之勢該逆望風膽落奪路狂竄我軍且追且殺又斃長髮老賊四五百名擠墜溝中淹死者不少直追至鐵鑪岔輜重馬匹丟棄盈路該逆不暇喘息悉向秦嶺一帶奔逃日已向晚各弁勇飢疲已極權就該處駐宿十四日黎明蕭慶高復率隊踵道前進又及之於金牛坪前數里地方兩面懸巖峭壁水勢湍急無路可行該逆皆涉水亂流以濟我軍亦隨後尾之路隘不能施展僅殲其老賊數十人殺其所乘馬十餘匹解散男婦百餘人此該逆窮蹙夜竄我師連日追剿之情形也伏查蔡啟諸逆由大峪口竄往蓋屋之

後銳意窺川圖由棧道前進臣等頃抵鄆縣該逆前鋒已逾郿縣而西因慮到處蔓延急撥英毅彝宇各軍及曹克忠所部繞由寶雞一路攔截東西夾擊節節逼緊始將逆黨聚於一隅布列長圍絕其糧道計不過五六日可期一鼓聚殲不謂經營五旬之久功在垂成竟被乘雨宵奔殊深憤懣然該逆以四萬餘眾沿途裹脅實繁有徒比計陸續收降前後斬馘以及連日追剿解散之眾已近三萬現所存者不過萬數千人又多丟失軍械乏缺資糧但能賈勇窮追當可殲諸南山老林之內惟聞李雲麟一軍至今尙未到防甚慮佛坪甯陝四畝地等處無兵堵截臣蓉於十三日卽經檄飭彭基品率親兵五營由潯峪口光

頭山繞赴四畝地又派蕭舉臣等湘果三營由就峪口趨厚畛
子逕赴佛坪並撥英毅彝字各軍趨板房子繞赴新場近復撥
曹克忠所部龔良臣等三營繼進但龔諸路繞前攔截之師均
可先期而至使該逆不能遽竄出山則檻獸釜魚終亦不能倖
脫羅網比復函催蕭慶高何勝必各率所部跟蹤尾追務使該
逆無暇喘息臣現趕籌糧運卽於日內由子午谷入山督勦亦
冀迅掃逆氛仰紓

宸廑所患軍餉困絀米糧奇貴將不能無濡滯延誤之慮耳至
前進攻大玉西堡之時降將鄭永和首先搶上賊壘實屬著有
微勞合無籲懇

皇上天恩可否賞給五品翎頂以示優獎之處出自逾格
鴻慈除將傷亡將弁彙案另請

卹典並將降眾分別收留資遣以期安置得所外所有官軍陸
續招降賊眾攻克堅壘三面合圍該逆敗竄南山追斬甚多現
籌分路勦以靖逆氛各緣由謹合詞會同署西安將軍奴才
德興阿由驛馳奏伏祈

皇太后

皇上聖鑒訓示謹

奏

附請飭將軍穆圖善督兵赴鄂會勦疏

再查偽扶王陳得才巨股現踞麻城當茲金陵老巢傾覆之後
急宜趁勢掃除以靖餘孽奴才穆圖善疊據常興阿藍斯明等
稟報所部馬步二十八營均經湖廣督臣官文派往麻城會剿
頗患無人督率臣蓉竊計蔡啟兩逆敗竄入山之後勢已窮蹙
雖其死黨尙萬餘人然有湘果兩軍及親兵英毅彝字各營分
途剿辦兵力尙不爲單惟南山迂迴千里路徑分歧欲期處處
扼堵頗有不敷分布之勢多畱一軍自可多收一軍之用顧念
餉項支絀萬分實屬無可供給而鄂中關係大局亦不能不速
籌掃盪所有入山逆匪應如何扼截搜剿以期力殲渠魁殄除
醜類臣蓉身膺疆寄自當專任其責奴才穆圖善所部各營及

招收降眾似應統赴麻城以資督勦當時勢艱難之會正臣子
各竭忠慮之時奴才穆圖善受

恩深重亦思薄效涓埃不敢稍耽安逸謹合詞附片陳奏請
旨是否有當伏祈

聖鑒訓示飭遵謹

奏

奏報籌解工程銀兩疏

同治三年八月十八日

奏為恭報籌解奉撥工程銀兩數目並起程日期恭摺具奏仰
祈

聖鑒事竊查陝省應解

定陵工程處銀十五萬兩因同治元年以來軍務迭興需用浩
大庫款支絀未能籌解經臣於本年五月十九日將陝西竭蹶
情形據實附片

奏請展緩俟秋閒設法催徵各屬未蠲地丁儘先委解旋奉
諭旨陝省應解工程銀兩現在需用甚殷著劉蓉督飭藩司趕
緊設法陸續撥解等因欽此遵卽轉行藩司速籌報解去後茲
據布政使林壽圖具稱伏查上項銀兩關係要工應於無可設
法之中力爲籌解當將各屬應徵本年地丁錢糧飭令上緊催
徵並將各項要款酌量緩發茲已湊有成數於本年徵收地丁
項下動撥銀二萬兩飭委畱陝補用知州湯敏管解定於八月

二十五日起程前赴

欽派恭修工程王大臣處交納以濟要需至下餘應解銀十三萬兩現實無款可撥容再趕緊設法籌措陸續報解等情具詳請奏前來臣復查無異除再督飭藩司趕緊籌畫續解並咨明戶工二部暨工程處知照外所有籌解工程銀兩數目並起程日期理合恭摺奏報伏乞

皇太后

皇上聖鑒謹

奏

官軍勦匪屢捷餘孽狂竄階州疏

同治三年八月二十九日

奏爲官軍跟剿竄匪屢獲勝捷沿途擒斬收降匪黨甚多餘孽
狂竄階州圖犯川境現仍督飭各軍越境窮追以圖盡殲恭摺
馳奏仰祈

聖鑒事竊照蔡啟兩逆敗竄南山之後經臣調派各軍分路追
躡會將辦理情形奏報在案旋據蕭慶高何勝必彭基品等稟
報該逆由鐵鑪漢金牛坪一帶狂竄之後委棄軍械甚夥我軍
追殲多名屍骸枕藉七月十五日蕭慶高何勝必各率所部躡
賊於八閣坪距秦嶺數里該逆方炊不意我師驟至鎗礮齊施
轟斃數十名以山峻林深難容隊伍我軍亦陣亡數人逆眾越
嶺奔逃蕭慶高等分路翻山追剿該逆趨踞韭菜坪兩岸民房

砍木爲壘憑險抗拒鎗礮犀利各勇傷亡不少適總兵謝正球督率親兵衛隊踵至遂於十八日會同分路前擊且戰且進殲斃逆匪三百餘名將韭菜坪賊卡攻踏餘逆竄入新場死拒鎗礮對轟半時之久道路窄狹難以展布遂各分派一營由觀音寨小徑山梁包鈔而出兩面夾攻該逆奪路分竄我軍乘勢攻開卡門截殺老賊二百餘名生擒六名逆眾向林子口拌死而逃其時彭基品亦由光頭山追至菜子坪截殺後隊悍賊三十餘名因聞逆踞新場飭總兵楊得勝由西河進自率中後兩營由閣老坪進齊抵兩河口而英毅彝字兩營亦由板房子繞出佛坪之袁家莊曹克忠所派之龔良臣葉毓廣等各營亦由佛

坪繼至扼賊橫竄該逆因見官兵歷險窮追不少憩息冀將險徑挖斷阻我追師我軍旋修旋進追至林子口屢有斬擒該逆奔赴四畝地立營湘果中軍百長鄧光升右軍營務處副將李遂勝率隊前行見賊營星列正在圍攻民堡卽分兩路首先進剿逆眾輕我兵少列隊相抗李遂勝鄧光升奮勇先登立斃悍賊十數人回合十餘次該逆尙恃眾分股包襲適總兵劉厚基蕭德見經歷蕭啟基暨副將周東興彭基秀總兵鍾玉勝各率所部左右衝出該逆首尾不能相顧殲斃五百餘人生擒三十餘名救出難民千餘奪獲牛耳礮十餘尊騾馬四十餘匹旗幟號衣多件賊眾潰散向大河壩一路逃逸蕭慶高等仍飭各營

跟蹤追逐二十一日追至距大河壩十餘里地方該逆尾隊正在涉淺飛渡經劉厚基蕭啟基蕭德見鄧光升列隊於山梁之右李遂勝周東興彭基秀列隊於山梁之左以扼其吭逆勢窮蹙當據僞友天義同檢陳友發僞笏天福同檢李得盈僞霽天福同檢姚松林僞凝天義尙書樂拜颺僞奉天燕承宣詹瑞蘭等率眾二千餘人跪地乞降詢悉啟逆黨類被逼同行因見蔡逆凶暴好殺悔悟投誠願以死報並稱蔡逆懼我追師現將老弱幼小概行殺戮欲由洋縣偷渡漢江如或水深不能搶渡卽擬循山逕趨褒沔等語察其情詞出於至誠當將興漢一帶被裹之人給資遣歸其籍隸三江兩湖四川貴州等處無家可歸

者尙千人暫行畱營効力俟事竣設法安置俾免反覆二十三
日追至金水河時已昏暮次日黎明大霧瀰漫蕭慶高等料賊
定然偷渡飭所部銜枚分下河壩正值該逆爭渡之時乘機
殺傷亡溺死者不計其數遂由酉水河槐樹關一帶狂竄維時
總兵蕭舉臣毛尙陞彭義益候選道蕭德綱總兵蕭餘勝等已
先由佛坪繞出洋縣二十五日賊至各營官兵畱一半守護洋
城以三成隊伍往槐樹關迎截時甫已初行抵該處山梁排列
隊伍該逆分五路漫山而來各營整隊分迎往來衝殺十餘次
俱有斬擒逆眾因被官軍前後裹逼手刃退後賊十數人逼令
拌命衝突各營將領亦卽盡力扼堵從巳至申鏖戰四時之久

總兵蕭餘勝以賊匪愈聚愈眾恐其奪路狂竄乃親率所部暨守備朱球珥千總吳高遠申芳茂等首先撲入賊隊殺斃數十人賊已退卻該總兵等乘勢追殺詎兩翼伏賊趨出竟被包鈔蕭慶高等各軍相離尙遠無兵策應蕭餘勝等遂以力竭被害然賊亦遂喪膽奪氣不敢窺伺洋城循山走竄城固矣蕭慶高等聞信各督所部飛渡西水河由洋縣進勦甫抵捷順橋堦水陡漲賊眾亦因水阻輒循北路竄踞城固縣屬之東原公一帶二十六日蕭慶高等商調湘果彝字三營並英毅前右兩營馳赴漢褒要隘以遏其前彭基品所部五營由斗寶二山以襲其後二十八日彭基品派總兵楊得勝由左路沿河進前營副之

參將王謨由中路進後營副之總兵謝正球由右路依山進彭基品與幫辦唐楚翹率親兵各隊策應踞村不遠賊亦分數路來迎彭基品等誓以死戰各勇奮興效命鎗礮刀矛愈接愈厲自午至申力戰兩時殺斃悍賊二百餘名生擒老賊十九名棄械投誠者一百二十四名內有僞先鋒向定升僞百長鄧澤喜二名是夜探知該逆造具竹筏急欲渡河彭基品密飭各營五更啟隊及抵河干該逆有已經過渡及未經渡河者人馬擁擠各營奮力衝殺逆眾首尾不能相顧旗幟器械拋棄沿河傷斃溺死者不可勝數救出難民數十名我軍亦有傷亡餘逆悉由西原公文川竄入彌勒院蕭慶高等恐該逆奔入漢中卽在漢

江尋覓礮船挨次渡河二十八日馳抵漢中適逆由北山小河奔文川集一帶遂派中右馬步各營暨大河壩新收降卒千人駐紮郡北之宗家營並派副中及先鋒馬隊駐紮東關又畱新中一營扼守城洋交界之區以防回竄並派前副中兩營守護郡城比值逆眾竄至彌勒院寶峯寺山邊因見我軍繞出在前不能竄突卽在該處暫踞各軍列營扼守並修築營壘以圖圍逼二十九日辰刻正在修理牆溝忽賊眾分三路衝撲各軍分頭迎敵自巳至未衝殺多時斃賊四五百名猶抵死抗拒及馬隊分兩翼包鈔賊始敗卻歸巢次日黎明蕭慶高等分兩路進攻賊亦迎拒鎗礮對轟逾時忽見逆首親督匪眾猛撲而前蕭

慶高等因賊鋒正銳各帶親兵監督部勇有進無退維時總兵毛芳恆都司瞿升富見賊愈來愈湧遂率所部往來衝敵斃賊百餘人逆眾怯退該總兵等乘勝追殺至逼北山之下詎該逆以無路奔逃忽分數股捨命反撲將該總兵等困在垓心斯時各營正在酣戰無暇接應毛芳恆等力竭陣亡蕭慶高等聞信督飭各軍併力衝殺斃賊二百餘人逆勢不支始行敗退歸巢比李百魁黃鼎各營繼至遂合各軍分道進攻初一日齊向彌勒院進發時甫辰初該逆分股相迎對施鎗礮約計一時斃賊四五百名逆眾見我後軍已到意在拌死奪路各軍併力環攻從已至申相持四時之久斃賊千餘人該逆虛設旌旗十餘面

隱伏村際以圖牽制黃鼎自帶親兵籐牌直前剿捕果見伏賊
 一二十人望風奔逃黃鼎揮隊與張玉文等三路馳進甫踰郭
 家灣山梁適英毅前右兩營接踵亦至黃鼎督飭親兵前擊立
 斬悍賊數名賊勢稍卻張玉文率隊乘機猛撲該逆敗過山梁
 賊目藍僞巡部孔僞都統自斫退後數賊棄所乘馬持矛回衝
 羣賊隨之副營後哨長李玉春亦卽下馬挺矛迎胸飛刺藍僞
 巡部倒地而斃孔僞都統攏救骹中矛傷立被我勇擒獲雷安
 邦手刃悍賊數名黃祖福陳金彪同副前哨長楊定春首先衝
 上山梁各營齊擁賊復大敗下山復於溪中回合十餘次矛刺
 鎗擊斃賊數十名我軍亦受傷數名追逼十餘里越過山梁四

層直抵鄭家營河岸沿途殺賊一二百名奪獲旗幟號衣刀矛
鎗礮百餘件方英毅軍之由山下鈔上也後營參將陳賢元奮
不顧身直衝逆隊手刃數賊不意礮傷腦頂登時落馬各軍奮
力鏖戰衝殺數次斃賊甚多該逆勢不能敵率黨狂奔蕭慶高
何勝必率中右兩軍三面圍之督各勇奮力攻擊賊勢大蹙時
值薄暮蔡啟二逆懼不得脫竟爲困獸之鬪率其死黨數千拌
命衝突潰圍而出該軍卽會合英毅彝字各營分道跟剿八月
初一日該逆已竄踞襄城對河之長寨追師陸續踵至分路逼
攻署知縣李承玖委員譚體迨與汎弁率團丁隨之該逆進退
無路遽向接灘河鳧水而竄我師趁勢逼之截殺多名生擒僞

先鋒數名奪獲旗幟鎗礮馬匹多件淹斃者不計其數日已昏
暮各軍飢疲已極就褻城採辦雜糧該逆漏夜狂竄由沔縣斜
趨略陽略邑已經兩次失陷城郭守具缺敝不全署知縣陳倫
親率團勇赴接官亭堵禦眾寡太不相敵方退紮江口護居民
過河該逆已紛紛闖入城中臣所派英毅營李百魁彝字營黃
鼎親兵營彭基品及曹克忠部下總兵王得勝參將龔良臣等
各率所部趕到初七日李百魁黃鼎各帶親兵赴近城一帶探
看地勢擒獲擄糧賊匪十餘人訊供該逆懼官軍追襲先就白
水河搭造浮橋以圖竄走等語初八日五鼓各軍出隊會剿該
逆分布其黨於新舊兩城而自列隊於河岸以拒我軍分四起

進攻一起由新城東門殺進一起繞城截擊一起直鈔舊城一起
起逕撲河岸維時兩城逆眾均奔河岸拌力死拒各營猛撲數
次逆眾難以支持蔡逆率其死黨飛奔過橋啟逆繼之我軍乘
勢掩殺斃賊數百名生擒百餘名淹斃數百名河深水急該逆
人馬擁擠橋梁爲之斷折署知縣陳倫帶領團勇分布相公山
隘口邀截敗匪復殺斃數百名生擒僞先鋒馬姓等十餘名奪
獲旗幟馬匹多件餘逆分股由宜口郭家壩竄越白馬關奔入
階州境內陝境遂無賊蹤臣自聞該逆竄出洋縣卽策此賊狡
謀必越襄沔略陽以趨階州意謂一入隴境則陝軍將不復追
少甦殘喘卽可隨處擄掠圖遂其窺伺川疆之計因檄鞏秦階

道林之望督率兵團力扼徽成階文各要隘而咨四川督臣駱秉章速飭邊將務嚴昭廣江油之防並檄湘果諸軍無論該逆竄隴竄蜀總當越境窮追不許稍分畛域現聞該逆猛撲畢口急圖入川蕭慶高何勝必等已繞出甯羌會同川軍分路邀截量此敗殘餘孽不難計日聚殲臣仍飭雄毅各營就鳳縣擇要扼守以防由徽縣兩當回竄之路不敢稍涉疏懈以誤地方李雲麟自聞逆眾敗竄南山卽率所部由興安逕赴西鄉分起扼紮防該逆偷渡漢水竄定遠輒坪等處之路嗣聞逆蹤已越褒沔過略陽追師厚集逆黨無多乃率師回駐興安擬遵旨遣撤毅健六營回楚以節糜費而暫畱隴軍六營以顧興安

一路之防惟查此次各軍翻山越澗不舍晝夜躡賊於懸崖峻
坂高林密箐之間谿谷阻深糧食乏絕軍士多餓斃於途者逆
眾則鋌急走險捨命以奔官軍則敵愾同仇飢疲弗恤崎嶇迂
迴窮追二千里轉戰廿餘日計擒斬逆眾收降匪黨共七千餘
人溺斃逃散者過之現據探報賊供所存餘孽約四千餘人各
將士困苦辛勤實屬著有微勞應俟事竣後擇尤彙案保奏請
旨獎勵以昭激勸至陣亡之提督銜記名總兵蕭餘勝記名總
兵毛芳恆參將陳賢元都司瞿升富守備朱球珥千總吳高遠
申芳茂均皆奮不顧身衝入賊隊力竭捐體而毛芳恆瞿升富
屍遭支解尤爲慘烈相應先行請

旨交部從優議卹以慰忠魂其餘傷亡弁勇容俟查明照例辦理所有官軍跟剿竄匪疊獲勝捷擒斬甚多餘孽狂竄階州現仍分飭諸軍越境窮追以圖盡殲各緣由理合恭摺由驛馳奏伏乞

皇太后

皇上聖鑒訓示再臣因患病兼旬日見沈重是以奏報稍遲合併聲明謹

奏

附請調曹克忠馬步赴甘疏

再臣頃接雷正綰咨稱攻克張家川龍山鎮逆巢後十四日直

搗蓮花城師次馬家堡斃賊無算奮追十餘里地勢陡險詎該
回逆埋伏精悍於深溝之內以致前敵遇伏潰散當督後隊奮
力抵拒無如伏賊愈出愈眾員弁兵勇傷亡過多一時難期整
頓該提督咽喉上受矛傷甚重催調曹克忠赴甘助剿並以逆
氛復熾隴防萬緊等情飛咨到臣查雷正綰自幫辦軍務疊挫
凶鋒其部勒營伍在諸將中最爲進止有法此軍潰敗則甘省
回氛大熾而陝省邊防亦因之震動總兵曹克忠前已奉
旨飭赴河州鎮本任現在蓮花城一帶悍黨數萬勢將踰隴而
東曹克忠前已回省臣當卽咨調該總兵先將現部三營及親
兵馬隊尅日拔發赴甘會剿以遏凶焰一面飛調現紮略陽之

總兵王得勝參將龔良臣等四營暨駐紮鳳縣之總兵陳德隆等三營星馳繼進并令兼顧隴防統計曹克忠馬步及新降卒有十五營之多增此勁旅當可杜竄越而免蔓延臣仍當隨時確探嚴防以固疆圉所有調兵赴甘緣由理合附片馳奏伏祈聖鑒謹

奏

附請開缺調理疏

再自該逆敗竄南山之後臣卽趕籌糧運擬由子午谷入山親督諸軍剿賊詎意七月二十四日行抵鄠縣忽然股際生癰呻楚異常不得已就鄠調醫旬日以後瘡口甫潰又患頭風徧體

俱現紫斑旋又轉而成瘡由是變證百出神識昏迷氣血蒼亂
醫者咸以爲棘手重證難期痊可不得已於八月二十三日輿
疾旋省現又轉而成痢雖服藥稍見功效而痊愈究須時日伏
查陝西境內現雖已就肅清而西固汧隴之防東嚴興商之守
籌軍籌餉責任匪輕臣以憂患餘生心力凋瘁誠不敢以病軀
戀棧貽誤地方伏求

皇上天恩賞准開缺回籍調理俾得釋其重負實荷

高厚鴻慈除將日行事件仍飭藩司林壽圖代拆代行至於重

大軍情仍由臣力疾料理外所有微臣病難速痊懇

恩開缺調理緣由理合附片陳

奏伏祈

皇太后

皇上聖鑒訓示謹

奏

遵

旨傳諭臬司赴甘招回疏

同治三年八月二十九日

奏爲遵

旨傳諭臬司赴甘議撫據詳代奏仰祈

聖鑒事准議政王軍機大臣字寄八月初三日奉

上諭鹽固回逆就撫本日已明降諭旨准予投誠免罪並派張

集馨前赴甘省查辦等因欽此欽遵轉飭在案仰見我

皇上撫育中外戎夏一體但分良莠不分漢回赦其已往之愆俾歸故土予以自新之路共釋猜嫌如該回乞撫果真出於至誠臣仰體

皇仁自當妥爲安插旋據臬司張集馨詳稱跪讀

詔書莫名欽佩顧通籌全局利害有不得不據實切陳者脅從可撫渠魁不可撫良懦可撫凶暴不可撫陝省西同等屬回民多半椎埋惡少向來帶刀遊蕩睚眦殺人與漢民積怨深仇已非一日元年四月乘髮逆入境大荔逆首于阿渾鄒阿渾任老五等豎立滅漢興回旗幟以尋仇報復爲名大肆焚殺婦穉無遺渭南縣差役洪興武進士禹元魁沙河掌教僞馮王總頭目

僞赫王分派海提木兒圍涇陽普洱馬率領二河州馬義馬花
諸逆圍咸陽沙河一帶則有僞西元帥唐一麻木總領馬花虎
馬朝保正馬五保武生馬得榮馬得明壞醇子等分投搜殺臨
潼起事首逆寇金積焚掠省關首逆僞元帥孫玉寶白占魁以
及高陵涇陽塔兒底蘇家溝光太廟之首逆馬武舉馬二元馬
三元鄉約馬興全馬烏什于五八兒白玉朝安阿渾等大小頭
目不下數十名僅聞馬二元在臨潼被獲其餘雖不免於陣斬
而先期逃竄者多今手刃前張都堂之任老五圍困省城之孫
玉寶概未伏誅且各擁眾或千人或二三千人不等屬聚於固
原城外類皆鋒鏑之餘驍悍善戰前此攻陷各縣村堡搜掠金

銀甚多既強且富現雖竄走其勢未衰至於乞撫乃該逆緩兵
慣技多帥入關初到同州屢墮奸計後洞悉陰謀立意主勦始
得奏功省城駐兵一萬七千人不戰而撫屢派已革知縣馬奎
煥帶領劉阿渾等出城開導不但出言狂悖多所要求且於省
城左右焚殺不休嗣經公商主勦將光太廟上下水腰馬家堡
白起營牛東義井各巢徧掃而糧運始通屢次

奏明在案迨多帥進省分派陶軍門援救鳳翔雷軍門勦辦甘
逆曹鎮軍又將汧隴邠州白吉原麟游各寨攻克將士疲勞餉
需鉅萬閱時幾及兩載百戰艱苦陝境始一律肅清而通省慘
死人民已數百萬矣本司深知回情詭譎恐棄前功是以前經

具奏不令逆回再入西同等屬實係統籌全局並非意存畛域
在秦言秦也夫關中據天下形勢拱衛

神京南接蜀黔東連晉豫同州府與晉省僅隔一河與豫省僅
隔一關晉省爲完善之區餉源所出豫省乃平坦之地堵截爲
難設該逆勾結爲奸必更蔓延難制非比邊陲僻壤距畿輔云
遙也上年陶軍門在鳳翔主撫事多遷就多帥未加深察遽行
議准該逆因已准撫日肆鴟張多帥恐釀事端嚴立條約而在
多營之孫玉寶旋即叛去本司在署撫任內准陶軍門咨所降
回逆馬隊張輝馬兆麟派赴寶雞助勦曹背時股匪該逆不遵
調遣遁回郡城陶軍門恐其煽亂趕緊折回親往彈壓經本司

奏奉

諭旨鳳郡逆回包藏禍心不遵多隆阿所頒禁約且將寶雞前
禁回民馬隊擅自調回郡城其以乞撫爲緩兵之計已屬確有
明徵可惡已極著卽嚴飭痛剿等因欽此本年七月接雷軍門
函開鹽固兩城均於克復平涼後獻城就撫楊署臬鈞錕來文
代陳真心反正並稱陝逆鄒保和孫玉寶等投誠批准等情所
關重大非將帥所敢專前已陳明形勢此時姑妄聽之又於七
月杪接雷軍門函開議撫招降事關西北全局該逆狙詐萬端
乞撫緩兵乃其故智未敢信以爲真適陶軍請援而楊署司率
逆目張保龍等詣營求宥乃姑示羈縻騰出兵力以助陶軍勒

令呈繳軍械馬匹囑楊署司驗收然此中操縱之機實未敢孟浪也本司查雷軍門人素精細深悉敵情近在目前猶且不敢深信今降眾數萬皆係亂民何者爲良何者爲莠無從而分且屢降屢叛何者爲真何者爲詐無從而辨卽或細送頭人呈繳軍械馬匹而此數萬逆眾令其各歸原籍與漢民共井同邨欲其相安無事勢必不能况該逆稔惡多年近更熟悉戰陣竊恐益肆強梁

朝廷能撫之以恩未必能化其梟獍豺狼之性有司縱繩之以法未必能解其父兄子弟之仇一旦復尋干戈必至大煩兵力貽害鄰疆後患伊於胡底查該逆巢穴早已邱墟若仍自搭棚

賈必至紛爭攘奪若令官爲安置又苦經費浩繁散處之則約東難周聚居焉則詭謀易遂該逆未必盡係愚蠢豈不料與漢民深仇大隙而敢於乞歸故土不慮漢民之報復者諒必具有深心尤不可不防其橫溢本司自當恪遵

諭旨馳赴涇固平涼一帶宣布

德意將陝省降逆詳加查察固不敢膠執前見亦不敢掉以輕心但窮蹙難民易於收撫而凶悍黨羽難以招安如是緩兵詭計斷不敢輕率貽誤

國家應聽雷軍門專意主勦再上年陝回滋事時卽有往糾新疆回眾之語特以道路傳聞事無證據今乃回疆不靖連陷三

城是否陝回煽惑起事抑係甘回勾結爲奸不能深悉惟查陝省逆目任老五普洱馬孫玉寶皆係滇回二河州係甘回洪阿渾係江甯逆回其餘河南山東各籍皆有足見平素聲息相通蓄謀已久新疆倡亂難保非內地勾通否則屢次乞撫緩師其意安在由此而論不獨陝回難於議撫卽甘回亦未見真降不獨關門揖盜陝回難令其復歸而清除內奸甘回亦急宜防範但使內患削平新疆回逆招引無人未必敢長驅東犯年來議撫百無一成與其因撫緩兵糜餉老師之非計何如先機決策一勞永逸之爲佳管見所及擬請代

奏等情前來臣復加察覈陝省回逆搆難誅殺漢民殆以千百

萬計矣殘賊詭險輒匿其精悍而故誘以疲羸自深保多隆阿陶茂林皆曾誤聽乞哀之詞幾墮緩兵之計夫勦撫不妨兼施漢回豈容歧視惟現在新疆之匪黨句結滋多鹽固之軍情反覆難定似宜通籌全局不可苟且目前該臬司所慮未爲無見然仍當飭令遵

旨相機籌辦毋得膠執成心除檄委候補道官銘暫行署理臬篆俾張集馨迅速交卸起程外理合據情代

奏伏祈

皇太后

皇上聖鑒訓示謹

奏

附請飭都興阿自行採買皮貨疏

再臣准署陝甘督臣都興阿以邊地嚴寒咨飭陝西藩司趕辦羊皮大襖五千件小襖五千件解營備賞價銀准赴甘肅糧臺請領等因當經札飭遵辦去後茲據藩司林壽圖詳覆徧加採訪販運不前實緣陝省自同治元年四月軍務始興迄今三載商民逃散向來皮貨來自甘肅聚於涇陽該縣自失守後室廬灰燼人煙幾於斷絕甘肅回氛猖獗更無來路本省元二等年貢皮等項曾經先後奏請停辦現仍商販斷蹤無從購製請分別咨

奏於甘肅山西二省採辦等語臣覆加察覈委屬實在情形惟軍士歲暮從征禦寒無具所需實關緊要相應請旨飭都興阿卽於甘肅就近採買或飭沈桂芬於山西出產皮貨之地如數購辦俾免貽誤理合附片陳奏伏祈

聖鑒謹

奏

附奏漢鎮余福象暫行開缺疏

再臣頃准議政王軍機大臣字寄同治三年七月初三日奉
上諭本日據官文奏陝西漢中鎮總兵余福象現年二十二歲
於營務毫無厯練而奢華浮動性情未定似未便遽膺專闡請

飭查看等語並著劉蓉隨時認真查看余福象於營務操防一切事宜能否勝任據實具奏勿稍徇隱等因欽此臣伏查余福象實已二十七歲心地明晰無武人習氣詢之穆圖善曹克忠及多營將士均稱其隨同征剿臨敵未嘗退怯前因蔡啟兩逆竄踞樓觀臺一帶臣慮其偷渡渭河派令余福象率所部親率及回兵二百名駐防北岸該鎮以河灘縣互數十里勸諭武功所屬民團二三千人沿河設守相地搭棚布置井然亦見其才之明幹可用而外間人言藉藉雖臣亦時有所聞推求其故則以多營宿將中年齒較長勞績較著者尙多未得實缺而余福象遠膺專閫之寄是以物議繁興傳播遠近今該鎮自以年力

方壯正効命疆場之時情願隨同荊州將軍穆圖善赴甘鞫辦
逆回以樹功績其壯志尤可嘉尙惟漢中重鎮員缺未便久懸
合無籲懇

天恩准予暫行開缺仍以總兵効力行間二三年後該員年逾
三十厯練滋深或續建有勳績再求

皇上恩施畀以一方之寄則於營務操防一切事宜當更勝任
愉快所有遵

旨隨時認真查看據實具奏緣由謹卽附驛陳明是否有當伏
祈

皇上聖鑒訓示飭遵謹

奏

附請補漢中鎮員缺疏

再漢中向稱重鎮額設馬步兵丁七千餘員名上年逆蹤竄擾
日久逃亡甚多計今存者僅逾三分之一春間臣駐漢郡各營
員弁屢求召募足額規復舊制言之再三臣未卽許良以地方
殘破無錢糧可資供支而鎮將不得其人徒以老羸備數則營
務無從整飭雖充伍亦與懸額等耳臣前飭署漢中府知府楊
光澍清查各屬絕產擬爲將來籌辦屯田之資現值秋稼漸登
謀食較易整頓營務實此其時惟其緊要關鍵總在鎮將得人
伏查儘先提奏提督蕭慶高久經戰陣謀畫老成其馭軍嚴而

不苛寬而能制故所統湘果中軍最爲勁旅現值漢中鎮總兵員缺如蒙

皇上天恩卽以蕭慶高借補斯篆必能充足士籍整肅營規訓練操防使漢中屹成重鎮實於軍政裨益爲大臣爲整頓營務起見是否有當伏祈

皇上聖鑒施行謹

奏

會奏覆覈改正獎敘出力員弁疏

同治三年八月二十九日

奏爲遵

旨覆覈改正獎敘督團出力各員弁恭摺奏懇

恩施仰祈

聖鑒事竊臣蓉前因在籍刑部主事管滂戶部主事蔣常垣浙江候補知縣黃加耀候選訓導曠瑛帶團防勦出力使髮逆不敢犯境曾經奏請

恩施將管滂蔣常垣均以員外郎歸原部補用黃加耀以知州仍歸浙江儘先補用曠瑛以知縣歸部卽選管滂黃加耀並請賞戴藍翎奉

旨允准在案茲於七月十八日准候補四品京堂李雲麟咨稱四月十一日承准議政王軍機大臣字寄同治三年三月十八日奉

上諭李雲麟奏首逆伏誅餘黨剿盡通籌現在賊情次第追剿及請改管滂等前次保獎各摺片所陳主事管滂率領團勇於紫溪地方合剿藍逆股匪殲除匪首等情與前日劉蓉所奏略同而管滂等由規溝場追賊餘黨及之於葉家坪與舉人張承燮等團勇相遇併力夾擊將賊餘黨全行殄滅並軍功王重良率勇搜尋藍大順正身並其僞巡部藍三順四順等八人同時殺斃等情較劉蓉前奏爲詳劉蓉前奏本有先於紫溪河殲斃眼有肉瘤之藍大順外間傳說並非該逆正身之語茲據李雲麟奏獲賊供係屬僞都統王包包假名此次王重良所殺藍逆正身割驗首級實屬確切當爲可信主事管滂及張承燮王重

良等帶團勦賊殲斃賊首自應給予獎敘惟據李雲麟奏稱管
涉蔣常垣二員前經劉蓉保獎之處均與新例不符應行改正
著劉蓉將李雲麟此次所保之管涉等各員獎敘併管涉蔣常
垣前保應如何改正一併覆覈擬定具奏再降諭旨等因欽此
查現定新例凡部員在外辦事出力不准復保京職均按功績
輕重酌擬既奉

諭旨覆覈擬奏自應將管涉蔣常垣二員改擬加保並將興漢
辦團出力官紳一併開摺保獎又前次奏保之浙江候補知州
黃加耀本名加焜原咨內繕寫錯誤應請附奏

敕部更正等情咨送前來臣蓉覆加詳核各官紳辦團防勦殲

除首逆洵屬著有微勞自應量子獎敘以示鼓勵所有刑部主事管滂戶部主事蔣常垣均請改獎以直隸州知州歸部選用並

賞加知府銜管滂並請

賞戴藍翎前保以員外郎歸原部補用之處應請撤銷以符定例並請將前保浙江補用知州黃加焜名字誤填加耀之處敕部更正至該員等與曠瑛勦辦藍逆殲除元凶續有勞績並在事出力各官紳理合繕具清單奏懇

恩施准予獎勵以昭激勸除將擬保千總以下出力稍次之紳團開單咨部核獎外所有遵

旨覆覈獎敘各員改正緣由謹會同候補四品京堂奴才李雲
麟合詞恭摺具奏伏祈

皇太后

皇上聖鑒飭遵謹

奏

會奏獎敘克復山陽出力員弁疏

同治三年八月二十九日

奏爲遵

旨查明克復山陽及勦辦鎮安回匪出力員弁會同覈實保奏
懇

恩獎勵恭摺仰祈

聖鑒事竊臣蓉前准兵部火票遞到議政王軍機大臣字寄同

治三年七月十二日奉

上諭李雲麟所部兵勇前次克復山陽勦辦回匪出力曾經諭令官文等查明保獎茲據官文聲稱遠在楚省打仗情形無從詳悉仍將原保底單咨送劉蓉就近辦理並咨覆李雲麟等語著劉蓉就近詳晰查明會同李雲麟覈實保獎毋許冒濫等因欽此旋准李雲麟奉

命辦理漢南軍務方期入陝之初克復山陽勦辦回匪一切打仗情形業經奴才李雲麟據實奏明在案所有在事出力員弁自應量予獎敘以昭激勸臣蓉細加察覈所保各員尙無冒濫

理合繕具清單恭呈

御覽伏候

恩施除將擬保千總以下各弁咨部核獎外所有遵

旨查明克復山陽勦辦回匪出力員弁會同覈實保獎緣由謹

合詞恭摺具

奏伏祈

皇太后

皇上聖鑒訓示謹

奏

三ノイ
ト
二
三
言
イ
三

四
五
六
七

劉中丞奏議卷五終

劉中丞奏議卷六目錄

報協濟甘營餉項艱窘情形疏

附解援甘軍火數目疏

覆陳官軍越勦淹遲緣由疏

附請飭曹克忠兼顧汧隴邠長防務疏

附抽調援甘兵勇防堵捻蹤疏

附請簡補鳳邠鹽法道員缺疏

附參劾中軍參將何九皋劣蹟疏

彙報各路軍情籌酌緩急請旨飭辦疏

附穆軍欠餉請飭多營糧臺清釐疏

請就晉蜀兩省開捐以濟甘餉疏

附請賞假一月疏

甄別庸劣道府州縣疏

查明扼堵川髮各匪出力員弁疏

附請開復戴茂林原官疏

請將殉節大臣事蹟宣付史館疏

遵查陝省被擾地方酌籌接濟疏

旂營欠餉刷放銀票扣抵疏

附籌解工程銀兩疏

特參帶勇官沿途需索滋擾疏

探據東路髮捻各匪逼近陝疆疏

附陳各軍會剿階州情形疏

附酌定兵勇行走程途疏

附東治營月餉仍歸山西撥解疏

附續解工程銀兩並請展緩疏

附報解援甘餉銀軍火數目疏

附銷假疏

密陳藩臬道府各員考語疏

劉中丞奏議卷六

湘鄉劉 蓉著

報協濟甘營餉項艱窘情形疏

同治三年十月二十九日

奏爲恭報協濟援甘各營餉銀軍火數目並陝省竭蹶異常惟有隨時勉力湊撥遽難懸擬章程據實瀝陳艱窘情形并懇
敕催山西等省協餉以濟要需恭摺奏祈

聖鑒事竊維秦隴壤錯犬牙勢依唇齒援甘卽以保陝故自東
回西竄雖陝省倉庫羅掘已窮猶復竭力轉輸俾雷正綰陶茂
林得以掃蕩崇靈規取平固顧地愈入而愈深勇日增而日眾
糧餉軍火遂至愈括而愈空夫兵與餉必須通籌陝與甘庶不

兩誤從前在陝供支祇陶茂林曹克忠西們克西克等馬步各營與夫李雲麟之隴軍耳而雷正綰則向來祇供軍火至多隆阿一軍悉由湖北各省協濟然前署撫臣張集馨等已覺竭蹶萬分日不暇給自本年五月臣所部援陝各軍月需餉銀八九萬兩川省奏令由陝自籌加以穆圖善金順等營悉由陝發而陶茂林曹克忠又各增添營數幾倍於前此卽全盛之陝猶難供應況值流亡未復痍傷未起膏腴之地悉已議緩議蠲之時耶然臣職任封圻恥分畛域雖在萬分爲難之際於入甘之軍無不按月力籌接濟往來轉運蓋趾踵相望於途而臣所部追勦蔡啟兩逆之軍則已積欠至四十餘萬兩而不遑兼顧旣舍

已以芸人猶此支而被絀則以本省餉無可籌而鄰省協餉又不復至之故也凡屬支發之款皆有文案可稽乃臣准都興阿文煜雷正綰等咨文並鈔錄摺彙一似陝省全未籌撥者恭奉諭旨飭臣明定章程究竟能協若干兩奏明報解竊謂籌兵當以籌餉爲急而出款必以入款爲衡當經嚴飭該司道等悉心查覈旋據藩司林壽圖等詳稱自本年正月起至七月底止除興商所屬地丁釐捐等項均歸李雲麟提充軍餉外司庫僅收各屬正耗銀三十六萬二千五百八十餘兩河東並山西藩庫協餉銀十萬兩共計收銀四十六萬二千五百八十餘兩若使按款供支僅敷兩月餘之用不得已先將萬不可緩之款隨時

酌發計共發過本省糧臺應需軍餉鹽糧等銀二十六萬六千九百五十兩零西安八旂月餉米折並道倉不敷米折俸廉養贍等銀一十二萬八千二百九十二兩零撫標西安城守餉乾料草折銀六千四百四十兩零製造軍火器械帳房工料銀四萬一千八百三十一兩零文武各官廉費並書吏口食等銀二萬三千一百七兩零補發上年積欠官錢鋪票本銀七萬三千兩以上共發過銀五十三萬九千六百二十兩零其餘一切雜支各款尙不在內是司庫業已出浮於入其所浮之數則全恃官錢票與爲騰挪而已別無他法矣臣又飭查支發甘省糧餉軍火數目據管理糧臺督糧道劉齊銜等詳稱除共解過雷營

製造軍裝銀五千兩外自本年正月日起至七月底止共解陶營
餉銀四萬七千三百兩西們克西克餉銀一萬五千二百三十
二兩零金順餉銀一萬一千六百八十七兩零至陳天佑一軍
月餉本歸山西支發亦經借給銀二千兩兼因臺庫現銀無措
撥解雷營三原捐輸銀三萬兩供支雷營募勇過境需費銀二
千五百二十四兩七錢二分此籌濟甘省軍餉之實在情形也
又據軍需局司道詳稱查陝省前次撥解固原提臣雷正綰糧
餉軍火已經前署撫臣張集馨奏報在案嗣後該營軍糧皆係
陝省各州縣磨麩運送涇州糧臺復於本年五月詳撥附近甘
肅之邠州三水瀘水永壽隴州乾州長武等七州縣倉糧一萬

石並委候補知縣黃召棠會同雷營員弁在北山州縣勸捐糧
米折價解往又在邠屬勸捐糧石據邠州長武縣稟報有案六
月內進勦張家川賊巢又經札飭隴州等州縣按日解麩二萬
斤其甘肅提臣陶茂林自鳳翔援甘以來亦係由鳳寶岐扶汧
隴等州縣碾麥磨麩接濟至軍火器械自同治二年十二月移
營之日起至本年七月止計解過雷營火藥二萬九千五百斤
鉛丸二萬六千五百斤火繩三萬五千丈鐵礮子三千六百五
十斤藍白布帳房八十二架火箭二百枝戰箭一千枝雙手帶
刀三百把斬馬刀三百把解過陶營火藥三萬五千斤鉛丸二
萬七千五百斤火繩四萬七千丈藍白布大帳房一百三十一

架擡鎗一百八十桿戰箭三千二百枝鳥鎗四百桿角弓五十張火箭五十枝噴筒五十箇此接濟甘省米糧軍火之實在情形也至西們克西克金順馬隊月餉軍火均係遵

旨隨時支發惟總兵陳天佑一軍月餉奉

旨歸於晉省按月撥解與陝無涉甘省原奏未曾查清致相牽混其軍械帳房等項原令陝省籌撥近因本省軍務繁重無可搜括請畱多營軍火請撥晉省火藥請撥京局火藥即使全行解到爲數亦屬無多乃雷陶兩營員弁守提坐索輒至火藥七萬斤之多委係一時難籌鉅數陝省自遭兵燹滿目荒蕪至不得已而碾盡十數州縣倉麥以濟援甘各軍者原冀掃清甘境

即可保護秦疆及倉麥告空又復勸捐米石其不遺餘力已可想見至京藥一項非萬分窘迫不敢遽請

奏撥乃竭盡陝省之力不滿甘省之望竊謂維持全局在陝省固當惟力是視在甘省亦當設法共籌嗣於七月內雷正綰陶茂林兩處嚴札催提業經籌解陶營火藥五千斤鉛丸一千斤火繩五千丈雷營火藥五千斤藉資接濟此後軍火器械亦惟有照舊隨時拮湊籌撥值此三空五盡之時本省軍務未鬆實難懸擬章程等情具詳請奏前來臣覆查陝省財賦專恃地丁膏腴尤資腹地自遭蹂躪極望蒼涼本年丁糧除已經蠲緩外尙有應行寬貸者今綜覈本省歲入之數與甘省月解之數餉

則臣部饑軍迄未支發糧則盡碾倉麥更勸捐輸軍火則請撥
晉藥京藥而外猶復晝夜製造不停所以爲甘省籌者實已不
遺餘力無如地多荒曠民僅孑遺而甘省營數較前日增陝省
糧糈來源日絀且

定陵工程銀十五萬兩勒限年內解清正在設法籌措而綠營
兵餉積欠至三年之久糧臺積欠各營勇餉將及百萬之多尤
爲異常窘乏所有甘省各餉臣與藩司林壽圖等再四籌維祇
有竭力經營隨時接濟就目前情形而論實屬支絀萬分若徒
虛擬章程空言搪塞殊非實事求是之意伏思甘省爲西陲重
地刻值大兵雲集須合數省之力以圖之事乃克濟伏乞

聖恩更飭附近完善省分寬籌協餉以期綏靖邊疆實爲至幸
至蓮花城現已攻克陶茂林曹克忠等勢須轉戰深入距北山
州縣隔絕一二千里以外不但常社皆空無糧碾運兼慮道路
寫遠不能飛越且車載馬馱往返三四千里一石之糧又增十
倍運腳之費不惟民力困竭萬難輸將抑且糜費繁多徒稽時
日似應由甘省就近採買方能免遲誤之虞抑臣更有請者前

奉

諭旨穆圖善欠餉俟陝省協餉解到陸續撥解等因欽此仰見
陝省艱窘情形早荷

聖明洞鑒查穆圖善所帶係多隆阿舊部從前各省協濟多隆

阿月餉由該營設立糧臺自行經理迨五月經臣奏截留六營始由陝發每月支給鹽菜現銀及採買麩斤接濟合算並無積欠現復奉

旨令陝省按月解濟穆圖善餉銀二萬兩已飭軍需局糧臺迅卽籌撥惟穆圖善所統現亦增至十二營之多臣所派赴甘省之湘果英毅親兵彝字等軍越境追勦欠餉亦逾半年之久雖

前蒙

恩准直隸山東各月解一萬兩山西月解三萬兩乃自五月起僅據各該省各解過一萬兩山西則准撫臣沈桂芬奏稱此後斷難協濟嗣經戶部議奏直隸山東按照臣奏月解一萬兩山

西省則仍月解六千兩迄今數月之久未經絲毫報解仍懇
聖恩俯念陝省實在窘迫

飭令各該督撫按照部議按月批解陝西俾免征兵譁潰實於
大局有裨所有陝省協甘餉需臣謹當仍飭該司道每月將解
撥數目詳請

奏咨以慰

聖廬理合先將七月以內協濟援甘餉銀軍火並現在竭蹶異
常情形據實瀝陳伏祈

皇太后

皇上聖鑒訓示飭遵謹

奏

附解援甘軍火數目疏

再陝省餉源枯竭業經瀝陳艱窘實情仰荷

聖慈洞鑒疊奉

諭旨令臣籌濟甘省軍需何敢稍存膜視復督飭藩司林壽圖

等竭力搜羅罄局庫之所存先儘甘省批解按月詳報由臣分

別

奏咨復據該司道等詳開八九兩月總共解過各營餉銀八萬
四千四百一十五兩零烏鎗擡鎗跳機小鎗共五百八十五桿
火藥五萬二百二十斤火繩二萬七千六百丈鉛丸一萬三千

二百二十斤噴筒四百箇火箭七百枝戰箭二千枝大帳房二百四十五架各經委員解往交納領有迴文爲據臣覆查本省征兵絲毫未能自顧屢次協濟甘省各軍實已不遺餘力除另繕清單恭呈

御覽理合附片陳明伏乞

聖鑒謹

奏

覆陳官軍越勦淹遲緣由疏

同治三年十月二十九日

奏爲官軍越境追勦逆匪迂繞稽延近始進趨階州謹將淹遲緣由及現規勦辦情形遵

旨詳細具奏仰祈

聖鑒事竊

臣

頃奉十月二十日

諭旨髮逆竄往階州劉蓉所派追賊之蕭慶高何勝必兩軍現在行抵何處一切勦辦情形總未見劉蓉詳細具奏殊不可解著卽恪遵前旨迅速覆奏毋得視同隔膜置軍事於不問自取罪戾等因欽此伏查八月初間蔡啟兩逆敗殘西竄臣卽嚴飭蕭慶高何勝必之湘果兩軍彭基品之親兵五營李百魁之英毅六營黃鼎之彝字兩營並曹克忠所派之龔良臣等七營悉數越境躡擊無論該逆竄隴竄蜀總當盡力窮追期將此股殘孽全數殲除不許稍存畛域之見嗣聞該逆於八月初八日由

略陽敗竄白馬關遁入階境窺伺川疆又復飛飭蕭慶高等由甯羌州繞截其前彭基品等由白馬關尾躡其後並飛咨四川督臣駱秉章撥兵嚴昭廣江油之防又檄鞏秦階道林之望派兵設徽成禮和之守於時蔡啟殘孽不過四千餘人窮蹙已極意謂網羅密布趁其喘息未定軍械喪失之時四面兜剿不旬月而餘燼悉滅矣逮九月間接到蕭慶高何勝必黃鼎等稟函始知該三軍均奉駱秉章檄調回川分防廣元昭化劍州各隘而曹克忠所部七營又適遵

旨派援河州於是臣部追剿之師僅存英毅親兵兩軍既須分防陝界又應追躡逆蹤諸將自以兵力單薄觀望遷延而該逆

遂得以其暇攻陷階州裏脅新黨無復過而問者臣在病中聞信焦憤萬分急由八百里飛咨駱秉章告以此股遺孽無多軍火皆缺急擊則殘喘斷難苟延緩之則死灰又將復熾請仍飭湘果兩軍彝宇各營進搗階州並派總兵周達武等率師與陝軍會勦庶期一鼓撲滅永靖邊氛誠不宜變勦爲防致貽後患並飭湘果各軍迅速望階前進然諸將本係川軍自四月以前餉糈軍火悉皆仰給於川五月以後議由陝省支發而司庫一空如洗聞有所入亦竭力搜括以奉鄰封迄今半年竟無涓滴之潤可以自顧兼之陝省米糧稀少物價翔貴以是軍士皆樂思蜀而不願入秦而且進勦之勞不如防守之逸雖經蕭慶高

等傳諭拔發而各軍士竟以陝西餉缺糧乏不如就食川疆且
既奉川檄防守川界卽應聽命於川等語藉詞推延臣既悉此
情形不得已復咨賂秉章極言養癰貽患之大不趁此時剿洗
使該逆增長羽毛養成銳氣不惟甘省遭其蹂躪卽川陝邊疆
永無撤防之日較其勞費百倍此時利害昭然誠不宜各爲畫
疆自守之計尋復恭錄前次

諭旨請卽欽遵會剿以靖三省邊氛逮昨二十五日始准賂秉
章咨覆昭劍各隘已派唐友耕率師防堵現飭湘果彝字各軍
進剿階州踞匪並添派武字達字果毅等營確探截擊等語計
此時當可會集此官軍進剿淹遲之緣由也伏查階文一帶土

著甚少向來客民雜處其間風氣本屬浮動該逆竄踞階城以
後隨處裹脅遠近招延探聞現已聚至三萬之多並將階城增
高三尺修製軍械廣儲麥糧迫脅各處村莊運糧入城又勾結
鹽關等處逆回遙相援應其氣燄又已驟張然使各軍四路環
集併力急攻逆黨雖多究屬新附之眾不難一鼓聚殲現飭各
軍分路進擊節節逼緊扼其狂竄旁逸之路以圖一戰成功伏
祈

皇上敕下四川督臣駱秉章嚴飭所派總兵周達武知府江忠
淑參將劉鶴齡等三軍協同蕭慶高何勝必黃鼎等務將此股
悉數撲滅不得無故退回縱賊紛竄又成不了之局並請

敕下護陝甘督臣恩麟甘肅提臣陶茂林卽撥此次赴蘭之軍嚴防該逆由岷入鞏竄犯省城之路兼斷逆回策應如能分兵會勦尤爲一勞永逸之圖所有官軍追勦淹遲及現規赴階援勦情形理合恭摺由驛馳奏伏祈

皇太后

皇上聖鑒訓示飭遵謹

奏

附請飭曹克忠兼顧汧隴邠長防務疏

再陝省西路之防向藉曹克忠率所部撫標各營駐防隴州兼顧策應嗣該鎮奉

旨赴援河州此路頗形空虛查曹克忠原部本祇七營自五六月以來添募三營旋將所收葉毓廣等降卒編爲馬步六營合計共成十有六營之數臣以所部楚軍概行追賊入甘而汧隴邠長一帶防務喫重竟至無兵可調當卽移咨曹克忠請遵諭旨以原部七營帶赴河州之任而畱其餘各營分防陝界旋值大軍進搗蓮花城該鎮遂併將駐隴各營調往會剿兵貴乘機在當時原不必拘泥成見惟現在蓮花城踞匪旣已悉數奔竄各路兵勇不日分途前進如使邠長汧隴一帶不畱一兵實屬空虛可慮查臣所部赴階援徽各軍正在攻勦緊要萬無遽卽抽調之理且陝省餉糈奇窘更無另行召募之資相應請

旨敕下固原提臣雷正綰轉飭曹克忠撥兵兼顧邠長汧隴之
防以期有備無患俟將來階州克復蔡逆殲除陝省可以騰出
兵力替換隴防然後再行抽撥隨征實於大局有裨臣爲慎重
邊防起見理合附片陳明伏乞

皇上聖鑒飭遵謹

奏

附抽調援甘兵勇防堵捻蹤疏

再臣頃接據鳳縣知縣郭建本十月初九日稟報鹽關回逆竄
至徽縣所屬之傅家鎮銀杏樹等處肆行擄掠距徽縣僅十五
里不時帶領馬隊行抵城下往來馳突招誘城內回民入夥勢

甚猖獗旋據徽縣知縣古一忱委該縣典史楊德潤赴鳳稟請
派兵救援前來臣伏查此次逆回猝至徽縣或圖與階州髮逆
相爲犄角分我兵力或逕由兩當竄入陝境以期緩我援師使
之回顧此時均未可定當卽飛檄總兵彭基品率所部五營逕
趨徽縣並撥駐防鳳縣之雄毅軍前往會剿庶期先發制人免
致臨變倉皇墮其詭計惟現准湖廣督臣官文八百里咨稱捻
逆回竄廣濟蘄州繞至蘄水黃岡蜂擁而上現已直奔黃陂孝
感一帶行蹤剽疾竄向靡定難保不回竄陝疆希卽迅派勁旅
嚴密堵禦以免蔓延等由前來查臣前因髮捻各逆已由鄂豫
竄赴下游去陝日遠是以將陝省所有兵力掃境援甘以赴鄰

封之急故商州僅存駐防之鎮西軍三營興安僅存李雲麟遣
畱之隴軍兩營此外猝無兵勇可調除飛飭隴軍鎮西各營確
探嚴防並由臣酌量事勢緩急抽調援甘兵勇防堵外理合附
片陳明伏乞

聖鑒謹

奏

附請簡補鳳邠鹽法道員缺疏

再陝西鹽法道劉鴻恩革職遺缺於同治元年九月十五日准
到部咨抽畱外補坐九月初五日行文陝省例限五十日減半
計算扣至九月二十五日作爲開缺日期彼時因陝省儘先補

用道沈鵬元補用道官銘該二員俱係候補班應准補用經前署藩司劉齊銜於十月二十一日詳由前署撫臣張集馨咨部請補在案官銘所保歸候補班次旋奉部駁另核請獎自無庸議惟是否准以沈鵬元補授斯缺閱今將及一年尙未接到部文竊維道缺緊要未便久事遷延擬請

迅賜簡放以重職守查陝西鹽道專司鹺政兼水利錢法且有分巡鳳邠等處地方之責軍興以後百事墮壞非初任人員所能整頓必須老成歷練通達政體爲守兼優之才方足以資表率

皇上御極以來勵精圖治求才若渴至於監司大員尤勞

宵旰除授大典

聖心自有權衡惟臣屢讀

詔書飭各督撫留意人才整飭吏治臣既職忝封圻竊慕古大

臣以人事君之道不揣冒昧謹獻所知伏查運司銜山西候補

道黃輔辰心術正大吏事精能上年經臣保奏來陝聽候

簡用前任湖南岳常澧道劉達善才識宏通志守端正該員補

缺後旋即丁憂現於本年八月服闋如荷

聖恩於該二員中採擇簡放一員實於凋敝地方大有裨益理

合附片陳奏伏祈

聖鑒訓示飭遵謹

奏

附參劾中軍參將何九皋劣蹟疏

再代理臣標中軍參將儘先遊擊何九皋於同治元年隨同勝保帶領東省練勇來陝嗣後遣散勝營兵勇前撫臣瑛棨因省城兵力不敷畱駐東關未卽裁撤二年八月前西安將軍多隆阿到省查知該將所帶靖安營勇丁虛額甚多臨期查點多以招募難民充數奏參革職將其營勇悉數裁撤令赴鳳翔效力贖罪該將在省逗遛夤緣奔競於營勇旣撤之後猶以欠餉爲詞屢向糧臺滋鬧後以撫標中軍花沙布告病經前署撫臣張集馨暫令代理已屬與例不符多隆阿傷病危篤之時奏予開

復該將不知愧奮益無檢束物議沸騰臣查該將平日臨陣不能得力訓練毫無紀律氣亢志卑貪利無恥迹其行事猶是椎埋惡少之風茲當整飭戎行未便以貪劣之員忝膺介冑且前帶東勇額數不足遭撤無存復敢憊索所欠至五千餘兩之多既已浮冒於前又圖侵肥於後若不嚴加懲創誠恐效尤者眾紊亂營規查該將最善鑽營相應請

旨卽行革職驅逐回籍不准逗遛外省復在各路軍營投效滋生事端以肅營規而申軍律所遺員缺已奉部咨准以提標宜君營參將恆泰調補惟恆泰經提臣雷正綰檄委代辦固原提督事務一時尙難到營現值鄰氛環逼防勦未鬆所有撫標各

營必須中軍得力方足整頓營規練成勁旅查有遇缺前儘先
卽補參將彭體道前在廣西湖南軍營打仗奮勇旋隨同多隆
阿入關攻克王閣村羌白鎮回巢戰功疊著諳練戎機經臣奏
畱署理左營遊擊訓練嚴明五月尹家衛之戰殺賊亦爲出力
嗣復搜捕遊勇巡緝認真軍民翕服擬請

聖恩准以該參將彭體道署理臣標中軍參將庶於營伍可期
整頓是否有當理合附片奏乞

聖鑒施行謹

奏

彙報各路軍情籌酌緩急請

旨飭辦疏

同治三年十一月十二日

奏爲彙報各路軍情籌酌緩急請

旨飭辦以遏逆氛而保完善恭摺仰祈

聖鑒事竊

臣

於月前業將官軍規剿階州並徽縣乞援擒匪警

報各情形恭摺馳奏在案旋據鳳縣知縣郭建本疊次稟報回
逆聞陝省調兵進剿已由銀杏樹退至高橋鋪一帶旋即退回
鹽關老巢近復竄往秦州之馬跑泉經曹克忠派兵擊退等語
至階州蔡啟兩逆近據英毅軍李百魁湘果軍蕭慶高彝字營
黃鼎等稟報甘省所派援剿之張華一軍與賊接仗失利退駐
佛耳崖該逆遂挑選悍賊分五路扼守隘卡一紮城北之兩水
以防由岷州西固進剿之路一紮報慈寺防由禮縣進剿之路

一禁八海山防由三河口文縣進剿之路一禁東江水防由佛堂山進剿之路一禁舊城山防由柳壩進剿之路其布置甚爲周密非官軍會師四面環擊難期得力並聞城中儲糧甚多悉皆封閉仍逐日派隊四出掠取食物圖爲久踞之計各軍漸次逼近總苦無糧接濟枵腹難前現在英毅湘果諸軍尙須由漢郡褒沔略陽一帶採辦四川所派周達武等軍由文縣進者尙須由綿州昭劍一帶採辦其相去均在四五百里以外崎嶇裝運艱苦倍常兼值天氣酷寒雪霰交作各軍皆有飢寒可憐之色若非糧餉充裕難期迅奏膚功等語臣查所稟各節係屬實在情形當卽飛咨護督臣恩麟專派道府大員由階州一帶附

近州縣採糧接濟其需用糧價銀兩由委員彙總具報卽在各
軍應發月餉內如數扣還不以累及甘省但使糧食不匱當可
迅掃而前此西路髮回兩逆之情形也至於下游捻匪上犯之
說前准湖廣督臣官文來咨當卽飛飭鎮西軍鄂太愚隴軍黃
加焜等確探嚴防迄今尙未接據探卒還報而興商各屬州縣
亦尙未見稟報捻匪逼近情形惟據河南坐探委員陳鍾藻來
稟內稱張總愚一股已由楚境西竄有擾犯陝省之意等語查
興商兩處駐防之師僅止五營而隘口繁多實屬不敷分布其
餘陝省兵力掃境赴甘曹克忠全部現紮蓮花城兼顧秦州湘
果軍現次兩河逼近階境英毅軍進趨白馬關親兵營進扼陽

李開督使相機進剿亦以杜該逆回竄之路據現在情形而論各軍均有萬難抽動之勢且由階境前赴興商計程一千三四百里山路叢雜雨雪交加以軍行日五十里計之約須一月而後可達設使捻勢狂奔實慮鞭長莫及再四籌維惟有籲懇皇上天恩敕下湖廣督臣官文嚴督所部馬步各軍一面繞前截擊一面跟蹤躡剿勿使逆匪得以長驅其或竄入陝疆亦卽責令越境窮追勿使興商一帶甫離水火之殘黎更遭逆捻蹂躪之慘臣仍當隨時籌酌先飭安漢一帶得力團練協同官兵加意堵禦以期固疆圉而備不虞不敢稍涉大意所有彙報各路軍情籌酌緩急請

旨飭辦以遏逆氛各緣由理合由驛馳奏伏祈

皇太后

皇上聖鑒訓示施行謹

奏

附穆軍欠餉請飭多營糧臺清釐疏

再臣頃奉

寄諭穆圖善所部兵勇陝省欠餉七八月之多此次沿途所發麩麩等項著劉蓉卽在補解欠餉內扣還歸款嗣後該將軍行糧仍著劉蓉陸續協濟等因欽此伏查前任西安將軍多隆阿所部援陝各軍月餉向由鄂晉各省按月協濟其協餉卽由各

省逕解多營糧臺自行經理陝省惟按日供給米麪料草亦解多營糧臺自行散給其餉項有無積欠陝省無從查悉且多隆阿原部馬步數十營均已奉調回鄂如有欠餉諒不止穆圖善所留數營自應仍由多營糧臺委員核明援陝入關及奉調回鄂日期綜計各營餉項盈絀查明各省協餉多寡按數補發如有不敷亦應查核何省欠解協餉若干催齊補放庶期事歸核實款不虛懸未宜隨意指陳致滋牽混至本年五月間陝省截留穆圖善所部馬步六營已由陝省發過銀六萬有奇每月供應米麪料草等項共需制錢三萬串統計該軍月餉有盈無絀現在穆圖善奉

旨率師援甘所有協濟餉銀軍火等項現經藩司會同軍需總局設法籌畫源源委解雖其力萬難供支期不敢少有延誤據軍需局司道會詳請

奏前來

臣

覆查無異伏懇

皇上敕令穆圖善將本年五月以前所部各營餉項仍飭多營糧臺核算清理一手報銷毋或稍滋牽混至此次赴甘沿途支應麩麩等項應由陝省糧臺查明價值在於續解協餉內如數扣除以清款目而節糜費除咨覆穆圖善查照辦理外理合附片陳明伏乞

聖鑒訓示飭遵謹

奏

請就晉蜀兩省開捐以濟甘餉疏

同治三年十一月十二日

奏爲援甘軍餉萬分難籌擬就晉蜀兩省仍開捐例並請將報捐道府州縣新章展緩四月俾得循例收捐以資接濟而免遲誤恭摺

奏祈

聖鑒事竊臣前因漢南軍務方殷餉源無出曾於同治元年臘月在廣元營次奏請倣照滇捐酌擬條款籲恩俯准以濟急需奉

旨戶部妥速議奏欽此嗣於本年三月中旬在漢中府接准部

咨原奏稱該撫駐軍漢南餉源未裕所請酌廣各條既未便率行議覆而現辦章程不准指省分發又恐收捐遲滯緩不濟急臣等公同商酌擬請查照雲貴甘肅捐章其一律收捐指省分發俾各捐生就近上兌以示激勸而廣招徠等由奉

旨依議欽此正在查照辦理間旋閱邸鈔山東撫臣閻敬銘奏請重名器以裕京餉一摺請將道府州縣四項改收入折實銀均在京銅局報捐各省捐局即將收捐道府州縣四項京階之處一律停止等情欽奉

特旨允准臣伏查閻敬銘原奏實爲整飭吏治之大端惟捐局去此四項則其餘零星湊辦爲數實不幾何是以雖荷

聖慈俯念陝省餉源枯竭准開捐例迄今竟未舉行嗣於九月間接准部咨議覆江西撫臣沈葆楨請將道府州縣等官循例收捐之奏深念外省籌餉艱難奏懇勉從所請並令各省捐局照舊一律收捐以歸畫一其減成新章請緩至同治四年正月爲始再行照辦等因奉

旨允准維時臣以爲日已屬無多卽趕辦亦恐不及以是仍未舉行刻值庫款支絀萬分本省軍儲旣已無可供應而援甘各軍月餉疊奉

嚴旨飭催且於接濟陶茂林十七營西們克西克馬隊二起之外又添穆圖善之十營並曹克忠之十六營金順馬隊一起合

計四十餘營除協撥軍火之外月需餉銀十餘萬兩此卽從前
完善之陝尙難支持況當頻遭殘破之餘何從取辦查今歲地
丁所入尙不逮四十萬鄰封協餉惟山西河東前後共解十萬
山東一萬直隸一萬此外如湖北月協六萬之款並未解濟分
毫四川每月協撥之餉已於四月停止而亦未滿八萬之數至
於興商釐金自髮捻各逆竄擾襄黃以來商賈不旺計其所入
月不過錢二千餘串或千餘串不等入款如此其少出款如此
其多雖有巧於運籌者無所施其通融調劑之法今湘果英毅
親兵彝字各軍赴甘援勦階州竄匪欠餉均逾半年之久飢寒
交迫憔悴可憐而穆圖善陶茂林等勦辦甘回之餉疊奉

諭旨嚴催該營亦各派員守領臣與藩司林壽圖等晝夜焦思徒作仰屋之歎計惟有派員仍赴晉蜀兩省廣開捐例庶可稍濟眉急合無籲懇

皇上天恩俯准敕部將道府州縣等官新章特爲陝西展緩四箇月俾得循例收捐以資接濟伏查部臣原奏已慮及各省屆期奏請展緩特先示以限制惟臣今所請係爲協濟鄰省軍餉起見並非自爲陝謀事體不同他省自不得援以爲例現擬派委候補道沈鵬元前赴山西設局辦理革職畱營效力藩司毛震壽前赴四川設局辦理伏祈

皇上敕下四川督臣駱秉章督飭藩司江忠濬永甯道恩祥署

川東道恆保會同毛震壽舉辦並

敕山西撫臣沈桂芬督飭藩司王榕吉河東道楊寶臣雁平道
覺羅興奎會同沈鵬元舉辦庶期事有責成款有著落而穆圖
善陶茂林曹克忠等各路援甘勦辦之師或可藉資飽騰不虞
饑潰臣等亦獲免於罪戾實於甘省大局有裨臣爲援甘軍餉
萬分難籌力圖接濟起見理合附驛馳奏是否有當伏祈

皇太后

皇上聖鑒訓示施行謹

奏

附請賞假一月疏

再臣前因病勢沉重奏乞

聖恩准予開缺回籍旋奉

恩旨著無庸開缺賞假兩月安心調理等因欽此當卽趕緊延醫調治數旬以來變證迭出屢瀕危殆幸賴

皇慈遠廕獲保孱軀現值假期已滿雖外證悉平而步履維艱眠食不調怯風惡寒未離房闈良由沈痼日久氣血銷耗未能遽卽復元伏乞

皇上天恩再行賞假一月俾資調攝如遇緊要軍情仍當力疾籌畫不致稍有貽誤幸而精力乍復亦卽不俟假期先起視事不敢稍耽安逸以負

委任之隆所有

微臣續請

賞假調理緣由理合附片陳奏伏祈

聖鑒謹

奏

甄別庸劣道府州縣疏

同治三年十一月十二日

奏爲甄別庸劣不職之道府州縣請

旨分別革降勒休以肅吏治而整官常恭摺伏祈

聖鑒事竊維陝省吏治之壞早在

聖明洞鑒之中我

皇上嗣位以來孜孜求治屢降

諭旨飭令各督撫畱心甄別以澄敘官方整飭吏治爲亟數歲以來各疆臣仰承

德意隨時舉劾仕風漸覺丕變然貪酷暴吏之員斂迹者固已不少而庸材劣品之濫廁其間者尙多有之臣自涖任以來於屬員賢否隨時畱心察看兼復博訪旁諮考其平日之素行證諸地方之輿論並察其居官辦事之實蹟亦旣確有見聞未敢竟安緘默謹繕列庸劣不職者十餘員出具切實考語分別請旨伏查現署鹽法道候補道景祥性質輕率嗜好尤深候補知府賈敦惺精神昏惰難期振作候補知府坐補涇陽縣知縣周文郁巧滑鄙俗行同市儈試用同知署興安府知府謝復榮粗

鄙近利不協輿情儘先補用同知慶祺心地顛預任性妄爲以
上五員應請

旨勒令休致候補直隸州知州瞿樹鎬險詐貪鄙歷署孝義甯
陝同知漢陰通判輿論沸騰聲名狼藉現有查辦事件應請先
行革職准補朝邑縣知縣朱璋性耽安逸最善鑽營前署武功
縣藉稱供應大營差務苛派憐索經多隆阿訪聞咨撤提營訊
究旋值多隆阿傷病舉發未竟其事應請革職查辦試用知縣
朱煥璧居心狡詐前署韓城縣因拖延交代業已奏參革職應
請永不敘用候補同知周潮性情躁競舉動輕浮應請降作通
判歸部銓選儘先補用知縣陸庭來行事瑣屑不識大體分缺

間用知縣劉普習染甚深不知自愛以上二員均請以府經歷
縣丞降補候補縣丞馮駿心地卑污聲名甚劣署臨潼縣典史
顧守坦把持公事浮躁不謹以上二員應請卽行革職其餘尙
有應舉應劾之員一時耳目難周訪察未實容俟與藩司林壽
圖悉心咨訪隨時甄別以副我

皇上孜孜求治之至意惟查近來各省甄別人員類多投效軍
營鑽求差使甚或獻金納贄投拜門牆武員尤聞大體往往爲
所熒惑到營未久旋以軍功濫行保奏開復原官於是各路軍
營遂爲劣員之淵藪廢宦之捷徑此輩巧黠譎詐遇事風生若
遂聽其鑽營不惟仕途偷巧之習由此而開更慮軍營樸直之

風因之而壞其關係尤非細故應請

敕下各路統兵大臣凡屬各省甄別人員不許隨營收錄濫請
開復以絕夤緣倖進之階其或各督撫於甄別各案但徇一己
愛憎之私未能諧諸公論仍許後任督撫爲之秉公剖析據實
辯白亦足以拔抑塞而起厄窮臣爲澄敘官方整飭吏治起見
是否有當伏祈

皇太后

皇上聖鑒訓示施行謹

奏

查明扼堵川髮各匪出力員弁疏

同治三年十二月初八日

奏爲遵

旨查明扼堵川匪髮匪水陸各營之出力員弁開單籲懇

恩施恭摺會奏仰祈

聖鑒事竊臣等前奉同治三年六月二十一日

上諭所有山陽出力及扼堵髮匪川匪之水陸各營著官文劉
蓉迅速查明籲懇恩施不得稍分畛域等因又奉七月十二日
上諭李雲麟所部兵勇前次克復山陽勦辦回匪出力曾經諭
令官文劉蓉查明保獎茲據官文聲稱遠在楚省打仗情形無
從詳悉仍將原保底單咨送劉蓉就近辦理並咨覆李雲麟等
語著劉蓉就近詳晰查明會同李雲麟覈實保獎毋許冒濫等

因欽此當將克復山陽及勦辦鎮安回匪出力員弁遵

諭會同覈實保獎奉

旨允准在案現在陝境業已肅清

奴才

雲麟仰蒙

聖恩簡授庫爾喀拉烏蘇領隊大臣已將所部各營次第遣撤
僅存奇右水陸兩營派員管帶專顧興防惟查澄漢水師一營
自去冬駐防茶鎮數月之久屢遇賊鋒迨川軍由甯羌青石關
分路齊進賊圖下竄因該營力扼西鄉石泉之交遂不敢犯中
路並不敢分擾南路本年二月楚隴各軍俱在石泉漢陰安康
一帶截斲髮匪而禁逆乘間圖由白河蜀河渡江回川陸師猝
難分兵復經該營分撥船隻沿江扼守大小十數戰使賊不得

搶渡川省大局賴以保全又本年春夏秋間屢次扼堵川髮各
匪之出力員弁均屬著有微勞自應量予獎敘以示鼓勵查明
實在出力各員弁開單咨送前來臣 睿覆核無異理合繕具清
單恭呈

御覽仰候

恩施除將擬保千總以下各弁咨部核獎外謹合詞恭摺具

奏伏祈

皇太后

皇上聖鑒訓示謹

奏

附請開復戴茂林原官疏

再查已革都司戴茂林自咸豐八年入營隨征皖鄂一帶備著
辛勤旋因奴才雲麟於十一年冬間告假回旂該都司復投統
帶湖南和右營總兵趙福元軍營效力奴才雲麟於同治二年
春間到楚戰將需人遂函招該都司來營差遣詎趙福元以該
都司久未歸營藉假潛逃等情稟經前湖南撫臣毛鴻賓咨部
將該都司歷保官階註銷在案查戴茂林係奴才雲麟招致而
來並無潛逃情弊在趙福元以該都司久假不歸稟請參劾自
係爲儆戒營員起見惟該都司勤勞王事效力疆場在楚在秦
本無二致今該都司自隨營入陝以來於克復山陽縣城勦辦

鎮安回匪以及招撫藍逆川匪降眾二千餘人不備艱辛使叛眾誠心歸化並於蜀河東芳坪一帶親身陷陣屢破凶鋒實屬戰功尤著未便以前案沒其微勞致失將士之心應請將已革都司戴茂林開復原官以遊擊儘先補用並請

賞加勇號等情咨商前來臣覆查該都司戴茂林既係李雲麟函致來秦並無潛逃情事情屬可原今李雲麟以該都司屢著戰功擬請開復原官量予獎敘係爲激勵將士起見可否仰懇天恩俯准將已革都司戴茂林開復原官以遊擊儘先補用並賞加勇號之處出自

聖主鴻慈謹附片陳

奏伏候

訓示謹

奏

請將殉節大臣事蹟宣付史館疏

同治三年十二月初八日

奏爲查明殉節大臣顛末情形懇將死事實蹟

宣付史館並在死事地方建立專祠暨該故大臣原籍涇陽縣
殉難親支一併附祀省祠以慰忠魂恭摺伏祈

聖鑒事竊查已故陝西團練大臣都察院左副都御史張芾於
同治元年五月在渭南縣倉頭鎮撫回遇害曾經前撫臣瑛

奏奉

天恩照侍郎例從優賜卹

賜諡文毅並在省城建立專祠維時賊蹤遍地遺骸難覓該故大臣雖邀

褒卹之恩未返忠良之骨迨夫軍情稍定懸賞購求冀其毅魄有靈殘骸可獲茲據該故大臣之子世襲騎都尉兼雲騎尉二品廕生舉人張師劬在於倉頭左近尋獲伊父殘骨負歸斂葬並將死事顛末情由呈報前來臣查該故大臣張芾孝友無間人言忠貞秉自天性起家詞館供奉

南齋其佐司郎務也端介立朝紀綱爲之整飭其執持文柄也孤寒託命關節爲之肅清迨夫江右擁旄正值粵氛壓境豫章

當吳楚之衝力支半壁南昌爲根本之地克保孤城捍衛之功
至今攸賴同治元年陝回滋事承平日久民不知兵延及五月
愈形猖獗時以奉

旨督辦團練日在省城思與當事諮度機宜築室道謀迄無成
算該故大臣忿戰守之無恃無人肯肩大任決大議也又思回
民皆踐土食毛二百餘年雖良莠相雜心志難齊要可感之以
至誠動之以大義於是挺身以往矢口而陳不意逆回包藏禍
心遽於是月十一日由臨潼之油房街擁至渭南之倉頭鎮該
故大臣猶復反覆開導冀其悔悟詎逆首任老五者懼眾心之
易動獨要挾以多端該故大臣自以身爲大臣義不受辱坐地

罵賊目眦俱裂遂於十二日遭支解之禍觀其自倉頭貽書省城紳士愧不能感格頑梗使桑梓享安全之福誓矢一死以報國家而謝鄉人蓋其致命遂志之忱已毅然不可奪矣前撫臣瑛榮當軍前倥偬之際傳說紛紜莫能指其實蹟是以原奏僅具大略臣比詳加詢訪現在倉頭居住之遺老孤嫠無不能確言其死事之日縷述其罵賊之情實指其支解之地者洵屬見危授命大節凜然謹鈔錄原呈恭呈

御覽伏懇

聖慈宣付史館列入本傳俾昭信史並請在於渭南縣倉頭鎮死事地方建立專祠以慰忠魂再該故大臣原籍涇陽縣於同

治元年十二月初四日城陷時二品

封典張蔭縣丞張師勛教諭張師濂從九張茹張莊張師程生
員張師銘張沐張師仲文童張師曾張師衡張師儀張師易張
師義張浥張澮張浩張洽張江張漢張清張源張汶張興
甲張興庚張興善婦王氏馬氏傅氏梁氏馬氏蔣氏常氏王氏
蘇氏吳氏馮氏姚氏李氏劉氏苗氏章氏甘氏唐氏王氏強氏
女蓉姑紅姑盼姑引姑月姑等計五十二員名或隨同守城遇
害或城破投井捐體查張蔭等均係該故大臣張芾本屬親支
忠義旣萃於一門

旌卹宜邀夫

曠典應懇

聖主鴻慈敕部照例議卹並准附祀省城張芾專祠以表忠貞
茲據藩司林壽圖具詳請奏前來所有查明殉節大臣顛末情
形及其本屬親支遇難緣由理合恭摺具

奏伏乞

皇太后

皇上聖鑒施行謹

奏

遵查陝省被擾地方酌籌接濟疏

同治三年十二月初八日

奏爲遵

旨查明陝省被擾地方酌籌來春接濟事宜據實覆

奏仰祈

聖鑒事竊臣承准議政王軍機大臣字寄同治三年十月初○日奉

上諭本年陝西南鄭等縣被擾蓋屋等縣被災節經該省奏到已分別加恩豁免蠲免緩徵各屬貧民經該撫奏明借給牛種勸導耕種小民諒不致失所惟念來春青黃不接之時民力未免拮据著傳諭該撫察體情形如有應行接濟之處卽查明據實覆奏務於封印前奏到候朕於新正降旨加恩再陝西平原一帶六月內雨水缺乏均經該撫奏明並將來春應否接濟一

併查明於封印前奏到等因欽此仰見

聖主惠愛元元有加無已之至意當卽恭錄行司飭查去後茲據該府查明由司轉詳前來伏查本年陝省平原一帶前於六月內雨水缺乏播種失時迨七月以後甘霖屢霈農民趕將二麥布種現又雪澤頻沾盤根穩固來春尙可無需調劑其被擾各屬亦經奏蒙

天恩分別蠲緩凡在貧黎莫不感頌

皇仁各安生業今復渥荷

鴻慈垂廬來春青黃不接之時民力未免拮据

諭令查奏臣與藩司林壽圖詳加確查除續報府谷縣被雹較

輕業將地丁兵糧懇緩毋庸另行接濟外惟自髮回滇匪滋擾
以來凡屬膏腴之區蹂躪殆遍瘡痍未復戶鮮蓋藏相距來年
夏收爲日甚長當春間青黃不接窮民難免拮据臣等體察情
形悉心籌酌應須予以調劑第庫款既極短絀而各屬倉糧又
多被賊焚掠或已運供各營軍食現存無幾實在無可籌畫臣
等再四圖維擬令被擾各處各就地方設法勸諭有力之家無
論銀錢或捐或借以待來春青黃不接之時分別輕重量爲賑
貸俾資接濟臣當督率藩司認真查核並嚴飭地方官妥辦總
期實惠及民不致流離失所至捐借銀錢或令麥後免息還本
或俟事竣造冊請獎容俟屆期分別辦理所有遵

旨查明被擾地方酌擬接濟緣由理合據實恭摺覆

奏伏乞

皇太后

皇上聖鑒謹

奏

旂營欠餉刷放銀票扣抵疏

同治三年十二月初八日

奏爲陝庫萬分支絀酌將旂營欠餉刷放銀票以濟兵艱而資
周轉恭摺奏祈

聖鑒事竊查西安八旂官兵應支餉乾等項銀兩自同治元年
七月以後因軍務緊急需用浩繁司庫短絀未能全數給發當

經設法籌挪每月以一五實銀及二成實銀先後酌發並因道倉糧石告罄復經前撫臣奏明將該營應支一半米豆由司折銀按月支放嗣奉

諭旨西安駐防旗兵欠餉著趕緊籌撥款項設法接濟嗣後務當按四成實銀發給等因欽此欽遵於同治三年四月起按月遵照四成實銀給發在案茲據藩司林壽圖詳稱旂營餉項雖止得此四成實銀而司庫之羅掘通挪實已筋疲力盡別無現銀可籌前准西安滿營協領巴呢泰咨稱該營兵困時艱請由司庫暫發票銀先行使用果能通行無滯卽請在於欠餉項下抵扣前經署司劉齊銜刷造陝省司庫票銀五萬兩以濟兵艱

在案茲又准協領柯克僧額咨請再發票銀藉恤兵困仍在欠餉項下抵扣又經該司刷造票銀五萬兩共兩次發過旂營庫平票銀十萬兩均已咨明西安將軍飭旂查照向各富紳剴切勸借收捐給票准其將票呈繳捐輸以蘇兵困仍俟將來支發欠餉時照數抵扣等情具詳請奏前來臣查司庫萬分短絀實無現銀籌發而旂營兵丁困苦不得不變通酌辦以濟兵艱而庫款亦藉資周轉所有發給旂營官兵銀票數目在於欠餉內抵扣緣由除咨部查照立案外理合恭摺具

奏伏乞

皇太后

皇上聖鑒謹

奏

附籌解工程銀兩疏

再臣欽奉

上諭現在工程萬分喫緊陝西欠解銀十三萬兩限本年十二月內全數解清勿得仍前玩忽致干咎戾等因欽此欽遵當經行司籌解去後茲據藩司林壽圖詳稱遵查陝省原准奉撥定陵工程銀一十五萬兩業已兩次籌撥銀四萬兩委員管解交納均經詳請

奏咨在案計尙欠銀十一萬兩自應悉數籌解以濟要需何敢

稍事延緩自取咎戾惟陝省自軍興以來司庫早無存積現在
境內甫經肅清流亡尙未復業地多荒蕪釐稅捐輸征解無幾
卽本年地丁錢糧亦僅賴數處完善州縣征收批解亦難踴躍
而援甘各營官兵應需餉項軍火以及省城旂綠各營兵餉均
須分頭協撥隨時接濟以有限之入款供無窮之餉糈殊覺顧
此失彼支絀萬分惟前項工程銀兩待用孔殷自當儘力籌維
先其所急復經設法催提各屬地丁並將要款酌量緩發現僅
湊集銀二萬兩飭委候補知縣陳爾第管解定於十二月初二
日起程前赴

欽派恭修工程王大臣處交納以濟急需其下餘銀九萬兩現

尚無款籌撥容再趕緊竭力籌解等情具詳請奏前來除再督飭藩司迅速籌措委解並咨明戶工二部暨工程處知照外所有三次籌解工程銀兩數目及起程日期謹附片陳

奏伏乞

聖鑒謹

奏

特參帶勇官沿途需索滋擾疏

同治三年十二月初八日

奏爲特參沿途需索滋擾之帶勇官請

旨革職查辦恭摺仰祈

聖鑒事竊查陝省軍興以來曾經前任撫臣瑛棨會同署固原

提臣雷正綰招募楚勇悉照楚省章程每勇五百名准加長夫二百名由本營發給募勇經費自開招起程沿途行走每名每日均由本營發給口糧錢文如遇中途艱於採買由地方官借支糧食麩料或帶勇官盤費不敷就所過州縣挪借銀錢均由地方官取具領借各狀並核定糧食麩料價值數目詳由糧臺在於該營月餉內扣還歸款東南用兵十餘年來募勇章程歷經如斯辦理從無向地方需索車馬供應餉糈等項名目致長夫轉成虛設口糧得以重支其或勇丁不能安靜帶勇官稍欠約束卽由該地方官逕稟該管統兵大員從嚴究辦以故軍行整肅彼此相安從無兵差擾累之事現在甘省軍務喫緊各營

調募勇丁絡繹不絕均由陝省行走一切帶勇起程章程係屬
事同一律茲據潼關大荔朝邑富平蒲城耀州同官膚施等廳
州縣以及大荔縣紳士先後稟報署陝甘督臣都興阿所派管
帶選鋒營總兵李曙堂英字營副將胡世英各帶弁勇五百餘
員名長夫一百八十四名由陝入甘路經該廳州縣除供應口
糧銀兩麩料草束外勒索車馬轎夫至二百餘輛之多以及前
站差官公費銀兩並酒席折價茶燭雜派等項每處共需銀八
九百兩及千餘兩不等兼有占住民房詐索商賈毆打營官槍
傷民勇入署咆哮橫責丁役掠搶財物等事而且行走程途忽
東忽西並無一定州縣官倉卒措辦不及大受陵辱至所供應

車輛馬騾二三百匹到站後不准卸裝仍復強挪前進勒令前
站州縣扣折車馬價銀入己並不餽養草料以致沿途倒斃復
累地方官折價賠償該管帶官於勒索既遂之後復勒令州縣
官出具並無科派騷擾印結以圖卸罪等情伏查行兵以紀律
爲先兵勇兩項各有定章不准絲毫需索亦不准例外浮消況
值甘省軍務正在勦辦喫緊之際陝省地方又當殘破凋敝之
餘其調派各路帶勇營官理應恪遵定章申嚴號令率師按程
前往以備調遣而助攻勦該總兵李曙堂等經都興阿專派帶
勇隨征盼望綦切乃該總兵等不思努力報效輒敢沿途繞道
行走違例坐轎耽延時日又不能約束弁勇整飭營規任聽橫

索州縣魚肉官民使地方重遭擾累實屬有干軍令若不從嚴參辦何以肅營政而儆將來據軍需局司道會詳前來相應請旨將記名總兵李曙堂儘先副將胡世英卽行革職交署督臣都興阿勒令將滋事弁勇全數交出繳還所拉騾馬從嚴查辦並懇

敕下甘省帶兵各員嗣後遇有征調外省兵勇以及招募勇丁均將所派管帶各員銜名兵勇數目暨沿途支應章程先期咨明並飭管帶官按站行走毋得任意繞道擾累地方致誤戎機如再違例需索迂繞延誤仍當隨時參辦除將各處稟詞並該兩營沿途浮索銀兩飭局查造細數咨明都興阿訊辦轉飭慶

陽糧臺按照章程在於該兩營月餉內如數扣除解還歸款外
理合恭摺

奏參伏祈

皇太后

皇上聖鑒訓示飭遵謹

奏

探據東路髮捻各匪逼近陝疆疏

同治三年十二月十五日

奏爲探據東路髮捻各匪逼近陝疆現籌派兵集團分防要隘
以資堵禦恭摺奏祈

聖鑒事竊臣於前次彙報各路軍情請籌酌緩急相機辦理拜

摺後疊據東路探報並准河南撫臣張之萬來咨髮捻各逆始
由棗陽回竄豫境之鄧州繼復由鎮平分股竄至南召白土岡
及鎮內交界之馬山口等處駸駸入山並聞有赴河南府過年
再圖入陝之信臣以賊勢愈趨愈近興商一帶隘口繁多萬一
該逆經鄂豫兩省官軍圍剿緊急或竄浙川以圖商南或趨鄖
西以窺山陽均應先事豫防以期有備無患當飭鎮西軍鄆太
憲駐紮商南之富水關隴軍黃加焜駐紮山陽之漫川關並調
派駐防鳳縣之劉精雄毅軍二營駐紮商州山陽交界之竹林
關扼要防堵又因三路統計僅止七營兵力尙單而黃加焜之
澄漢水師一營復須巡防白河沿江一帶此外各軍業已掃境

入甘旣無可調之師實慮鞭長莫及於是札商前保道員之在籍主事管涉選帶安漢得力團丁前赴漫川關協同黃加焜併力守禦又檄候選同知史兆熊會同在籍主事蔣常垣員外郎余上華等總辦興安八屬團練以資捍衛而壯聲威並飭商州山陽商南等縣齊集民團分防各處隘口以助劉精鄢太愚兵力之所不及至鳳縣寶雞一帶隘口緊要雄毅軍旣經抽動此路頗形空虛因檄前調赴援徽縣之記名提督彭基品一軍分紮鳳寶交界之黃牛鋪方柴關等處以防蔡啟兩逆勦急狂竄之路萬一東路潼商有警仍可就近調撥爲移緩就急之圖伏蒙

皇太后

皇上塵念陝防單薄屢降

諭旨飭令湖廣督臣官文酌派勁兵越境兜擊勿許稍分畛域
聖慮周詳無遠弗届下懷曷勝欽佩惟未經指定何軍則雖承
詔旨諄切究慮因循致誤伏求

聖恩敕下官文僧格林沁仍遵前

旨分撥安肅道蔣凝學一軍繞赴浙川駐紮荆紫關爲繞前截
擊之師則浙川鄖西兩路既可兼顧並與臣派防富水關漫川
關等處之軍聲勢聯絡實與防剿機宜兩有裨益臣仍當嚴飭
各軍會合團練認真防堵以捍鄰氛而固疆圉所有東路髮捻

各逆逼近陝疆現籌派兵集團扼要堵禦緣由理合由驛馳奏
伏祈

皇太后

皇上聖鑒訓示飭遵謹

奏

附陳各軍會勦階州情形疏

再臣頃接據派援階州之彝字營黃鼎稟稱該營於十一月十
五日約會各軍分路進擊達字營沿河而上以攻其南武字營
分出東洛水北山以攻其東北該逆直薄回回坪舊城以阻西
北柳壩兩水紛竄之路偃伏疾趨列隊甫定城中之賊出隊數

千分西北兩路來迎當先賊騎五十六匹直向彝字正營衝撲該營堅持不動俟其撲近數十步始行奮隊衝擊旂幟甫張賊卽驚奔循壘而逸折由南面渡河復與達字營迎敵旋又分隊數千直撲武字右路當被擊退下山該逆復折回抗拒我軍鎗礮轟擊斬馘甚多麤戰至暮始行收隊賊知北山舊城柳壩一路已駐大兵乃連夜分股渡河而營十六日復出大隊遍滿山谷勢欲大戰各營分路列隊疾馳而下該逆遽卽收隊入城而河南之賊亦乘間搬運輜重遁歸城中現與湘果達字武字各軍商同分兵渡河向南進逼賊壘以圖會剿等情又據湘果軍蕭慶高等稟稱該逆於城東峻險之處築立三壘並將姚家渡

白水街河水引入城中以圖抗阻官軍火攻地道所有階南竄
川要路現有武字達字兩軍分兵扼守惟北山道途紛歧地勢
遼闊一由柳壩繞出可通褒沔略陽廣元昭劍一由成縣紛竄
可至徽縣畱壩鳳縣實爲秦蜀咽喉在在有路可遁該總兵現
與右軍各營分扼北山諸隘並催英毅一軍扼阻舊城衝要庶
免逆蹤乘虛遁逸惟該逆旣拌命相拒我軍亦宜深溝高壘先
固藩籬使賊無糧可掠則餘黨勢將瓦解然後乘其腹背受敵
勢蹙力窮之際會同各軍四面兜剿以期一鼓撲滅等情前來
除批飭會合川隴各軍相機圍剿迅圖克復毋任逃竄致滋蔓
延外所有各軍會剿階州踞匪情形理合附片陳明伏祈

聖鑒謹

奏

附酌定兵勇行走程途疏

再甘肅回逆叛亂經署督臣都興阿提臣雷正綰陶茂林分路
勦辦現在調派各省官兵並各營添募勇丁以及協撥軍火器
械餉銀從陝經過絡繹不絕查關中自遭回擾以後艱窘情狀
迥異尋常若仍照依先年驛路行走則大營駐紮之地既分數
處天涯地角輾轉迂迴既徒增跋涉之勞而員弁兵勇每見地
方蕭條往往隨意繞越忽東忽西忽南忽北任其所之毫無定
準在州縣既以猝備車馬不及受其陵辱而百姓復因突如其

來驚逃四散以致兵勇乘隙或姦淫婦女或搶掠貲財或打毀車輛或強拉馬騾迨至事後控訴行文飭拏又無姓名可指空言回覆莫可根究更有先派前站數人講取使費如能滿其慾壑亦卽舍其必由之路轉而之他否則但憑一紙溜單任意喧索浮開夫馬名數勒令折價每起自數百串至千餘串不等稍不如意動輒滋鬧地方官以軍務重大緊迫慮及貽誤遲延勢不得不勉強應付敷衍目前乃前起甫去後起踵來以凋敝之殘區供無厭之苛索官累民困伊於胡底此等弊端雖經山東河南疊次咨會飭禁因未奏奉

諭旨各將帥不免視爲具文漫不經心迄未能改縱有明白領

帶之官亦狃於積習而無如之何竊惟用兵本以救民豈可轉
增擾累茲特按照各大營駐紮所在就陝省地勢情形與軍需
局司道共同商酌擬定兵勇行走程途如赴慶陽者一由潼關
朝邑大荔澄城洛川鄜州一由澄城韓城洛川鄜州均出甘肅
合水縣而至慶陽其赴花馬池者由潼關朝邑大荔澄城洛川
鄜州甘泉延安安塞保安靖邊定邊而至花馬池其赴涇州平
涼者由潼關華陰華州渭南臨潼省城咸陽醴泉乾州永壽邠
州長武出境直達涇州平涼此外有由潼關赴隴州者則以前
走之咸陽道上分路興平武功扶風岐山鳳翔汧陽而至隴州
至於招調兵勇暨運解軍裝等項沿途均須公文知會不准再

用潤單一入陝境卽由潼關道協督廳先驗來文兵勇若干名
數解送何項軍物係奉何營調往何路逐一查明再由潼關道
協給牌先行傳知經過州縣照例預備一面給發帶兵官文書
將應行程途里數分填傳牌之內解運餉銀亦倣照辦理倘敢
不遵指定之路行走故意妄更卽按軍法嚴懲如此明定章程
庶免繞道騷擾而亦不致逗遛遷延茲據軍需局司道會詳前
來除分咨各省及統兵大臣並行知陝省入境各首站州縣外
所有酌定兵勇行走程途並議給公文傳牌禁絕潤單緣由理
合附片陳明伏乞
聖鑒訓示飭遵謹

奏

附東治營月餉仍歸山西撥解疏

再查總兵陳天佑所帶東治兩營月餉曾於本年四月間經山西撫臣沈桂芬奏明東勇赴陝應需口糧等項飭據藩司在庫存雜款內暫行籌借銀五千兩飭委管解起程馳解多隆阿營交納轉發日後此軍餉銀自當與月解多隆阿軍餉竭力併解至軍火器械等項晉省實有難再分撥之勢擬請由陝就近酌給等因奉

旨戶部知道欽此欽遵在案嗣因該兩營勇丁陸續到關急於赴甘援剿而晉省尙未解到不得已由陝省糧臺暫行借撥餉

銀二千兩擬俟晉省到後扣還歸款並咨明晉省以後協濟該營餉銀應卽逕解慶陽糧臺轉發以期迅速乃甘省不知查察誤以陳天佑一軍餉歸陝協奏奉

諭旨敕令撥解臣於接濟援甘各軍餉項竭蹶情形摺內曾將甘省誤會緣由縷晰

奏明在案茲復准陳天佑來咨東治右後兩營自本年正月十六日起截至十月底止共應支銀五萬六千餘兩該鎮親兵哨弁等官鹽糧公費共銀三千六百餘兩除領過晉省協餉銀五千兩借領陝省糧臺銀二千兩外共欠餉銀五萬二千有奇咨請給領前來臣伏查陝省凋敝之區現在籌撥援甘之穆圖善

金順西們克西克陶茂林曹克忠等四十餘營餉項軍火已屬力盡筋疲曾經按月繕具清單附片陳

奏所有艱窘情形諒荷

聖明洞鑒若再以晉省欠解陳天佑軍餉移歸陝省清解實屬無可搜羅且晉省於前協五千兩之外曾否續解慶陽糧臺陝省無從查考如果秦中力能支持亦何必稍分畛域無如點金乏術羅掘俱窮臣部赴援階州各營欠餉已近八月之久僅藉空言撫慰實深飢潰之虞合無仰懇

皇上天恩敕下山西撫臣沈桂芬查照原奏將陳天佑一軍餉銀按月撥解並飭慶陽糧臺逕行催提庶期餉歸有著俾該營

士卒得免飢寒之慮所有東治兩營月餉請仍歸晉省撥解緣
由理合附片陳明伏祈
聖鑒飭遵謹

奏

附續解工程銀兩並請展緩疏

再陝省應解

定陵工程銀一十五萬兩業已飭司兩次籌解銀四萬兩嗣准
部咨同治三年十一月初一日欽奉

上諭飭將欠解銀兩統限本年十二月內全數解清等因欽此
欽遵復經飭司在於地丁項下動銀二萬兩委員解赴工程處

交納共計解過銀六萬兩尙欠銀九萬兩據藩司林壽圖詳稱
職司度支責無旁貸當此工程緊急之際自宜激發天良於無
可設法之中力籌趕解以濟要需該司甫由京員外簡詎不知
要工急款斷難再延無如陝省兵燹之後民戶逃亡商販絕迹
現雖竭力招徠而元氣過傷驟難復業捐輸釐稅征解無幾卽
地丁一項亦僅止數處完善州縣完納車薪杯水於事何濟此
外被擾各處民不聊生未便急切追呼轉致哀鴻失所是陝省
刻下情形實屬殘破太甚非四川河南可比所有短解前項工
程銀兩委難依限清解與其臨時貽誤莫若先事直陳懇請
奏明展緩三箇月趕於四年四月以前解清並稱該司籌餉無

才請先交部議處等情具詳前來臣查陝西通年入款專賴地
丁而地丁所出全在西同鳳乾等府州屬自逆回滋擾以來民
盡流離地多荒廢沃野千里彌望蓬蒿非但被災較重之區難
以起征卽屬次重地方前經酌定分數聽其輸納而迄今日久
完解寥寥或值紳民哀求緩征亦經臣婉爲批駁並將地方有
司分別奏參凡事躬任嫌怨亦期稍濟餉需乃時屆歲杪征收
仍屬無幾推原其故一由土田荒蕪轉輸不給一由兵差絡繹
閭閻愈疲司詳情形尙屬確切可否仰懇
恩施逾格俯准展緩三箇月限於明年四月以前不拘何款儘
力騰挪陸續委解清楚出自

鴻慈至設措維艱固由地方凋敝所致而要需莫濟究屬臣等籌畫無方應請

旨將臣暨藩司林壽圖一併交部議處以昭儆戒理合附片具陳伏乞

聖鑒訓示遵行謹

奏

附報解撥甘餉銀軍火數目疏

再陝省餉源枯竭早在

聖明洞鑒之中惟臣屢奉

諭旨籌濟甘省軍需不敢稍存膜視業將八九兩月撥解過撥

甘各營餉銀軍火數目附

奏在案嗣復督飭藩司林壽圖等設法搜羅以濟鄰封之急茲據軍需局司道詳稱十月十一月總共解過援甘各營餉銀六萬一千九百五十七兩零火藥四萬七千四百四十五斤火繩四萬四千八百丈鉛丸三萬零六百九十三斤擡鎗鳥鎗共二百桿藍白布大帳房一百八十一架引線一萬五千莖戰箭三千枝行卓行牀几凳共一十八張竹噴筒三百箇銅火箭二百枝紙火箭三百枝各經委員解往交納領有迴文爲據臣覆查所解餉銀軍火各項分撥雖不幾何而在陝省竭蹶供支實已不遺餘力除仍飭該司道等竭力籌措源源接濟外所有陝省

十月十一月撥解撥甘各營餉銀軍火帳棚等項數目謹另繕
清單恭呈

御覽理合附片陳明伏祈

聖鑒謹

奏

附銷假疏

再臣前因抱疴日久陳請開缺嗣於九月初十日欽奉

恩綸著實假兩箇月安心調理旋值假期已滿病體未痊復自

奏陳請假一月併奉

諭旨允准

聖恩高厚淪浹肌膚回枯朽之餘生沐

甄陶之大化遂蠲沈痼漸即平安茲謹於十二月初十日照常
供職視事所有銷假日期理合附片陳明伏祈

聖鑒謹

奏

密陳藩臬道府各員考語疏

同治三年十二月二十八日

奏爲密陳藩臬道府各員切實考語恭摺循例具奏仰祈

聖鑒事竊查定例現任司道暨知府各員賢否應由督撫於年
終出具切實考語密

奏一次臣仰蒙

恩植昇任封圻雖自慙知識樛昧不足以鑒別羣才然與屬員接見既久審察已周則其器識之大小材力之優絀心術之邪正謀慮之公私以及供職任事之實心與否要可得其大凡竊維我

聖祖仁皇帝設爲年終密考之制亦欲周知外任司道賢否以定考課之衡以神黜陟之用而督撫臣好惡之公私鑒別之當否亦可參觀而互見立法之意至爲深遠臣雖愚闇誠不敢視爲故常之典亦不敢稍涉愛憎之私所有現任司道各員除延榆綏道常瀚甫報回任尙未接見經署督臣都興阿調營差委又鳳邠陝安兩道並同州延安鳳翔漢中興安等府均未到任

毋庸註考外其餘各員謹就臣愚昧所反出具切實考語開列

清單親自填註恭呈

御覽伏乞

皇太后

皇上聖鑒謹

劉中丞奏議卷六終

劉中丞奏議卷七目錄

奏留唐正恩仍歸陝省補用疏

查覆前署撫劣蹟疏

遵查提督馬德昭被參各款據實覆奏疏

附委解工程銀兩疏

彙報階州官軍擊賊獲勝疏

附請飭曹克忠分兵暫防陝邊疏

附報階州賊情疏

附續報會剿獲勝情形疏

逆回分股回竄陝疆派兵截剿疏

附攔襲回逆折往西竄情形疏

附階州逆匪襲營追剿獲勝疏

附甘省潰勇沿途滋事疏

官軍會攻階州大獲勝捷疏

附覆陳階州三路官兵必須擇人統率疏

附各軍前剿蔡啟兩逆出力員弁另案請獎疏

劉中丞奏議卷七

奏留唐正恩仍歸陝省補用疏

同治四年正月初五日

湘鄉劉 蓉著

奏為知縣為守兼優循聲夙著懇

恩俯准畱陝補用俾資治理恭摺仰祈

聖鑒事竊照丁艱起復知縣唐正恩由四川拔貢中式道光庚子科順天鄉試舉人庚戌科進士引

見以部屬用簽分刑部學習江蘇司行走咸豐二年三月因本科截取註銷主事仍歸進士知縣原班銓選是年八月選授江蘇陽湖縣知縣親老告近三年四月改選陝西涇化縣知縣於

七月二十一日到任七年十一月十六日在任聞訃丁母憂領
咨回籍守制旋於九年三月初九日服闋業由川省取結報部
起復在案臣曩在四川卽聞該員品端學裕爲川北士林所推
重逮上年駐師巴州正值該員本籍接見之頃覺其善氣迎人
而於政體民情特爲練達當經奏調隨營派令就地勸捐誠信
動人甚爲踴躍臣蒞任之後訪悉該員前在涪化縣知縣任內
政聲卓著實爲循良之選現值陝省甫就肅清瘡痍未復亟須
整頓吏治以培元氣而繫人心唐正恩雖係實缺人員丁憂起
復例應歸部銓選惟該員曾任陝西知縣熟悉地方情形民情
素洽合無仰懇

天恩俯准將前涪化縣知縣仍畱陝省補用免其補交分發指
省銀兩庶俾吏治得人於凋敝之區不無裨益臣爲吏治需人
起見未便拘泥常例所有保薦循吏畱陝補用緣由理合恭摺

具

奏伏祈

皇太后

皇上聖鑒訓示謹

奏

查覆前署撫劣蹟疏

同治四年正月初五日

奏爲遵

旨密查前署撫臣被參劣蹟據實覆陳仰祈

聖鑒事竊臣前准議政王軍機大臣密寄同治三年四月二十

八日奉

上諭有人奏前暫署陝西巡撫按察司張集馨奸邪險詐諂媚卑污於多隆阿初到省城時獨迎於十里以外並不與司道同見致使陝西有巡撫公服跪接欽差之謠縱使並無其事而眾口已傳爲笑柄其所參文武官員均係仰體多隆阿之愛憎如提督馬德昭臬司劉鴻恩及各州縣等其中儘有循聲素著有功無過之員而馬德昭尤爲陝省兵民所悅服屈列彈章公論無不惜之漢中鎮總兵奈福象爲多隆阿所狎比捏報戰功保

獎提督銜花翎勇號儘先遊擊陳東霖綽號陳鐵匠以緝拏逃
勇爲名妄殺民人沒其貲財且過一州縣必索重貲陵虐官民
無所不至候補道李宗燾並有跪求多隆阿緩攻整屋保全家
小等事是否實有其事著劉蓉確切查明據實具奏單內所傳
奇方一張有薑桂劉寄奴陳皮李核等藥名係指何人而言其
傳此方之呂洞賓又係何人並著劉蓉查明詳晰陳奏毋稍徇
隱原單著鈔給閱看等因欽此臣未入秦疆卽習聞張集馨平
日傾險之名尙未親悉其情狀逮督師漢南復聞官紳士民共
相訾議每用畱心訪察五月奉

旨密查旋以出省勦辦蔡啟二逆未竟其事近復按款周諮原

摺論列蓋眾口之所能言眾目之所共覩者也。大抵張集馨之
爲人陰柔便辟，濟以奸邪險詐之才，老而彌譎。方其陳臬入陝，
由潼關繞道謁多隆阿於同州軍營，卽欲託以取寵，先納交於
左右以樹黨。援凡多隆阿所倚重，如雷正綰、陶茂林、曹克忠等
皆訂爲換帖弟兄。其年少如奈福、象輩，則引諸門牆之列。此皆
張集馨所自言，不諱。時出其信函以示人者，而與曹克忠從同
州進省，結識尤早。前提督馬德昭先以獨力捍禦回逆功在省
垣，紳民倚重。曹克忠忌其聲望，覲面後語多不合。時值張集馨
署理藩篆，馬德昭不諳文義，貽書曹克忠，有張藩臺有餉不給
可惡之語。曹卽持以示張，以故銜恨刺骨。光太廟之役，爲曹克

忠鋪敘戰功而痛詆馬德昭以悅多隆阿之意臣嘗博採輿論馬德昭力保危城其功要不可沒二年六月初四十六兩日該逆猛撲省城城中奸回躍躍欲動人心極爲危悚馬德昭奮率所部出駐北關兩番鏖戰殺賊數千該逆由是不敢復犯省垣城回亦遂帖耳跽伏至今紳民父老咨嗟太息謂向非馬提臺則省城之淪覆已久安有今日嗣值勝保率師入城檄派馬德昭所步親兵前赴渭河草店護取炭薪中途遇伏死者至數百人精銳銷亡以故不能復奮鳳翔之不得遽行與紳民之公呈請畱以其時多隆阿尙未能分兵防省恃有該提督在逆回猶未敢直撲城關乃不量敘其功而又文致其罪此秦人所爲至

今扼腕者也至署臬司鳳邠道劉鴻恩之附參尤有不能瞞人耳目者張集馨之署藩司也前長安縣知縣李煒貪鄙狡詐聲名狼藉乃以門生故欲令署理西安府篆至年老多病之白廢臣物譏沸騰之毛鳳枝又以私人故欲派差使又嘗授意回紳使主撫議數事皆已具橐而劉鴻恩不肯判行固已疊觸其怒且於張集馨之揚曹而抑馬則於公庭面訐其非以故甫攝撫篆卽加醜語並列彈章然猶顧忌公論未敢顯然劾之也爰具疏彙摺摭多端密送多隆阿會銜繕發蓋欲藉多隆阿爲主之名掩其誣陷之迹詎意多隆阿以所參交涉地方官事未經署銜迨後欽奉

批回發還片稟知係單銜參奏是日司道公見張集馨愧赧失措於大庭中向劉鴻恩屈膝稱罪且呼之曰老弟此實多將軍意我不得不隨同畫稟今列我單銜其實與我無干我必爲汝奏畱此時情態蓋大庭之共見共聞者臣查劉鴻恩當同州回氛兇猛之時僅帶勇丁百名馳往登陴守禦歷八晝夜死傷相繼猶親冒矢石開礮擊賊多名郡城賴以全活卽二年四月在省出城駐馬德昭營內隨隊護民刈麥將及一月之久艱險備嘗雖值麥地遼闊照料難周頗多遭賊蹂躪之處然農民之穫麥進城者實亦不少故至今紳民公論謂馬德昭罪不掩功劉鴻恩有功無罪徒以秉性剛方不肯媵佞諛順致遭污讟然使

立功之將氣節之士橫被摧殘則當日秦中吏治營務真堪太
息原摺稱所參文武官員均係仰體多隆阿意旨者良亦不爲
無因而證諸前提督馬德昭署臬司劉鴻恩各情節則又借逢
迎以行其傾陷之私者也多隆阿於二年八月二十二日帶兵
抵省時尙在

文宗顯皇帝大事二十七月期內是日司道皆常服不掛珠出
東關公廨迎接張集馨獨補服朝珠遠赴十里鋪執手板迎謁
道左屈膝請安多隆阿性喜逢迎昧於大體見署巡撫執禮甚
恭意頗嘉悅當時觀者傳以爲笑而張集馨自鳴得意反嗤司
道照常迎接爲非此其諂事多隆阿之彰明較著者也至多隆

阿部曲每多優保戰功奈福象年齒尙輕閱歷較淺實難遽膺
專闕臣已奏陳在案其綽號鐵匠之副將陳東霖現經穆圖善
奏保加以總兵銜勇號該副將由楚勇從征曾充年字營哨官
兇悍無賴睚眦殺人多隆阿以其奮勇敢戰雖明知其然而置
之不問由是暴戾恣睢日甚一日惟查多營部曲不循軍律者
非止一人現值西事孔棘陳東霖等方隨穆圖善效力戎行但
能時施控馭之方或可終收猛鷲之用候補道李宗燾當賊踞
蓋屋眷屬失陷其子被賊拷掠受傷甚重全家幾罹虎口該員
雖隨營辦事聞其見多隆阿驕蹇日甚遇事唯諾未敢盡言以
拂其意似無因保全家小能求緩攻之理伏查多隆阿前在皖

鄂質直剛勇號稱驍將自入陝後功高志懈意滿氣盈於將弁則曲加袒護於官吏則喜取訶諛故張集馨得由曹克忠等以結歡因陷馬德昭等於非罪人心因之不附聲望由此漸衰臣愚以爲多隆阿武人無識不足深求張集馨以翰林清班歷任藩臬十餘年屢受

厚恩棄瑕錄用宜何如砥礪廉隅以圖報稱乃徇一己之愛憎伺將帥之喜怒獻諛貢媚挾詐逞私以至遠近同聲謂其患得患失能諂能驕核其邪佞之情實貽官常之玷臣既廉訪確實不敢稍涉徇隱再奉

飭查單載奇方菴桂劉寄奴陳皮李核等藥名係屬何人傳此

方之呂洞賓又係何人等因臣查張集馨署撫篆時嘗引薑桂爲喻自謂老而愈辛又戲謂代理咸甯縣知縣黃兆熊長安縣知縣白楷爲金銀花謂調補西安府知府呂雋孫爲呂洞賓皆切其姓爲諧謔之談時值劉齊銜署理藩司候補知府前長安縣知縣李煒出入撫署情甚親密於是州縣之久不得缺者心存缺望遂借薑桂劉寄奴李核金銀花等名目騰蜚語以相揶揄惟陳皮未知所指然察訪劉齊銜官聲素好辦事認真實無舞弊營私之事牽連併及殊屬無稽所有遵旨密查各情謹繕摺據實具

奏伏乞

皇太后

皇上聖鑒訓示遵行謹

奏

遵查提督馬德昭被參各款據實覆奏疏

同治四年正月初五日

奏爲遵查已革甘肅提督馬德昭被參各款稽核案卷採訪輿論據實覆奏仰祈

聖鑒事竊臣於同治二年九月二十三日在四川巴州營次欽奉同治二年八月十四日

上諭本日據多隆阿等馳奏籌辦省城防勦事宜摺內據稱該大臣於抵省後查點馬德昭所統四關各營勇丁三千八百餘

名而實數僅一千八百餘名孱弱又且過半瑛棨之存城營勇一千餘名僅四百餘名可用其每月糧餉各營均按數支領覽奏殊堪痛恨瑛棨以巡撫大員貽誤地方至於如此所部勇丁徒糜餉需毫無實用且藉護省城爲名屢次飾詞奏畱馬德昭鳳翔等城久被賊困置之不顧但爲馬德昭捏報戰功且縱令馬德昭虛報勇數至二千之多並不認真查點通同朦蔽朝廷實屬瀆職辜恩大負委任前旨僅予革職尙覺情浮於罪瑛棨著卽行發往新疆充當苦差以示懲儆馬德昭於軍務喫緊之際以提督統兵當派援鳳翔託病遷延其居心已不可問又復虛報勇數冒領口糧竟視軍務爲利藪置國家於不顧貪詐尤

爲可惡馬德昭業經革職卽著交多隆阿劉蓉張集馨嚴行查訊奏明辦理等因又同日奉

上諭茲據多隆阿穆騰阿張集馨等會奏點驗四關勇丁數目虛冒甚多而每月糧餉則照虛數支領實堪痛恨本日業經明發諭旨將瞻徇故縱之已革巡撫瑛棨發往新疆效力贖罪馬德昭交該將軍及劉蓉等嚴行查辦矣各營營官現據多隆阿等奏明分別拏問自能將所有侵蝕朦混等情訊查得實嚴加懲辦至所稱馬德昭營中旣未打仗所保人員應由張集馨查明概請撤銷自爲力祛冒濫起見惟一載以來該營官兵於省城戰守究竟有無出力抑果全係冒濫著多隆阿等詳悉查明

確實具奏辦理等因欽此時臣遠在川北未能會辦迨漢南郡縣次第收復撫綏事宜稍有頭緒於三年四月進省接印又值多隆阿因病出缺臣到任甫逾一月卽赴盤屋督師勦辦蔡啟兩逆八月回省患病請假而前護撫篆按察使張集馨奉

旨赴甘辦理招撫事宜馬德昭於前陝甘督臣恩麟交卸後亦奉

旨調赴僧格林沁軍營差遣業已起程赴營奏報在案竊思案關參劾理貴持平雖馬德昭等遠赴鄰疆無由面質而案卷具存輿情可採無難得其梗概爰是澈底清查馬德昭之遷延赴援鳳翔也先是多隆阿奏奉

諭旨令前撫臣瑛棨添足兵勇三千馳往勦辦已據馬德昭調
派各營定期起程適瑛棨以眾紳士聯名攀留據情入
告奉

旨准其暫留陝西省城力籌防勦保衛根本重地以順輿情遂
卽中止斯時多隆阿之請援鳳郡瑛棨之留保省垣均屬因公
起見而附省一帶逆氛猖獗紳民方倚爲重自有難遽赴鳳翔
之勢至各營勇丁雖共計有四千七百餘名之多而各統各營
不歸節制僅止安勇一營六百名係該革員自行領餉數旣無
幾餉亦不充殊難期其得力其餘各營均歸管帶官各自請領
散放旋經多隆阿等訊明各營勇丁陸續病故無力增募楚勇

因將本地難民招補充數又以糧餉兩缺逐漸逃亡當經行查糧臺軍需局亦無支發糧餉實數因將漫無約束之參將劉熾遊擊何九皋陳明昇都司唐祥照劉效功張才勝蔡明光七員奏參革職並將守備謝聯陞發往新疆效力贖罪在案是馬德昭於各營勇丁缺額未能先事查參咎有應得而冒領餉銀入已則實並無其事復查馬德昭自甘入陝以來兵力甚單賊勢甚熾該革員駐紮城外防勦一載有餘辛勤備至而二年六月北關兩戰痛挫兇鋒省城賴以保全尤爲人所稱道前撫臣瑛棨曾將戰守情形以及歷次陣亡員弁兵勇隨時奏報不得謂之並未打仗況陣亡員弁已奉

恩卹其出力各員亦宜獎敘未便以主將被議概予撤銷致失情理之平而無以示激勸臣會同司道博採輿情皆謂馬德昭於兵單將缺之時力保危城其功難泯厥後官兵倚重聲望稍隆因而驕態頗形亦屬武夫之見此外尙無別項劣蹟卽前撫臣瑛棨咎在庸懦無能未諳軍旅至於各營缺伍甚多毫無覺察然亦委無通同朦蔽情弊臣等再三察訪眾口相符所有查明已革提督馬德昭被參各款緣由理合恭摺具奏伏乞

皇太后

皇上聖鑒訓示謹

奏

附委解工程銀兩疏

再陝省應解

定陵工程銀一十五萬兩前已飭司三次籌解銀六萬兩計尙欠銀九萬兩因陝省地方殘破過甚庫款萬分短絀業據司詳奏請展緩三箇月欽奉

恩旨允准在案惟工程銀兩最關緊要臣與藩司責有攸歸何敢因請展緩稍事諉延仍於無可設法之中隨時籌措茲復竭力催提各屬地丁並將要款緩發零星湊集同治三年地丁銀三萬兩儘數動支派委候補知縣白楷管解定於四年正月十

六日起程前赴

欽派恭修工程王大臣處交納以濟急需據藩司具詳前來除再督飭迅速籌措委解並咨明戶工二部暨工程處知照外所有四次籌解工程銀兩數目及起程日期理合附片陳明伏乞聖鑒謹

奏

彙報階州官軍擊賊獲勝疏

同治四年正月初五日

奏爲彙報官軍進剿階州逆匪獲勝情形現飭併力圍攻以圖聚殲恭摺馳奏仰祈

聖鑒事竊

臣

於昨臘

二十五六日接記名提督漢中鎮總兵蕭

慶高等稟報階州賊情地勢據稱城外兩水地方向爲該逆屯糧之所既可拒官兵進攻亦可繞赴柳壩以截我師後路如不先將此巢攻破則舊城山不能駐軍州城難期攻拔當與彝字營黃鼎輕騎前往查看該處地勢平闊道路分歧兵力太單卽難分布且慮城中逆隊併力出援乃分派道員蕭德綱總兵劉厚基會同黃鼎於二十九日前往扼紮該逆偵知官軍雲集復增築數壘以圖抗拒二十八日蕭慶高函約川軍達字武字兩營於次日黎明分道挑戰藉以牽綴賊勢當派該部新中營蕭德見進攻腰道里下山脊逆壘副中營彭義益進攻北山中路墩上逆壘前後兩營毛尙陞蕭舉臣進攻綏子山東嶽廟逆壘

以右軍中右兩營排列殿溝山背遏西門援賊左後兩營由真武山進攻王家寨並派右軍副中營與馬隊兩營由柳壩出舊城山左邊寇家村溝口設伏蕭慶高自率親兵居中策應詎該逆負隅不出憑牆施放鎗礮我師冒煙猛攻逆壘既堅且高濠亦深闊兼之道路陡窄均被削挖雖拌命猛撲徒傷精銳乃佯令收隊密諭北山右手各營半收半伏派馬隊數騎馳驟西門城外冀誘該逆出巢適舊城山之賊搶入北岸小寨意圖從後鈔襲經右軍副中營譚獻定與馬隊從柳壩溝道攻撲該處洞寨斃賊十餘名奪獲號衣十餘件正得手閒城中倏出援賊數百人分路蜂擁而來我軍伏兵齊出左右截擊斃賊數十名潰

賊悉退入城各弁勇奮追不避鋒刃藍翎守備姜福元中鎗陣亡時已薄暮逆眾堅匿不出祇得收隊而還維時黃鼎紮營李子山杜家溝一帶該逆懼絕糧道日往兩水運載糧食絡繹不絕十二月初二日蕭慶高黃鼎各派奮勇親兵百餘名設伏溝澗遙以馬隊誘之逆不及防被我軍衝潰二三百人墜坡溺水者甚眾擒獲老賊十餘名新脇數十名奪得麥麩十餘駄驢騾二十餘匹兩水北岸之路頗足攔截第慮該逆由舊城山上坡繞唐家坪鐵堡兩處襲我後路各營甫經紮定營壘猶未完固因慮該逆併力往撲正擬出隊牽綴適接武字營周達武函稱該逆潛伏不動東泮水梁壘仍前攻打恐難得手擬移三營於

賊壘山下逼紮阻其挑水運糧之路約請同時進攻互相牽制當經蕭慶高首復初四日黎明各派六成隊分途進攻我師初用噴筒火箭射入壘中守梁之賊竄伏不動惟遙見城中人影蝟集布列如星蕭慶高知該逆必有詭謀諭令各營嚴陣以待適見周達武率隊赴東泮水布列河干逆眾湧出相抗該軍用鎗礮擊逆不敢逞倏大山裏賊旗搖曳東門突出賊數千人由范家坪蜂擁越坡而來蕭德見率百長趙名魁等由毛鬻山截之刀矛相接立斃黃衣賊二十餘名我師愈戰愈厲該逆初不少卻且戰且前意欲拌死衝突蕭慶高飛派蕭啟基率隊從墩上右手繞擊派親兵百長杜榮慎鄧光升與彭義益率隊由

左手併力猛撲陣斬執旗先鋒賊六名生擒老賊二名逆勢不
支始退下坡彼此站隊相持據陣獲老賊供稱該逆因武字營
進紮河邊挑選悍賊三千餘人欲由范家坪繞鈔後路並派二
千餘人由西門牽制真武山柳壩各營使我師應接不暇卽圖
乘隙攻撲等語正催進聞忽聞木魚溝礮聲震動經英毅副中
營王九齡與右軍副中營譚獻定攻撲該處逆寨已將碕卡攻
破斃賊十餘名冒水山之賊見勢甚危由舊城山背奔趨而下
西門之賊亦由溝道馳騁而來正值蕭舉臣毛尙陞與右軍王
金志周東興鍾玉勝彭基秀列隊梁家溝石家莊鼠子山各澗
四出包鈔鎗礮齊施斃賊三十餘名該逆見我師勢甚威猛手

剔潰賊二名吶喊直前經該部前後兩營趁勢壓擊用連環鎗
礮施放斃賊數十人一時短兵相接殺聲震天逆勢不支遂復
潰退城內我師自卯至酉攻戰約七時之久始行收隊三更後
倏據巡哨勇丁報稱該逆約千餘人向東泮水前往蕭慶高卽
傳各營五更出隊分起排列濠外不移時間果見該逆已在嚴
家灣山上下布修梁壘復有逆隊自階城東路擁出直趨范家
坪一帶山梁時周達武正督各營抵東泮水河岸進撲逆壘蕭
慶高見援賊將有馳逼之勢立飭蕭德見與親兵隊由毛觜山
下整隊策應而以副中左營仍堵禦梁家溝逆壘並令右軍中
左右後四營站隊梁家山腳殿溝一帶派前後兩營由梁家溝

鼠子山攻龍王廟逆壘該逆憑壘拚死抵禦各弁勇奮不顧身
銳氣百倍已拔其梅花椿數十重將欲搶上牆垣俄而西門出
賊千餘人分兩路來援蕭舉臣因見功在垂成喝令弁勇毋避
鋒刃親率精悍敢戰之士冒刃爭先手剔悍賊數人該逆且戰
且卻蕭舉臣趁勢趕進逼近逆巢不意壘中劈山礮發逕中該
員頭顱登時陣亡其時溝左之賊亦被前左兩營擊潰斃賊數
十名該逆悉退入城乃令收隊而還計此兩役斃賊二百餘名
擒斬十數名我勇亦有傷亡其陣亡之記名總兵揚勇巴圖魯
蕭舉臣藍翎守備姜福元懇卽奏請優卹以慰忠魂等情前來
伏查蔡逆在諸賊中最爲狡悍每見官軍有閒可乘有懈可擊

則風馳電疾以赴之一遇強敵則憑城據壘深匿固拒務堅壁以老我師卽或出隊亦不過千人或數百人仍不遠離巢穴官軍雖奮力猛撲所誅殺不過數十百人而逼近其壘則懸鎗遙擊伏礮潛發往往折我精銳此其狡謀詭計之最堪痛恨者今惟設法誘出大隊以期一鼓撲滅或終恃險不出計惟有長圍坐困之一法除仍飭蕭慶高等會合川隴各軍相機圍勦力圖攻克以冀聚殲外查記名總兵楊勇巴圖魯蕭舉臣藍翎守備姜福元衝鋒冒刃奮不顧身先後陣亡均堪憫惻蕭舉臣前於蓋屋案內擬加保提督銜尙未出奏合無籲懇天恩飭部將蕭舉臣照提督例議卹姜福元照守備例議卹以

慰忠魂其餘陣亡弁勇容俟查明照例辦理所有連日進攻階州獲勝情形理合恭摺馳

奏伏祈

皇太后

皇上聖鑒訓示謹

奏

附請飭曹克忠分兵暫防陝邊疏

再臣於昨臘二十三、四等日接據邠州長武縣稟報固原平涼各處逆回於十八日回竄靈臺縣擾及獨店慘殺異常相距長武僅二十餘里又據隴州汧陽縣稟報該逆分股竄至隴州屬

之銀胡汧陽屬之上店鎮等處地方焚戮搶掠勢甚兇猛該州縣疊被蹂躪民無固志難以抵禦稟請飛咨雷正綰曹克忠分兵繞前邀截勿任回竄以保陝境等情前來臣查秦中兵力掃境援甘前因邠隴爲甘省入陝咽喉又爲後路糧運要道若各軍長驅前進不留一兵備禦設或該逆乘虛回竄實屬可虞曾經奏懇

敕下雷正綰轉飭曹克忠分兵駐防邠隴以固陝圍俟階州克復蔡逆殲除再爲騰出兵力替換隴防原以陝甘唇齒相依必須彼此兼顧嗣准雷正綰疊次咨函謂該軍現駐涇州左防靈崇以捍汧隴右防環慶以衛邠長並稱階州爲髮逆竄踞接壤

秦州而鹽關尙餘回逆未殄業經奏明暫畱曹克忠居中控制
儻該匪等圖竄陝境皆可相機勦辦萬一陝省有警當以曹克
忠全軍赴陝爲遊擊之師等語並接曹克忠來函亦以兼顧陝
防自任臣以爲大軍自東掃盪而西邊境自可解嚴何期該逆
被勦窮蹙奪路回奔涇州之師旣已撥赴慶陽而護陝甘督臣
恩麟又以曹克忠攻克鹽關秦州境內肅清

奏飭曹克忠所部十六營專顧甘境如果全軍貿然而去不顧
陝邊後路之防則腹地空虛實堪焦慮臣於無可抽調之中不
得不移緩就急將駐防寶鳳之彭基品一軍飭赴邠長扼堵幸
雷正綰亦已撥兵追勦業將逆匪逼往涇州然邠隴民情已不

勝其驚擾而該逆之蓄謀回竄仍在意中伏懇

天恩敕下雷正綰並飭曹克忠各抽所部三營分紮邠長汧隴
兩路以顧陝防勿使甫離水火之民復遭蹂躪之慘一俟階州
克復卽行撥兵換防計爲日亦當不久且查去歲冬臘兩月陶
茂林等添募楚勇八九營陸續前赴蘭州兵力已厚僅分雷正
綰曹克忠所部各三營暫行回紮於甘省勦辦局勢固亦無損
現值階州遺孽窮蹙思竄專俟此軍到防卽當仍調彭基品一
軍回駐鳳寶以堵要隘而備不虞庶邊郵稍臻安謐所有逆回
被勦回竄請

飭雷正綰曹克忠分兵暫防陝邊緣由理合附驛具

奏伏祈

皇上聖鑒訓示飭遵謹

奏

附報階州賊情疏

再據彝字營黃鼎續稟十二月初八日會同湘果英毅諸軍進攻兩水逆壘之役陣斬僞都統僞統領七八名傷斃悍賊尤多蔡逆志不得逞乃分悍黨千餘從左路山腰斜鈔該軍營壘黃鼎督飭總兵黃友忠知縣張玉文等分路迎擊鏖戰半日鎗斃賊屍狼藉滿地蔡逆大呼此路不開不准收隊黃鼎知蔡逆志在必得兩水以圖竄越乃整隊指揮直衝而前藍翎千總徐占

彪督率奮勇百人直從鎗矛林立之中衝擊而下蔡逆手刃數賊壓隊來迎我軍鎗擊矛刺兼施火箭噴筒從高壓下斃賊過半逆始敗退是夜五鼓該逆太字營僞統領李三奇葛輝江僞先鋒李樂山田少儀等率老賊十餘人叩關投誠據稱蔡逆是日親自督隊抗拒身受重傷並於陣前自斬其退卻之統領先鋒老賊數人黃鼎察其誠心來歸當令薙髮畱營以示招徠又據四川廣元縣知縣梅震稟稱探得蔡逆兇悍狡詐欲畱啟逆於階以堅諸軍之守而自出銀二萬兩誘買該處番民冀由南坪出竄番民旣利其財復虞其詐因赴周達武軍營納款情願誘令深入使官兵伏路要截冀得分其輜重周達武疑而卻

之番民復赴果毅營劉鶴齡重申前說於是諸軍會商各派一營隨果毅營以圖誘獲仍畱重兵於階以防其僞此計若成可期殄滅等情臣查蔡逆在諸賊中最爲狡悍此次身受重傷假途番境雖據降賊與番民言之鑿鑿究係一面之詞未可深信總須加意防範庶可破其詭謀且番民素性嗜利更宜多方籠絡俾不致反爲賊用除仍飭各軍嚴密圍剿相機設間以圖聚殲並飭黃鼎將畱營降目妥爲安撫彈壓外所有續報會剿獲勝蔡逆受傷設計圖竄情形理合附片陳明伏祈

聖鑒謹

奏

附續報會勦獲勝情形疏

正封摺聞復接湘果中軍蕭慶高彝字營黃鼎英毅營李百魁等十二月十四日稟報初六日總兵劉厚基道員蕭德綱與黃鼎等各率隊伍馳撲兩水逆壘誘賊出穴我師分路迎戰用連環鎗礮擊陣斬二十餘名各勇奮力猛撲拔去花籬笆大半奈牆壘高險驟難得手於是選派伏兵不時斜出截殺河北擄糧之賊不敢逕行往來初七日各營仍分道出隊以彝字一軍扼堵階城援賊中營蕭德綱與英毅右營總兵劉玉興圍繞後村之路右營劉厚基與英毅前營總兵蕭祥勝直撲兩水逆壘拔取木椿該逆礮石交加文昌宮援賊紛至我師連施鎗礮該

逆遠退回巢初八日劉厚基擬於山腳添築先鋒小壘便爲出師攔截之圖正在派隊踏看倏蔡逆率僞營悍賊二三千人與兩水南北各壘之賊傾巢分路蜂擁前來阻我增竈之舉劉厚基卽以築壘之師迎頭截擊並派隊繞顧舊壘而以親兵隊併力扼堵短兵相接陣斬悍兵十餘名逆不得逞乃分隊從左路山腰直鈔經黃鼎率正副兩營及親兵隊分路迎戰拋擲火彈火箭斃賊甚多是時前村之賊衝撲中營及英毅各營經蕭德綱等以排鎗刀矛四路截殺斃賊十數名該逆應接不暇且戰且卻各營趁勢追逼賊壘該逆鎗礮犀利我軍亦對敵施放一面砍拔梅花椿冒煙衝入度越濠溝直抵壘邊英毅右營參將

彭長林奮勇先登柰賊營礮石交加火藥傾箱而下彭長林躲
避不及中傷陣亡而後壘之賊又復出隊援應各軍鏖戰竟日
頗形勞瘁始行鳴金收隊訊據擒獲老賊供稱該逆以我師扼
紮兩水李子山杜家溝阻其北路糧道遂添派城中悍賊數千
前往直圖併力衝撲營壘等語蕭慶高卽撥左營六成隊伍星
夜馳應一面函商川軍武字達字兩營出隊挑戰以分逆勢俾
不敢併趨兩水旋接周達武函復以新抵防所之果毅三營駐
紮南岸大埠里出隊牽綴蕭慶高乃傳諭中右各營於十一日
黎明出隊偃旗銜枚潛伏濠旁辰刻果毅營築壘南山該逆分
隊往拒周達武江忠淑率兵兩面夾擊逼撲逆壘蕭慶高飛飭

中右各營及親兵馬隊分攻墩上龍王廟毛背山真武山姜家山木魚溝等處逆壘並派隊列於溝中以杜援賊時各軍逼近逆濠兩岸礮聲如雷各勇猱升而前拔其梅花椿十餘層終以壘高濠深地勢壁立逆眾堅伏不動壘上火藥傾盆而下未能力拔堅巢正相持間西北兩門之賊見我師攻撲甚猛馳來搶上山坡經中軍前後新中先鋒馬步分隊截擊斃賊數十名該逆旋即潰入老巢計自初六至十一日屢次攻撲兩水北山殿溝各處逆壘先後斃賊二三百名並陣斬僞都統曹柳王羅等姓四人僞先鋒孫楊陶黃等姓十餘名而各營傷亡弁勇亦數十名中軍前營都司擬保遊擊歐國和把總擬保藍翎千總白

春霖均皆衝鋒冒刃力竭捐軀應請從優議卹等情稟報前來
臣伏查該逆自陝南敗竄之後軍火拋棄殆盡賊眾不過數千
迫經竄陷階州襄陽日眾恃險抗拒詭計多端現在川軍武字
達字果毅各營分紮東南兩路雲屯星布而昭劍廣元各隘仍
有防守之師且又層層逼進無虞竄越惟西北兩隅道路紛歧
防範難期周密而兩水尤爲寬廣西達岷洮北趨西和禮縣以
至徽成一帶頭頭是道防不勝防臣前慮陝境空虛抽撥彭基
品之親兵五營扼紮寶鳳各隘以期稍固藩籬昨緣甘回回竄
又復調赴邠長備多力分萬難兼顧雖經蕭慶高等札飭西固
營汛土司各官擇要扼堵究未審能否禦控昨據甘肅鞏秦階

道林之望稟報擬以勦辦鹽關之師移赴階州會勦亦迄未見
抵階信息雖其兵數無多然但能力扼一路亦可遏逆蹤紛竄
之勢至階州地素瘠苦賊擾之後軍中糧米採辦維艱臣前次
奏懇

敕下護理陝甘督臣恩麟派委道府大員專司糧運就近採辦
其糧價仍由各營扣給要不過費一轉手之勞乃經臣疊次咨
催至今亦未派員經理各軍越境遄征日憂枵腹合再叩懇
天恩飭令恩麟速派妥員馳赴階州辦理糧運源源接濟以資
飽騰至參將彭長林都司擬保遊擊歐國和把總擬保千總白
春霖奮勇爭先衝鋒冒刃先後陣亡均堪憫惻相應懇請

恩施飭部卽照參將遊擊千總例分別議卹以慰忠魂其餘陣亡勇丁容俟查明彙案辦理謹將續報連日會剿階州獲勝情形附片陳明伏祈

聖鑒訓示謹

奏

逆回分股回竄陝疆派兵截剿疏

同治四年正月十六日

奏爲逆回分股回竄陝疆現籌派兵截剿小有斬獲恭摺馳奏仰祈

聖鑒事竊臣前因界聯甘省之邠州長武隴州汧陽等州縣於去臘稟報逆回竄擾邊境陝省腹地空虛當於無可抽調之中

酌派駐防寶鳳之彭基品一軍馳赴邠長扼堵並因邠隴一帶彌互百餘里路徑紛歧勢難兼顧曾經附片籲懇

天恩敕下雷正綰與曹克忠各抽所部三營分紮邠長汧隴兩路以固陝防在案茲據汧陽縣知縣林之焜稟報本年正月初六日忽有回匪句通逃勇自甘省華亭一帶從後山閒道潛入陝境馬步約千餘人頭戴翎頂貂尾者居多竄至該縣東柵門外大聲疾呼假道過境索要好馬十數匹前赴鳳翔等語當經城上開放鎗礮轟斃紅衣賊二名逆遂焚殺數人往東南而走旋據鳳翔府縣以及附郡之寶雞岐山扶風郿縣武功等處均以逆蹤逼境相繼告警前來臣查陝省兵力早已掃境援甘除

彭基品一軍之外別無兵勇可調適值甘肅提臣陶茂林所派
參將王守基招募馬步各勇數百名甫抵鳳郡因卽飭令截畱
會同彭基品率部迎頭攔截又有雷正綰所遣副將段登雲都
司李楚英及陶茂林所派參將何仕科遊擊劉雲山招募新勇
各兩營均皆道出省垣亦卽一體截畱以資臂助復慮各營均
係南來新募之軍心志未齊地利不熟隨又揀派省城所練防
兵五百名檄委署撫標中軍參將彭體道帶領出城會合截畱
諸軍由武功而進偵賊所向併力兜剿並委道員用西安府知
府呂雋孫前往布置聯絡以期各軍合志同心免致臨敵觀望
一面飛飭彭基品等探明汧隴如無後股竄匪亦卽整隊跟追

以收前後夾擊之效旋據彭基品疊次稟報初七八九十等日
由岐山追抵武功節節躡剿屢有斬獲惟逆黨馬隊七八百匹
馳驟飄忽而該處地勢平行無可控扼須俟各軍會集始克聚
而殲旃等語伏查逆情詭譎蓄謀回竄服飾類於官兵據報句
通逃勇尤難辨其真偽防範更宜周密所有邠隴一帶隘口繁
多該處居民久遭兵燹迄無固志雷正綰曹克忠尙未派有防
兵誠恐該逆乘勢接踵東趨竟致甘肅未平陝氛又熾深爲可
慮惟有仰懇

皇上天恩迅飭雷正綰曹克忠分撥馬步勁旅節節堵截勿使
逆股奪路回竄一面如臣前次所請各派三營扼堵邠隴要隘

以防後來竄匪仍俟階州克復之後騰出兵力替換陝防庶邊
圍稍臻安謐除責令彭基品彭體道會同段登雲何仕科等各
營客兵實力兜勦以期迅殄醜類勿任蔓延外所有逆回分股
回竄陝境現籌派兵截勦並請

敕下雷正綰曹克忠分兵扼防邠隴以絕後患緣由理合恭摺
由驛馳

奏伏祈

皇太后

皇上聖鑒訓示飭遵謹

奏

附攔襲回逆折往西竄情形疏

再頃據彭基品報稱截畱之參將王守基所帶馬隊現經陶茂林委員催調赴甘未能挽畱偵知該逆被勦疾趨東向足無停趾遂率本營各隊於初九初十兩日追截於岐山縣屬之新店子暗伏於扶風縣屬之南園各堡計先後斃賊多名奪獲鎗矛旂幟四十件騾馬十九匹解散被脇男婦一百餘名又據西安府知府呂雋孫稟報該逆竄伏皮李村一帶經中軍參將彭體道會同截畱之參將何仕科遊擊劉雲山於十三夜子刻各率隊伍銜枚疾走圖爲乘夜掩襲之計並約會甫田興平截回之義字營副將段登雲挑選奮勇於五更時出隊接應四更將盡

行抵該村逆方造飯彭體道分兵三路偃旂疾上該逆猝不及防無暇拒鬪紛紛跨馬奪路奔逃我軍奮力上前撲擊立斃悍賊二十餘名奪獲牛馬驢騾五十六匹餘逆捨命縱馬狂奔由涇河涉淺而渡我軍皆係步隊跟追莫及現探該逆因官軍節節迎勦又從涇陽交界之北杜鎮折而西竄醴泉境內等情伏查該逆馬隊居多行蹤飄疾又多係西同兩郡逆回熟悉途徑我軍概係步隊僅能設法圍勦而地在平原無隘可扼以故無能攔截頃接汧隴探報固原提臣雷正綰已派副將雷恆等管帶馬隊一營步隊兩營追勦入陝臣現飛調該軍星馳前來會同夾擊庶收一鼓聚殲之效除嚴飭彭基品等實力跟勦毋任

紛竄蔓延外所有連日攔襲獲勝逆蹤往西折竄緣由理合附片陳明伏祈

聖鑒謹

奏

附階州逆匪襲營追勦獲勝疏

再據赴援階州之英毅軍李百魁去臘二十四日稟報該軍左營副將李成一駐紮鐵堡山因兵力單薄復於扼紮兩水杜家溝之前右副中三營內各抽一哨往該處同紮以壯聲勢十二月二十一夜三更時分忽報賊由兩水繞道而來鈔我軍三哨營壘之後各哨長以昏夜未審虛實不便出隊傳令各勇扼守

牆邊鎮靜以待一面密遣健足馳報兩水杜家溝各營派隊接
應俄而逆眾三四千人暗襲三哨之壘直抵牆邊砍拔梅花樁
吶喊喧天壘中鎗礮齊施該逆亦以鎗礮對轟我軍堅守不動
逆黨拌死猛攻卻而復前者十餘次參將李德高頭中賊刃駁
受矛傷仍復堅持不退僞先鋒方逆帶隊從山腳小溝邊猱上
圖相策應李成一分撥隊伍扼堵溝邊兼援三哨內外夾擊於
時天色微明賊勢稍卻該前營總兵蕭祥勝右營總兵劉玉興
中營副將王九齡並彝字營黃鼎各帶隊伍分路同進截鈔該
逆歸路猛撲而前該軍左營及三哨各勇見援軍紛至膽氣百
倍愈戰愈奮蕭祥勝等從後來擊該逆腹背受敵力不能支紛

紛敗走又無歸路隨卽循溝緣坡而上以悍賊百餘名殿後死拒我軍乘勢追殺直抵溝內投擲噴筒火彈該逆自相踐踏亡命而逃共計斃賊四五百名方逆骹受鎗傷我軍亦有損折現經蕭慶高添派湘果中前營會紮鐵堡山以厚兵力等情具稟前來伏查蔡逆狡悍異常伺隙攻瑕是其慣技現在東南各隘已經川兵層層堵截無可竄越之虞惟西北兩隅彌互百里路徑紛歧而兩水尤爲該逆必爭之地若無重兵圍紮則西竄岷洮北走和禮南繞徽成頭頭是道萬一乘間逸出更與回逆勾通則後患方長遂有不可復制之勢伏懇聖慈敕下護督臣恩麟轉飭甘肅臬司林之望督率張華等軍

務於兩水各路擇要扼紮與湘果英毅各軍協力同心務先斷其旁竄之路然後節節逼進奪據舊城山使該逆竟成檻獸釜魚坐困孤城之內卽克復稍稍稽時日要可悉數聚殲除飭蕭慶高等協力圍剿迅殄逆氛以靖疆圉外所有據報逆匪暗襲營壘追剿獲勝緣由理合附片陳明伏乞

聖鑒飭遵謹

奏

附甘省潰勇沿途滋事疏

再據安塞縣知縣吳延慶稟稱同治三年十二月二十日接據統帶禮字全軍參將王泰來移稱蒙前陝甘督臣熙麟札調招

募楚勇三千赴甘助剿行抵河南地界添收擒匪六七百名分爲副前副後兩營派田清平王青選韋同春張衍翰管帶於本月十六日行抵靖邊縣屬之沙嘴子地方該處並無人煙因令分紮各鄉次早督隊前進不期該勇等盡行折回將文書關防以及餉銀等物一概掠去或恐沿途滋事務請防範查拏等情該縣當卽豫爲備防嗣聞該逃勇聲稱因王泰來剋扣餉銀各懷怨望以故折回保安後經哨官王青選趕到勸諭情願隨赴大營者一半業已起程其餘不肯前往卽由保安向洛河川一帶折回等語又據宜君縣知縣柳坤厚稟稱十二月二十五六等日有王泰來所帶勇丁二百餘人百十成羣由中部折抵該

縣北境二十七日復向同官縣而去內有帶勇頭目二人係張
韋兩姓其經過之七里鎮腰坪鎮焦家坪鎮等處人戶較多民
團尙爲齊整該逃勇僅令民間供給飲食尙無騷擾情事惟東
村段家莊張家莊水担坪等處小村鋪戶居民銀錢衣物概被
搶掠一空已據呈報到縣等情具稟前來臣查此起勇丁入關
之初因未接准現署陝甘督臣都興阿咨會調募明文業飭暫
行截回俟行查明確再令前進嗣據潼關道協稟覆現奉督辦
慶陽糧臺副都統文煜札飭俟該參將王泰來帶勇到關卽令
逕赴都興阿大營聽候調遣並准於山東解到餉銀內截畱三
千兩給發王泰來具領據此情形其爲征調官兵無疑並稱該

軍實勇四營計二千名又親兵百名因卽准其按站前進並飭沿途州縣按日供應該軍口糧銀兩俾資接濟乃該參將前旣添收捻匪濫招備數繼又剋扣口糧領餉不發以致各勇心懷怨望竊取文書關防餉銀中途潰散該參將竟自帶隊前行並不設法安撫任聽沿途搶掠貽害地方殊屬不成事體萬一勾結竄匪又將增長兇鋒現查該潰勇行蹤係向東南回走臣已分飭各州縣調集團練一體嚴防如遇該潰勇到境妥爲彈壓儻敢聚眾橫行任意搶奪擾害卽行督團截捕就地正法以昭炯戒惟臣頃接都興阿咨稱王泰來一軍係前督臣熙麟札飭招募恐爲慶陽而設並非該署督所調早已飭令毋庸來甯等

情是王泰來所募勇丁尙無實在營分可歸其現在曾否行抵
慶陽亦未准文煜咨報將來作何安置急應豫爲籌酌免致全
數潰逃更貽陝省殘區之累至各勇所稱王泰來剋扣餉項因
而怨望潰散並竊取文書關防餉銀各情除由臣移咨署陝甘
督臣都興阿督辦慶陽糧臺副都統文煜確查嚴辦外應請
敕下都興阿文煜務將此起勇丁妥爲安置用鑒前車而弭後
患所有潰勇沿途滋事緣由理合附片陳明伏乞

聖鑒訓示飭遵謹

奏

官軍會攻階州大獲勝捷疏

同治四年正月三十日

奏爲官軍疊次會攻蔡逆踏破賊壘三座大獲勝捷恭摺仰祈
聖鑒事竊查階州踞匪屢經各營攻剿獲勝情形經臣疊次奏
報在案茲據湘果中軍記名提督漢中鎮總兵蕭慶高稟稱謀
知蔡逆有乘臘底春初欲由真武鐵堡各隘奔衝之說遂擬豫
撥勁旅分撲其壘爲先發制人之計迺函約川軍武字達字果
毅並湘果右軍英毅彝字各營於十二月二十六日分道進攻
逆壘使之應接不暇是日黎明齊抵逆濠先以中軍新副後三
營攻撲墩上賊壘而以左營防禦西門援賊親兵隊居中策應
賊見我師抵卡亦分兩路迎敵各營連環鎗礮轟擊當斃執旂
賊八名我軍趁勢前進逆眾仍憑卡死拒親兵百長鄧光升杜

榮慎等喝令各勇越濠猛撲短兵相接殲賊十餘名正欲搶上卡門突有東路河邊援賊大股蜂擁搶上山坡蕭慶高飛令蕭德見彭義益率兵由毛崙右澗迎戰毛福益由龍王廟左坡邀截左右夾擊斃賊三十餘名生擒二名時城中援賊入壘者已多噴筒火石紛紛拋擲我勇傷亡數十人總兵劉厚基道員蕭德綱以該逆增築新壘會同英毅彝字兩軍並甘軍張華各營分兵出隊逼近新壘而文昌宮逆匪二千餘眾出撲杜家溝英毅營盤劉厚基蕭德綱率隊由梨子山分道襲出縱橫馳突殺賊二十餘名逆退入巢此十二月二十六日攻勦獲勝之情形也訊據生擒髮逆供稱蔡逆自北山鐵堡以及東南各役懲創

之後每於夜間偷赴兩水窺探意圖奪路狂奔蕭慶高諭令各營嚴爲準備各造攔子門牌箠箕鋤鉤以爲攻壘塞濠之用正月初三日約會各營於初四日昧爽出隊同時並進蕭慶高以新副左後四營各派二哨分攻墩上及龍王廟逆壘該逆出隊六七百人於壘外迎敵左營百長孟學文親兵百長鄧光升杜榮慎等率隊直前各勇一齊擁上砍斃悍賊三十餘名生擒十名奪獲五色大旂四面逆潰入卡施打鎗石火藥傾盆而下煙塵迷漫總兵蕭德見蕭啟基揮軍奪入卡隘回合十餘次斃賊二十餘名各勇左撲右攻愈進愈猛已將濠溝填塞一層拔去梅花椿十餘重該逆拌命力拒相持不下是時嚴家灣逆壘已

經武字營周達武攻破蔡逆顧此失彼心益憤懣親率三千餘
眾由城東北分股援應毛福益彭義益蕭德見蕭啟基等引軍
從山左右迎擊蕭慶高飛令親兵隊由壘脊衝下前後鈔襲交
鋒數十回合陣斬衛隊悍逆四十餘名散逆數十名生擒七名
我軍搖旂吶喊聲震山谷各勇乘勝進薄城根該逆抵敵不住
紛紛奔下山坡落澗跌斃者不計其數奪獲旂幟軍械甚多訊
據擒賊供稱是日陣斃僞孔都統一名僞先鋒張梁周李等姓
四名摧傷精銳甚夥我軍亦陣亡遊擊擬保參將劉厚俊把總
擬保藍翎千總李鎮川二員勇丁三十三名劉厚基蕭德綱會
同英毅彝字並甘軍張華分攻前村文昌宮等處逆巢以英毅

各營扼堵前村之賊蕭德綱與張華列隊文昌宮旁以禦援應之賊彝字營黃鼎率隊進攻鐵堡山腳河岸賊壘劉厚基由河隄環攻彼此麾勇進逼濠邊用鎗礮連環施放斃賊數十名拔去花籬笆十餘層該逆憑壘死拒鎗礮懸擊我軍傷亡數名劉厚基坐騎亦被礮斃此正月初四日攻勦獲勝踏破逆壘之情形也初六日該逆因嚴家灣賊壘踏破率眾肩簍負板在城北半山增築新壘蕭慶高卽派新副兩營前往鵬勦周達武亦派隊伍同時搶上山梁夾擊斃賊數十名餘逆奔散爾時右軍各營馳逼西門該逆出隊迎敵各勇奮力前攻轉戰數斗合殲賊甚夥天晚收隊詎該逆夤夜拌死新築一巢掘濠布籬以阻我

軍進攻收隊之路初七日黎明各軍復率隊伍前進該逆已出隊千餘人分站山坡彭義益蕭德見督部疾趨用礮轟擊立斃先鋒賊十餘名各勇趁勢搶上逆隊漸卻適武字三營分兩路由山觜襲來彼此夾攻殲賊甚多逆遂潰竄我軍且追且殺墜崖落澗者無算維時墩上之賊經蕭啟基毛福益又親兵兩哨截住而新壘逆眾二百餘人方欲奔逃彭義益與武字三營乘勝合圍拋擲火蛋噴筒各勇奮力爬上賊梁登時踏破新壘將逆眾悉數殲除奪獲擡鎗八桿小鎗三十九桿大旂十二面黃色號衣二十五件牛耳礮六尊刀矛無算正擬乘勢拔取舊壘倏見該逆大股由北門擁上左坡吶喊而來武字三營迎頭堵

截該逆復由右溝小路紛紛衝上經毛福益與親兵右哨揮兵
掩擊斃賊數十名逆勢遂卻維時左營分哨與右軍中營同攻
龍王廟逆巢賊又分股千餘人從西門擁上左坡牽襲我師蕭
慶高飛飭蕭啟基與親兵左哨馳往助勦各勇戰氣百倍揮刃
衝擊殲斃執旂僞先鋒十餘名僞都統張李二名散逆三十餘
名逆乃大潰時聞校場壩聲不絕郭外塵氛蔽日知東路之
賊亦經周達武馬步各營擊敗該逆悉退入城劉厚基蕭德綱
與黃鼎同攻鐵堡河千賊壘蕭德見與英毅左營及其三哨攻
撲鐵灣逆巢英毅中前右副中四營直趨文昌宮而以後營列
隊李家山半坡爲該四營援應張華一軍站隊兼防對河蔡家

堡援賊各營負牌束草分道前進抽拔木椿正抵賊壘該逆施放鎗礮我軍與之對擊斃賊十餘名逆眾鼠伏不出各勇猛撲數次以壘上木石紛投未能得手是役各路殲賊五百餘名生擒二十餘名我勇亦有傷亡此初七日攻勦獲勝踏平賊壘之情形也是晚該逆因新壘被毀又於二更時潛由城北山腰添築一壘蕭慶高探知卽傳諭各營定於詰朝乘其壘基甫定一鼓盪平乃飭彭義益蕭德見各出八成隊伍從左手而進畱中左兩哨牽制龍王廟賊壘令蕭啟基揚隊墩上綴住舊巢令毛福益埋伏山右坡下以禦城內援賊一面知會右軍各營準備挑戰並飛派兩軍馬隊從木魚溝馳驟而進直逼西門均於四

更造飯黎明取齊蕭慶高自畱親兵兩哨居中策應並函約周
達武派隊協攻初九日卯刻各軍分督部卒前進賊見官軍勢
猛因將排列壘外勁賊二千餘眾分作三路包鈔蕭慶高於陣
上親援桴鼓督戰各勇奮不顧身搶進逆卡隙地擺成陣勢蕭
德見指揮本營分左右兩翼接仗而自帶一哨與彭義益所部
一營從中掩殺鎗礮齊施刀矛並舉噴筒火箭雷掣星飛殲斃
賊匪無算逆仍拌命相持左衝右突鏖戰數十回合該逆抵敵
不住且戰且卻適武字三營從左面襲來我軍左右兩翼乘勢
鈔出將逆眾圍困垓心約戰半時之久生擒多名逆大潰亂彭
義益蕭德見督同哨勇手持禦牌衝至濠邊穴內老賊憑牆放

礮矢石交加我軍冒險猛攻拔去鹿角柵數層彭義益揮旂一
招各勇飛縱上牆舉刀亂砍用火箭延燒賊柵該逆驚惶失措
武字營隨同掩入逆黨二百餘名半被焚殺半墮濠溝所築新
壘登時踏破蔡逆見壘外之賊已敗新壘復陷乃縱城內黃衣
衛隊七八百名從西北兩路鈔來而墩上之賊亦派股出巢援
應蕭慶高登高瞭見舉旂四繞蕭啟基率隊列陣用子母連珠
礮窺定賊穴併力環轟墩上股匪數次擁撲營壘均經立時擊
退不敢出援毛福益以伏兵從右殺出親兵兩哨由山梁壓下
彭義益麾眾前驅蕭德見與武字三營從後掩至四面夾攻殺
聲震地大戰兩時之久始將各路悍賊擊敗我軍跟蹤躡至

玉皇廟三官殿等處直薄城根蔡逆膽落急撤弔橋緊閉城門
餘黨不及入城者悉被追跌落澗拋棄軍械旂幟無數正欲攻
城忽見西面塵頭大起援賊蜂擁而來適右軍各營與兩路馬
隊早已逼近西門外卡迎刃交鋒彭緒慶策馬直衝各騎相隨
繼進該逆鎗礮如雨我軍毫無退怯左旋右轉戈刺鎗擊殲斃
紛紛彭緒慶手刃黃衣賊目二名逆始潰退其落後衝倒在地
者概被馬隊踐斃不可勝數比時北山各營士氣百倍愈戰愈
奮由東角戰至西門合軍一處截殺逆眾甚多殘甲敗鱗紛披
枕藉城上蔡逆懸礮遙擊城外餘賊悉遁入巢是役各營陣斬
四百餘名殪其僞都統僞巡捕各一人僞先鋒四名生擒十餘

名追襲墮崖落澗自相踐斃者不計其數奪獲大小旂幟三十
一面擡鎗六桿小鎗十五桿刀矛號衣甚多我軍傷亡亦復不
少此初九日攻勦獲勝踏破賊壘之情形也伏查蔡逆狡悍異
常盤踞階城分隘築壘務爲堅壁固拒之圖迨見我軍攻勦日
亟又於西北兩路設卡布防豫爲乘隙奔竄之計臣以甘省回
氛正熾實深句結之虞而陝南甫就肅清亦慮蹂躪爲患是以
督飭諸軍聯絡合圍力圖聚殲以靖三省邊防今經蕭慶高等
連番攻擊屢挫兇鋒誠恐該逆受創窮蹙之餘圖竄益急尤當
先事嚴防杜其偷越之路臣比復嚴飭諸軍晝夜嚴備並飛檄
甘肅臬司林之望懷遵前

旨迅率所部越階督率張華等會合湘果諸軍扼紫兩水各隘
節節逼勦以期迅殄醜類共保邊陲至陣亡之遊擊擬保參將
劉厚俊把總擬保藍翎千總李鎮川爭先陷陣力竭捐軀深堪
憫側相應請

旨飭部從優議卹又去臘二十一日夜賊襲鐵堡山之役英毅
營花翎參將李德高奮力抵禦身受重傷旋於二十四日亡故
合無仰懇

天恩俯准飭部照陣亡例賜卹以慰忠魂其餘各營傷亡弁勇
容俟查明照例辦理所有官軍疊次會攻蔡逆踏破賊壘大獲
勝捷緣由理合恭摺由驛具奏伏祈

皇太后

皇上聖鑒訓示謹

奏

附覆陳階州三路官兵必須擇人統率疏

再臣現奉正月二十三日

諭旨階州三路官兵必須擇人統率方免互相推諉之虞著劉
蓉咨商駱秉章於得力武職大員內斟酌一人奏聞請旨辦理
等因欽此伏查川省所派武字達字果毅三軍與臣所派湘果
中右英毅彝字四軍本屬川陝勁旅又益以甘省林之望張華
等軍兵力已屬厚集而記名提督漢中鎮總兵蕭慶高提督銜

建昌鎮總兵周達武均皆久歷戎行謀勇俱備使共竭其智力以滅此賊而有餘然而彼此夙相等夷不惟蕭慶高周達武有莫相統率之勢卽達字果毅等軍不能盡由周達武調度湘果右軍及英毅彝字等軍不能盡受蕭慶高節制蓋近日軍營積習旣已自領一軍卽各建鼓旂莫肯相下臨敵對陣不能指揮自如臣頃因英毅軍統將李百魁不甚得力已改派記名總兵劉厚基代領其眾並使歸蕭慶高節制又因甘肅肅州鎮總兵何勝必臥病廣元勢頗危篤其所統湘果右軍日形渙散亦飭令該軍將士悉聽蕭慶高調度亦冀事權歸一呼應較靈然而周達武等軍勢處東南蕭慶高等軍地居西北以賊情而論蔡

逆本係川人其黨亦皆川匪窺川省之完善富饒垂涎日久陝甘殘破均非其所屬意以形勢而論東南地勢險峻又自周達武各軍而外另有守隘之兵故其勢萬難竄越西北兩水柳壩各處地形散漫又自蕭慶高各軍而外別無駐防之卒則該逆不能逞志於蜀不得不仍趨秦隴者勢使然也現在大軍三路雲集該逆已成檻獸釜魚之形所慮諸軍各顧分防汎地莫肯統籌全局萬一該逆乘閒逸出亦莫肯越境窮追則三省邊防將終受此賊之累此臣之所晝夜私憂者也伏讀

上諭三路官兵必須擇人統率方免互相推諉之虞

聖慮周詳所謂明見萬里之外臣頃接四川提督胡中和函稱

現准四川督臣駱秉章咨令前赴階州察看軍情已於正月初六日由廣元起程計此時早已抵階查該提督官階較大諳悉戎機又與蕭慶高周達武共事日久情意孚洽如令督率進剿當能和輯諸軍統規全局查階州距川陝省城均在千里以外蕭慶高周達武等稟報軍情往返動淹旬月而賊情變幻旦夕異形進止既無所稟承事機每失於遙制如蒙

皇上天恩特派胡中和總統三路官兵以後階州勦辦情形卽請由該提督專摺奏報其或何路官兵不聽調度致貽誤戎機亦由該提督從嚴參辦庶幾事有責成算無失策旣無彼此推諉之患自絕逆蹤竄越之虞計不出二三兩月必能悉數聚殲

永絕後禍除咨商四川督臣駱秉章籌酌外所有遵
旨斟酌擇人統率緣由理合附片陳奏伏祈

聖鑒訓示飭遵謹

奏

附各軍前勦蔡啟兩逆出力員弁另案請獎疏

再查上年五、六、七等月勦辦蓋屋蔡啟兩逆之役

臣部湘果中

右英毅親兵彝字五軍並穆圖善曹克忠所將各營員弁兵勇
隨時擊勦冒暑鏖戰通計前後斬馘收降至二三萬之多其後
該逆力不能支於七月十二夜乘雨翻山竄遁老林又經
臣派所部五軍及曹克忠部下七營入山躡勦由漢郡略陽追出陝

境奔馳千里計所擒斬收降之眾又六七千人維時臣方責令各將士俘斬首逆盡殲醜類曾經奏請俟事竣彙案奏保請旨獎勵意在激揚士氣俾各努力窮追迅速蕝事嗣值穆圖善一軍遵

旨赴甘鞫辦回逆欽奉

恩諭此次追剿蔡啟各逆勞績准其查明請獎等因旋准穆圖善咨送保獎出力員弁清摺該營將士業已渥荷

恩施由是臣部及曹克忠一軍將弁兵勇舉不免怏怏缺望之意又值階州天氣酷寒米糧奇貴各營欠餉均逾八月之久各將士枕戈于役負盾前驅而衣襖單殘饘粥不給不免乘閒潛

逃甚至有爲賊營誘去者幸賴四川督臣駱秉章查悉陝省庫儲窮窘情形不時接濟湘果彝字等軍月餉卽英毅一軍亦經委解一月口糧所以士氣稍充軍心粗定不時出隊接戰尙覺銳氣未衰然念自上年五月以來冒暑耐寒忍飢苦戰幾近一年之久而保獎尙遙遙無期不免私意較量頗懷希恩望澤之思合無籲懇

皇上天恩俯念該將士弁勇係屬與穆圖善所部一體出力之人現又同在甘省勦賊勞辛相等

恩准臣部與曹克忠一軍自五月至八月以前追勦蔡逆出境勞績特作一案保獎俾免向隅之歎將來克復階城殲除全股

所有在事出力員弁仍許另作一案辦理在

朝廷功疑惟重不過獎以虛銜而將卒感戴彌深遂可收其死力儻蒙

特恩允准實荷

高厚鴻慈臣愚魯之見冒昧瀆陳是否有當伏乞

聖鑒謹

奏

劉中丞奏議卷七終

劉中丞奏議卷八目錄

官軍跟剿竄回獲勝疏

附畱侍衛訥依楞阿馬隊調遣疏

附畱毛震壽仍辦川省捐輸疏

謝 賞賜福字疏

選補省城額兵變通章程以實營伍疏

遵查知州都司被參緣由據實覆奏疏

參帶勇官縱勇搜掠財物疏

甄別府廳州縣據實舉劾疏

附延榆綏道員缺請補疏

附陳陝省無力協濟餉軍疏

官軍進剿階州踏破兩水鐵堡賊壘疏

附請飭訥侍衛馬隊前赴甯夏助剿疏

附報解協甘餉銀軍火數目疏

請蠲緩被災州縣舊欠錢糧疏

附完解工程銀兩疏

請酌發卽用知縣來陝差委疏

明白迴奏懇賜查辦疏

附陳蔡壽祺挾嫌構陷疏

劉中丞奏議卷八

湘鄉劉 蓉著

官軍跟剿竄回獲勝疏

同治四年正月三十日

奏爲官軍跟剿竄回獲勝擒斬甚多餘逆狂奔甘境現復分軍堵剿以杜另股回竄情形恭摺由驛馳

奏仰祈

聖鑒事竊臣前將逆回分股回竄派兵截擊疊有斬獲各情繕摺附片奏陳在案嗣據親兵營記名提督彭基品西安府知府呂儁孫等稟稱探得該逆竄往醴泉後盤踞距該縣二十里之趙村一帶維時風雪交加漫滅途徑該員等分督隊伍於正月

十六日黎明由咸陽冒雪前進酉刻始抵醴泉卽派健卒潛探趙村情形記明泔河以北大小坡兩道進兵路徑猶慮該逆之聞風而遁也思再乘其不備一舉就殲於是彭基品飭令中營幫辦都司姚爾位中營總兵銜儘先副將羅洪德前營照磨唐楚翹會同撫標中軍參將彭體道義字營副將段登雲茂字營游擊劉雲山各率所部於十六夜子刻涉泔河而北彭體道段登雲由大坡前進羅洪德唐楚翹由小坡而進劉雲山爲兩路策應十七日寅刻彭體道頭隊先抵趙村雪影中遙見該村五門掩閉寂無動靜彭體道選派敢死弁兵三十餘名親自督率躍登堡牆隨將東門打開守備程啟富等率領兵丁一齊衝進

撞遇頭戴白帽老回驚呼有兵彭體道擊而殺之逆眾猝不及防紛紛狂竄彭體道率兵搜殺殲斃二百餘名維時段登雲羅洪德姚爾位唐楚翹等均經趕到將該村圍裏賊有從堡牆缺處躍下者均經殲斃約百數十人逆眾惶窘無計遂縱放騾馬從東北門騰出以誘我軍隨糾其死黨馬隊四五百騎捨命衝突步隊隨之我軍分隊緊追羅洪德唐楚翹擒其右彭體道段登雲角其左鎗礮隨施刀矛相接正在進逼緊急之際忽見趙村之西北小堡內突出一股來鈔彭體道隊伍前竄之賊亦復回旂包繞致將彭體道圍困垓心羅洪德唐楚翹等憤率所部直前救應副將朱之南參將艾傳四游擊譚孝友等十餘人奮

勇突入重圍登時陣亡羅洪德等仍復督隊繼進千總錢萬選武舉馬殿元等均各手刃數賊大呼突陣彭體道亦從圍中大呼衝出賊勢披靡復整隊向中前兩營猛撲唐楚翹見賊勢洶湧復慮馬步不敵會商姚爾位等變一字陣爲方陣各率親兵居中接應堅壁抵禦不稍顧卻血戰兩時賊眾衝突數次我軍陣腳不移而鎗礮環施傷斃悍賊實已不少始行卻退唐楚翹姚爾位等督飭各勇分頭刺殺彭體道等亦各奮追助勦賊隊大亂殲斃悍回三百餘名生擒七名訊係入陝上墳探路引頸受戮當於陣前正法是役鏖戰四時之久殺斃悍賊共計六百餘名奪獲騾馬五百餘匹旗幟器械無算救出難民七八百名

餘逆遁入山口晝夜狂奔由瀋化縣境返竄甘界臣正在飛咨
 甘省派兵兜擊以圖聚殲忽接邠長探報長武縣屬之亭口鎮
 白吉原地方現有甯州竄匪滋擾當卽飛調副將雷恆迅率馬
 步三營馳赴長武迎頭堵剿復咨固原提臣雷正綰派撥勁旅
 繞前截擊頃接邠州先後稟報十九日經雷正綰營務處記名
 提督周顯承靖安營總兵劉劾忠兩軍由蕭鎮正平太常追至
 白吉原賊從亭口逃竄復經降補游擊余萬明所帶義字三營
 迎剿殺賊多名該逆南竄靈臺之邵寨等處又經各營跟蹤追
 剿詎該逆復由南原繞竄安化地方渡河仍赴白吉原焚掠逆
 蹤出沒無常似欲盤踞白吉原以圖復肆鴟張等情隨又飛飭

雷恆余萬明等馳往長武迎截並飭段登雲劉雲山赴三水之
土橋扼堵又飭彭基品督同何仕科等由乾州進趨邠州會剿
以杜該逆合併之謀咨准雷正綰咨稱親督六營回駐涇州分
撥各營駐紮北原黨原花所郿現等鎮以遏後股竄匪而顧邠
長門戶該提督西剿東防實屬力籌大局刻下陝邊有此防兵
諒後路逆匪不敢再萌窺伺其白吉原股匪亦不難聚而殲旃
除嚴檄各營認真剿辦外查此次逆回專以騎隊回竄意在乘
虛狂逞幸賴各將士於雪積冰凝之時日夕馳追乘夜掩襲使
該逆不得肆其狡謀剿辦尙爲迅速合無籲懇
天恩立予獎勵以昭激勸所有尤爲出力之總兵銜儘先副將

羅洪德可否以總兵儘先補用副將段登雲可否

賞加總兵銜參將彭體道可否以副將畱於陝西儘先補用都司姚爾位可否以游擊儘先補用四川松潘廳照磨唐楚翹可否以縣丞儘先補用並請

賞戴藍翎之處出自

高厚鴻慈至陣亡之副將朱之南參將艾傳四游擊譚孝友擬保都司花翎守備高松林藍翎守備梁清泰羅培元郭連升孫仲祥千總龍正大把總李春發外委鄭玉山均係衝鋒冒刃奮勇捐軀深堪憫惻合無仰懇

天恩飭部從優議卹以慰忠魂其餘在事出力員弁容臣查明

擇尤酌保以示鼓勵所有官軍跟剿竄匪獲勝擒斬甚多餘賊
狂奔甘境現復分軍堵剿以杜另股回竄緣由理合恭摺馳奏
伏乞

皇太后

皇上聖鑒訓示飭遵謹

奏

附畱侍衛訥依楞阿馬隊調遣疏

再臣頃接固原提臣雷正綰咨開上年十二月二十八九等日
我軍在隆德所屬之三合鎮地方與賊接仗擒獲回逆供稱首
逆孫義保傳令陝省回眾將家眷婦女概行殺盡探聽官兵何

路空虛卽乘馬由何路竄出等語又接河州鎮總兵曹克忠函稱近來回逆得此四路分竄之法非馬隊萬難追剿該軍現已深入若復拔隊東行逆匪必乘其後實屬無可柰何等語查孫義保本係陝回其蓄謀回陝固屬逆情所必至近值甘肅連年被擾播種失時凡可以擄掠之處計亦蹂躪殆徧糧乏食缺其不能不急謀回陝又勢使之然也從前雷正綰陶茂林曹克忠各軍分道揚鑣櫛次鱗比旣已堵其回竄之路是以陝境粗安今陶茂林旣赴蘭州曹克忠亦率全部踵進固原一路僅存雷正綰一軍勢難兼顧則旣予以可乘之隙而固原攻剿旣急乃謀分股回竄絕我糧道抑又出於攻其所必救之狡謀今雷正

綰西勦東防既已疲於奔命而曹克忠陶茂林各營之糧餉軍火已因道路通塞不常無從解運前進似亦處於必須返顧之勢故凡勦賊之道要在節節掃盪謀出萬全而貪一時之利恃銳猛進未有不盡棄前功卒至於跋前疐後而後已者據供孫義保現謀盡殺家小乘馬紛竄如果出此很毒之謀使逆黨無所顧慮則賊馬萬騎紛至沓來陝省邊陲大有防不勝防之慮現雖欽奉

諭旨飭將陶茂林所募王守基馬隊一起截畱備用而爲數究屬無多查有三等侍衛候補佐領訥依楞阿由揚州帶領馬隊一起遵

旨前赴署督臣都興阿軍營現由省城經過伏乞

皇上天恩准將該侍衛馬隊暫畱陝省調遣以備緩急俟一兩
月後逆蹤稍定再令前赴甯夏實於防勦事宜大有裨益臣爲
陝省邊防緊急起見是否有當伏祈

聖鑒飭遵謹

奏

附畱毛震壽仍辦川省捐輸疏

再正月二十一日接准吏部知照同治三年十二月二十五日
奉

上諭林鴻年奏調員差委一摺林鴻年請調蔡步鍾毛震壽二

員著交該撫帶赴雲南差委等因欽此伏查已革陝西布政使

毛震壽前經

臣

於同治三年十一月十二日

奏委就近在川勸捐接濟援甘軍餉奉

旨允准在案茲欽奉前因自應遵飭該員赴滇差委惟刻下甘省軍需浩大秦中協餉維艱而毛震壽甫經奉委現在設局勸辦之際該員宦蜀日久夙爲該省紳民所愛戴正可藉竭悃忱稍濟涸轍舍此實無可替換之人未便改令赴滇致失駕輕就熟之道且毛震壽於滇南情形究不熟悉如果林鴻年差委乏人自應另揀妥員隨帶前往庶幾臂助各得其人相應請旨俯准已革陝西布政使毛震壽仍畱四川辦理捐輸事宜以

資得力除已由臣咨明雲南撫臣林鴻年外理合附片陳明伏
祈

聖鑒飭遵謹

奏

謝 賞賜福字疏

同治四年正月三十日

奏為恭謝

天恩仰祈

聖鑒事同治四年正月初十日臣標差弁齋摺回省捧到

恩賞福字一方當卽跪迎至署恭設香案望

闕叩頭祇領欽惟我

皇上鼎祚延釐

乾符闡瑞

兩宮慈祐垂美蔭於春臺

三殿祥暉慶同文於夏甸仰

鸞箋之絢采

義畫開天

秉龍德以當陽箕疇

播福伏念臣任兼牧禦報靡涓埃際旋斗之移躔荷

錦綸之錫羨

雲霄捧出合轅童壤叟以偕歡

奎壁懸餘映嶽色河聲而並耀從此

珠囊吉靄燦爛三秦還欣

玉燭休光宣昭九服臚懽曷極戴

德難名臣惟有奉

國威靈與民休息履萊北臺南之地長歌周雅以摭誠瞻

星輝雲縵之華願對

虞廷而獻頌所有微臣感激榮幸下忱謹繕摺叩謝

天恩伏乞

皇上聖鑒謹

奏

選補省城額兵變通章程以實營伍疏

同治四年正月三十日

奏爲省垣重地額兵久缺現擬變通章程籌畫糧餉補選兵丁以實營伍而備緩急恭摺仰祈

聖鑒事竊查前署撫臣按察使張集馨以撫標額設外委馬步守兵二千二百七十二名除調外征防缺額未補以及陣亡兵家子弟看庫傳號營書匠藝各項差使外僅挑出馬步守兵三百名殊形單薄當經招足千名於裁撤虎威營月餉內每月酌提二千五百兩津貼該兵每日每名餉銀八分酌給白麪斤許千把外委一體照給以免枵腹於同治二年九月間奏奉諭旨著照所議辦理欽此欽遵在案彼時前西安將軍多隆阿

所統大兵全數在陝軍威甚壯以省標所練新兵千名彈壓地方查拏游勇尚可敷衍差遣現在所有客兵除撤回鄂省之外掃境援甘無復壁壘而盤踞階州之蔡逆屬聚固原甯靈之叛回竄擾河汝之髮捻各匪處處逼近陝疆東防西堵動成掣肘之形以目下兵力而論東路興商一帶橫亙數百里僅止隴軍鎮西雄毅七營西路邠隴鳳寶一帶要隘林立亦僅親兵五營勉強防堵均有應接不暇之勢今省城撫標僅此千兵而城守協之原設馬步守兵九百八十六名亦多缺額祇因餉項支絀尙未募補設或稍有警報實屬無可分撥雖庫款拮据萬分一時未能補足原額亦應酌量選募操練成軍以實營伍而資調

遣當經責令撫標中軍參將彭體道增募新兵五百名城守協副將林春挑選新兵五百名逐日操演以期悉成勁旅惟添兵必先籌餉現值司庫如洗尤宜力求撙節因與司道再四熟籌擬將此項續選新兵糧餉量爲酌減每名每日給餉銀六分白麩一斤如將來派出征勦仍當酌增口糧以資飽騰至所需帳棚旂幟器械由糧臺籌款製備給領以備隨時操演之用查撫標城守共有五營額設馬步守兵三千二百五十八名每年額餉七萬有奇應發倉麥二萬五百三十餘石今前署撫臣張集馨所挑新兵千名每名每日給餉銀八分白麩一斤八兩此次臣選募新兵千名每名每日給餉銀六分白麩一斤統計每年

共需餉銀五萬四百兩白麪九十萬斤合倉麥六千石遇有閏月以及大小建仍分別加增扣除以歸核實其前定發給二成原額餉乾等銀自同治四年正月爲始概行停止所有征防官兵家屬應支餉乾糧料仍照前定章程發給二成餉銀五成馬乾糧料以示體恤至督操各員亦應酌量籌給薪水茲議副將參將每月各給銀四十兩游擊每月給銀三十兩都司每月給銀十六兩各該營員弁每日每名給白麪一斤八兩其俸廉公費暫緩支領所有折色馬乾本色料豆均案五成給發俟庫款稍裕糧價平減再行察看情形仍復舊制照例關支似此變通章程庶期餉不虛糜兵歸實用據軍需局司道會詳前來

臣覆

核無異除飭令各營認真操練務須一律精壯嫻熟技藝以期
臨敵敢戰緩急足恃所有省城額兵久缺現擬變通章程籌畫
糧餉補選兵丁以實營伍緣由理合恭摺具

奏伏乞

皇太后

皇上聖鑒訓示謹

奏

遵查知州都司被參緣由據實覆奏疏

同治四年二月十日

奏爲遵查知州都司被參革職緣由均屬無辜謹據實具奏請
旨開復原官陝補用仰祈

聖鑒事竊臣於上年七月接准荊州將軍穆圖善咨准議政王軍機大臣字寄同治三年七月初一日奉
上諭熙麟特參玩誤軍火餉項之知州暨廢弛營伍之都司請旨革職一摺本日已降旨將沈際清等革職示懲矣甘肅軍務正當喫緊各省協濟軍火餉項沿途地方官自應妥爲照料發給牲口駝腳以利遄行乃陝西署鄜州知州沈際清於山西陝西委員運解軍火餉項行抵鄜州驛站該署州竟敢置若罔聞遲延貽誤並於過往商賈牲口每頭征收制錢八十文仍令百姓照舊供支駝腳以致百姓抗不遵辦貽誤軍需已屬任意妄爲並據該督奏稱沈際清原係題補定遠同知撤省另補之員

今春黃緣得署此缺更屬巧於趨避該員現已革職卽著文煜
檄委現在慶陽定邊營中辦理文案之員馳往暫行代理並著
劉蓉迅速派員前赴該州接署並將該革員於征收商賈牲口
駝腳錢文之外仍令百姓照舊供支並如何黃緣署缺之處有
無實據確切查明據實具奏等因欽此當卽欽遵遴員前往接
署並行司查辦去後茲據藩司林壽圖署臬司官銘轉據督糧
道劉齊銜督飭委員委用知縣林元薌按照原參情節逐一查
明稟由該司道覆查沈際清暨都司景福前後辦理情形均無
不合具詳請

奏開復原官畱陝補用前來臣隨覆加查核緣鄜州地處北山

土瘠民貧向鮮騾馬前惟延安綏德榆林三府州屬差事經過其境尙能敷衍近因甘肅甯夏回匪蠢動凡大營之招募兵勇提解軍火器械及各省協撥糧臺餉銀俱從該州行走以最苦山僻之區供絡繹不絕之差其不能隨到隨行蓋亦勢偏處此在軍務喫緊曷敢稍存膜視置若罔聞而地方凋敝動多掣肘似亦未便操之過急惟有斟酌緩急次第籌辦總求無誤大營之用斯爲善策據查同治三年六月初一日有山西委員張正忠管解火藥火箭鉛丸行抵鄜州屬之張村驛又潼關採購竹竿亦於是月初十日委員解到值沈際清先期赴鄉清查保甲並勸捐雷正綰軍營糧石遂就近飭令辦差丁役催雇牲口夫

腳詎自初二起至初八日大雨時行州城暨張村驛並王家角與甘肅合水之太白鎮一帶河道水漲洶湧節節阻滯非但夫馬不能飛渡且值農忙無從雇覓兼接前途傳知吉林黑龍江馬隊不日到州又須照料彈壓當將軍火暫存該驛義學迨至十三日河水稍退先行轉運火藥一百餘簍十四日河東委員陳鑄又解到餉銀五萬兩張村一驛本在鄉曲之間無庫可寄因一併安置義學房內會同都司景福選派兵役小心看守不料十五六等日又復大雨而吉林黑龍江馬隊已於十八日到州沈際清卽繞道趕回因倉卒覓驛不出祇得先其所急將已備之夫騾支應俾利遄行而免逗遛維時陰雨連朝因恐火藥

受潮正在搬至院中曬晾適前督臣熙麟行抵該驛借住義學
瞥見並詢知尙有餉銀寄放義學之內熙麟平日辦公認真性
急不稍寬假目覩之下忿激於心未暇詳察原委卽以沈際清
玩誤軍火餉項並都司景福不派兵丁看守均參革職此沈際
清等被參之實在情形也其所參沈際清於軍火餉項並不發
給牲口未經起解一節現據委員確查六月初二四六七八至
十五六等日大雨河漲騾馬難渡致稍稽遲並非該革員不給
牲口臣查熙麟原摺內亦有晴雨相間及天雨河水暴長丈餘
之語是軍火餉項遲延未解由於雨水阻隔似尙可信又所參
遲誤半月有餘一節據查火藥於六月初一日到驛計至十八

日雖在半月以上委因移緩就急先將騾馬支應兵差遲延尙屬有因其餉銀則係十四日始到一至天晴卽備夫騾同大宗火藥竹竿等項陸續趕運完竣毫無貽誤又所參沈際清不治輿情百姓呼曰審不清一節據查該州街談巷議僉稱沈際清到任以來聽斷公允一切詞訟隨到隨結輿情悅服並不聞有此名目或係出自訛傳亦未可定又所參都司景福於軍火餉鞘棄置汛內並不派兵看守廢弛軍務一節據查該已革都司當軍火等項到驛之日立派外委徐登雲帶兵六名馳往看守祇因營餉久缺各兵窮苦日久衣履殘破熙麟見而生嗔悉予逐出現有名單可據至所參沈際清征收商賈牲口駝腳錢文

之外仍令百姓照舊供支一節據查沈際清係遵署督臣都興
阿札飭擬於張村驛王家角兩處設立轉運公局在於過往客
商每騾抽錢八十文每驢收錢四十文由局收存以作雇騾備
支軍需小差之費大差照舊仍由里民供支原爲體卹民艱起
見後因紳民意見各執迄未辦成並無運錢解署之事又所參
沈際清實緣得署此缺更屬巧於趨避一節臣檢齊案卷查得
沈際清係浙江舉人由臚錄議敘知縣捐輸軍餉銀兩加捐同
知分發陝西辦理釐捐出力保奏不論班次遇缺卽補旋補定
遠廳同知因人地不宜撤省另補於同治三年二月委署鄜州
該革員入甚誠實臣屢次接見聽其言詞察其舉動大抵德優

於才不失書生本色尙無鑽營取巧習氣既准另補即可委署
且鄜州向非美缺無所用其黃緣以上各情委查並無實據臣
與司道又復明察暗訪亦皆相符應卽擬結查例載被參訊問
之員究係無辜卽以開復定擬不得稱已革職無庸議題覆等
語今已革同知沈際清轉運軍火餉項既無玩誤情弊而其移
緩就急實亦權變互用辦理尙覺得宜已革都司景福於軍火
餉鞘運解至汛卽時派弁帶兵看守似亦不得謂之廢弛相應
照例聲明可否仰懇
天恩俯准將已革同知沈際清都司景福均開復原官仍畱陝
省以原班補用之處恭候

諭旨遵行所有確切查明參革知州都司均屬無辜緣由理合
恭摺據實覆

奏伏乞

皇太后

皇上聖鑒訓示謹

奏

參帶勇官縱勇搜掠財物疏

同治四年二月十二日

奏爲特參縱勇搜掠商民財物並捉人勒贖之帶勇參將請
旨革職查辦恭摺仰祈

聖鑒事竊據岐山縣知縣黃兆熊稟報同治三年十二月初九

日有新右營參將周思勝奉甘肅提督陶茂林派赴湖北襄樊募勇五百名行抵該縣住宿西關隨卽應付車八兩馬五匹麩一千二百斤錢二十四千文乃該勇等搜搶西關鋪戶居民二十餘家錢貨衣物並將鋪戶人等強捉勒贖周思勝任勇妄爲毫無約束等情當經批飭軍需局查明詳辦去後茲據該局司道轉據該縣將搜去財物共估銀一百二兩九錢零詳請

奏參前來臣查陝省自遭兵燹凋敝不堪子遺之民僅存殘喘該參將周思勝自楚募勇行抵岐山於該縣照章應付之外縱令勇丁搜掠商民財物強捉民人勒贖估銀一百餘兩之多實屬毫無紀律有干軍令若不從嚴參辦何以肅軍政而儆效尤

相應請

旨將候補參將周思勝卽行革職交署督臣都興阿甘肅提臣陶茂林勒令將滋擾勇丁全數交出從嚴查辦除將估計被搶銀兩在於該勇月餉內照數扣還以便飭知被擾商民給領外所有帶勇營員縱容掠掠商民財物並捉人勒贖緣由理合恭摺奏參伏乞

皇太后

皇上聖鑒訓示飭遵謹

奏

甄別府廳州縣據實舉劾疏

同治四年二月十八日

奏爲甄別府廳州縣人員賢否據實舉劾請

旨分別黜陟以昭勸懲而肅吏治恭摺附奏仰祈

聖鑒事竊維行政首在得人安民必先察吏吏治之得失則生
民之休戚風俗之升降係焉故得其人則萬事理而兆民以和
不得其人則百度廢而民將無所措其手足然而人之品彙不
同若上智與下愚究所希覲大都中材之士居多舉其賢者去
其不肖者以示之準則中材固將視風氣爲轉移而吏治亦漸
有蒸蒸日上之勢故期廉頑而立懦要在激濁以揚清陝省吏
治窳壞日久臣於上年參劾庸劣不職之道府州縣等官凡十
餘員亦旣稍知警惕比與藩司林壽圖悉心訪察考其心迹證

諸輿論現任府廳州縣及候補正雜各員材質猥陋成於性與習之不可移易者又復十餘人既灼知其不堪化誨未便稍事姑容而各州縣中頗有實心任事循聲卓著者數員亦未敢聽其浮沈下位壅於上聞謹就見聞所及出具切實考語分別請旨特賜黜陟以昭懲勸伏查現任榆林府知府劉廷鑑貪利營私行多詭詐在任抽收釐稅徵多報少且有借端科罰民財入私肥己等事捐升補用知府花培貪鄙狡險前署韓城縣知縣任內侵蝕捐輸雜項銀一萬五千餘兩挪用倉糧二千七百餘石該二員應請先行革職聽候查辦漢陰廳通判松齡心地昏庸嗜好深重商州州同曾承忠居心殘酷貪得無厭略陽縣知

縣現署蒲城縣事李模性情浮僞專事鑽營清澗縣知縣喬晉
福操守不潔物議沸騰分缺間用儘先補用知縣江震氣質乖
張不堪造就該五員均請卽行革職膚施縣知縣涂殿颺委靡
不振諸事廢弛城固縣知縣程道源心地糊塗不知吏事候補
理事同知前署米脂縣知縣巴哈布才識猥鄙難膺民社該三
員應請勒令休致候補同知署綏德州知州徐鳳藻聲名平常
輿情不附請以通判降補歸部銓選邵陽縣知縣懋德心氣粗
浮不諳吏治瀆化縣知縣陳榮性情躁競幕氣甚深試用知縣
李紹曾神昏氣浮識見鄙俗該三員均請以府經歷縣丞降補
歸部銓選長武縣典史謝人瑞行止卑污署沔縣典史候補巡

檢李郁垣性貪才劣該二員均請卽行革職以示懲創至若補用知府甯陝廳同知龔衡齡居官廉正宅心仁厚旣歷數任皆有遺愛在民應請

賞加道銜又同知銜富平縣知縣孫毓林果毅廉明到任後抑強扶弱兇頑斂迹案無畱牘獄無羈囚知州銜府谷縣知縣郎鶴鳴廉靜端謹不慕聲華而四境整肅百廢贍舉該二員均屬有守有爲之才請以同知直隸州儘先補用署藍田縣知縣事題補三原縣知縣濮斗衡學知務本志在澤民當兵燹殘破之餘猶孜孜以化民成俗爲務應請

賞加同知銜又升用同知直隸州署安康縣知縣孔華準勤慎

明敏吏不能欺署任未及數月民情悅服應請

賞加運同銜此外或性情樸厚悃幅無華或才具開展力期振
作者尙有數員俟廉得其居官行事實蹟再行

奏請獎勵臣爲整飭吏治鼓舞人才起見不敢以刻覈博風厲
之名亦不敢以姑息沽寬厚之譽是否有當伏祈

皇太后

皇上聖鑒訓示施行謹

奏

附延榆綏道員缺請補疏

再延榆綏道常瀚遵

旨赴都興阿軍營差委行抵波羅營病勢沉重折回榆林旋於正月二十六日出缺據榆林縣申由藩司林壽圖詳報前來所遺延榆綏道員缺統轄府州各縣俱係山區瘠苦之地駐紮榆林府密邇邊牆旁臨河套向爲衝繁難要缺自甘省回氛猖獗犬牙接錯豕突頻驚必須人地相宜之員方於邊防有裨我皇上御極以來於軍需省分監司大員尤加遴選故東南巨竅得以次第削平而各省吏治日有起色今以陝西殘破之區又值回務喫緊之日若不爲缺擇人誠恐難期得力以臣所知候補道前陝安道張由庚廉勤強幹諳悉軍旅道員用西安府知府呂儁孫明敏精細熟悉邊情臣雖忝任疆圻不敢違例瀆請

亦不敢竟安緘默除照例恭疏具

題請

旨簡放外所有道缺緊要情形理合附片陳明伏乞

聖鑒謹

奏

附陳陝省無力協濟鮑軍疏

再臣頃奉同治三年十二月十五日

上諭新疆地處沙漠餉無所出從前用兵皆由各省轉運接濟此次鮑超所帶兵勇月餉計需十餘萬須合各省之力協濟俾免缺乏著官文曾國藩都興阿駱秉章毛鴻賓李鴻章吳昌壽

惲世臨劉蓉閻敬銘沈桂芬郭嵩燾恩麟體察情形每月可撥若干均各酌定數目奏明辦理等因欽此當經轉飭藩司林壽圖等欽遵妥籌詳奏去後茲據該司道等詳稱陝省自軍興以來繁盛地方遍遭蹂躪舊糧既皆蠲免新賦又無起色庫藏空虛餉源久竭現在協濟接甘之四十餘營糧餉軍火已屬力盡筋疲且各軍營派員增募楚豫等省勇丁往來過境絡繹不絕沿途州縣供應口糧極形掣肘加以逆回窺伺邠隴派兵防堵尤應籌畫糧餉苦於無計按羅所有鮑超所部兵勇餉銀委實無款可撥難以酌定數目應請俟各省協陝軍餉撥解有項再行籌議以紓陝力而免貽誤等情具詳請奏前來臣覆查陝省

涸敝之餘土曠人稀賦稅無出刻下協濟援甘諸軍餉項軍火已屬勉強支持萬分竭蹶前蒙

恩准直隸山東各月解一萬兩山西月解三萬兩以濟陝餉乃自上年五月起僅據各該省各解過一萬兩山西則准撫臣沈桂芬奏稱此後斷難協濟嗣經戶部議奏直隸山東按照臣奏月解一萬兩山西則仍月解六千兩迄今並未報解分釐以致陝軍欠餉愈積愈多甘軍協餉亦往往不能及時湊解各軍弁勇枵腹荷戈久已時深飢潰之虞至於陝省旂綠各營兵餉積欠纍纍有延至九季十季未發者每思補足兵額整頓營規終以餉源枯竭無從下手窘乏情狀不問可知該司道所稱餉超

一軍餉項無款可撥自屬實在情形合無籲懇

天恩俯念陝省瘡痍之餘甫離水火暫免協濟餉軍俾得稍紓
喘息實荷

高厚矜全之德所有鮑超軍餉陝省無力協濟緣由理合據實
附片陳明伏祈

聖鑒訓示謹

奏

官軍進剿階州踏破兩水鐵堡賊壘疏

同治四年二月十八日

奏爲官軍進剿階州逆匪疊獲勝捷踏平兩水鐵堡山等處賊
壘並將竄出股匪追剿殆盡現籌逼圍階城計圖聚殲恭摺奏

祈

聖鑒事竊臣前將去臘今正疊勦蔡逆踏壘獲勝情形奏報在案時慮該逆受創窮蹙圖竄愈急當經飛飭諸軍晝夜嚴備並檄林之望率部赴階督同張華會同湘果等軍扼紮兩水各隘攻破逆巢節節逼進以杜偷越而圖聚殲去後嗣據蕭慶高等稟稱正月初九日攻破逆壘之後因查墩上賊壘係由城中運送薪水米糧計惟撥軍進紮所破新壘之中絕其外援則該逆食盡計窮可期坐困於是會同周達武知會各軍出隊分道牽制周達武移紮兩營於墩下山脊蕭慶高派彭義益毛福益兩營分紮墩之左右而派蕭德見移營元王隴下以逼之布置既

定初十日蕭慶高率部會同英毅彝字及張華各營於黎子山
脚逆壘開挖隧道用地雷轟陷外卡該逆拌死抵禦互有傷亡
蔡逆親率衛隊千餘人夤夜赴援補造木城黃鼎思欲乘其修
補未竣而急攻之於五鼓出隊直趨壘下都司童南山千總李
秉忠首先上牆破其木城童南山受槍墜地李秉忠受傷陣亡
未能得手十一日張華引兵出隊該逆督兩水各壘之賊擁前
迎敵經蕭德綱劉厚基率部分兩翼策應彝字英毅兩軍四面
包鈔該逆左衝右突我軍鎗礮環轟斃賊甚多生擒黃衣賊六
名奪獲旂幟刀矛尤多逆遂紛紛敗入壘中猱伏不動是夜三
更探報該逆於北山半坡添築一壘圖援墩上老巢蕭慶高復

留約各營於十二日昧爽整旅前進詎該逆預料我軍往攻竟督城內大股列隊相伺而以悍黨數百人蹲伏壘上蕭慶高卽飭毛福益與親兵左哨牽綴龍王廟逆巢彭義益蕭德見與武字各營進攻新壘而以蕭啟基攻擊西門援賊該逆擁眾冒刃來迎蕭啟基率百長蕭聚林孟學文麾軍猛進矛刺鎗轟立斃黃衣賊八名散賊三十餘名該逆且戰且卻各勇趁勢趕殺武字各營踵至愈追愈厲殲賊甚夥直至城邊啟逆於城採用大礮轟擊我軍勢不得近維時彭義益蕭德見與武字各營攻撲新壘業將梅花椿拔盡一面拋擲火彈噴筒一面挖掘壘址該逆拌死抵抗礮石紛飛各勇所執攜牌均被擊裂總兵張怡輝

都司鍾九思不避鋒刃嚴督精銳勇丁首先爬牆中礮陣亡該逆悍股由西門右溝蟻聚來援適湘果右軍各營與兩軍馬隊由木魚溝分路迎擊鏖戰數十回合殪賊數十名蕭慶高復飭毛福益由龍王廟左邊鈔出而自率親兵隊由右手包下逆始奔潰因思墩上逆壘已被我軍截斷料難固守隨復派隊晝夜環攻並掘濠圍困以絕去路十三日黎明右軍營務李遂勝整隊前進自辰至午該逆以舊城山毛水山王家寨等處之賊四路照應以城中大股出隊禦戰李遂勝分兵堵截自率隊伍攻擊城賊並經唐友勝馬隊衝殺斃賊無數生擒紅衣賊目二名悍黨十餘人均於陣前正法逆遂敗退入城申刻該逆潛出二

百餘人由西門右溝趨入龍王廟賊巢西刻遙見濠上墩上之賊彼此搖旂相應蕭慶高度其水食既絕勢必乘夜狂衝乃約會武字兩營由壘前進攻以新副左後四營分攻左右復派親兵隊遏阻龍王廟援賊三更時候見墩上潛出數賊越濠伺探當經巡兵捉獲而坡下逆壘火光燭天知該逆將有奪路前迎之勢乃飛令各勇執持攔牌雲梯奮力搶上火彈火箭四面環拋賊見外援未至慌亂失措蕭德見督率各勇奮力爬牆刀矛齊進殲斃二百餘人生擒二十餘名當將逆壘踏平其越牆奔逃者悉被彭義益等截殺無遺奪獲旂幟軍械多件十四日早李遂勝以中左後右四營埋伏西城山邊掩旂息鼓自率親兵

副中先鋒三營直撲城卡該逆出隊迎拒我軍且戰且卻誘令離巢既遠伏兵齊出兩面截殺斃賊百餘名奪獲旂幟器械馬匹甚多逆敗回城我軍追抵城卡拔去梅花樁數重燒燬該逆糧房磨房十餘間奪獲糧米十餘石麥麩無算總兵銜儘先副將雷濟泰身先士卒奮勇衝鋒殺賊較多尤復沿城攻打詎該逆礮石如雨致受鎗傷登時陣亡計此數役共殲悍賊六七百名生擒三十三名據供僞帥弟蔡九僞巡部周姓並僞先鋒五名均經我軍殲斃奪獲大小鎗礮六十八件旂幟四十五桿我勇亦有傷亡此初十日至十四日攻勦獲勝踏毀逆壘之情形也蕭慶高等既將墩上賊壘踏平之後以兩水地面遼闊各營

分布黎子山李家山杜家溝等處隘口繁多難期控塞且該逆所踞文昌宮前村泰山廟最爲形勝各營迭次攻打迄不得下賊見我師於東南北三面層層進逼亦遂連環築壘大有圖由兩水衝突之勢訊據擒逆供稱文昌宮賊糧悉由階城運送隨議於鐵堡山腳黃家壩直抵河干將北岸衝要先行堵塞使城中援賊截爲兩斷首尾不能顧應米糧無由接濟庶期文昌宮及前村各逆勢孤不遁卽降於是分撥各營連日移紮營壘復恐該逆見我師斷其犄角併力抗阻因預派先鋒馬隊漏夜趕赴兩水一面函約周達武南岸各營站隊牽制並於河邊用礮轟擊十四日黃昏階城逆眾果陸續由舊城山腰趨赴兩水十

五日黎明悍賊千餘人負牌束草一由黃家壩一由梨子山馳來勢頗猖獗我軍準備鎗礮以俟該逆見官軍悄無聲息搖旂蜂擁而前正在拔籬越濠我軍用劈山礮連環轟擊斃賊十數人該逆冒煙爬牆各勇以火彈噴筒拋射亂石紛投將該逆攔牌折損繼用擡鎗火箭一齊猛放逆勢不支兇斃漸卻劉厚基蕭德綱各率五成隊伍鈔出接戰適武字營由大埠里渡河而北劉厚基等趁勢奮殺該逆前後受敵紛紛狂奔維時彝字英毅右後各營亦已出隊從山坡包鈔而下四面追殺直至鐵堡山脚溝內恰值文昌宮之賊率眾數百馳驟來援唐友勝等率先鋒馬隊縱橫衝擊殲斃黃衣賊十餘名該逆且戰且卻又被

劉厚基及各營撤回之隊左右截殺斃賊七八十名逆遂披靡
潰入老巢是役斃賊三百餘名生擒蔡逆衛隊悍賊三十七名
據供蔡逆假子蔡偽四千歲並偽先鋒張六及偽統領數名均
經殲斃奪獲大小鎗五十桿號衣四十八件大旂二十五面矛
子三十莖我勇傷亡二十餘人戰馬亦傷斃數匹此十四十五
兩日阻絕城援會勦獲勝之情形也十六日黃鼎見賊勢已蹙
親率降卒赴鐵堡山上游河岸偽東中營大呼招降諭令投誠
免死於是偽都統周正貴與其偽輔軍曾光斗偽統領李三順
周興胡興順等并先鋒十餘人率其部黨舉壘出降黃鼎遂分
隊進紮其壘將被脇難民及疲弱之眾薙髮給資遣散選其精

壯一百四十名連陸續投誠悍卒共二百名分爲兩哨擄馭激厲俾作前鋒十七日武字右路三營亦渡河進紮營壘於是鐵堡山上下所布僞帥營及太字平字日字並僞西婁東房南壁西奎等營逆眾俱行宵遁回城十八日河南及舊城山各處逆壘亦皆撤退蓋蔡逆以鐵堡山諸賊出降自知羣情解體恐文昌宮各壘盡行渙散張皇無計乃分悍黨千餘人遣派僞巡部蔡三蔡四連夜由舊城山摸水溝越河趨鳳凰墩一帶是日四川提臣胡中和適抵軍營蕭慶高等正與會商移營圍逼文昌宮詎該逆已於十九夜由西路翻山潛逸蕭慶高得信卽派右營總兵劉厚基中營道員蕭德綱與彝字營黃鼎果毅營劉鶴

齡並英毅五營裹帶乾糧由兩水星夜跟剿一面飭令先鋒馬隊由柳壩小道迎頭截擊黃鼎親率所部策馬疾追躡迹上山奔逐五十餘里喊聲震地追及後隊尾賊投誠三十餘名餘逆竄至高家村經林之望率團迎擊截住隘口蕭慶高復派左營經歷蕭啟基帶隊前往柳林埡會同馬隊彭緒慶攔截胡中和亦派右軍一營馳往邀擊蕭德綱等與英毅彝宇及張華各營疾趨高家村該逆被我軍前截後剿傷亡甚夥遁入村內二十日夜四更逆由村東翻山越嶺狂奔辰刻前隊百餘人竄至呂家山適蕭啟基與彭緒慶由柳林埡馳至該逆猝不及防倉皇失措彭緒慶等揮軍迎擊斃賊七八十名該逆退據隘口持鎗

抗拒我軍援巖繞撲礮石刀矛齊進立將此股擒斬無遺奪獲
騾馬三匹鎗礮器械無算比時張華與彝字兩軍由河內野牛
寺前進以過分竄禮縣之路英毅與武字果毅各營分兵躡追
總兵蕭祥勝並張華黃鼎催隊急進奔馳六七十里追抵洞門
前將該逆截住適英毅中營副將王九齡都司蕭玉田與武字
果毅各營督隊繼進該逆屢受懲創未遑喘息飢憊莫支我軍
前擊後鈔陣斬偽巡部蔡三一名餘賊數百名逆眾窮蹙無計
紛紛棄械乞降英毅中前副中三營王九齡等擒降偽都統蔡
同榮及偽先鋒百長蔡起世等十名餘黨七百二十一名彝字
營黃鼎收降偽周統領趙輔軍蔡九先鋒等賊目數人新勝及

老賊四百餘人張華擒降僞巡部蔡四等三名起獲鎗礮旂幟
號衣刀矛不計其數此十六至二十日追勦竄賊悉數擒斬之
情形也當逆黨偷竄之際蕭慶高恐城中悍賊乘間逸出因復
抽撤各營勻紮追師原壘並督率諸軍占駐舊城山俯瞰階城
晝夜嚴備蔡逆計不得逞勢益困迫現據蕭慶高來函謂於月
底總可奏功等語伏查蔡逆著名狡悍自盤踞階城以來牙隘
築壘勢相犄角已成負隅之勢屢經我軍設法攻勦踏破逆壘
痛挫兇鋒繼又移營逼進絕其援應之師斷其濟糧之路餘黨
解體逆志倉皇遽思分股奔竄意圖分我兵力截我後路以遂
其狡逞之謀不意諸軍長圍如故使踞逆不敢動移逸賊悉遭

俘馘洵足以快人心而寒賊膽現惟三官殿及西南西北兩隅
尚有逆壘未下蕭慶高等督飭諸軍逼近城根掘濠樹柵層層
圍裹該逆已處萬難飛越之勢臣現飛咨胡中和懍遵

諭旨統率諸軍乘此屢捷之威掃除餘壘以拔堅城而殲渠魁
諒茲檻馘釜魚不難剋期掃盪所有陣亡之總兵張怡輝總兵
銜儘先副將雷濟泰都司鍾九思童南山千總李秉忠皆係奮
勇衝鋒中鎗遇害實堪憫惻相應請

旨敕部從優議卹以慰忠魂其屢次出力員弁容俟事竣核實
保獎籲懇

恩施以昭激勸所有官軍連旬攻勦獲勝踏毀兩水鐵堡山等

處逆壘並將竄出股匪悉數殲除現已進紮舊城山逼圍階城以圖聚殲各緣由理合恭摺由驛馳

奏伏祈

皇太后

皇上聖鑒訓示謹

奏

附請飭訥侍衛馬隊前赴甯夏助剿疏

再臣前准固原提臣雷正綰咨首逆孫義保傳令回眾自殺家小乘馬紛竄等情計非有得力馬隊萬難堵截請將侍衛訥依楞阿馬隊一起畱陝調遣以備緩急旋奉

諭旨侍衛訥依楞阿由揚州帶領馬隊一起赴甘從陝省經過
著照劉蓉所請暫准截畱陝省調遣以備緩急仍著與都興阿
籌商如甯夏軍營亟須此項馬隊而陝省邊防較鬆不至逆蹤
闖入仍卽飭赴都興阿軍營助勦均由該督等熟商辦理等因
欽此伏查前此竄陝股匪經臣派兵截勦斬馘頗多餘孽潛遁
陝境業已肅清頃接涇州長武縣探報曹克忠於正月二十九
日攻克蕭河鎮城本地回民乘官兵進攻之際殺斃陝回數百
名呈繳騾馬器械出降者三十餘名雷正綰於二月初二日克
復固原城池亦頗得甘回張寶龍等之力首逆孫義保自殺家
眷棄城西走等情又據定邊縣探報甯夏回匪於上年十二月

二十六日經官兵踏破城外賊營四座轟斃賊目馬現濇一名
聞有固原逆匪二三千人前往赴援等語臣查蕭河固原雖已
次第攻克而逆首孫義保尙在免脫餘黨紛紛西竄甯夏一帶
頗形喫緊值現陝境肅清邊報稍息以臣酌量緩急應飭侍衛
訥依楞阿率所帶馬隊馳赴都興阿軍營助剿庶免顧此失彼
之虞至於陝邊防務臣已咨商雷正綰陶茂林暫畱段登雲雷
恆王守基等馬步六營分紮邠隴扼堵如階州遂於月內克復
更可騰出兵力嗣當察看情形萬一該逆又復縱騎紛竄折入
陝邊仍當飛咨都興阿雷正綰遵
旨酌撥勁旅兼籌防剿以遏奔突除檄飭訥依楞阿迅率馬隊

前赴甯夏軍營助勦並移咨都興阿知照外理合附片陳明伏乞

聖鑒謹

奏

附報解協甘餉銀軍火數目疏

再臣疊奉

諭旨籌撥甘省軍需雖值窘乏萬分不敢稍存膜視業將同治三年十月十一月分撥解過援甘各營餉銀軍火數目附

奏在案嗣復督飭藩司林壽圖等設法搜羅以濟要需茲據軍需局司道等詳開同治三年十二月總共解過援甘各營餉銀

二萬六千兩火藥一萬八千斤火繩一萬五千丈擡礮五十尊
擡鎗五十桿烏鎗一百五十桿大小鉛丸一萬一千斤紙火箭
三百枝各經委員解往交納領有迴文爲據臣覆查所解餉銀
軍火等項分撥雖不幾何而在陝省竭蹶供支實已不遺餘力
除仍飭該司道等竭力籌措源源接濟外所有陝省同治三年
十二月分撥解援甘各營餉銀軍火等項數目謹繕清單恭呈
御覽再自同治四年正月初間逆回分股回竄道路通塞不常
並據署鄜州知州吳欽曾稟報合水縣屬太白鎮地方存未起
解之火藥有被逆回劫掠之事是以各營餉銀軍火正月內未
經運解合併聲明伏乞

聖鑒謹

奏

請蠲緩被災州縣舊欠錢糧疏

同治四年四月初二日

奏爲查明被災較重各屬舊欠錢糧無力完納籌擬分別蠲緩以紓民困恭摺仰祈

聖鑒事竊照陝省自同治元年三四月間川髮回逆相繼作亂蔓延數十州縣地方悉被蹂躪小民死亡過半廬舍蕩然田土荒蕪當將西安同州鳳翔各府屬元二等年並漢中府屬三年民欠錢糧以及應徵各款先後

奏懇

恩施分別蠲緩在案當此庫項支絀餉需浩繁之際陝省歲入
向以地丁爲大宗舍此別無可籌隨將三年地丁錢糧嚴飭各
屬逐一查勘已種地畝分數設法催徵一面借給牛具籽種勸
令樹藝寓催科於撫宥之中滿冀時和年豐踴躍完納以佐急
需無如二麥原未播種齊全兼之上年夏間雨澤愆期秋禾受
旱以致收成歉薄糧價昂貴加以兵差絡繹閭閻十室九空凋
敝情形不堪言狀其中被擾稍輕之家收穫之戶均已量力輸
將陸續解司撥用餘欠地丁正耗錢糧俱係無力災黎兼有叛
絕各產迄今乏人佃種實屬無從催納現據各屬紛紛稟請蠲
緩臣與藩司覆加訪察委係實在情形查地丁錢糧固屬兵餉

要需而事關民瘼又未便置之不顧况四年新賦業已開徵猶慮完納不前若再將三年舊欠一律並徵民力實有未逮即使緩至麥後帶徵亦恐舊欠未完新欠復至愈積愈多是使州縣徒專追呼百姓轉增擾累而於餉需仍無裨益自應據實奏請蠲緩以蘇民困而培元氣據藩司林壽圖具詳前來相應仰懇

天恩俯准將被災最重之咸甯長安三原富平涇陽臨潼渭南醴泉興平咸陽高陵盩厔鄠縣鳳翔大荔蒲城華州等十七州縣民欠同治三年地丁正耗折徵銀兩本色糧石全行豁免次重之藍田邠州三水長武永壽武功等六州縣民欠三年本色

糧石折徵銀兩全行豁免地丁正耗緩至本年秋後帶徵此外
甯陝孝義白水三廳縣民欠元二兩年地丁正耗本色糧石漢
陰甄坪定遠三廳民欠元年地丁正耗等項銀兩皆以民力萬
難完納先後稟報應請一併豁免以示體恤除飭司嚴飭各屬
查明民欠確數造具冊結並此後或有續經查出應行蠲免之
處隨時另案詳辦外所有查明被災較重各廳州縣民困未蘇
懇請蠲緩舊欠錢糧銀兩緣由理合繕摺具奏如蒙

俞允一俟奉到

恩旨 臣卽飭司刊刻 謄黃徧行曉示務令實惠及民無任胥吏
隱射滋弊合併聲明伏乞

皇太后

皇上聖鑒訓示飭遵謹

奏

附完解工程銀兩疏

再陝省應解

定陵工程銀一十五萬兩當因地方殘破過甚庫款萬分短絀業據司詳奏請展緩三箇月欽奉

恩旨允准一面竭力籌措共計五次解過銀十二萬兩尙欠銀三萬兩未敢稍事諉延茲於無可設法之中催提各屬地丁並將要款緩發集有成數隨在地丁項下動銀三萬兩派委試用

縣丞茹樹生管解定於同治四年三月二十六日起程前赴
欽派恭修工程王大臣處交納以濟急需據藩司具詳前來除
咨明戶工二部暨工程處知照外所有原撥銀十五萬兩現已
依限掃數解清及起程日期理合附片陳明伏乞

聖鑒謹

奏

請酌發卽用知縣來陝差委疏

同治四年四月初二日

奏爲請

旨酌發知縣來陝以資差遣恭摺仰祈

聖鑒事竊臣接據藩司林壽圖署臬司官銘會詳陝西屢遭逆

亂地方凋敝現值軍務初平子遺災黎正需撫字而舉辦善後一切事宜尤關緊要須以讀書明理諳曉政體之有司分布各州縣休養生息始足起瘡痍而蘇民困等情請

奏多發進士卽用知縣數員備用前來臣查陝省幅員遼闊政務殷繁自遭髮捻逆回滋擾以來殘破特甚亟須妙選讀書達理之才俾資整頓前雖疊請揀發知州知縣三十四員陸續到省現均委署有缺或經派辦要務其卽用知縣一班所存僅止三員尤屬不敷差委相應請

旨飭下吏部於本年乙丑科會試後卽用知縣內除循例簽掣陝西不計外酌量多發八員飭令迅速來陝以資差遣遇有相

當缺出照例按班補用臣為吏治需材起見未便拘泥常例所
有請發進士即用知縣以備委用緣由理合恭摺具
奏伏乞

皇太后

皇上聖鑒訓示飭遵謹

奏

明白迴奏懇賜查辦疏

同治四年四月初一日

奏為遵

旨明白迴奏懇

賜嚴加查辦以重名節而全素履恭摺奏祈

聖鑒事竊臣頃奉三月十六日

諭旨前據倭仁等奏遵旨查訊翰林院編修蔡壽祺摺內緊要
條件一摺據稱本月初六日將蔡壽祺原摺內所稱挾重貲而
內膺重任善夤緣而外任封疆之緊要二語傳到蔡壽祺面加
訊問當據供稱辭煥劉蓉行賄夤緣係得自傳聞應否查辦伏
候聖裁等語朝廷登進人才豈容納賄行私致滋物議辭煥劉
蓉或內躋卿貳或外任封疆均係朝廷大臣如於蔡壽祺所參
不行查辦何以重名節而振紀綱著辭煥劉蓉各將所指行賄
夤緣一節據實明白迴奏以憑查辦如敢有一字欺飾再經查
出定行從嚴治罪欽此伏查臣以湘楚諸生志安貧賤咸豐三

年今兩江督臣曾國藩在籍辦理團練旋率水陸各軍出境剿
賊邀臣襄其軍事前後兩年旋與羅澤南李續賓等各率一軍
由江西赴援湖北轉戰崇陽通城蒲圻各縣值臣弟蕃殞命疆
場負骸歸葬咸豐六年經前湖北撫臣胡林翼奏調赴營維時
臣父年已篤老不忍遠離由是家居奉親歷三四年不幸臣父
見背胡林翼旋有敬舉賢才力圖補救一疏濫列臣名遂於十
年六月欽奉

文宗顯皇帝諭旨飭令募勇六千赴援江浙皖南等省旋值湖
南撫臣駱秉章督辦四川軍務奏調臣隨同入蜀十一年正月
復奉

諭旨垂詢胡林翼前保之同知劉蓉現在何處聞該員才具尙好應如何錄用之處著胡林翼酌量具奏等因旋經胡林翼覆陳有器識遠大堪膺封疆藩臬之任等語是年八月復經駱秉章隨案保奏奉

旨以知府歸部銓選九月十五日欽奉

恩命賞給三品頂戴署理四川布政使司同治元年二月奉旨補授實缺二年七月奉

命督勦漢南逆匪旋奉

恩旨特授陝西巡撫以重事權等因三年四月到任凡臣一生出處本末大略如此臣方自謂身受

兩朝特達之知超越非常實屬儒生曠世之遇惟自慙經術迂
疏知識闕陋無以仰稱

朝廷破格錄用之意旦夕凜凜懼且與漢之樊英晉之殷浩同
貽笑於將來卽當世士大夫之賢者知臣之空疏寡昧莫裨時
艱亦不過以爲

朝廷過聽胡林翼保薦之言遽使叨竊至此至於出處大節固
共信其無他乃蔡壽祺以其不肖之心造作夤緣之謗肆情侈
口惟所欲言直欲厚誣天下謂皆與己同類而無復有稍知廉
恥之人則何其情之悖也凡世之以夤緣爲事者必其平日縈
情寵利之場役志聲華之會不勝其歆羨戀慕之私思一得之

以快其意欲然後喪失本心捐棄廉恥爲此乞憐昏夜驕人白
晝之行故凡士之小廉曲謹粗知自愛者卽有所不屑爲不必
其有過人之識量而後能之也臣雖至愚極陋無足比數然幼
承庭訓頗識禮義之歸壯遊四方雅以志操相尙砥名礪節垂
四十年其於希榮慕祿之情降志辱身之事往往不待禁戒而
自絕於心蓋當隱微幽獨之餘所爲兢兢矢慎其自治尙有精
於此者而此特其粗節故不待力排深屏而後能自克也使蔡
壽祺臣智術淺短非救時之長才謀畫闊疏無慮變之遠略
自膺鉅艱未效涓埃臣將內顧懷慙而無以自解使臣尸居
高位未翕黎庶之情謬撫名邦莫振頽敝之俗負

聖君之殊遇竊處士之虛聲臣且將愧汗悚惶而莫知所措至欲舍事功而誣其名節搆蜚語以毀其素行則臣潔白無滓之操堅貞不屈之志晝不歉於旦明暮無慙於夢寐方寸之地皎如白日確然有以自信而不疑且臣自起草茅未趨

朝闕於

皇上左右親貴之臣未嘗有一面之識卽政府樞密之地亦未嘗有一緘之達秉義持律涇涇自守則其志匡公室義絕私交不特心可鑒諸神明抑且迹無涉於疑似夤緣之謗將何自來而蔡壽祺肆口詆呵遽至如此其爲誣罔不辯可明伏祈皇上嚴加查察推究根由如其果涉曖昧之情頗著交納之迹

卽請

嚴治臣罪刀鋸鼎鑊甘之如飴萬不敢倖邀

寬典其或仰荷

聖明遠垂無私之照深察致謗之由幸不玷於官箴尙無虧於大節亦乞

聖主天恩憫臣孤危放歸田里俾遂還山之願長爲擊壤之民

臣謹當篤守遺經勉卒故業或者晚節末路不至貽誚士林尤

荷

高厚之施永戴

生成之德所有遵

旨明白迴奏懇賜嚴加查辦以重名節緣由謹繕摺據實覆奏
伏祈

皇太后

皇上聖鑒施行謹

奏

附陳蔡壽祺挾嫌構陷疏

再查蔡壽祺於咸豐九十年間僑寓四川省城每遇地方公事
招搖把持聲名狼藉經前署督臣崇實奏參欽奉

諭旨驅逐回籍不准逗遛川省等因欽此咸豐十一年臣在督
臣駱秉章幕中接閱武弁姚懷玉等稟牘輒有奉翰林院蔡檄

飭募勇字樣怪而詢之始知蔡壽祺當逆氛擾攘之時自刻翰林院編修關防徵調鄉勇收召匪目陳八仙等爲門徒聚眾橫行不受地方官節制其舉動實涉荒唐臣嘗訪查蔡壽祺平日行事卑鄙夸誕劣蹟多端雖其同鄉及同官翰林者莫不斥爲敗類恥與爲儔既經崇實奏參猶復徘徊省會遇事招搖臣嘗對眾宣言該編修係奉

旨驅逐回籍之員如復逗遛滋事將不能更事姑容蔡壽祺聞之始遂巡東裝入陝逮聞臣奉

命撫陝旋復東裝赴都每聞眾人傳述蔡壽祺口出怨詈之言固知其將有譸張爲幻之事今果自上封章造作傳聞無據之

詞巧肆彈射此固從古小人羅織構陷之常情不足深怪惟臣
自受任川藩晉擢陝撫以來計所糾參道府州縣前後四十餘
員其中頗多聲勢顯赫性情狡黠之倫臣非不省漢人白璧不
可爲庸庸多後福之語姑務含容徇隱取悅流俗顧念遭逢
殊遇不敢稍涉瞻徇雖明知異時報復相尋將至卒受中傷而
有所不暇顧且計

聖明在上眾正盈朝運祚方際

中興尤可決無他慮不圖蔡壽祺一進影射之詞已蒙我
皇上嚴加詰問則後之伺隙挾嫌接踵而起者勢將深文周内
變幻紛紜在臣一身禍福原不足係輕重萬一以後封疆任事

之臣遽以臣爲前車之戒罔恤清議競務優容風會所趨殊非細故伏祈

皇太后

皇上俯垂鑒察俾臣孤危愚直之蹤得自安於泉石山林之外

修身補過以卒餘年則微臣之受

賜既多而

國體之所全已大從古大臣被謗誼當引咎自責臣雖不才頗諳斯義然不得不一陳此委曲者非欲伸眉論列與蔡壽祺較量短長亦冀

朝廷當言路宏開之日仍能豫絕僉壬傾陷之謀則正氣常伸

陰機自熄實於

中興盛業裨益滋多所有蔡壽祺挾嫌構陷緣由理合附片陳

明伏祈

聖鑒謹

奏

劉中丞奏議卷八終

劉中丞奏議卷九目錄

奏甘肅陶營潰勇滋擾派兵彈壓疏

附酌擬在廣捐輸九條

援甘軍餉枯竭請推廣捐例疏

附請川捐銀錢並收疏

附報解協甘餉銀軍火數目疏

附請將團紳管勞等照原保職銜補用疏

請補潼關協副將疏

附參營員折收車馬價銀疏

附將副將倡眾索餉正法疏

附請飭被參知府暫緩赴營當差疏

附報烏魯木齊提督抵陝借撥軍械疏

保奏收復漢南郡縣出力員弁疏

附請卹陣亡將弁疏

附請將奪獲賊馬添設撫標馬隊疏

密陳甘肅軍營積弊疏

會奏勦撫陶營潰勇疏

訊明陶營弁勇潰散緣由疏

附請另撥直東防軍疏

據實陳明疏

劉中丞奏議卷九

湘鄉劉 蓉著

奏甘肅陶營潰勇滋擾派兵彈壓疏

同治四年四月三十日

奏為甘肅陶營勇丁潰逃入陝肆意搶掠滋擾現籌派兵彈壓
勦撫兼施以儆兇頑而靖地方先將大概情形恭摺由驛馳奏
仰祈

聖鑒事竊臣頃據隴州汧陽等處探報甘肅提督陶茂林所部
兵勇在安定縣潰散隨帶旂幟號衣軍械在通渭縣屬攻寨搶
掠於四月十一日竄抵隴州屬之長甯驛並探得該潰勇係茂
字中左前後四營及衛隊與新中一營提選二營其餘各營勇

丁隨逃者多寡不一沿途搶奪客貨搜索糧食其馬隊由長甯
驛斜趨隴州屬之石莊撒家店一帶步隊由清水白沙竄赴山
門鎮可通寶雞鳳縣之路臣當飭駐紮寶雞縣之親兵營彭基
品與駐紮鳳縣之雄毅軍劉精就近查探攔截一面飛咨陶茂
林派員追回歸伍詎該潰勇已潛入距寶雞縣四十里之縣頭
鎮等處經彭基品選派百長童仁興護哨李吉春持帖前往詰
問原由該潰勇等語言含糊竟將李吉春羈畱令童仁興執持
副將高選清等來文還報內稱陶茂林剋減軍糧各營不期而
散約有一萬餘人行至中途共推伊爲統領沿途需用柴麩請
飭寶雞等縣預爲備辦等語臣查甘省現值軍情喫緊之際該

弁勇等正當努力報效之時陶茂林係提督大員何至剋減軍糧任聽各勇攜帶旗幟器械相率潰散殊堪詫異適值陝甘督臣楊岳斌抵陝隨即會商派委營務處遊擊文朝清協同臣標中軍副將彭體道馳赴寶雞善爲開導令其作速回甘歸營効力贖罪儻該提督實有扣餉情事該弁勇不願回甘亦准據實稟明繳還軍器發給路票酌籌川資分遣回籍一面札諭高選清遵照查明營分數目造冊呈送分別各勇籍貫以憑資遣不准滋生事端亦冀該潰勇等改悔前非立時遣散免致擾害地方彭體道等去已數日尙無回報而高選清到處張貼僞示聲稱假道回籍需索米麪如有官兵阻擋卽行燒殺滋事等語彭

體道開導數日陽奉陰違卒無解散之意頃據寶雞縣知縣程逢春稟報該弁勇等移紮益門鎮等處擄搶裹脇姦淫婦女無所不至惟尙無焚殺情事又接鳳郿岐山各路探報已有分股竄至盩厔縣屬之啞柏鎮一帶並由鳳翔城外零星東竄者其甘肅兩當縣境內亦有潰勇二千餘人滋擾臣伏查寶雞盩厔一帶漸逼南山該潰勇聚眾至六七千人自立統領任意擄掠毫無顧忌跋扈情形已可概見若不厚集兵力勤撫兼施難保不四處蔓延竄擾爲患因卽飛調雷駐邠州之遊擊王守基馬步兩營及駐紮鳳縣之雄毅兩營直趨寶雞並撥省標新兵三營飭派遊擊陳照臺胡得成管帶由盩厔啞柏鎮前進復調駐

防商州之鎮西三營由藍田逕趨蓋屋會合省標各營步步進逼與彭基品等相機籌辦分別遣散如該潰勇逞兇抗拒立即前後夾擊以儆兇頑而靖地方又慮該潰勇情急狂竄深入山谷更爲漢南之害復又飛飭黃加焜督率隴軍會合總辦興漢團練之擬保道員管滂等率勇扼要嚴防以杜紛擾之患惟現准雷正綰咨稱陶茂林所部各營勇丁暗相勾約網縛營官持械四散者共有八營之多旋因勦賊失利敗沒二千餘眾潰散者又復不少現僅提選四營與衛隊左營退守安定而逃勇遊勇團聚山南羣謀作亂勦撫兩難大力不能支之勢等語據此情形是陶營潰勇麇聚山南者尙多誠恐相繼入陝則逃勇

竄擾於前回逆伺隙於後實爲陝省之深憂除飛咨雷正綰曹克忠分兵邀截毋任句結東趨並飛飭各軍迅速齊進勦撫兼施以杜紛竄而滋蔓延外所有陶營勇丁潰逃入陝不服開導遣散肆意搶掠滋擾現籌派兵撫勦大概情形理合會同督臣楊岳斌恭摺由驛馳奏伏祈

皇太后

皇上聖鑒訓示謹

奏

援甘軍餉枯竭請推廣捐例疏

同治四年四月三十日

奏爲援甘餉源枯竭萬難籌畫現擬推廣捐例以期踴躍而資

接濟恭摺仰祈

聖鑒事竊照陝省應供援甘各軍月餉萬分難籌經臣專摺具奏請將報捐道府州縣新章展緩分派委員前赴山西四川辦理嗣准戶部駁飭並准山西撫臣沈桂芬以晉省不能再議勸捐委員遠來徒勞無補等情奏明咨覆當經分別轉行遵照在案惟查陝省各屬厯屆捐輸不下四百餘萬均以協濟鄰封迨同治元年四月髮捻竄擾繼以回匪到處焚殺庫款支絀不得已奏設米捐暨舉行捐借發給印票陸續得銀三十餘萬藉持危局刻下內患稍息而竄踞階州之蔡啟餘逆尙未殲除安定靖遠甯夏等處回氛遍地疊經勦辦仍覺蔓延無論鳳寶邠長

汧隴定靖處處接壤必須籌餉籌軍且穆圖善陶茂林曹克忠
西們克西克金順馬步各軍數至四十餘營月餉軍火俱應由
陝供支當此流亡未復瘡痍未起筋疲力盡捐借既勢不能行
水盡山窮款項則絲毫無著反覆籌畫舍捐輸無可挹注現飭
毛震壽在川設局試辦然道府州縣四項既經停止外捐其餘
零星雜職爲數無幾殊覺杯水車薪徒有開捐之名卒無濟餉
之實臣與林壽圖毛震壽反覆籌商除變通推廣捐輸之外別
無寬籌補救之方但推廣一層必須與京局互相通融而於名
器並無窒礙庶足以廣招徠而裕餉源茲據林壽圖毛震壽等
酌擬章程具詳請奏前來臣覆加確核均與例案相符不特陝

捐可廣招徠之途卽京局亦將並收集腋之效於籌餉不無裨益合無籲懇

天恩迅賜敕部議覆俾得及早收捐庶援甘各軍或可藉資飽騰不虞飢潰實於甘省大局有裨臣爲協濟鄰省軍餉起見並非專爲陝謀他省自不得援以爲例所有援甘軍餉萬難籌畫酌擬陝局推廣捐輸條例緣由理合繕具清單恭摺具奏伏祈

皇太后

皇上聖鑒訓示飭遵謹

奏

附酌擬推廣捐輸九條

謹將酌擬推廣捐輸九條恭呈

御覽

計開

一同通佐貳雜職願加四成實銀准在陝局報捐一條查籌餉新例各項官職願加四成者統歸京局上兌推原其意係爲充裕京餉起見今道府州縣外省已經停捐所有同通佐貳雜職捐項既屬無多其有願加四成實銀者如定須赴京呈交則道路云遙攜貲往返諸多糜費或因此畏難中止殊不足以期踴躍而廣招徠擬請將同通佐貳雜職等官無論舊捐新捐凡願統加四成及分缺先分缺閒儘先加四成者准在京銅局陝局

兩處報捐他省不得援以爲例

一捐升銜推廣一條查例載七品准捐至五品銜八品准捐至六品銜九品以下准捐至七品銜均不得捐本管上司之銜等語原所以示限制也第現在各路軍營七品保至四品銜八品保至五品銜九品以下保至六品銜且有從未雜職保至五品銜者是例文徒有限制之名而保舉轉開便捷之徑夫希榮好勝人之恆情與其格於例而使羣趨於保舉不若廣其途而使各效夫輸將擬請以後七品准捐至四品銜八品准捐至五品銜九品以下准捐至六品銜仍不得捐本管上司之銜既可遂捐生上進之心亦可杜夤緣保舉之念於軍餉不無裨益祇准

在京銅局陝局報捐他省不得援以爲例

一曾任實缺之同通佐貳雜職起復起病由本職捐升者准捐歸候補班補用一條查起復起病人員由本職捐升者概不准歸候補班補用原爲慎重地方起見但曾任實缺其政治一切情形較之初捐人員自必諳練雖經捐升究與初捐人員有間卽請補繁要之區當無覆餗之虞擬請將曾任實缺之同通佐貳雜職起復起病後由本職捐升者核計到任久暫如從前到任試俸已滿此次到省試用已滿准照捐升之職分缺先銀數不減成報捐歸於候補班補用仍不准捐免試俸試用以杜取巧如有於捐歸候補班再捐儘先者仍照例定儘先銀數不減

成報捐似與吏治亦無關礙祇准在京銅局陝局報捐他省不得援以爲例

一丁憂實任人員捐請坐補一條查道府以下等官必久於其任方能熟悉地方情形利弊如丁憂一項係屬以禮去官於原缺本無隔闕向來告病人員例應坐補原缺旋因丁憂之員往往於聞訃後預填日期告病故特定以原籍報憂及任所聞訃限期以杜巧避在案擬請嗣後丁憂人員如願坐補原缺者俟服闋到省後各按原官照捐入候補班銀數加倍報捐准其坐補原缺祇准在陝局報捐其應歸部選及告近人員應歸原掣省分者不在此例如係道府州縣仍在京銅局辦理外省不准

收捐

一候補試用人員捐升各職准捐在省候補一條查分發省分之同通佐貳雜職到省後未經得缺之前如有捐升他職候選者卽不得以原官在省候補今撥甘軍餉緊要不得不量爲推廣擬請仿照現用人員在任候選之例凡候補試用人員如有捐升同通以下等官其所捐官階係按現任之員例得在任候選者准其報捐在省候選其銀數按照捐免離任加三成辦理其未經銓選得缺時遇有候補試用之各本班到班仍以原官按班敘補將捐升之職作爲在任候選如所捐並非例得在任候選之官應按捐免離任銀數加五成報捐准其在省候補均

毋庸減成准由本省取具同鄉官印結咨部註冊按班銓選仍於選缺時給咨赴部分別引見驗看以符定例此項祇准在陝局報捐他省不得援以爲例俟甘省軍務稍平卽行停止

一候補卽用委用大挑議敘拔貢教習教職人員准捐本班儘先一條查軍功候補人員卽經部議准其在陝局報本班儘先補用其銀數照籌餉例定各本職本班儘先銀數報捐毋庸減成在案惟候補卽用委用大挑議敘拔貢教習教職各員未經議及似覺向隅擬請一概准捐各本班儘先補用以歸畫一其銀數仍照例定各本職本班儘先不減成銀數辦理祇准在陝

局報捐他省不得援以爲例

一同通佐貳各官准捐在籍在營候選一條查定例六七品佐貳例應引

見人員均須赴部投供不能在籍候選惟此項人員自減成之後捐資較少若令其赴部候選累月經年旅費不貲因此裹足不前適阻其上進之志未遂報效之忱且此等人員均無地方之責非州縣可比而各路統兵大臣保奏府廳州縣又有在營候選之條均奉

恩旨照准在案擬請將同知通判直隸州州同布庫大使鹽庫大使批驗大使運庫大使暨六七品首領佐貳各員均照捐免

離任銀數加五成在京銅局陝局報捐毋庸減成准其在籍在營候選俟選缺之後應引

見者由原籍督撫給資赴部應驗看者由部封發文憑咨送原籍督撫驗看給資赴任核與定例毫無窒礙而捐輸可冀踴躍他省不得援以爲例俟甘省軍務稍平卽行停止

一增生准捐復設訓導一條查增附捐教於咸豐八年經前任山西巡撫恆福奏請停止蓋以廩生出貢卽可以教職註選而增附無出貢之例故不准捐教免開躁進之門惟原奏內稱朝列青衿暮任司鐸自係側重附生而言若增生既有等第非朝列青衿可比況學政全書內載一等文理平通增附青社均補

廩無廩缺附青社先補增二等文理亦通增補廩附青社均補增是增生原係一二等生員因無廩缺始行幫增與廩生雖微有等差實無區別且各直省增生竟有屢考一等而不獲補廩者良以廩缺有歲科考之限也食餼既格於成例報捐又令其向隅似非推廣士林之道擬請增生按照廩生報捐復設訓導選用如有報捐班次概照例定銀數加一成辦理祇准在京銅局陝局收捐他省不得援以爲例

一軍務省分改指鄰近軍務省分一條查軍務省分補缺選缺揀發分發人員丞倅以下等官捐離改指或捐升改捐降捐非道府州縣者各按本職除捐離原省之外再照分發指省兩層

銀數加倍報捐毋庸減成曾經部議覆准皖浙兩省照辦在案
今陝省軍餉緊急亦應仿照辦理前次奏請改指章程吏部未
經明白指覆此次應再申明條款藉資遵守擬請軍務省分補
缺選缺揀發分發各員除道府州縣四項仍歸京銅局照章收
捐外其丞倅以下等官各案本職除捐離原省之外再照分發
指省兩層銀數加倍在陝局報捐毋庸減成准其捐離改指或
捐升改捐降捐分發鄰近軍務省分仍不准捐歸部選及報捐
京職以杜趨避

附請川捐銀錢並收疏

再臣前奏派革職留營藩司毛震壽會同四川藩司江忠濬等

就川省設局勸辦捐輸接濟援甘軍餉其一切章程悉照陝局米捐辦理惟查陝省制錢銅鐵並用銀價較昂而川省行使盡係銅錢現在銀價日低錢價日長每銀一兩僅易制錢九百餘文或一千餘文不等而各府縣紳商出入向用錢項居多各營采買米石製備軍裝又係用錢之款若概限以折銀交納勢必輾轉倒換徒多耗費於捐生諸多不便不能不體察情形量爲變通請令銀錢並收以遂報效之忱如有各捐生自願輸納銀兩者照常收捐其有願輸納錢文者准以制錢一千作銀一兩似此通融辦理庶捐生可無倒換糜費之煩而捐局藉收變通周轉之益再川省距陝二千餘里如仍扣滿三月造冊由陝彙

奏則道路遙遠必致往返稽延誠慮捐生因此疑阻擬請嗣後川省收捐不分卯次一有成數卽由臣隨時造冊咨部先行核覆並按月彙開清單恭呈

御覽飭部覈准以期妥速庶各捐生早獲登進之階藉廣招徠之路實於軍需有裨據已革前任陝西布政使毛震壽具詳請奏前來臣覆加察核係爲籌濟軍餉便利捐生起見事屬可行理合附片陳明伏祈

聖鑒訓示飭遵謹

奏

附報解協甘餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治四年正二月分撥解過援甘各營餉銀軍火數目附

奏在案茲據軍需局司道詳開同治四年三月分共支過援甘各營餉銀三萬一千兩火藥一萬斤鉛丸九千斤火繩一萬一千丈長矛竹桿一百莖擡鎗十桿鐵鋏一百張鐵鑊一百把大帳房一百五十架竹噴筒二百箇分別委解給領取有迴文爲據臣覆查無異除仍飭該司道等竭力籌措源源接濟外所有陝省同治四年三月分解支援甘各營餉銀軍火等項數目謹繕清單恭呈

御覽理合附片陳明伏乞

聖鑒謹

奏

附請將團紳管滂等照原保職銜補用疏

再上年二月馬啟諸逆由漢南竄敗之時興安防兵單薄經李雲麟督飭在籍刑部主事管滂戶部主事蔣常垣浙江候補知縣黃加焜候選訓導曠瑛等統率安漢團練五千餘眾扼險截剿擊賊於規溝場等處斬馘百餘級奪獲器械多件該逆以是不敢逕犯興安經臣隨摺聲明附片奏保該四員等京外職銜欽奉

諭旨管滂等著均照所請獎勵欽此三月初閒首逆藍大順被
蕭慶高黃鼎等率師追剿既急竄入安康屬之紫溪河等處復
經管滂等督團逼剿遂將藍逆殲除餘黨悉滅臣復會同李雲
麟查實奏乞

天恩逾格優獎管滂請以道員卽選並換花翎蔣常垣請以知
府選用並戴藍翎黃加焜請以同知直隸州補用並換花翎加
運同銜曠瑛請以同知直隸州知州選用並戴藍翎其餘出力
官紳分別酌保有差奉

旨該部議奏單併發欽此欽遵在案嗣於同治四年正月接准
部咨原奏內開查刑部主事管滂戶部主事蔣常垣二員前因

屢次接仗出力保奏以員外郎仍歸原部補用管滂並請戴藍翎臣部正在核辦奏駁閒今據該撫奏稱以京官不准復保京職均請改獎以直隸州知州選用並加知府銜管滂並請戴藍翎查該二員前次接仗出力並未聲明攻城殺賊所請免補本班核與章程不符均應俟補主事後以直隸州知州選用並准加知府銜管滂並戴藍翎今續因勞績出力該撫將該二員由直隸州知州奏請獎勵礙難核議又黃加焜由浙江候補知縣請以知州仍歸浙江儘先補用並請戴藍翎曠瑛由候選訓導請以知縣卽選核與章程不符黃加焜應俟補缺後以知州儘先補用並戴藍翎曠瑛應俟選訓導後以應升之缺升用臣部

正在核辦奏駁聞今據該撫將該員等復由前保官階奏請獎勵礙難核議均應令更正另核請獎等因奉

旨依議欽此咨行查照前來伏思酬庸之典要在核明實在勞績始足以示鼓勵而昭激勸部臣援章奏駁意在杜絕軍營濫保之弊自係爲慎重名器起見惟查漢南當巨逆狂竄之時逆黨繁多分股奔突聲勢頗爲浩大李雲麟所統兵勇僅十餘營分路堵剿實有防不勝防之勢幸得管滂等督率團練協同遏截維時馬啟各逆由安漢交界之鐵鑪壩一帶折竄安康屬之葉家坪規溝場等處豕突狼奔橫互一百八十餘里興安人心震駭岌岌可虞該主事等督帶安漢兩邑民團五千餘人據險

助剿擊賊於規溝場殺斃百餘級旋與官兵協力追剿沿途斬
馘愈多逆勢大挫始併歸鎮安一路下竄興郡得保無虞是管
勞等雖未著克城殲渠之功而所保全者已大實非尋常團練
可比臣於正摺既已奏明是以附片不復贅述今部臣以臣前
奏並未聲明攻城殺賊所請免補免選本班與例不符分別核
減等因未免功浮於賞且陝省自遭回逆屠戮以來各屬團練
迄鮮成效獨管勞等奮發有爲屢著戰績現方飭令總辦興安
八屬民團以助兵力而節餉糈在籍報效之日方長若令俟補
主事等缺始行改選升階則時日遙遙轉至阻其上進之路可
否籲懇

天恩俯准仍照原請管滂蔣常垣均免補主事以直隸州知州
歸部選用並請

賞加知府銜管滂並請

賞戴藍翎黃加焜免補知縣以知州仍歸浙江儘先補用曠瑛
免選訓導以知縣歸部卽選黃加焜並請

賞戴藍翎之處出自逾格

恩施至該員等旋復率領團勇合剿竄匪於紫溪河地方殲除
逆首藍朝璧並將餘黨悉數殄滅更屬情殷敵愾懋績昭彰自
應續請從優獎敘以示鼓勵合無再懇

皇上天恩俯准將管滂免選知府以道員不論雙單月遇缺卽

選並

賞換花翎蔣常垣免選直隸州以知府不論雙單月選用並

賞戴藍翎黃加焜俟服闋後免補知州以同知直隸州知州仍
歸浙江儘先補用並加運同銜

賞換花翎曠瑛免選知縣以同知直隸州知州不論雙單月選
用並

賞戴藍翎俾各官紳知所觀感團練益形踴躍庶輔兵力之不
逮藉節募勇之糜費除將其餘奉駁各員弁飭查明確另核請
獎外所有疊次帶團防勦殺賊並殲除逆首出力紳士核明先
後勞績請照原議獎勵緣由理合附片陳明伏祈

聖鑒訓示施行謹

奏

請補潼關協副將疏

同治四年四月三十日

奏爲揀員請補要缺副將以重營伍而勵戎行恭摺馳奏仰祈
聖鑒事竊照陝西潼關協副將魏添應欽奉

上諭補授陝安鎮總兵所遺潼關協要缺爲陝省東南門戶毗
連豫晉行旅絡繹且值甘肅軍務方殷時有調派兵勇軍械餉
銀經過一切彈壓操防在在均關緊要必須將領得人訓練調
度始足以資整頓而重營務查有儘先補用副將彭體道由行
伍隨原任西安將軍多隆阿進征皖鄂勦辦陝西回逆屢著戰

功洵升參將旋經前署撫臣畱署陝西撫標左營遊擊督捕遊
勇逃匪約束嚴明有犯必獲省垣賴以靖謐民情極其感戴本
年正月派赴醴泉縣趙村地方會剿回竄回匪冒雪疾進出力
異常經臣奏奉

諭旨以副將畱於陝西補用該員強毅廉幹謀勇兼優現署臣

標中軍參將辦事勤奮馭兵得法洵爲營伍中出色之員合無
仰懇

天恩俯准以彭體道補授潼關協副將以重防務而肅營規如
蒙

俞允現在陝境雖就肅清而河南甘肅賊氛猖熾時虞竄越陝

境仍須嚴防應請

敕部先給劄付俟軍務完竣再行送部引

見以符定制臣爲營務要缺得人起見謹會同署固原提臣雷正綰恭摺具

奏伏乞

皇太后

皇上聖鑒訓示飭遵謹

奏

附參營員折收車馬價銀疏

再本年正月閒甘省回逆由汧隴回竄陝境臣當飭親兵營記

名提督彭基品等卽率所部由鳳翔出岐山扶風武功興平一帶跟蹤躡剿各軍以步隊晝夜追擊尙屬勤奮惟據武功縣知縣劉式蒲稟稱是時有親兵營後隊勇丁入城索要車馬折價並有砍傷本城盤查兵勇情事當經嚴飭彭基品勒令交出滋事弁勇訊究並將管帶官查明參辦去後嗣據稟稱查得該營後隊於正月十四日馳抵武功適值該縣民人謠傳逆匪又復回竄於是知縣劉式蒲暫畱該弁勇等協同守城並無砍傷盤查兵勇之事惟花翎副將黎有餘藍翎守備饒仁山手執派撥車馬潤單向縣折價實屬違例妄索業經該提督斥責並將所折價銀如數追還退繳仍請嚴參等情前來伏查副將黎有餘

等帶兵勦賊輒敢違例折收車馬價銀雖經如數繳還究屬任
意婪索現值陝省兵差絡繹各州縣疲於供應而帶兵官往往
肆意苛求沿途滋事若不嚴加整頓何以垂戒將來相應據實
奏參請

旨將花翎副將黎有餘藍翎守備饒仁山兩員一併革職畱營
効力以示懲儆而觀後效其勇丁究竟有無砍傷盤查兵勇情
事仍飭武功縣確查指名稟覆從嚴究辦所有查參折收車馬
價銀之副將守備革職畱營効力緣由理合附片陳明伏乞

聖鑒訓示謹

奏

附將副將倡眾索餉正法疏

再臣頃據總理營務記名提督彭基品稟稱所統親兵各營將備自入陝以來先後勦辦髮逆回匪尙屬認真得力雖值餉項支絀接濟愆期尙知體念時艱毫無愠色乃查有中營右哨百長副將歐得龍因總哨遊擊王謨告病回籍未將該員推拔心懷怨望輒於本年追勦竄匪軍抵咸陽之際密約各哨弁勇以索餉爲名倡言鼓譟搖惑軍心幸各哨官深明大義不敢附和旋即據實首告經彭基品傳詢各百長眾供吻合歐得龍俯首無辭實屬目無法紀請按軍法從嚴懲治等情具稟前來伏查臣部親兵各營欠餉本逾半年之久時值庫款窘乏無可支給

幸賴各將士恩義夙洽尙無怨詞歐得龍由勇丁投效保至副將輒因未經推拔總哨之故倡眾索餉煽亂軍情若不從嚴懲辦何以申軍律而肅營規臣於接到彭基品稟詞後當卽飭令覆訊明確恭請

王命將歐得龍照律正法以示炯戒除將歐得龍出身履歷咨部註冊外理合附片陳明伏乞

聖鑒謹

奏

附請飭被參知府暫緩赴營當差疏

再臣前訪查榆林府知府劉廷鑑貪利營私行多詭詐在任抽

收釐稅征多報少且有借端科罰民財入私肥己等情經臣於甄別案內據實

奏參奉

旨先行革職聽候查辦等因欽此欽遵當經飭委候補知府齊琮前赴榆林會同署延榆綏道李義鈞確切查辦在案頃奉同治四年四月初十日

上諭都興阿請調劉廷鑑一員前經劉蓉甄別降旨革職查辦現在都興阿營務乏員著劉蓉飭令該革員馳赴都興阿軍營以供差遣等因欽此自應飭令赴甘藉資驅策惟查該革員被參抽收釐稅征多報少科罰民財入私肥己之案現經署延榆

綏道李羲鈞署榆林府齊琮按款確查已有端倪應令劉廷鑑
面質虛實未便遽令赴甘致滋懸宕都興阿現署總督與臣同
有整飭吏治之責今以營務乏員奏調差遣自係未知劉廷鑑
被參情節且辦理營務與帶隊需員急籌前敵者有閒自不妨
稍緩須臾都興阿素識大體使知劉廷鑑此案情節較重尙未
辦結亦必不肯以軍務爲逋逃之藪除一面檄飭藩司速催李
羲鈞齊琮將劉廷鑑各款趕緊查明據實稟覆核
奏一面咨商都興阿查照令該革員暫緩赴營差遣外所有暫
畱已革榆林府知府劉廷鑑查辦被參各款後再赴軍營緣由
理合附片陳明伏祈

聖鑒訓示飭遵謹

奏

附報烏魯木齊提督抵陝借撥軍械疏

再_臣於同治四年四月初二日接奉三月二十六日

上諭成祿前經簡放烏魯木齊提督俟行抵陝省卽由該督撫一面奏聞一面催令前進等因欽此查該提督成祿業於三月十二日抵陝_臣與接見一次旋卽催令束裝前進並未停畱計此時早已行抵甯夏矣伊犁參贊大臣聯捷頃由山西帶領黑龍江馬隊官兵行抵省城據稱前因黑龍江庫存軍器無多所領兵丁並未發給器械經該參贊奏准由山西籌辦所解火鎗

聖鑒 卷九
三
弓箭等件不敷應用昨在途次奏催尙未解到該參贊急思欽
遵

諭旨卽帶所部官兵星速趲行以副我

皇上眷念西郵之至意因與臣商及此項軍械暫就陝西借給
以期迅速臣維甘省肅州軍情正在喫緊之際該參贊自應遵
旨星速赴援以解危急當飭陝省軍需局趕緊製辦火鎗弓箭
等項給發該軍攜帶前進俟晉省運解此項軍器到陝時就便
扣收歸款臣與彼此面商意見相同現在製造粗備不日卽可
前進理合附片陳明伏乞

聖鑒謹

奏

保奏收復漢南郡縣出力員弁疏

同治四年四月三十日

奏爲遵

旨查明官軍疊破賊壘收復漢南郡縣各城兩次在事出力員弁彙案擇尤保奏籲懇

恩施恭摺仰祈

聖鑒事竊臣於同治二年八月欽奉

諭旨督勦漢南逆匪適值援軍潰退漢郡淪陷賊勢益見鴟張兼復窺伺川界經臣督率諸軍力扼青石關各處要隘旋率親兵果毅果後各軍由廣元以出甯羌並分軍由梨坪閒道以趨

沔縣而飭蕭慶高何勝必率湘果中右兩軍仍由青石關出師
逕搗漢中十二月二十五六日復值石逆中旂股匪由秦州敗
竄略陽窺擾甯羌經周達武曾紀鳳率師堵剿該逆折竄沔縣
境界劉嶽曙派兵截其尾隊會蕭慶高等攻破法慈院新集各
巢漢郡大隊逆匪業已竄動中旂與之合併湘果諸軍跟蹤躡
剿乘勢收復漢中府城旋復大破上元觀賊壘克復城固洋縣
二城既又收復西鄉縣城敗匪悉數東竄曾經臣將實在情形
先後馳

奏欽奉兩次

上諭著將此事出力文武員弁核實請獎毋許濫冒等因欽此

欽遵在案嗣值各營勦辦藍曹蔡啟各逆往返奔馳各將領無暇查開保案以是延未出奏茲據各該營查明實在出力員弁開單請獎前來臣伏思論功行賞必核其勞績之多寡大小分別等差始足以昭平允而資激勸此次逆匪盤踞漢南窺伺巴蜀多至二十六七萬人眾寡本不相敵會值金陵圍急各逆酋意見參差兼聞我師三路會勦之謀數逾十萬逆黨震於虛聲共相驚懼合謀圖竄諸軍趁勢進勦連復數城此皆仰賴皇上威福非戰之力惟各營將士衝鋒冒雪晝夜奔馳而於攻破法慈院上元觀各賊壘以及克復城固洋縣兩城斃賊最多實屬著有微勞而湘果中右兩軍自漢郡失陷之後賊燄大張

意圖竄擾川北蕭慶高等督率新挫之眾竭力扼守既歷四月
飢寒交迫而銳氣不衰且將中旂逆黨追勦甚多核其勞績實
較他軍爲優臣謹將各營所開保案逐加確核擇其尤爲出力
者分別繕單請獎不敢稍涉冒濫合無仰懇

天恩俯准給予獎敘以示鼓勵惟劉嶽昭所統果後一軍事竣
後卽調赴敘南其中出力員弁前在四川尙有勦辦高縣雙龍
逆匪應行保獎之案不知曾否出奏容俟咨查川省奏保後再
由臣核明勞績懇加

恩典除將擬保千總以下各弁造冊咨部核獎外所有查明疊
破賊壘克復漢南郡縣各城兩次在事出力員弁彙案擇尤保

奏緣由理合恭摺具

奏伏祈

皇太后

皇上聖鑒訓示謹

奏

附請卹陣亡將弁疏

再查上年湘果兩軍進剿漢南攻克法慈院牟家壩新集上元
觀等處賊巢並克復城固洋縣兩城節次與中旂髮逆藍逆等
匪接仗其時各將士更番迭戰衝鋒銳進湘果中軍陣亡遊擊
舒經畬等八員湘果右軍陣亡副將卿士祥等十一員經蕭慶

高何勝必查明呈請

奏給卹典漏未附奏五月間蔡啟兩逆竄出長安縣屬之尹家衛及盩厔縣屬之店子頭焦家巷樓觀臺塔兒峪並跟蹤追勦逸賊沿途在西南溝槐樹關彌陀院宗家營鐵鑪岔八閣坪四畝地等處打仗陣亡之員除已經隨摺奏請各員外尙有因一時倉卒未及查悉者計甘肅河州鎮總兵曹克忠所帶撫標各營陣亡守備黃洪勝等七員又湘果中軍陣亡參將廖復勝等二十二員湘果右軍陣亡遊擊周萬祥等九員並驍騎營之守備李續傑雄毅營之千總鄭洪福撫標右營之藍翎把總夏興魁以上共計六十員名均係冒險赴敵奮勇捐軀實堪憫惻理

合彙案分別補繕清單伏懇

皇上天恩敕部照例從優議卹以慰忠魂除將其餘傷亡兵勇照例辦理外謹附片陳明伏祈

聖鑒施行謹

奏

附請將奪獲賊馬添設撫標馬隊疏

再陝省軍興以來額兵久缺前經變通章程籌畫糧餉選補撫標兵丁一千五百名城守營兵丁五百名按日籌給口糧餉銀飭令署撫標中軍參將彭體道署城守營副將林春督率認真操練以實營伍而備緩急業將辦理情形兩次

奏明在案惟查新募兵丁皆係步隊設遇賊馬奔衝勢難抵禦久擬添設馬隊藉資得力而苦於購買馬匹之資無從籌款本年正月初間甘省敗匪分股回竄陝境經臣調派各營兜擊截剿殲除殆盡奪獲賊馬多匹當飭彭體道挑選臚壯戰馬一百匹招募馬勇一百名逐日操演期於節省馬價之中藉爲整頓營務之計查撫標營制馬兵一名騎馬一匹每年額支餉乾等銀二十五兩六錢六分糧料一十一石四斗二升按照時價核算每年每名共需餉乾糧料銀九十四兩一錢八分現在庫款支絀不得不撙節辦理擬將此次所添馬兵一百名每名每月酌給口糧銀三兩六錢馬乾銀三兩九錢計每年每名需銀九

十兩另設哨官二員管帶每員月給薪水馬乾長夫銀十二兩
又在百名之內挑選什長以資訓練約束現值操演之初酌給
馬夫三十名以便採買草料餵養馬匹俾各兵認真演習免致
曠誤其馬夫每名每月發給口糧銀二兩四錢約以百日爲期
俟馬匹操練精熟卽歸各兵自行餵養以節糜費所有弓箭鎗
械由軍需局製造給領遇有征調應添旂幟軍械長夫雜費等
項再行隨時斟酌辦理該營馬匹如有倒斃隨時領價買補仍
不得逾十分倒二以符定例以上馬乾自同治四年二月初一
日起支官兵薪水口糧自二月二十一日起支如遇閏月小建
分別加增扣除以示體恤而歸核實至撫標城守各營官馬乾

銀兩向歸實任全支今撫標馬兵營制係屬新設而城守營尙未設有馬兵應請嗣後在省營官無論正署支給五成馬乾其調營換防離任營員一概停發俟將來兵歸原營時再照舊額辦理據軍需局司道會詳請

奏前來所有現就奪獲賊馬添募撫標馬兵派員操演以資備禦緣由除彙案咨部外理合附片陳明伏祈

聖鑒訓示謹

奏

密陳甘肅軍營積弊疏

同治四年五月十二日

奏爲甘省軍營積弊已深急須整頓以維大局恭摺密陳仰祈

聖鑒事竊維甘省自逆回構禍以來我

皇上宵旰憂勤籌兵籌餉日期底定西陲又安黎庶各路統兵大員月有捷報似乎指顧可以蕩平然而弊竇日覺滋深賊勢卒無大損臣每遇由甘來陝員弁詳加查詢則所報攻克城池巢窟其所斬馘實不幾何每一進攻輒虛其數面以使之走以故此勦彼竄殄除之數無幾而蹂躪之地轉多

朝廷覽其奏報以爲克城破壘收復地方勦勞卓著安知其流弊之至於此哉回黨雖多其大隊逆酋不過數股使就渠魁所踞之地環攻而聚殲之勦一股卽了一股則逆勢挫傷不過數四大舉餘黨自當獸散然而各統將不肯出此者不但慮合圍

麤戰勝敗難期而且曠日曩時無赫赫可見之功不如擊之使走則捷報頻聞可爲倖功邀賞之地此其弊之在於冒功者也雷正綰所部二十九營今增募至四十餘營陶茂林所部十七營今增募至三十營曹克忠所部十四營今增募至二十餘營營數日增而勇數究未能益由向以五百人爲一營今則每營實數不過三百餘人進戰之兵無幾而虛糜之餉愈多且聞各軍所派赴鄂赴豫募勇之將頗多招收遊勇捻匪以充其數其所立之營官百長多非其人甚者所派各處富家子弟捐助銀米者以當之以故沿途滋擾毫無紀律此其弊之在於冒餉者也軍營保舉向從優厚良以行役辛苦戰陣艱危非予以逾格

恩施無以獎勤勞而資激勸今則被參之劣員屢黜之謬品往往濫廁其中以獻金納贄投拜門牆之人置諸負盾荷戈衝冒鋒刃之列已革職者立請開復居末僚者驟加優保至於隔省牧令亦不難借勸捐運糧等項勞績以酬之

皇上以甘省行軍較苦無不曲意允從於是軍營之中別開賣官鬻爵之捷徑流品猥雜賄賂公行此弊之借軍功以納賄者也甘省地方著名瘠苦民間儲蓄本屬無多近值兵燹累年耕種尤少各營採買軍糧固將藉資接濟然使給予價銀尙可源源販運乃各營勒捐勒派至再至三或竟懾以兵威責令輸納甚且蔑視軍律肆意搜掠民間蓄怨既深遂亦集團相抗強者

幸獲苟免而弱者死於非辜竊維

朝廷命將出師本以救民爲事今統兵者旣無地方之責又鮮仁愛之心遂至疾視窮黎重加荼毒故近來甘省之患不在賊而在勇如其積而愈深勢將激而生變此弊之藉行軍以事虐者也凡此數端均屬行師之大戒有一於此尙堪僨事顧茲諸弊之叢集實爲有識之深憂祇冀督臣楊岳斌迅速赴甘力圖挽救不謂逆氛北犯局勢乍更環顧甘省任事諸臣無能膺茲重任者恩麟之昏庸陶茂林之貪劣固足以壞甘事而有餘雷正綰向著勇略聞近吸食鴉片嗜好特深恐亦難期振作都興阿達心而懦穆圖善忠勇寡謀他如玉通成祿聯捷諸人尤難

委以一路之寄且以甘省一隅之地而統兵大員專摺言事者
已至八員之多意見紛歧莫相統屬所謂眾人共與一瓢其不
至破壞者幾希督臣楊岳斌每與臣熟商深慮積弊之太重事
權之太分不知所以爲補救整頓之計比奉兩次

諭旨飭令率師赴東直一帶各營弁勇聞之意固欣然該督臣
遵

旨東行亦可藉釋重負獨臣旦夕憂慮竊恐事機之壞日積日
深欲不言則恐負

朝廷而言之則將招怨謗顧念甘事壞則陝必不支是以不得
已而卒陳之伏祈

皇太后

皇上俯念西陲大局早決

廟謨憫眾庶之阽危拯斯民於水火如楊岳斌必須東行卽懇
特簡重臣總司兵柄庶幾甘事不至潰決大局尙可支持不勝
迫切待

祈
命之至所有甘省軍營積弊急須整頓緣由理合恭摺密陳伏

皇太后

皇上聖鑒施行謹

奏

會奏勦撫陶營潰勇疏

同治四年五月十二日

奏爲勦撫陶營潰勇擒獲首犯正法並將餘眾分別遣畱以弭後禍恭摺會奏仰祈

聖鑒事竊

臣

蓉前因甘肅提

督陶茂林所部勇丁潰逃入陝沿

途搶掠滋擾不遵開導解散當將派兵勦撫大概情形會同

臣

岳斌馳報在案旋據派往曉諭之署中軍副將彭體道遣丁密稟該潰勇馬隊頭曰張起德蘇興隆經該副將反覆開導尙知悔悟而步隊頭曰高選清卽高文義桀驁難馴語多不遜該副將再三勸誘卒無解散之意輒敢擁眾由寶雞拔隊直趨郿縣盤屋鄠縣聲言欲赴子午峪大峪口駐紮並據郿縣知縣高偉

會稟報該勇在第五村一帶肆行擄掠焚殺與賊無異等情臣
蓉竊查該叛弁高選清以臨敵潰逃之將擁眾數千到處滋擾
屢經曉以利害給資遣散卒無悔悟之心仍沿途蹂躪鄉村攻
撲寨堡竟敢深入盤鄂逼近省垣黨與繁多情懷叵測若不懾
以兵威稍示懲創竊恐一出陝境勢遂鴟張鄰近楚豫各屬將
遭蹂躪之慘於是會商臣岳斌親督所部七營奴才德興阿亦
選派馬步各隊於初四日督同彭體道管帶撫標三營前往攔
截並飭彭基品王守基各率所部由鄂縣後路躡追以杜回竄
之路伊犁參贊大臣聯捷適帶馬隊抵陝亦卽邀同常明札拉
芬偕往掠陣以助聲勢維時該潰勇連夜竄踞長安縣屬之梁

家橋義井寨各堡及見官軍出隊列陣高文義輒敢督眾施放鎗礮迎敵抗拒彭體道麾眾鼓勇而前張起德亦反戈相向殲眾二三百名餘眾遁入堡內堅閉不出臣等親督各軍四面環逼復將前列抗拒之匪悉數斬馘蘇興隆尋縛叛弁高文義獻出眾始懼怯相率棄械投誠約計三千餘人臣等勒令繳出馬匹器械派員分起押解省城其乘閒竄逸各匪亦經彭基品設伏擊斃數十名截獲黃玉魁等四百五十餘名騾馬一百四十餘匹所有白家寨芙蓉村各堡踞勇一律搜清均皆繳械乞撫當卽分飭各營押帶降眾駐紮城外一面查點造具名冊分別河南山東湖北湖南四川各省籍貫酌籌資斧繕給路票分起

遣回原籍並咨行各原籍督撫及沿途地方一律彈壓護送勿
任逗遛滋事復就其馬隊中挑選膘壯二百餘匹照依上次奏
定章程操演歸伍以備陝省邊防之用數日以來安置粗畢
等伏查該叛弁高選清卽高文義由勇丁保至參將不思力圖
報效輒藉甘省糧餉不繼率眾潰逃沿途搶掠姦淫傷斃民命
既經臣等派員屢次開導不遵解散意圖擁眾橫行蔓延爲害
及至官軍圍捕猶不俯首就擒膽敢恃眾抗拒實屬悖逆不法
遵卽恭請

王命將高選清卽高文義就地正法梟首示眾一面將犯事原
由咨行甘肅各營及陝邊各屬張貼曉示以昭炯戒至張起德

首先就撫隨同勦捕足見心本無他蘇興隆縛獻首犯尙知愧奮該二員均已保至遊擊都司應請從寬免議至竄赴甘肅兩當境內潰勇業據駐防鳳縣之雄毅軍劉精稟報該勇全股五百餘名俱係川人竄至羅漢寺經該軍會漢鳳營遊擊郭興阿督率兵團馳往彈壓該頭目魏學成率黨繳出鎗礮器械悉數就撫給發路票資遣回籍其竄赴百花川勇丁一千餘名經該營追至上台地方有籍湖南貴州不願同行者四五十名沿途乞撫其餘川勇拋棄軍械已由畱鳳關竄向畱壩而去並據兩當縣函稱通渭等處尙有另股潰勇南趨徽縣小道竄向略陽近聞此股因被前途團勇攔阻仍復折回等語該潰勇如果改

道回川勢將由鳳縣以趨棧道臣隨飛飭劉精嚴加堵截勒令
繳出軍器始准放行如不遵依卽行痛加剿辦一面馳檄漢南
各府州縣集團嚴備並咨四川督臣駱秉章飭屬一體防範妥
爲安插惟現據汧隴鳳翔各州縣稟報陶營後起潰勇一千餘
名攜帶器械旂幟又已陸續入陝前隊已過鳳翔除飛飭劉精
率所部雄毅軍就鳳縣攔截並檄彭基品王守基由岐山迎擊
勿任紛竄滋擾所有勦撫陶營潰勇擒獲首犯正法並將餘眾
分別遣畱以弭後患緣由謹合詞恭摺由驛馳奏伏祈

皇太后

皇上聖鑒訓示謹

奏

訊明陶營弁勇潰散緣由疏

同治四年五月十二日

奏爲訊明陶營弁勇潰散緣由謹將所供情詞據實具奏請

旨派員覈實查辦以祛積弊而免效尤恭摺奏祈

聖鑒事竊查陶營潰勇經臣會同督臣楊岳斌等督兵圍捕分

別勦撫遣畱之後因念該勇等合六七十之眾同時潰散事屬

罕聞今高文義等既經擒獲自應推究潰散之由與一切軍事

情形逐加體察爲將來補救整頓之計當經督飭西安府知府

呂備孫訊據高選清卽高文義供稱陶提督所統共計二十餘

營每營勇丁實數僅止三百餘名陶提督曾由鳳翔隨帶回女

並眷屬赴甘其弟陶生林陶兆熊陶萬成均皆攜有婦女在營
惟陶光明尙無家眷陶生林綽號三閻王性情尤爲苛刻陶提
督每遇紮營先將民房折毀並令兵勇在鄉梭尋婦女回營挑
選畱宿至拔隊起程之際始行放回抵甘以後陶提督常住蘭
州省垣本年正月初六日始赴定安營內自同治二年十二月
發過餉銀後僅於三年七月及四年三月發給各營餉銀二次
營官又多剋扣是以每勇僅得銀一兩三數錢不等口糧麪斤
亦祇發過十餘次不敷餬口陶提督傳令各營兵勇下鄉搶擄
麥糧自行磨麪充飢仍於月餉內扣除麪價銀兩因此各營軍
心解體怨恨滋深自入甘境屢次與回逆打仗馬步不敵每仗

不過傷斃數賊通計前後殺賊不滿百名之數等語訊之張起德蘇興隆僉供上年領餉一次後於十一月發過步勇每名餉銀六錢本年三月又發步勇每名餉銀七錢馬隊亦共祇發過銀一兩九錢既逾一年之久並無口糧可領以致兵勇潰散伊等招撫不住祇好隨同彈壓來陝並稱曾經謁見護理陝甘總督恩麟面諭會發餉銀十六萬兩並有每勇格外賞犒銀二兩該兵勇等均未領過等語摘傳馬步各勇陳照祿劉廷獻郝金城陳占魁等質訊眾口一詞臣愚竊謂現當時局艱難之際無論文臣武臣吏事軍事皆當以操守廉潔爲先文臣不廉則無以表率僚屬而官常以壞武臣不廉則不能拊循士卒而怨讟

以興況甘省回氛猖獗餉項支絀爲統將者非躬自刻勵與軍士同其甘苦何以資鼓舞而張撻伐陶茂林身爲提督大員統領萬餘之眾匪惟不能加意體卹與同休戚且於各處協解餉銀任意剋扣致令兵勇灰心將士解體實屬有負委任現據張起德等供稱甘省發過餉銀十六萬兩雖未悉其虛實惟但以陝省協餉計之自上年正月以來先後解過銀十萬三千三百餘兩卽以此項分撥各營每勇亦當有七八兩之數何以僅給一兩有奇至高選清等所供陶茂林貪淫刻薄缺短勇額縱擄民糧捏報戰事各情雖係一面之詞遽難憑信惟聞該提督前在鳳翔收納回女所部將領紛紛效尤其所設營官多派兄弟

親屬充當以專其利勇數實不足額又於製造旂幟號衣各項均將各勇月餉銀兩扣除軍中早已嘖有煩言今據該弁勇等供稱各情未必盡屬無因臣與陶茂林同籍湖南向曾相識若竟瞻徇情面不以

奏聞竊慮積弊相承軍心益渙於甘省大局關係非細伏祈皇上敕下陝甘督臣楊岳斌於赴甘後澈底查明覈實辦理庶期稍挽頽風嚴申軍律苟前轍不致再蹈斯後效尚可徐圖臣爲整頓甘省營務起見是否有當伏祈

皇太后

皇上聖鑒訓示施行謹

奏

附請另撥直東防軍疏

再臣頃奉五月初五日

上諭前因直東軍情緊要諭令楊岳斌移師會剿現在陝西潰
勇急須剿辦著該督即將此事辦結後再行候旨遵行其蔣凝
學一軍現在行抵何處如已行抵陝境即由該督飭令隨同征
剿以厚兵力其甘肅兩當境內亦有潰勇二千餘人滋擾並著
楊岳斌等就近撥軍扼剿等因欽此查陶營潰勇業經臣等辦
結其分竄兩當境內一股多係川人意圖由棧道回蜀經臣飛
飭劉綽派兵勒繳軍器並檄漢南各府州縣集團嚴防或者尙

無大害惟甘省西甯肅甘一帶逆蹤蔓延安定自陶茂林軍變之後賊燄頗張蘭州情形實覺喫緊非得督臣楊岳斌督師前往恐無以救省城之急甘省士民盼望綦切現在直東一帶軍情不知何似如其勢已稍緩似可改派湖北記名提督成大吉一軍前往扼紮以固畿疆門戶成大吉係屬李續賓兄弟舊部其爲人樸勇穩練所統馬步二十餘營尙能恪守李續宜當日規模且與捻匪相持日久熟悉逆匪詭變情形足資得力如蒙皇上允准則甘省可無震動之虞而直東亦資屏蔽之助臣愚昧之見是否有當伏候

聖裁至蔣凝學一軍現據潼商道蔣徵陶稟報頃接該道四月

十七日來函已由河南信陽取道荆紫關赴陝計不日可以到
關合併聲明謹

奏

據實陳明疏

同治四年五月二十三日

奏爲據實陳明以紓

聖廛事竊

臣頃奉

上諭德興阿奏甘省潰勇東犯陝境暨請飭聯捷暫駐陝省各摺片陶茂林潰勇結隊東犯節據聯捷劉蓉連章入奏此次德興阿所陳各情與劉蓉前奏大略相同此項潰勇經劉蓉派令彭體道前往招撫該潰勇要求路票需索欠餉種種刁難現已

趨至鄆縣迤東連夜舉放號火居民驚惶逃避距省城僅七十
里亟應迅圖勦辦以伐狡謀前因劉蓉奏該潰勇甘心叛亂一
意東趨曾經嚴諭該撫派兵實力扼堵並將脇從之人分別遣
散現在勇眾已近省垣劉蓉並不亟思堵勦輒令其在城西牛
洞梁家橋等處地方就撫是其臨事毫無布置有希圖了事之
心無論該潰勇設謀兇狡不肯甘心就撫卽令詭詞馴順仍復
肆意句結必致蔓延爲患貽害鄰封該撫自問其能當此重咎
耶著劉蓉凜遵前旨飭令前次派出之王守基等分路兜擊實
力勦辦如實係脇從之眾一經懲創卽肯將軍械馬匹呈繳者
自不妨分別遣散以施法外之仁其省城防守事宜卽著德興

阿實力防維毋稍疏懈聯捷現駐陝西省垣楊岳斌身任兼圻
尤屬責無旁貸著卽整頓隊伍會同劉蓉所派員弁合力進擊
將不法潰勇盡力殄除以靖地方將此由六百里諭令知之欽
此並准德興阿咨送奏稿前來伏查陶營潰勇竄入陝疆雖眾
至六七千人情懷叵測然但以假道回籍爲詞未敢公然背叛
臣慮其一出陝境卽猖狂不可復制鄂豫各省邊疆將罹其害
是以密檄駐紮商州之鎮西三營由藍田進擊遏其東竄潼商
之路檄遊擊陳照臺胡得成率省標三營由藍屋啞柏鎮橫截
以出遏其南竄南山之路檄彭基品王守基馬步六營由寶雞
躡擊遏其回竄棧道之路然慮諸軍未集之先該潰勇聞風紛

竄則州縣殘黎又遭蹂躪之慘因復派弁四處宣諭該潰勇等但不焚殺滋事卽當貸其死命五月初二三日前鋒已過鄆縣彭體道自盩厔來見據稱張起德蘇興隆所帶馬步各眾真心歸順惟高選清步隊三四千人首鼠兩端漸肆焚殺經該副將列隊規勦始各伏地乞降等語臣謂該潰勇人數眾多如不繳出旂幟號衣馬匹器械分起解散難保不蓄異謀且高選清自稱統領煽亂眾心若不縛出正法亦何以彰

國憲遂於初四日邀同督臣楊岳斌等率師親往勦辦及抵梁家橋高選清竟敢率眾出堡拒戰旣殲三百餘人始各棄械就撫維時德興阿等尙在二三里之後並未目擊情形旋值天雨

淋漓遂各策馬先返臣與楊岳斌冒雨駐隊勒令各降勇將器械馬匹悉數繳出派兵分起押赴省城並將所擄婦女分別安置初更以後始相與並轡而歸不謂德興阿於是日發摺竟以探聞撫臣專意主撫等語聳動

朝廷譎張爲幻此誠事之不可解者也上年五月蔡啟兩逆竄出大峪口時德興阿倉皇謂臣宜速調金順馬隊駐守西關一面嬰城站堞臣謂賊遠來不測虛實不宜閉城以示之弱應卽派隊迎擊戰而不勝守固未晚且城中糧儲空虛徒使人心惶擾於事何濟因派兵逆擊於尹家衝稍挫兇鋒該逆遂旁趨鄆縣不料德興阿竟以省城危急等語具疏入

告臣當面詢危急情狀該署將軍乃言實因不諳漢文不審詞語輕重如將來奉

旨詰問當爲辨明臣方信以爲實迨奏畱荊州將軍穆圖善步

隊六營畱陝會勦德興阿忽爲臣言穆圖善祇肯守城不肯率

師進勦旋向穆圖善言謂臣嫌其隊伍不整紀律不嚴不欲令

其前進及臣與穆圖善面相質對則彼此均無是語其後在盩

屋軍營德興阿忽遣所親語穆圖善曰聞比與撫臣不和不妨

將因何不滿意之處詳書見告當代爲具摺陳奏穆圖善正詞

卻之旋卽舉以語臣曰此人每事播弄意在離閒誠不知是何

肺腸我固不爲所惑竊慮他日共事之難也臣以爲是時相處

日淺誠信未孚亦未嘗以之介意此次潰勇紛竄事體尤小卽無督臣大軍亦不難從容辦結乃德興阿故作張皇以致頻煩聖慮伏思臣既忝膺封圻責任綦重無論內修守備外固邊防皆當周慎小心卽城守事宜亦屬責無旁貸雖自知才力短絀智慮淺闇要不敢稍涉疏懈以負

皇上委寄之隆德興阿平日聲名與其人品心術計亦久在

聖明洞鑒之中臣與共事一城知其所見較小遇事優容亦尙無大相抵牾之處此種瑣屑細故本不當上瀆

宸聰獨慮以後或際事會該署將軍輒以不根無實之詞張皇入

告無當地方之事勢徒增

宵旰之憂勞不得不先事陳明以紓

聖廬謹據實縷悉上

聞伏祈

皇太后

皇上聖鑒謹

奏

劉中丞奏議卷九終

劉中丞奏議卷十目錄

官軍攻克階州元凶授首疏

附陶營後股潰勇遣回原籍疏

附請將協甘餉項撥歸督臣核發疏

附陳派兵防剿定邊情形疏

附報協濟甘軍餉銀軍火數目疏

附請將果後營出力將官獎敘疏

揀員請補要缺副將疏

揀員請署陝安鎮總兵疏

附報籌撥聯參贊馬隊軍械疏

查明知縣誤被揭參據實昭雪疏

附請豁免四廳州縣民欠錢糧疏

附報協濟甘軍餉銀軍火數目疏

請獎殲除趙村踞匪出力員弁疏

陳陝省凋敝情形疏

定邊防軍屢捷復撥兵扼防鄜延保定疏

附陳派兵防堵潼關疏

附陳派兵防堵邠隴鳳略疏

轉運甘肅軍糧艱難情形疏

籌撥倉糧接濟甘軍疏

奏雷曹諸軍失利急圖補救疏

附請催各省協甘月餉疏

附酌量緩急派防潼商疏

附請飭陳國瑞等攔截捻匪疏

遵旨籌撥滿營馬價疏

登口之考言卷一 正金

劉中丞奏議卷十

湘鄉劉 蓉著

官軍攻克階州元凶投首疏

同治四年五月二十三日

奏爲官軍攻克階州城池元凶投首餘黨悉數殲滅謹將疊次
攻勦及現在克復大概情形恭摺馳奏仰祈

聖鑒事竊臣前將官軍疊平賊壘勦除竄匪各情奏報後疊經
督飭蕭慶高等乘此聲威掃除餘壘期拔堅城而殲巨憝去後
嗣經湘果英毅武字彝字果毅達字各營歷次攻擊三官殿龍
王廟踞逆斃賊多名並增修卡牆於舊城山腳回回坪以阻賊
營運道疊次出隊攻勦俱有斬馘二月二十九日龍王廟賊目

李國厚率眾一百二十四名繳械乞降蔡逆意圖復占此巢增兵於半坡兩壘並分股搶上山梁紛擊鎗礮我軍乘夜圍逼拋擲火蛋火箭加以鎗礮矢石該逆應接不暇突圍而走湘果中右兩軍各營四面趕殺殲斃多名落崖死者亦復不少隨將逆壘踏破奪獲鎗械多件於是胡中和蕭慶高復飭各營添修長濠於舊城山河壩等處以扼之三月初九至十六等日該逆屢次衝突均被我軍擊退日有斬擒十九日周達武於城東覆土填濠啟逆率隊出戰各軍分路鈔截伏兵齊出斃賊一二百名生擒僞都統張姓易姓二名僞先鋒四名餘賊十餘名受傷者無算二十二日舊城山賊壘糧盡援絕哀呼求降胡中和蕭慶

高勒令繳出軍器擒獲賊曰僞先鋒楊興華楊洪順並餘逆一百六十八名訊係積年老賊概予正法其餘越壘竄逃各匪亦經悉數殲除奪獲鎗礮旗矛多件二十五日胡中和蕭慶高派隊圍攻龍王廟下坡逆壘未克二十七日進攻三官殿以上兩壘賊中藥盡計窮情急乞降蕭慶高揮軍直進登時踏破其壘共計降眾六百餘名惟三官殿後地字營僞都統蔡又九沈先鋒等八十餘人首先投誠反戈助陣當准其隨營戴罪立功其餘僞都統蔡老七蔡老五范老三僞先鋒艾姓林姓沈姓張姓及其黨與共五百餘人多係蔡逆衛隊死黨窮蹙始降當卽分別正法其龍王廟下坡逆壘經蕭慶高差弁誘降該賊曰僞統

領蔡老二意尙猶豫維時城賊悉眾來援胡中和恐其中變揮
軍破壘而入逆眾持械抵拒立被我軍格殺殆盡其踰垣而遁
者亦皆斬獲共殲一百五六十名奪獲鎗礮多件守備蕭大光
力竭陣亡胡中和蕭慶高與周達武等會商由北山開挖地道
數處一面輪番出隊時作進攻之狀以疏其防該逆勢窮陰派
老賊呂大漢周得興攜帶黃綾密函偷赴岷州回巢求援當經
揆獲梟斬四月初十一兩夜蔡逆親率死黨由三官殿後攻
我隧道均經我軍奮擊大創而遁該逆以我軍四面環圍無隙
可竄旋於城中東西兩面開挖地道數處希圖穿越官軍營盤
卽由隧道潛遁亦經胡中和蕭慶高探悉情形卽時截阻由是

逆計益窮二十一日周達武約會胡中和蕭慶高劉鶴齡黃鼎等派隊爬城攻擊各營攜帶攔牌雲梯密抵城下拔去梅花樁數重不意玉皇觀三官殿逆壘鎗礮環施城上礮石紛飛火藥傾盆而下副將銜參將盧勝祥都司陳得勝守備羅本立把總彭才勝登時陣亡兵勇亦多死者胡中和偵知三官殿踞逆與城賊不睦於是草諭招降五月初二夜賊目偽監軍何士興叩關求見願率偽都統朱書榮偽統領龍生宜鄧洪有等眾投誠惟僞先鋒蔡老三卽汪平洋尙未允從懇請約期派隊前往以便獻卡內應胡中和與蕭慶高各派隊伍分路埋伏以防詐謀而禦援賊一面督隊趨上山梁朱書榮等密率其眾二百餘人

徒手出壘我軍揮隊直入餘逆爭相奔竄經我軍掩殺六十餘名蔡老三跪地乞降其時城賊不敢出援惟於城上大施鎗礮亂投石塊胡中和率隊逕逼城下爲礮石中傷鼻梁並擊落門牙兩箇仍復負痛督陣隨將降卒收畱入伍以渙賊志各營收獲鎗礮器械甚多五月十一二等日地道次第告成於是胡中和蕭慶高周達武江忠淑劉鶴齡黃鼎等會商定於十三日寅刻舉火轟城四更後各派四成隊圍守長濠以六成隊環列攻城胡中和蕭慶高率湘果中右及英毅各營由西北南三面而進周達武率武字達字果毅彝字各軍由東南及北城而進蕭慶高並與胡中和各派隊伍圍攻西門外玉皇觀逆壘時甫黎

明地雷響發轟倒城垣數丈北路各將士冒煙蜂擁肉薄先登其餘各軍填濠豎梯四面猱升而上該逆拌死抗拒鎗礮紛擊我軍鼓勇直前拋擲火蛋火箭延燒城內木柵房屋火光燭天賊勢慌亂突路湧出各軍扼巷截擊賊屍山積湘果中軍總兵彭義益英毅後營總兵蕭集山督勇陣斬偽昭武王蔡昌榮於巷內分裂其屍並生擒偽天將陳姓及偽巡部曹儒典等首逆多名惟偽啟王梁成富尙無下落或云被武字營擒獲其玉皇觀賊壘及西南兩面礮臺亦經我軍踏破刀砍矛刺血流成渠於是階城內外之賊悉數殲除無一名漏網者據蕭慶高飛稟前來伏查蔡啟二逆合四萬之眾回竄陝中經臣與荊州將軍

穆圖善等督飭諸軍痛勦於蓋屋境內降斬過半逮該逆敗竄入山又經各軍追勦擒斬六七千人既陷階城勢成負嵎幸賴四川督臣駱秉章督飭周達武江忠淑等軍越境會勦疊破堅壘並不時撥解餉銀接濟湘果彝字各軍用能併力協擊無虞飢潰前接蕭慶高函稱二月總可攻克臣愚竊慮西北兩路布置未周該逆或從此路逸出則城雖克而遺孽未殄終成不了之局因函致胡中和蕭慶高等務爲長圍坐困悉數聚殲之計即使時日稍淹而後患永絕究成長策並嚴飭各將領分段嚴防如賊從何路竄出卽惟何路將弁是問數月以來攻者悉其智力守者竭其狡謀幸託

聖主威福卒收殲渠掃穴之效洵足以伸

天討而快人心四川提督胡中和儘先提奏提督漢中鎮總兵蕭慶高謀畫周詳不避艱險該二員官階較大應如何獎勵之處出自

聖主鴻施記名總兵彭義益蕭集山陣斬首逆督率有方均請以提督記名

簡放副將銜參將劉鶴齡請以副將畱於陝西儘先補用並
賞加總兵銜候補同知直隸州知州黃鼎請以知府儘先補用
並

賞加勇號至周達武江忠淑等各統將應由四川督臣駱秉章

酌擬保奏其餘出力各營官仍請俟查明詳細情形再請先沛
恩施其疊次陣亡之副將銜參將盧勝祥都司王興發陳得勝
守備蕭大光羅本立千總袁泰興把總彭才勝七員奮勇捐軀
深堪憫惻均請

敕部從優議卹以慰忠魂除飭蕭慶高等查明梁成富實在下
落並飛咨護督臣恩麟速即派員辦理階州善後事宜外所有
各軍攻克階州城池擒斬元惡殲滅餘黨大概情形理合先行
由驛馳奏伏祈

皇太后

皇上聖鑒訓示施行謹

奏

附陶營後股潰勇遣回原籍疏

再陶營潰勇之由兩當縣南趨及汧隴續報後起潰卒經臣疊飭鳳翔漢南各郡縣並親兵營彭基品雄毅營劉精分別攔截如有抗違滋擾情事卽行就地勦除以弭後患茲據陝安道何丙勳署漢中府知府楊光澍稟報竄入漢南潰勇一千餘名業經委員會同地方官悉數遣散酌給口糧川資分起回籍其由廣元大路回川者七百餘名由青石關就近入川者二百餘名均經派委員弁押送川境交替該勇丁等沿途頗屬安靜並未滋事又據署佛坪廳同知樊繼英稟報竄入該廳潰勇一百二

十四名全數呈繳器械酌量道路遠近籌給川資繕發路票分起遣回湖南湖北陝甘各原籍安插沿途均未滋事等情並據鳳翔各屬州縣稟報後起潰卒聞省城已將高選清大股勦辦均各丟棄器械繕給路票四路分散回籍並經彭基品劉精探明汧隴鳳寶一帶現無潰勇蹤跡稟覆前來除再嚴飭各府廳營縣隨時確探防範並咨明各省將遣回勇丁飭令地方官妥爲安插外所有陶營後股潰勇均已遣回原籍陝境肅清緣由理合附片陳明伏祈

聖鑒謹

奏

附請將協甘餉項撥歸督臣核發疏

再甘肅提督陶茂林軍營餉銀軍火屢經陝省湊撥協濟按月彙開清單附奏在案自本年四月閒解過火藥鉛丸火繩之後因該軍勇丁潰竄入陝沿途滋擾未能起解餉銀迨此案辦結後資遣潰勇回籍需用盤費銀兩無款可籌不得不在備撥陶營協餉內分別動用旋聞陶茂林所部各營除潰散外所存不過十營復有零星散去者當經臣會商督臣楊岳斌於到甘後確查該軍實存勇丁及以後應協軍火餉項數目再行飭知陝局籌撥委解由楊岳斌核明轉發以昭核實頃奉

諭旨飭將陝省按月解供陶茂林餉項軍火改解曹克忠軍營

並製造帳房數百架一併解往以濟要需等因伏查督臣楊岳
斌已於閏五月初二日起程赴甘計期將抵蘭省陶營勇丁雖
多潰散而現存之勇仍不得不籌給餉銀以安其心俾免復有
譁潰之事所有該軍協餉擬仍飭陝局按月協解由楊岳斌核
發陶營勇丁之外如有盈餘再行分撥曹營較爲妥協免致顧
此失彼之虞除檄軍需局司道遵照辦理並將曹營帳房趕緊
製造解往接濟一面咨明楊岳斌查照外理合將陝省協濟甘
肅陶營軍餉仍由楊岳斌核明轉發分撥曹營以期兼顧緣由
附片陳明伏祈

聖鑒飭遵謹

奏

附陳派兵防勦定邊情形疏

再臣接奉同治四年四月初五日

上諭定邊一帶州縣並著劉蓉飭令該地方官妥爲布置防守嚴遏東竄賊勢毋稍疏虞等因欽此查臣前接雷正綰函稱北路敗匪有力攻靖遠東竄定邊之謀儻靖遠急不能破卽日將家小沈溺黃河祇畱悍賊竄陝等語臣卽飭令副將段登雲一軍馳赴定邊擇要駐紮以資防勦猶恐兵力單薄復咨准穆圖善商同都興阿抽撥西們克西克馬隊二百名並侍衛訥依楞阿副將趙有勝所部馬步駐防定邊其花馬池甯條梁亦經前

任安徽撫臣翁同書統帶直晉各軍扼守臣仍嚴飭段登雲及
延安各府縣會同各路防兵實力堵剿以免匪蹤窺伺嗣據稟
報該逆大股盤踞靈州屬之大水坑爲巢穴時赴界連定邊之
紅柳溝倉家灣杜家溝羊圈山石頭灣王家來灘木瓜溝等處
搶掠四月十二日段登雲率隊攻逐王家來灘股匪追殺七十
餘名生擒三名供係固原敗匪任老五鄒阿渾之黨十七日段
登雲會同營總貴陞副將趙有勝派隊設伏誘擊木瓜溝踞逆
殲斃多名奪獲騾馬刀矛不少該逆西奔羊圈山紅柳溝而逸
自是以後段登雲等屢次出隊攻撲各處賊堡少有斬馘該逆
退入大水坑老巢時出馬賊到處擄糧出沒靡定五月初七日

馬賊四百餘騎竄踞南山溝草渠地方擄掠段登雲貴陞趙有勝於初八日黎明出隊圍剿該逆捨命衝突並有另股馬賊鈔襲經游擊殷華廷都司李楚英奮勇擊退各軍追殺十餘里斃賊二百餘名奪獲騾馬旂幟甚夥初九日辰刻馬賊一二百名馱糧西走段登雲出隊追截該逆勢促拋灑穀糧縱馬而逸我軍追殺十餘名生擒三名就近解赴花馬池翁同書軍營訊辦初十日該逆大股竄至新安邊地方焚殺踞靖邊一百五十餘里經靖邊縣知縣徐錦江會營撥兵移知甯條梁精銳營出隊馳赴協剿又准督辦慶陽防務楊能格咨據精選營參將劉明泰探報回逆現踞紅柳溝楊柳溝等處分股由新安邊一帶東

竄窺伺陝疆距吳旂鎮四十里該鎮係安化定邊保安三縣交界之區路徑紛歧可通慶陽亦可達陝現在元城赴定邊大路尙形梗塞糧道阻滯盤獲被裹勇丁徐占彪訊稱此股盡係陝西回匪因與甘回意氣不投逕思東竄等語現經總兵魏添應飭派參將項上達率隊馳赴元城會同劉明泰相機前進剋日督率各營由五箇掌一帶進剿等因臣卽飛飭段登雲約會訥依楞阿趙有勝及駐紮花馬池馬步各營前往剿辦毋使匪蹤闖入惟查該處地勢平行扼控難周該逆蓄意東趨已非一日亟應嚴加剿洗以免竄越除飛飭段登雲及靖定各縣確探防剿如果賊勢猖獗應行添兵扼剿之處再由臣酌派數營馳往

協助以厚兵力而固藩籬外所有派兵防剿定邊屢擊竄匪獲勝緣由理合附片陳明伏祈

聖鑒謹

奏

附報協濟甘軍餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治四年三月分撥解過援甘各營餉銀軍火數目附

奏在案茲據軍需局司道詳開同治四年四月分共支過援甘各營餉銀二萬五千兩火藥一萬八千斤鉛丸一萬六千五百

斤火繩一萬九千丈火彈一百箇銅噴筒四十箇竹噴筒五十
箇火彈餅八百箇紙火箭五十枝引線一萬根擡鎗五十桿鳥
鎗五十桿戰箭二千枝大帳房九十架分別委解給領取有迴
文爲據臣覆查無異除仍飭該司道等竭力籌措源源接濟外
所有陝省同治四年四月分解支援甘各營餉銀軍火等項數
目謹繕清單恭呈

御覽理合附片陳明伏乞

聖鑒謹

奏

附請將果後營出力將官獎敘疏

再臣頃將漢南疊破賊壘收復郡縣各城兩次在事出力員弁
遵

旨查明擇尤保奏並聲明劉嶽昭所統果後一軍事竣後卽調
赴敘南其中出力員弁前在四川尙有勦辦高縣雙龍逆匪應
行保獎之案不知曾否出奏容俟咨查川省奏保後再行核明
勞績請獎奉

旨允准在案茲准四川督臣駱秉章以果後一軍勦辦高縣雙
龍場逆匪保獎各員已於同治三年五月二十日彙奏奉有
諭旨等因咨覆前來臣查該軍自同治二年十一月由川隨同
援陝馳抵甯羌適值強寇當前軍糧缺乏加以石逆達開中旂

餘黨竄擾略陽甯羌交界之地該軍士卒枵腹荷戈經統領劉
嶽昭加意拊循督飭將士分路兜剿連日冒雪忍飢攀躋山徑
擊賊於袁家河上朱壩黃官嶺等處殄其尾隊斬馘甚多繼復
會同湘果等軍先後收復城固洋縣各城核其勞績未便聽其
湮沒自應量加鼓勵以昭平允謹將尤爲出力員弁繕具清單

恭呈

御覽伏懇

皇上天恩俯賜給予獎敘以示激勸理合附片陳明伏祈

聖鑒訓示謹

奏

揀員請補要缺副將疏

同治四年閏五月十六日

奏爲揀員請補要缺副將以勵戎行而資整飭恭摺仰祈
聖鑒事竊照各省營伍員缺例准以軍營立功人員酌量請補
歷經遵辦在案茲查西安城守協副將文志因病出缺迄今日
久尙未補有人員所遺係題缺駐紮省城有巡查地方接遞餉
鞘人犯之責現值甘肅軍務正殷調派兵勇軍械軍餉往來絡
繹一切緝捕匪類彈壓操防在在均關緊要非素有威望之員
不足以資整飭查有現在軍營屢著功績之提督銜記名總兵
劉厚基勇略邁眾諳練戎機堪以先行借補該員業已保請總
兵記名今補副將與例稍有未符第該員出師最久未經補有

實缺亟須量爲變通以昭激勸而勵戎行未便拘泥成例合無
仰懇

天恩俯准將西安城守協副將一缺卽以劉厚基借補以重地
方俟日後遇有總兵缺出仍請

簡放如蒙

俞允陝境雖就肅清而甘肅賊氛猖熾仍須加意嚴防應請
敕部先行給予借補劄付一俟軍務告戢卽行給咨送部引
見以符定制臣爲營伍得人起見謹會同署固原提臣雷正綰
恭摺具奏伏乞

皇太后

皇上聖鑒訓示飭遵謹

奏

揀員請署陝安鎮總兵疏

同治四年閏五月十六日

奏爲揀員委署南山要缺總兵以資整飭而重地方恭摺仰祈
聖鑒事竊照陝安鎮一缺地處秦鄂交界之區向稱重鎮比值
兵燹之餘閭閻凋敝營伍懈弛尤賴總兵隨時認真訓練督率
稽察始足以資整頓現在該鎮篆務係固原提標左營遊擊烏
訥什護理查該員官職較小久護鎮篆誠恐難資彈壓擬卽飭
回本任其新補總兵魏添應尙在甘肅軍營到任需時未便久
懸要缺茲查有記名提督彭基品老練安詳諳悉戎務堪以委

令署理除檄飭遵照外所有揀員委署南山總兵要缺緣由謹會同固原提臣雷正綰恭摺具奏伏乞

皇太后

皇上聖鑒訓示謹

奏

附報籌撥聯參贊馬隊軍械疏

再伊犁參贊大臣聯捷帶領黑龍江馬隊官兵抵陝後因山西籌辦火鎗弓箭等件尙未解到商之於臣暫就陝省借領以期迅速俟山西解到軍器扣收歸款曾經附片

奏明在案茲據軍需局司道詳開馬鎗五十桿九龍袋三十副

木烘藥壺盧三十箇牛角式大皮藥壺盧三十箇六力馬弓一百六十五張絲弦一百六十五條戰箭八千枝撤袋一百九十二箇烘藥五十斤已照該營原單數目式樣趕造齊全並將發來破損烏鎗一百二十桿一律修理完好移知該參贊派員具領惟查陝省凋敝之餘諸物昂貴此次造撥軍械數目較舊有加不等晉省解還之件不敷扣抵而且工料價值亦屬不符自應各歸各省作正報銷免致轉轄將山西解還軍器另作收款抵撥各營應用以昭覈實現在該參贊尙欲添撥擡鎗帳房等項若再逐件加增驟難接濟具詳請奏俾免延誤等情前來

查聯捷所帶馬隊屢奉

諭旨飭催迅速赴甘與成祿一軍會合西征該參贊急思報効未可稍緩須與當飭軍需局酌撥糧餉帳房該參贊已於本月初八日起程前進除咨山西巡撫查照外所有陝省籌撥聯捷馬隊軍械現已起程赴甘緣由理合附片陳明伏祈

聖鑒謹

奏

查明知縣誤被揭參據實昭雪疏

同治四年六月十六日

奏爲查明知縣誤被揭參休致據實昭雪請

旨開復原官畱陝補用以彰公道而勵人材仰祈

聖鑒事竊照懷遠縣知縣鄒常泰經前署撫臣張集馨以病軀

懋棧諸事廢弛彙奏參勒令休致同治三年二月奉

旨俞允員缺另補在案臣到任後接據該員稟稱懷遠地處邊

疆土瘠民貧在北山尤爲極苦公事雖屬難辦無不竭盡心力
計共支應過境官兵四千名並陸續運解軍裝火藥餉鞘等項
又辦喇嘛差事迨甘肅甯夏靈州失守復調延綏鎮兵一千名
由懷遠而至定邊防勦需費浩繁百端籌畫遂致憂勞成疾肝
氣驟發曾經稟府轉請開缺蒙批照常供職儻難速愈自行詳
辦隨卽通稟各憲詎本年二月接奉行知勒休自問冰淵時懍
不知廢弛何事無端譴責心實不甘等情當經臣以該員參後
瀆訴此風斷不可長行司究辦適接西安府知府呂雋孫稟稱

查鄒常泰由儒爲吏樸實堅強察其居官民情愛悅聆其言論
吏事敏嫻原參戀棧廢弛各情曾經細加考核該員年力富強
並無疾病辦事周密絕少愆尤竊謂人才難得公道宜彰等情
具稟到臣一併批司確查去後茲據藩司林壽圖署臬司官銘
查得鄒常泰前已驟發肝氣稟府開缺未准維時前署延榆綏
道何丙勳誤聽人言因有兵差過境恐其貽誤率稟前署巡撫
亦未覆查遂以該員病軀戀棧諸事廢弛奏參勒休惟該員患
病先已稟請開缺其非戀棧可知且被參之後署任未到該員
辦理兵差運送軍火毫無貽誤是其並無廢弛公事尤可概見
覆加採訪該員樸實穩練精力正強實屬堪以起用等情出考

會詳請

奏開復前來臣維察吏之道要在區別賢否舉錯得宜始能澄
敘官方其貪劣昏庸者固不可一日姑容任其濫膺民社致乖
治道而平日居官勤慎並無劣蹟者正宜多方策勵俾知感奮
以成循良若不問虛實動登白簡卽無以示勸戒而服人心今
該員鄒常泰前任懷遠縣知縣既經西安府暨藩臬兩司查無
廢弛公事年力強壯並無疾病原參實由一時之誤臣復悉心
體察其材器實堪造就未便令其終身廢棄自應爲之秉公剖
白據實昭雪以免屈抑而昭公允合無仰懇
天恩俯准將前任懷遠縣休致知縣鄒常泰開復原官仍畱陝

西補用出自

逾格鴻慈至前署延榆綏道何丙勳謨聽人言將鄒常泰稟請
撤任以致前署撫臣張集馨據稟奏參休致該道爲專管上司
耳目較近人既有言並不細察輕率具稟至使屬吏竟遭廢斥
殊欠黜陟公明之道相應請

旨將前署延榆綏道現任陝西道何丙勳交部議處以昭儆戒
臣爲澄敘官方起見理合恭摺具

奏是否有當伏乞

皇太后

皇上聖鑒訓示飭遵謹

奏

附請豁免四廳州縣民欠錢糧疏

再陝省西同鳳漢興商邠乾等府州前被川髮回逆滋擾蔓延數十州縣當將所屬元二三年民欠錢糧以及應徵各款先後奏懇

恩施分別蠲緩並聲明續有蠲免之處隨時另辦在案茲據督糧道劉齊銜查得乾州甯陝孝義鎮安等廳州縣民欠三年夏秋本色糧石節次催徵無力完納應請蠲免等情由藩司覆核轉詳前來臣查該廳州縣被賊滋擾以來閭閻元氣未復實屬拮据異常咸甯長安等二十廳州縣均皆仰沐

皇仁准予蠲免該州等同係被災之區自應一律請豁以示體卹除地丁欠數無多應毋庸議外相應仰懇

天恩俯准將乾州甯陝孝義鎮安四廳州縣民欠未完同治三年夏秋本色道倉糧石概行豁免俾紓民力如蒙

俞允仍俟奉到

恩旨臣卽飭司刊刻騰黃徧行曉諭務令實惠及民勿許吏胥隱射滋弊所有查明被災廳州縣無力完納糧石續懇蠲免緣由理合附片具奏伏乞

聖鑒謹

奏

附報協濟甘軍餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治四年四月分撥解過援甘各營餉銀軍火數目附

奏在案茲據軍需局司道詳開同治四年五月分共解支過援甘各營餉銀二萬一千九百二十八兩七錢三分九釐一毫四絲火藥八千斤鉛丸八千斤火繩一萬三千丈銅火箭二百枝引綫二萬根藍白布大帳房八十二架戰弓五十張絲弦五十條銅弓勒子五十副牛皮箭袋五十箇紙火箭五十枝竹噴筒五十箇斬馬刀一百把馬鎗一百桿鐵鉞二十把鐵鑊二十把

戰箭一千枝雙手帶刀二十把均經分別發解給領取有迴文
為據臣覆查無異除仍飭該司道等竭力籌措源源接濟外所
有陝省同治四年五月分解支撥甘各營餉銀軍火等項數目
謹繕清單恭呈

御覽理合附片陳明伏乞

聖鑒謹

奏

請獎殲除趙村踞匪出力員弁疏

同治四年六月十六日

奏為遵

旨查明勦辦竄回殲除趙村踞匪在事出力員弁籲

恩給予獎敘恭摺奏祈

聖鑒事竊臣於同治四年二月十一日接奉本年二月初六日

上諭劉蓉奏官軍跟剿竄匪疊獲大勝一摺甘省回逆竄回陝西醴泉縣趙村地方經記名提督彭基品等督率各軍分路進剿於正月十一日馳抵趙村立將逆堡攻破斃賊甚多賊黨衝突官軍分隊緊追突有另股逆匪鈔襲副將羅洪德等奮勇衝擊賊勢披靡計殲斃悍賊六百餘名奪獲騾馬五百餘匹旂幟器械無算救出難民七八百名餘匪由淳化返竄甘界勦辦尙爲得手所有出力員弁著劉蓉查明保奏毋許濫冒等因欽此伏查甘肅逆回於本年正月閒由隴州回竄陝境經臣督飭彭

基品等晝夜跟蹤追擊屢挫兇鋒該逆旋即竄踞醴泉縣屬之趙村地方時值風雪交加各起官兵乘夜掩擊冒雪疾驅攻其不備立將所踞村堡攻克擒斬幾無孑遺由是陝境一律肅清至今未敢窺伺所有在事員弁實屬著有微勞自應量予獎敘以昭激勸謹將實在出力員弁分別繕單陳奏不敢稍涉冒濫合無仰懇

天恩俯賜給獎以示鼓勵其前次漏未查報之陣亡藍翎儘先外委孫得勝並請

敕部照把總例議卹以慰忠魂除將擬保千總以下各弁咨部核辦外所有查明追勦趙村踞匪在事出力員弁開單請獎緣

由理合恭摺具奏伏祈

皇太后

皇上聖鑒訓示謹

奏

陳陝省凋敝情形疏

同治四年六月二十四日

奏爲陝省凋敝特甚善後事宜無力舉辦懇

恩飭撥湖南釐金協濟甘餉以紓陝力而蘇民困恭摺縷陳仰
祈

聖鑒事竊維陝甘壤地毗連誼切脣齒自遘逆回之變三秦糜
爛厥禍遂延於甘今陝境粗安甘患仍熾雖各路大軍雲集而

糧餉兩絀日虞飢譁萬一不可支持則兵潰回猖其禍又將復歸於陝然則陝之不得不竭力援甘匪特迫於義所不容辭亦處於勢之無可諉者也臣自履任以來日以協濟甘餉爲亟計一歲撥解之款約四十餘萬金帳棚軍械一切在外在陝省物力已屬罄竭無餘然以之分撥甘省諸營不過涓滴之潤是以甘軍之責望於陝者無已嘗若吝而不予膜視而不相關然不知陝省之舍己芸人筋疲力盡已處於萬分竭蹶無以復加之勢謹爲我

皇上縷晰陳之陝省歲入之數專恃地丁一項額徵一百三十餘萬兵燹之後土地荒蕪上年所徵錢糧不逮原額之半今歲

秋糧稍可指望計亦不能逾其半釐金雖經舉辦而陸程不通舟楫貨物艱於轉運車騾奇貴費或倍於昔年富室凋殘買用積而不售加之兵差絡繹商販尤畏憚而不敢前此釐金之所由絀也米捐一項似乎月有所入然所收者多空票而少實銀緣逆回初起之時任事者無以贍軍輒借富室之銀以充餉而給之票每票以百兩五十兩爲率積多至三四十萬金今之捐生卽持此官給之票以投捐固不能拒而不納凡成數皆係廢紙僅尾數收入現銀以故入款猥多庫儲仍乏此捐輸之所以有名而無實也上年奏派已革藩司毛震壽就蜀設局勸捐又請推廣捐例並請官犯贖罪之條皆經部議覆准今開局已逾

半歲僅據報解銀一萬二千以後情形蓋可概見通計今歲所入極多不過八十萬金而解充甘餉者逾其強半其得謂陝力之未竭乎當臣率師入陝之時回氛雖已逾境然藍大順曹燦章蔡昌榮梁成富諸逆首豕突狼奔東西竄擾所部楚軍萬餘人征勦年餘略無暇日今幸階州克復諸逆首先後殲滅然北路之定靖鄜延西路之邠隴鳳略東路之潼關商雒處處當設防兵舊部既悉畱而難撤軍餉且有增而無減今親兵雄毅鎮西各軍欠餉已六七月湘果彝字各軍欠餉至七八月英毅一軍欠餉至逾十月通計積欠在五十萬以外各將士枵腹從戎但聞庚癸之呼終無飽騰之望將何以遏鄰氛而固邊圉乎至

於各鎮協緣營兵餉或欠至九季十季未發各營兵弁襤褸若
丐或傭工以度日或乞食以營生臣嘗目擊情形惻然動念願
以庫款支絀卒亦拱手熟視而無可如何他如州縣牧令廉俸
役食畱支款項亦苦不能盡給則視其征收錢糧之成數多寡
以爲權衡名示公允之施實爲撙節之計各州縣支應過往兵
差需費繁重而苦無所出其賢者則乞病開缺反以罷官爲幸
不賢者或藉以派之里社便其侵漁吏胥之追呼愈煩而閭閻
之情形益苦此營務吏治之難於整頓皆由地方凋殘庫款支
絀之故也從前東南殘破省分皆賴鄰封協濟未有反責以協
濟鄰封者准湖北當克復之後卽能以餘力兼濟下游水陸各

軍雖由撫臣胡林翼籌畫協宜亦賴地據上游坐收江湖舟楫
之利維時四川湖南廣東之貨船蟬聯而下駛江西安徽浙江
之商舶銜尾而上趨鄂省設局分卡抽收上下過江之釐歲至
四百餘萬故能緩催科之令以養民力推司庫之贏以贍客軍
民懷撫卹之恩士盈敵愾之氣上下孚洽譽望休隆則取資於
商而不求諸民推己之餘以濟人之乏之明效也今陝省釐稅
情形既已如前所陳則舍地丁而他無所入然而土荒不治物
力彌艱富商之貿遷於他省者既遭兵燹而盡喪其資其細載
以歸藏於私室者又罹回禍而並燔其舍以故不特無力捐輸
抑且無資本以爲耕種之費向有地百畝者今所種不過三四

十畝而州縣按故籍以征新餉則必取盈焉責以百畝之錢糧
派以百畝之差徭縣官之求索彌苛殘黎之脂髓殆竭臣雖察
悉情狀時加戒飭然苦於協餉之無出軍食之不給籌思無計
仍不能不以催科爲事爲州縣者百計搜羅以赴長官之急卽
亦不從其令而從其意由是憔悴顛連之眾益展轉於水深火
熱之中而撫字之術窮蘇息之望絕此臣所爲晝夜撫心愧憤
交集不知所以爲善後之圖者也西同鳳三府地最沃饒古稱
陸海今土地之開墾者十不二三而人民之死亡者十居六七
所以地境肅清已近兩年然有土地而無人民亦遂竟歸荒廢
向日繡壤相錯之地樹木叢生樞杈成拱或行數十百里不見

一椽之屋一瓦之覆炊煙晝絕豺獾夜嗥氣象殆非人境既屢
下招徠墾荒之令卒不聞有負耒耜而至者無廬舍以資棲止
無牛種以備耕耘無籽粒糗糧以供播種饗殮之計至於挈家
遷徙所費猥繁而隴氛未靖仍慮回竄秦中更無以堅其還定
安集之志此鄰省客民之所以疑畏顧慮而不敢來也臣前督
師漢南卽思以近省叛絕各產籌辦營田逮抵任後知庫款奇
絀其勢未可驟舉而今熟籌善後生財之法舍李悝盡地力之
語別無長策亟思招徠客民墾闢荒地興水利治農田以裕財
賦之源以垂經久之規然非於西北兩路重設防兵則新徙之
氓無所恃以固其志非於牛種籽粒廬宅各事薄給經費則遠

方之眾無所利以歆其情計自略陽鳳縣隴邠延鄜以達靖遠
彌互二千餘里約需防軍一萬二三千人始敷分布潼商一帶
亦當設守此項餉糈歲在百萬以外其他經費又頗紛繁今陝
省歲入之數如此其少而協甘之款又已如此其多加之責運
索糧時相敦促以義則不容辭以勢則無可諉而以力則萬不
能支是以臣與藩司林壽圖等無日不在憂思仰屋之中而於
本省善後事宜一籌莫展使不及今早自爲計卽更三年五年
土地之荒蕪如故錢糧之短絀如故而民氣之凋殘且將日甚
一日而不如其故陝事其可問乎甘事其能濟乎從古名臣佐
有爲之主治凋敝之國無不以愛養民力爲先務者諸葛亮之

治蜀王猛之治秦皆以閉關息民勸農講武爲事休養數歲俟其力既充裕而後用之故能轉貧爲富變弱爲強以著一時俊偉之績其規畫設施載在史策可考而知也今陝省凋敝情狀至於如此之極不及今與民休息顧反思策疲癯而迫使之竭脂膏以供餉糈驅瘡痍以備輸輓無論臣之蹇劣不能復自支持即使才力智略十倍百倍於臣等輩者爲之亦決不能有所展布何者民命所係卽

國脈所係戕元氣以求膚革之華伐本根而冀枝葉之茂自古迄今未有能濟焉者也伏思薄海蒼黎莫非皇上赤子而秦民積困至此尤宜在

聖主哀矜惻怛之中且今日稍寬其力則他年可効踴躍之忱若此時更竭其中卽目前已有危迫之慮關輔屏蔽中原拱衛神京宜圖鞏固以培根本不得不叩乞

皇上天恩暫紓秦民之力以規久遠之圖然而援甘諸軍嗷嗷待哺若非另有協濟之款實慮立臻窘迫之憂臣竊熟計各省情形大概都非饒裕或積累尙重而未遑他圖或自謀不暇而無能兼顧晉蜀最稱完富而比年兼濟鄰省力已竭而無餘計惟湖南東征局釐金一項尙可藉爲挹注之資查湖南釐金向委紳士辦理而官總其成歲計八十餘萬逮今兩江督臣曾國藩總師皖吳餉糈困絀奏派紳士黃冕等勸諭商民照依舊辦

章程加增一倍厥後金陵大功告成實賴此項餉糈之助比聞該督臣奏請停止蓋不欲以一人之故重增桑梓無窮之累其用意自屬摯切惟臣與督臣楊岳斌均籍湖南各率楚軍同肩鉅任又適際陝甘軍餉窘乏之時私計同鄉紳民亦必與有息息相關之意伏求

皇上天恩敕下湖南撫臣李瀚章卽撥此項釐金協濟甘餉俟兩三年後隴境肅清再行奏請停止如蒙

聖恩允准臣與楊岳斌卽當函致湖南士紳勸率商民勉以忠義或別議獎敘之法以彰好義之忱庶幾甘省行軍餉項不致枯竭之虞陝省善後事宜尙有舉辦之望實於兩省大局深有

裨益所有陝省凋敝特甚善後難籌請

旨飭撥湖南東征局釐金協濟甘餉以紓陝力而蘇民困緣由
理合縷晰陳奏是否有當伏祈

皇太后

皇上聖鑒訓示飭遵謹

奏

定邊防軍屢捷復撥兵扼防鄜延保定疏

同治四年六月二十四日

奏爲定邊防軍堵剿逆匪屢獲勝捷現復遵

旨添撥馬步各軍嚴防鄜延保安一帶以固邊防而期周密恭
摺奏祈

聖鑒事竊臣前將派兵防剿定邊屢擊竄匪獲勝並飭靖定各縣確探嚴防如果賊勢猖獗再行撥兵馳往協剿以厚兵力等情附片

奏明在案嗣據副將段登雲稟稱閏五月初一日探得西南距營六十餘里之胡家園地方有賊馬游弋勢必仍圖回竄隨派八成隊伍埋伏於正西三十里之紅莊璩家灘一帶並會商副將趙有勝等馬步出隊合力圍剿初二日辰刻果見馬賊千餘騎護衛騾驢數百頭漫山遍野而來我軍點放號礮三面伏兵突出鎗礮齊施該逆抵死抗拒我軍奮勇直前適趙有勝等馬步各軍齊至賊始相率奔潰我軍追殺至紅柳溝四五里許共

殄賊三百餘名奪獲騾驢牛馬二百餘頭生擒逆回二十餘名
訊係由靈州竄出圖往南山攜糧等語該副將卽就近解赴花
馬池翁同書行營訊明正法初九日段登雲復會同趙有勝等
於三更出隊圍勦胡家園黎明始抵溝口卽遇賊匪整隊而來
我軍一齊吶喊賊始恇懼紛遁當撥步隊緣山追殺馬隊兩面
兜勦六斃賊二百餘名奪獲騾馬驢畜二百餘匹鎗礮旂幟刀
矛無算生擒逆張大媧趙日貴二名解赴翁同書行營訊明
正法初十日夜復探胡家園又有賊蹤段登雲與趙有勝等於
十一日出隊埋伏紅莊及南山坳中北沙坡內各處十二日午
刻西風大作煙沙蔽目探得馬賊由南山而下趙有勝等率部

兩面包鈔段登雲由中路迎擊鎗礮連環賊始驚覺紛竄趙有
勝等左右鈔殺遊擊殷華廷由山坳截出該逆拌命衝逸一二
百名被都司李楚英截殺殆盡因風沙愈緊未敢窮追共計殲
賊七八百名奪獲騾馬驢畜八百餘匹旂幟刀矛甚夥生擒九
名均於陣前正法我軍亦受傷數名等語先後稟報前來旋准
雷正綰來咨擒獲奸細供稱該逆均係陝回麴聚大水坑一帶
如官軍逼紮擬將家小拋棄黃河騎馬回竄定靖保安以入陝
疆現派魏添應統帶慶環防兵八營分扼各隘惟追剿之師不
過二三營卽請派兵扼堵會剿並准楊能格咨亦稱慶防喫緊
無兵可撥請派兵協力嚴防等因又據定靖各縣稟報前奉都

興阿翁同書等所派駐防定邊及甯條梁各營均已調赴前敵
境內防兵尙形單薄等情臣查該逆自固原敗竄以來盤踞靈
州大水坑等處時赴定靈交界之區肆行擄掠屢被防軍截擊
殄斃多名近被官軍逼緊益肆狡逞之謀陰爲窺伺紛竄之計
而定靖一帶毗連甘肅路徑紛歧亟應添派勁旅實力防剿始
足以杜奸謀而免竄越正在籌撥聞欽奉同治四年閏五月二
十八日

上諭回逆詭譎異常現在東竄保安縣境並圖窺伺安化縣元
城鎮難保不牽綴我師暗爲甯靈掎角著楊能格督飭魏添應
等相度機宜實力防剿並著劉蓉添撥兵勇馳赴延安鄜州安

邊保安等處扼要堵截不得稍有疏虞等因欽此臣當卽飭派
候選同知鄔大愚督帶鎮西軍馬步四營馳赴保安定邊一帶
會合段雲登等扼要堵禦並飭段登雲就奪獲馬匹中挑選臙
壯戰馬百五十匹揀派銳卒練成馬隊以備衝擊之用又派記
名總兵楊得勝督帶雄毅軍馬步四營進紮鄜延一帶要隘以
防該逆由合水各隘偷竄之路庶期稍固邊防藉紓
宸廬所有定邊防兵擊賊屢勝現復添撥勁旅扼防鄜延保定
一帶以資堵截各緣由理合恭摺由驛馳奏伏祈

皇太后

皇上聖鑒訓示謹

奏

附陳派兵防堵潼關疏

再臣前奉

寄諭現在髮捻各匪擾及蒙亳等處難保不被擊西竄潼關一帶防務緊要著劉蓉派兵前往扼紮以固邊防毋稍疏虞等因欽此當卽飛飭潼商道蔣徵陶選派健足輪流偵探逆蹤趨向一面檄調記名提督劉厚基接統親兵營暫就省西關外駐紮勤加訓練聽候調遣旋據蔣徵陶稟報該逆尙在慶亳一帶相距甚遠惟現准河南撫臣吳昌壽咨稱訊據賊供有欲西竄鞏汜直撲潼關圖竄三秦等語不可不先事防維臣現檄飭劉厚

基統帶親兵馬步五營前赴潼關東門外五里之金陡關駐紮如逆蹤由陝州閩鄉竄來卽率師前赴盤豆鎮截擊如逆蹤由永甯盧氏竄來卽率師徑趨秦峪口堵剿查金陡關爲陝豫交界要隘不但可顧陝疆並可兼顧晉省風陵渡一帶於防務頗有裨益所有遵

旨派兵前赴潼關駐紮要隘防堵緣由理合附片陳明伏祈

聖鑒謹

奏

附陳派兵防堵邠隴鳳略疏

再臣頃接署甘肅涇州直隸州知州林發深稟報陝省回酋赫

明堂一股雖經固原提臣雷正綰招降安置黑城子地方籌糧
贍給惟該回酋陸續招聚回眾已至八九千之多現在黑城子
深藏不測不但漢民不准入城卽本處回民亦不准其插入一
人一騎誠恐黨與日聚日眾口食愈多愈艱又將復行搶劫激
而爲亂此固平慶涇心腹之患亦卽邠長乾永眉睫之憂等語
旋准督臣楊岳斌函稱此起回眾頗懷反側地與秦壤相接竊
慮終爲邊患等因伏查赫明堂係屬渭南逆首屠戮陝省人民
不可勝計近雖勢屈投誠而心懷叵測不可不豫爲之防且現
據探報雷正綰曹克忠兩軍於六月初七日進攻金積堡中伏
失利挫衄頗多尤難保該回酋不因而生變臣現檄調提督銜

記名總兵劉玉興督帶英毅軍移紮鳳翔調候補知府黃鼎帶
所部彝字營駐紮邠長調提督銜記名總兵蕭德揚分督湘果
中軍馬步四營駐紮鳳縣務使聲勢聯絡聞警卽相策應並咨
記名提督漢中鎮總兵蕭慶高以其餘部四營分紮略陽留壩
一帶以防岷洮鞏昌各處蠢動之舉臣仍當酌量緩急隨時調
度以期周慎而固邊防惟各軍現尙分紮甯羌褒沔一帶欠餉
太多猝難拔發恐未能刻期到防除飭糧臺趕緊籌餉接濟外
所有派兵分防邠隴鳳略一帶緣由理合附片陳奏是否有當
伏祈

聖鑒飭遵謹

奏

轉運甘肅軍糧艱難情形疏

同治四年六月二十四日

奏爲轉運雷營軍糧需費繁重陝庫支絀異常萬難設局採運現籌酌撥附甘州縣倉糧協濟請

旨飭催各省協撥雷營月餉就近採買以濟要需恭摺奏

聞仰祈

聖鑒事竊臣前准議政王軍機大臣字寄同治四年二月十七日奉

上諭雷正綰奏官軍攻克固原州城及疊破蕭河城一帶逆巢並請飭陝省妥籌接濟各摺片甘省地瘠民貧向不產糧雖經

雷正綰飭令涇州糧臺設法採辦而各屬羅掘已空慶陽糧臺
不惟協餉未充即使有力採買亦屬轉運維艱著劉蓉督飭藩
司林壽圖將雷正綰軍營糧食寬爲籌備並由林壽圖督辦糧
運事務遴委幹員在陝境設立轉運局嚴督沿途州縣源源飛
輓勿許藉詞推諉致誤要需等因欽此欽遵檄飭藩司林壽圖
遵辦去後嗣據該司詳稱設局轉運事關重大不得不將經費
之盈絀採辦之難易道途之遠近運費之輕重通盤籌畫既不
敢空言塞責卽不能舍己芸人查陝省入款全賴地丁一項每
年解司起運正銀一百三十餘萬兩專爲支放旂綠各營俸餉
以及雜支各款之需從前承平之時已屬入不敷出今則二三

等年民欠錢糧均已調緩本年新賦完解寥寥蓋因殘破之餘
流亡未復荒蕪未墾故雖竭力催征尙不及原額之半至捐輸
釐稅亦因民力竭蹶商販裹足所收甚屬無幾而每月協濟穆
圖善陶茂林曹克忠金順西們克西克等援甘各營餉項軍火
約需銀四萬餘兩本省旂綠各營並畱防邠隴延廊定靖與新
募省標馬步以及階州凱撤湘果英毅彝字各軍通計月需餉
銀十餘萬兩以涓埃之庫款供浩繁之軍精竭蹶情形較之慶
陽糧臺不啻百倍比因司庫竭蹶積欠纍纍多則數季少則半
年未能發給若再責以採辦甘省軍糧縱使悉索按羅亦難籌
此鉅款況添設總局分局薪水口食心紅紙張在在需費無米

之炊何從設措此款絀難籌之實在情形也且轉運糧石必先計程途遠近查由西安省城取道邠長運至固原計程八百三十里卽由鳳翔府城設局取道汧隴運至固原計程亦五六百里且山路崎嶇車馬難進往返約需十餘日至二十日不等姑無論腳價昂貴卽以道路計之較之由慶陽涇州運解前往難易之判奚啻倍蓰此道路難致之實在情形也陝省地方向非出產騾馬之區各州縣支應兵差以及運送軍裝皆係雇自民間比歲軍興以來各處馬騾多被逆回搶掠農民之歸業者幾費經營始得車畜藉以墾種田畝爲數已屬無多是以各屬近辦兵差極形掣肘若復設局轉運需用車馬尤屬繁多購買旣

苦無資雇覓尤難備數一車之貴已需數倍之資一石之糧又增數石之費此又費繁難辦之實在情形也溯查道光六年辦理回疆軍需陝省正當繁盛之時亦祇供給過往兵差並未辦糧轉運今協餉之外復須籌糧籌糧之外又須籌運其力萬難兼顧該藩司職掌度支責無旁貸今奉

諭旨飭辦籌畫數月委屬無策可施不得不將艱窘情形據實直陳免蹈欺朦推諉之咎等情具詳請奏前來臣查甘省軍營糧食缺乏由陝採運自屬義無可辭況重以

諭旨諄切尤不敢稍涉推諉乃籌畫已經數月智盡能索實屬無力承辦從前尙冀川省捐局或可湊成鉅款尙有一綫可恃

甘肅通志卷之

五

之源今聞川中以久愆雨澤之故銀錢艱難報捐者寥寥無幾
卽從前已經書捐之戶亦各逾期不交似此情形卽援甘各軍
月解之款且有萬難設措之勢況本省防軍欠餉已逾五千餘
萬無可給發至於旂綠各營兵餉積欠纍纍均苦無從點綴若
復責以轉運軍糧需費繁重卽罄一年歲入之款尙不能支該
藩司所稱庫款入不敷出艱窘萬分力難採辦軍糧設局轉運
委屬實在情形竊查甘省糧食雖艱然但有現銀採買尙可源
源接濟伏祈

皇上敕下山西湖北各省務將派撥月協雷正綰軍營之款按
月如數委解慶陽糧臺並

飭楊能格卽將此項餉銀就陝甘交界之產糧州縣委員採買不惟可免軍食缺乏之虞抑且可省車騾轉運之苦且一石之糧可省數石之費其於樽節軍儲之計裨益良多除遵

旨動撥鄰甘州縣倉糧二萬石並飭北山州縣會同雷正綰委員勸捐米麥接濟外所有轉運雷營軍糧需費繁重陝庫支絀萬難設局採運請

旨飭催各省協撥月餉就近採買以資接濟緣由理合恭摺由驛馳奏伏祈

皇太后

皇上聖鑒訓示飭遵謹

奏

籌撥倉糧接濟甘軍疏

同治四年六月二十四日

奏爲遵

旨籌撥倉糧接濟援甘軍食並飭鄰近北山州縣會同委員勸捐糧石以濟急需請

旨敕下慶陽糧臺自籌運費以紓陝力而免貽誤恭摺奏祈

聖鑒事竊臣頃奉同治四年閏五月初九日

上諭楊能格奏雷正綰一軍進逼靈州需糧孔亟甘省倉存多已動缺著劉蓉迅飭鄰近甘省各州縣於常平義倉存儲內無論米麥雜糧每屬各撥解一二千石共作爲二萬石之數飛飭

解交涇州慶陽糧臺轉運至環縣分局收存備支此項運腳均
准其作正開銷其鄰近北山州縣並著劉蓉轉飭各該地方官
會同雷正綰委員妥籌勸捐實在米麥解交糧臺以濟要需等
因欽此遵卽轉飭軍需局司道查明近甘州縣存儲倉糧趕緊
籌撥去後茲據藩司林壽圖等詳稱雷正綰一軍進攻靈州需
糧孔亟自應不分畛域籌撥軍食以資飽騰而利攻勦何敢稍
事諉延惟查陝省自軍興以來各路援師兵勇口糧均由各州
縣動用常平義倉供應迨陝境肅清以後援甘數十營兵勇並
派防漢南邠長汧隴各軍及甘省各營招募勇丁過境口糧無
不碾動倉儲藉資接濟今查西南兩路各州縣存糧多已告罄

而北山各縣常平義倉因節次供支過境兵糧及駐紮定邊甯
條梁兵勇口食所存倉穀亦屬無幾現因靈屬回匪意圖東竄
復派郿太愚楊得勝所部鎮西雄毅兩軍馬步八營馳往郿延
定邊一帶會同段登雲等軍堵剿尙慮兵食不給奉飭撥解倉
糧二萬石實難如數湊集運解應請甘省糧臺就近採買足數
俾免貽誤軍糈一面檄飭北山各州縣會同雷營委員體察情
形妥爲勸辦米麥協濟等情具詳請

奏前來臣復查鄰近甘省各州縣倉儲旣據該司道等查明歷
次動用供支軍糧所餘無幾現復派兵堵剿北路一帶正慮兵
食不敷無從湊撥係屬實在情形惟雷正綰率師進搗靈州正

在喫緊之際需糧孔亟不得不於無可設法之中竭力籌撥現
飭鄰近慶陽之甘泉等縣如數湊撥二萬石並飭北山附近州
縣勸捐米糧以濟目前之急惟運腳一項陝力實不能支雖奉
諭旨准其作正開銷而延安一府十二州縣額徵錢糧歲僅五
千餘兩鄜州四屬錢糧歲僅萬餘兩均已徵收過七八分委屬
無款可籌相應據實奏祈

聖恩敕下慶陽糧臺楊能格籌備運腳自行轉解以資軍食而
免延誤除咨明固原提臣雷正綰暨慶陽糧臺楊能格查照並
檄飭北山各州縣會同雷正綰委員勸捐實在米麥接濟外所
有遵

旨竭力籌撥倉糧勸捐米麥請由慶陽糧臺自行轉運以免貽
誤緣由理合恭摺附驛陳奏伏祈

皇太后

皇上聖鑒飭遵謹

奏

奏雷曹諸軍失利急圖補救疏

同治四年七月初三日

奏爲探悉雷曹諸軍失利退紮賊勢猖獗情形請

旨飭催各省協甘軍餉趕緊委解來陝以圖補救而支危局恭
摺由驛馳奏仰祈

聖鑒事竊

臣

前據探報雷正綰曹克忠兩軍於六月初七日

於金積堡挫衄頗多曾經附片奏

聞在案嗣准曹克忠咨稱該營自閏五月十六日移紮強家沙窩以來四戰皆捷詎逆匪劫其後路糧運挖斷水道祇冀雷正綰大軍速至彼此聯絡以振軍聲六月初二日雷軍移紮東南相距約二十里聲息仍未時通初七日約會雷正綰兩路進攻該鎮督飭各營派八成隊逕搗高章三堡強家沙窩等處逆巢該逆卽率馬步賊眾前來拒抗各營鎗礮齊施踴過長壕強勇五營乘勢攻克高章三堡殺賊頗多親兵兩營亦卽攻入強家沙窩堡內正在得手之際遙見東南塵飛蔽天雷正綰大軍已被逆賊擊敗壓退賊勢甚屬兇猛該鎮急令各營收隊忽見賊

騎蜂擁而來將我軍層層圍裏其攻入堡內之哨弁兵勇均被擒殺更番苦戰甫得收隊歸營該逆旋於黃昏時湧來圍撲該軍水米久缺力不能支祇得突圍而退且戰且走行二十里至西南大山逆眾跟追不舍該鎮坐騎受傷幸得副將陳尙友降回王銘忠蘇嘉良馬秀等突圍救出計喪營官周有貴秦久勝朱友文董逢春及揀發遊擊保明等五員新舊帳棚及存營餉銀均皆丟失現在收集兵勇退紮中衛縣屬之四百戶急圖整頓糧餉鍋帳軍械俱缺等語並據探報是日雷正綰親督大軍各派九成隊進攻金積堡該逆率隊逆戰佯敗奔退我軍乘勝追逐將近逆堡不圖伏兵四面湧出將我軍重重包裹雷正綰

左衝右突指揮諸軍奮殺數時之久至戌刻始行突出重圍雷正綰骹帶礮傷退走韋州將弁兵勇之陣亡及被裹去者甚夥丟失旂幟號衣軍械等件尤多既抵韋州收集潰卒不滿六營正在整頓隊伍之際該逆馬步大隊又已跟蹤掩至聲言如不退出韋州立卽撲攻旋將東西北三門圍住雷正綰力難再戰遂率師由南門逸出現在退紮固原屬之預望城軍械俱失糧餉兩缺而逆黨蝟集兇焰鴟張能否支持尙未可定等語伏查該逆由固原平涼一帶節節退走共踞靈州金積堡爲老巢死黨悍賊麇聚麋集其詭計狡謀固將憤盈以圖一逞我軍以該逆望風輒靡頗忘戒備之心致墮逆賊設伏誘敵之計此次聲

威大挫逆勢乍張不惟平涼固原有累卵之危慶涇各邊在在震動卽甯夏大營亦有孤危牽掣之勢若不迅圖補救不特甘事糜爛卽陝事亦難支持現在各營挫衄之餘米糧鍋帳軍火器仗事事乏缺惟有寬籌餉項隨地採辦隨時製造以期再整旂槍重新壁壘庶幾轉危爲安軍威尙有克振之望伏祈

聖恩敕下各省督撫迅將協濟撥甘諸軍額派月餉先行籌撥兩箇月委員星速解赴慶陽糧臺分撥各軍藉資接濟惟查慶陽防軍八營前經雷正綰調去六營同時挫敗此項餉銀到後誠慮該逆聞而生心似應請

飭令逕解陝西藩庫收存由臣隨時知照楊能格委員提撥以

期妥慎並派員就陝甘交界州縣採辦米糧分撥接濟以贍飢
軍仍由臣飭陝局酌提銀兩趕緊製造鍋帳槍械軍火隨時委
員解赴軍營以資整頓而支危局除飛飭派赴鄜州之總兵楊
得勝卽率所部雄毅軍馬步四營駐紮與合水交界之五十里
鋪一帶俾與慶陽聲勢聯絡並檄催英毅彝字各軍速赴邠長
汧隴防所扼要堵禦以固邊陲外所有探悉雷曹諸軍失利退
紮賊勢猖獗請

旨飭催各省協甘軍餉趕緊委解來陝以圖補救而支危局緣
由理合恭摺由驛馳奏伏祈

皇太后

皇上聖鑒訓示飭遵謹

奏

附請催各省協甘月餉疏

再現據探報督臣楊岳斌一軍已由安定進駐鞏昌府規剿狄道河州一帶逆匪查距鞏昌城外數十里之伏羊場久經陝回盤踞與渭源狄河洮岷各逆黨互相勾結而狄河逆匪著名兇悍楊岳斌以一軍獨進恐未能迅速奏功蘭州省城需用芻糧專恃甘涼二州接濟近聞肅州逆匪日圖東竄靈州逆匪亦虞西犯萬一東西夾擊甘涼兩郡精華均歸烏有則蘭州岌岌可危故竊謂目前辦理之法當以重兵分駐甘涼以護蘭州糧食

之源以勁旅規勦狄河以靖蘭州肘腋之患楊岳斌本部僅五千人祇能專勦狄河而甘涼一路僅恃黎獻之一二千人實虞單薄從前尙冀靈州巨巢迅速克復則雷正綰一軍可以會攻甯夏曹克忠一軍可以移駐甘涼今兩軍新挫其勢未可驟張但能力保平固慶涇各路卽爲幸事似不能不添撥蔣凝學一軍前往助勦疏通後路以壯聲威至於餉需一事前楊岳斌率師行抵西安月餉未發因就陝庫借撥銀三萬兩以資散給迨將起程赴甘又借撥銀三萬兩以支行糧均議俟各省協餉到時扣畱歸款乃迄今已逾兩月並未聞各省報解協餉信息陝庫去此巨款不惟臣部各軍無可點綴卽楊岳斌所統之眾計

亦無可接濟當此局勢喫緊人情動搖之時非餉項充裕何以固軍心而作士氣查楊岳斌前過陝時曾語臣云該軍餉需經湖廣督臣官文許月協三萬兩兩江督臣曾國藩許月協三萬兩江蘇撫臣李鴻章許月協一萬兩其餘江西浙江湖南等省尙無一定數目等語相應請

旨敕下湖廣督臣官文現署兩江督臣李鴻章護理江蘇撫臣劉郁膏及江西浙江湖南各省務將此項月協之款趕緊委員撥解兩箇月來陝轉運前進以固軍心而惟大局所有請

旨添撥援甘勁旅以壯聲威催解援甘協餉以作士氣各緣由理合附片陳奏是否有當伏祈

皇上聖鑒訓示飭遵謹

奏

附酌量緩急派防潼關疏

再臣疊奉

諭旨派兵扼紮潼關商雒等處以防捻匪西竄之路當卽遵旨調派記名提督劉厚基率所部親兵五營前赴金陡關扼紮業經附片奏

聞在案正在籌撥月餉料理起程之際探聞固原提臣雷正綰已由韋州退紮預望城逆勢猖獗人情震動誠慮金積堡狂逞之賊迫之於前黑城子招降之眾乘之於後而臣所調赴邠長

鳳翔之英毅彝字各軍未能卽刻到防萬一逆騎剽疾闖入陝疆殊爲可慮當經飭令劉厚基暫緩拔發一面速催記名總兵劉玉興候補知府黃鼎等迅速由甯羌襄沔一帶拔赴鳳翔分防汧隴邠長各隘一俟諸軍到防卽飭劉厚基進駐金陡關妥籌布置現據潼商道蔣徵陶稟稱疊據探報渦河南岸之牛老紅賴文光等股於六月初四日由陳州之槐店一帶向西南竄出渦河北岸之張總愚任柱等股由商邱之塢牆集往柘城太康一路西竄並據獲犯供稱該匪大股有窺伺鞏洛之意十三四等日已由柘康竄至通許鄆陵許州尉氏淮甯各縣滋擾並圍攻扶溝縣城據獲犯供稱逆首張總愚等現分五旂黃旂張

總愚藍旂任柱白旂牛老紅黑旂李允五色旂賴文光商量分
兩路同到汝甯陳大濬家會齊再圖西竄現在陝縣以南已有
賊蹤等語是該逆結黨會約蓄謀西竄已有明徵除飛咨湖廣
督臣官文湖北撫臣鄭敦謹速撥勁旅扼駐浙川荆紫關一帶
並咨河南撫臣吳昌壽遵

旨派撥兵勇督飭鞏汜地方官扼防虎牢關老犍關等處並於
陝州閩鄉一帶節節設防杜其竄秦之路仍由臣酌量緩急撥
兵防堵以固邊圉外理合附片陳明伏祈

聖鑒訓示飭遵謹

奏

附請飭陳國瑞等攔截捻匪疏

正封摺開復接潼商道蔣徵陶稟報現據探卒回稱六月十八日逆首張總愚率賊萬餘人由臨潁許州襄成一帶竄至邠縣南鄉擄掠經河南統將陳國瑞督帶官兵跟蹤追勦該逆旋向西南大路圖竄魯山南召石家店等處等語伏查逆蹤詭譎竄突靡常一入南魯則山徑紛歧處處有路可通無論潼關要隘在所當防卽雒南之三要關商南之富水關竹林關山陽之漫川關在在均形喫緊陝省兵力現俱調赴西北兩路嚴防逆回竄突尙慮不敷分布今捻逆大股又復西趨實屬無可調撥除由臣抽派數營先扼武關力籌堵勦外伏祈

皇上天恩敕下湖廣督臣官文速派重兵駐紮浙川荆紫關一帶既遏該逆西竄商雒之路亦可兼顧南犯鄖陽之防並懇敕下河南撫臣吳昌壽轉飭統將陳國瑞等督兵攔頭截擊庶期陝省殘破之區免致復遭蹂躪之慘實荷高厚鴻慈所有捻勢西趨情形理合附片陳

奏伏祈

聖鑒飭遵謹

奏

遵

旨籌撥滿營馬價疏

同治四年七月初三日

奏爲遵

旨籌撥西安滿營馬價請將此項馬兵月餉援舊搭放票銀並嗣後察看庫款情形隨時接濟該營薪俸恭摺奏祈

聖鑒事竊臣接准署西安將軍德興阿咨開同治四年六月初二日奉

上諭德興阿奏請飭撥欠餉購買馬匹酌加馬隊兵餉請飭發官員俸銀各摺片西安滿營馬匹無多不敷操防自應陸續買補據德興阿奏稱陝西藩庫欠發滿營官兵餉銀爲數甚鉅請撥給銀五千兩派員由山西前往綏遠歸化一帶採買馬四百匹所籌尙妥著劉蓉卽飭藩司於六月內將前項銀兩如數撥給以應要需所有此項馬匹經過山西綏遠歸化等處均著免

其納稅並著德勒克多爾濟沈桂芬桂成飭令各該州縣豫備
棚廠應付草豆此外概不准濫應德興阿於此項馬匹到營後
務須認真操練不得有名無實此項購買之款卽著免其造冊
報銷德興阿所稱擬挑練馬隊兵一千名請照舊章按八成五
支放卽照所請辦理滿營官員情形艱苦所有該營俸銀並著
劉蓉自本年春季起每季按照部定七折六扣章程給發毋令
缺乏欽此遵卽轉飭藩司林壽圖籌撥去後茲據詳稱查西安
滿營現擬派員前往山西綏遠歸化一帶購買馬匹回營操練
是前項馬價銀兩係屬目前要需業經欽遵
諭旨在於欠餉項下由司籌發銀五千兩以資採買至馬兵一

千名該營既經挑練自應籌給餉銀惟陝庫支用浩繁早已入不敷出卽支放該營四成餉項步甲全餉以及道倉米折養廉等銀每月不下三萬兩無非借款挪湊百計張羅若再按照舊章以八成五實銀支發實屬力有未逮而兵餉緊要又不得不於無可設法之中力爲籌畫因查銀票一項疊准該營以旂兵欠餉過多變通酌辦先後咨取票銀由司印發已至十四萬兩據稱流通無滯自可援照辦理擬請前項馬兵千名俟挑練成軍後每月應支八五餉銀卽以四成五實銀四成票銀搭放該馬兵添此票銀不無裨益而司庫亦可藉以周轉至陝省旂綠各營官員俸廉早已

奏咨停緩嗣因旂員艱苦是以先後五次發給俸銀九千餘兩原係格外體卹而綠營官俸尙難照此辦理今既奏奉

諭旨飭令籌發擬請嗣後察看庫款情形如能稍可通挪卽當隨時接濟等情具詳請奏前來除飭林壽圖竭力籌措隨時撥發並咨明德興阿查照外所有遵撥滿營馬價懇將馬兵月餉援舊搭放票銀並嗣後察看庫款稍可通挪隨時接濟該營俸銀緣由理合恭摺具

奏伏祈

皇太后

皇上聖鑒訓示飭遵謹

奏

劉中丞奏議卷十終

劉中丞奏議卷十一目錄

請准知縣唐正恩仍畱陝省補用疏

附報籌撥甘軍餉銀軍火數目疏

附挑收潰勇馬隊歸撫標備用疏

奏甘省潰軍入陝勒令回甘自贖疏

弁勇藉餉譁噪拏獲首犯正法疏

逆回竄踞王家角堵擊扼截情形疏

附探明捻匪竄擾情形分兵扼堵潼商疏

附請楊得勝仍駐河上原疏

附派軍赴隴防堵疏

訊明已革遊擊尙無棄城逃走情弊疏

附請開復胡得成原參處分疏

請開復咸長二縣被參處分疏

附報籌撥甘軍餉銀軍火數目疏

奏潰勇入陝拒殺官軍派軍兜剿疏

官軍克復吳旗鎮並攻剿定邊竄匪獲勝疏

附捻逆復竄鎮平內鄉派兵防堵疏

劉中丞奏議卷十一

湘鄉劉 蓉著

請准知縣唐正恩仍留陝省補用疏

同治四年七月十六日

奏為覆查知縣政聲夙著現署凋敝繁區辦事得力懇

恩俯照前請仍留陝省補用以資整頓而順輿情恭摺仰祈

聖鑒事竊照丁艱起復知縣唐正恩前經臣奏請留陝補用欽

奉

上諭前任陝西淳化縣知縣唐正恩據劉蓉奏稱該員前於淳

化縣任內政聲卓著民情素洽實為循良之選陝西甫就肅清

亟須整頓吏治請將該員留陝補用等語丁憂起復知縣唐正

恩著仍畱於陝西補用並免交分發指省銀兩該部知道等因
欽此當卽恭錄轉行欽遵在案嗣准部咨以唐正恩四川進士
由候選知縣選授江蘇陽湖縣知縣親老告近改選陝西瀋化
縣知縣丁憂服滿親老事畢例應坐選江蘇陽湖縣知縣原缺
據奏畱陝補用覈與歷辦例案不符應飭令該員赴部引
見候

旨錄用等因具奏奉

旨依議欽此知照前來伏思州縣養親事畢例應坐選原省原
缺不准改選省分請畱蓋慮其意存規避故令守候原缺以杜
弊端今江蘇與陝西雖屬同一被賊滋擾之區然陝省先遭粵

捻蹂躪繼被逆回殘殺最爲酷烈人民之死亡田地之荒蕪者
十居六七加以甘氛猖熾兵差絡繹錢糧旣難徵收而供支益
增繁浩以故官場視爲畏途近來報捐之員從無指陝分發者
省分優絀旣已與江蘇懸殊矣且唐正恩仍歸先選江蘇尙可
望補陽湖原缺而畱陝則係候補人員得缺遲速皆難預必是
畱陝本非所願非有規避情弊亦可概見在部臣總司銓政自
應援例斷制以符定章而微臣撫輯殘黎亦不得不越例奏陳
期興吏治前蒙

聖恩允將唐正恩仍畱陝省適值三原縣出缺之際該處地處
衝繁迭遭回患凋敝特甚撫綏爲難據藩臬兩司具詳揀委唐

正恩前往署理該員宅心仁厚辦事懇摯到任以來務崇儉約清釐積牘日坐堂皇據稟規畫地方利弊事宜俱有條理以故人心允洽輿論咸孚茲復與涇陽縣會修龍洞渠該渠泉水額灌涇陽三原高陵醴泉四縣民田六百六十餘頃年久淹塞工程浩大非得實心任事不辭勞悴之員難期經理盡善而且需費繁鉅籌款艱難非有誠心愛民不規私利之意難期踴躍從公現經該員與涇陽縣分認勸捐延請公正紳耆商畫辦理事關數縣水利正在喫緊之際若遽改委他員將致有誤要工臣於接准部文之後與藩臬兩司籌商再三當此吏治頹壞民氣凋殘之時求能盡心民事裨益地方之官實不易得唐正恩前

任陝西知縣政聲夙著現署三原縣事眾志悉孚臣何敢避嫌
緘默不爲地方擇人破格陳請合無籲懇

天恩俯念陝省凋敝需才孔殷仍准將丁艱起復知縣唐正恩
畱陝補用並交分發指省銀兩實於吏治民生大有裨益爲此
不揣冒昧恭摺覆

奏伏乞

皇太后

皇上聖鑒訓示飭遵謹

奏

附報籌撥甘軍餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治四年五月分撥解過援甘各營餉銀軍火數目附

奏在案茲據軍需局司道詳開同治四年閏五月分共解支過援甘各營餉銀二萬二千九十三兩八錢二釐火藥三千五百斤鉛丸三千三百斤火繩四千丈馬弓一百六十五張淨絲絃一百六十五條戰箭八千枝撒袋一百九十二副白布單帳房三十架藍布夾帳房十架擡鎗四十桿擡礮二尊馬鎗五十桿隨帶藥壺盧九龍袋什物俱全新布大白旗十四面五色小旗一百二十面烘藥五十斤均經分別委解給領取有回文爲據

臣覆查無異除仍飭該司道等竭力籌措源源接濟外所有陝省同治四年閏五月分解支援甘各營餉銀軍火等項數目謹繕清單恭呈

御覽理合附片陳明伏乞

聖鑒謹

奏

附挑收潰勇馬隊歸撫標備用疏

再臣前因陝省軍興以來額兵久缺先後選募省標新兵二千名皆係步隊設遇賊馬奔衝勢難抵禦現擬照舊添設馬兵苦於購馬之資無從籌款適本年正月間勦辦竄陝回匪奪獲賊

馬當經挑選百匹招募勇丁百名酌量籌給餉乾派員操演以資備禦附片

奏明在案嗣於五月間勦撫陶營潰勇復就其馬隊中挑選臚壯馬匹照依上次奏定章程操演歸伍以資邊防之用亦經隨摺陳明在案茲據署撫標中軍副將彭體道逐加點驗裁汰疲弱揀選精壯戰馬一百四十六匹弁勇一百四十六員名飭令該副將督同遊擊張起德等歸入前募馬隊認真操練並飭軍需局司道查照上屆奏定章程議明按月發給管帶之儘先遊擊張起德薪水馬乾銀二十一兩幫辦儘先都司蘇興隆薪水馬乾銀一十五兩縣丞王遇春薪水馬乾銀一十二兩哨官劉

振興和得華刑大法三員每員月給薪水馬乾銀九兩勇丁一百四十名每名月給口糧銀三兩六錢馬乾銀三兩九錢均於同治四年五月二十三日起支仍按閏月小建分別加增扣除如有倒斃馬匹隨時領價買補不得踰十分倒二之例以符定制而歸覈實所需弓箭鎗械帳房等項由局製造給領遇有征調應酌增行糧及旗幟器械雜費再行隨時斟酌辦理具詳請奏前來所有現就陶營潰回馬隊挑選操演歸入撫標以備邊防緣由除咨部外理合附片陳明伏祈

聖鑒謹

奏

奏甘省潰軍入陝勒令回甘自贖疏

同治四年七月二十八日

奏爲甘省潰逃弁勇竄入陝境滋擾現經派兵勦辦擒獲首要各犯解省審辦並將餘眾勒令回甘效力自贖謹將勦辦處置情形恭摺馳

奏仰祈

聖鑒事竊臣於七月初間接據署甘肅涇州知州林發深稟報固原提臣雷正綰部下將官劉正高所帶勇丁因索餉滋鬧裹帶器械旗幟糾眾二千餘人潰逃東竄六月二十七八等日由平涼城外竄踰華亭之安口窰並接雷正綰所派總理營務之周顯承稟報此起潰勇在甘搶劫委員所解軍裝火藥擄掠村

莊請加勦辦以懲效尤等語臣查安口密地接汧隴該潰勇恃眾橫行勢將竄入陝疆蔓延爲害維時派防汧隴之劉玉興英毅一軍甫由漢中拔發猝難到防因派總兵邱時成統帶省標新練馬隊兩起星馳前往迎頭截擊旋據鳳翔府屬州縣探報此起潰勇爲精左親兵雄右新右等營七月初八九等日已由汧隴竄踰寶雞各境沿途搶掠財物殺傷男婦數名並接隴州知州湯敏稟報現據雷營委員面稱新右雄右等營不過圖回本籍尙無逆志惟其中親兵精左兩營多籍河南向係捻匪出身現推王得順等爲首密約竄入南山更換旗幟再作計較新右各營亦被牽率等語臣查河南髮捻正圖西竄此起潰勇旣

有舊日擒匪在內難保不潛相勾結爲患尤長不得不盡力勦辦惟該潰勇爲數頗多竊慮馬隊單薄未能盡遏奔衝因檄飭署中軍參將彭體道右營遊擊胡得成統率撫標三營兵丁由盩厔會合邱時成馬隊前後夾擊並飭駐防鳳縣之湘果營就地迎擊咨會漢中鎮總兵蕭慶高以畱防漢中之數營分紮各隘堵禦以杜分竄邱時成於初八日行抵岐山探明匪蹤已竄郿屬之齊家砦遂於初九日徑赴郿縣列隊斜峪關先防竄入南山之路該潰勇頭隊百餘人突來抗拒當經悉數殄滅生擒十三人訊明正法各潰勇偵知諸路皆已嚴備勢難飛越於是雄右營副將文元興等率眾俯首道旁遞稟投誠乞回原籍等

語臣思該潰勇既犯逃軍之律又蓄狂逞之謀其中良莠不一
實難盡邀寬典雖甘省糧餉兩缺兵士嗷嗷亦有迫以難堪之
苦然竟令解散回籍則甘省兵勇將致紛紛效尤相率逃潰且
捻蹤迫近商雒該潰勇等窺知陝中虛實一出陝境勢將投入
捻黨句結內犯當經批飭彭體道邱時成查出倡議潰逃之首
要各犯及沿途搶劫殺傷男婦不法之勇丁勒令文元興等按
名交出解省訊辦並將所搶軍火財物及所帶軍械逐一追繳
仍勒令該潰勇等迅速回甘效力自贖不許輒回本籍致滋他
虞如敢抗違則是始終頑梗應卽痛加殄除以伸
國法十三日邱時成率隊行抵藍屋途次該潰勇隊內親兵精

左等營頭目王得順羅應選閻大德段炳春等抗不呈繳軍器
邱時成知其心懷叵測卽時帶隊扼紫舊峪口進山之路以防
中變一面函知彭體道督率所部中左右三營隊伍親赴該潰
勇頭敵開示順逆該潰勇等竟敢揚旗抗拒彭體道邱時成立
督隨帶弁兵馬隊奮勇衝殺當卽陣斬數十人生擒十九名各
潰勇仍復執詞不屈正在揮眾進剿之際倏值大雨淋漓鎗礮
難施暫行收隊該潰勇意圖乘夜偷竄潛由終南北路向東前
竄彭體道策其必由鄆縣偷越當卽督隊由捷徑繞出其前邱
時成由南路并進預防竄山之路遊擊胡得成都司胡明李正
榮等各率隊跟追以杜回擾十五日巳刻彭體道率師馳抵鄆

縣該潰勇已於午刻到鄆紮踞附近村堡適雷正綰派委副將張廷秀前來招安徑赴潰勇營內開導王得順羅應選閻大德等仍復抗不遵依十八日邱時成彭體道等麾隊進攻該潰勇精左親兵兩營均據堡牆施放鎗礮拒守彭體道親督各營由東南進邱時成胡得成等督隊由西北進該潰勇精壯千餘出堡接仗彭體道邱時成等率眾奮勇衝殺生擒當先首惡段炳春一名鎗礮環施該潰勇勢不能支紛紛敗走步隊追剿八九里馬隊追剿十餘里共計斬馘四五百名生擒八十餘名於是精左親兵之眾殄除殆盡其文元興等所帶之雄右新右兩營本伏未動及見精左等營均經殄滅益懷愧懼立將鎗礮軍裝

等項拋棄路旁跪地乞撫當經彭體道等招收八九百名查出其中擄脇之鄉民幼孩百餘名妥爲資遣餘眾七八百名及倡議潰逃之王得順羅應選閻大德段炳春等均於二十一二等日押解來省臣查提督劉正高所部六營前駐安定會甯等處淫擄焚殺無所不至經督臣楊岳斌拏斬數人劉正高僞稱奉雷正綰檄調赴援星速拔發及抵韋州各將弁輒敢相率譁謀持械潰逃沿途搶劫軍裝攻撲砦堡顯著悖叛之迹其精左親兵兩營多係捻黨反覆無常現經痛加勦洗擒獲首要各犯稍可戢其邪志其新右雄右兩營較爲馴帖然竟准其回籍則甘省各軍更無固志雷正綰等挫衄之餘無復再振之望臣現勒

令文元興等仍率此項投誠潰卒回甘歸伍開以自新之路並
飭局酌給川資檄令沿途州縣給發口糧庶期援甘士卒聞風
警畏不敢復萌潰散之心或於大局稍有裨益至臣所部省標
各營訓練未久此次勦辦潰勇多係捻黨百戰之卒尙克奮勇
爭先踊躍用命卽上次五月勦辦陶營潰卒雖有駐省各營壯
其聲勢而臨敵陷陣亦係省標三營之力居多查陝省本地弁
兵自從軍興以來未收一卒之用現經彭體道邱時成等勤加
訓練嚴行督率此兩次經歷戰陣皆能迅速奏功不無微勞足
錄如趁此予以獎勵作其憤盈之氣堅其敵愾之心以後奮勉
圖功再接再厲或可不借客兵之力共切同仇之思實於營伍

有裨合無籲懇

皇上天恩可否擇尤保獎以示鼓勵之處出自

高厚鴻施除將首犯王得順羅應選閻大德段炳春等發府審訊明確卽行恭請

王命就地正法以昭炯戒並將馬步各營帶傷員弁兵丁查明彙案咨部外所有甘省潰逃弁勇竄陝滋擾現經派兵剿辦擒獲首要各犯解省訊究並勒令餘眾回甘效力各緣由理合恭摺由驛馳

奏伏乞

皇太后

皇上聖鑒訓示飭遵謹

奏

弁勇藉餉譁噪拏獲首犯正法疏

同治四年七月二十八日

奏爲弁勇藉餉譁噪現經拏獲首要各犯正法所有撫馭無方失於覺察之帶兵各員請

旨分別革職畱營摘頂示懲恭摺奏祈

聖鑒事竊查英毅六營隨同漢中鎮總兵蕭慶高等克復階州之後本擬酌量裁撤無如欠餉日久爲數近二十萬陝庫支絀異常未能籌此巨款旋值甘回東犯捻逆西趨各邊防勦事宜驟形喫緊不得不暫畱該營以資守備因復揀派記名總兵劉

玉興統領其眾飭令移營鳳翔前赴邠長扼要駐紮防堵業經
臣疊次奏報在案頃據蕭慶高稟稱劉玉興先率所部親兵右
營拔隊赴鳳而中前左後四營亦已次第啟行七月初四日路
經褒城各營勇丁紛紛請領數月餉項蕭慶高慰諭多端許以
催領餉銀散給飭令作速開拔眾心亦已翕然惟左後兩營意
懷觀望蕭慶高於初五日移駐漢郡城外正擬調集該兩營哨
弁什長委曲開導詎於二更時接據管帶正中營游擊蕭玉田
稟報左後兩營聚集宗家營地方喊聲震地脇偪營官索發糧
餉大肆譁噪蕭慶高慮中前兩營並被煽惑附和當飭蕭玉田
及管帶前營總兵蕭祥勝妥爲安撫一面在於川省所解湘果

軍餉項內借撥一月餉銀飭令開差前進一面勒令該營兩營
官查出爲首滋鬧之弁勇拏解懲辦嗣據左營記名總兵李成一
後營記名提督蕭集山各將滋事弁勇擒獲送交蕭慶高訊
明知係左營什長彭星益夏得勝廖其章楊鳳飛等以欠餉日
久起意勾結什長花翎都司李元慶後營百長花翎參將梁俊
慶什長向宗文劉廷春勇丁陳得貴李有貴索餉鼓譟約定是
夜二更時舉礮三聲爲號齊赴後營梁外大聲喧嚷逼索餉銀
意圖誘眾滋事旋經蕭集山覺察列隊準備伊等復回左營鼓
譟事定之後李成一會同蕭集山將各犯拏獲訊認不諱查梁
俊慶彭星益等奉調赴防輒敢中途索餉句眾鼓譟煽惑軍心

實屬刁頑不法當將該參將梁俊慶等十人就地正法以昭炯戒其餘被脇附和勇丁查尙無兇暴情形概予寬免以安眾心所有不能馭撫之管帶營哨各官應請分別參革摘頂以示懲儆等情具稟前來臣查英毅各營欠餉本踰十一月之久委因司庫空乏無可籌撥該營官等苟能曉以大義曲意撫循卽值饑窘萬分亦應恪遵紀律乃管帶左營記名總兵李成一百長花翎游擊羅德三歐陽明貴都司謝得勝花翎守備李祥發於所部勇丁起意句眾索餉鼓譟未能先事預防雖經當時拏獲尙無故縱情弊究屬馭撫無方後營記名提督蕭集山百長花翎游擊李茂蘭守備黃國臣千總張友亮雖能臨變準備銷患

已萌惟於所部哨弁什長隨同滋事失於覺察亦屬疏忽相應請

旨將記名總兵李成一游擊羅德三歐陽明貴都司謝得勝守備李祥發一併革職羅德三歐陽明貴謝得勝李祥發四員仍准其畱營效力以贖前愆記名提督蕭集山游擊李茂蘭守備黃國臣千總張友亮均請暫行摘去翎頂以示懲儆而觀後效除將李成一撤委另揀妥員管帶英毅左營並飭局迅籌月餉接濟外所有弁勇藉餉鼓譟拏獲首要各犯正法請將撫馭無方失於覺察之帶兵各員分別革職畱營摘頂以示懲創緣由理合恭摺具

奏伏祈

皇太后

皇上聖鑒訓示謹

奏

逆回竄踞王家角堵擊扼截情形疏

同治四年七月二十八日

奏為逆回竄踞王家角堵擊扼截情形甘現籌進攻吳旗鎮踞
匪並添兵扼堵定邊要隘以壯聲勢而固疆圉恭摺馳奏仰祈
聖鑒事竊臣前將派撥鎮西軍鄜太愚雄毅軍楊得勝分赴鄜
延保定一帶防剿緣由奏報在案嗣值鎮西軍行次延安雄毅
軍甫抵中部即據探報逆回由甘肅合水縣竄入鄜州所屬之

王家角賊騎數千焚掠滋擾旁及黑水寺直羅等處臣當飭鄜
太愚率部折回鄜州由大路赴援楊得勝率部由中部捷徑前
趨就張村驛會合整旅進剿詎該逆聞官兵驟至先行奔遁我
軍追至合水縣境因該逆均係馬隊路遠糧缺未敢深入探悉
吳旗鎮大股逆匪盤踞未動於是楊得勝駐兵王家角西三十
里之河上原以遏該逆回竄之路鄜太愚督率所部四營由保
安進攻吳旗鎮踞逆惟甘軍新挫逆股分乘該處路徑歧出誠
恐此剿彼竄兵力不敷分布因復咨商雷正綰楊能格速派慶
防魏添應一軍會合截剿以收兩路夾擊之效頃奉同治四年
七月十五日

上諭劉蓉所派駐防定靖邠州各營與慶陽聲勢不相聯絡著
劉蓉飭令總兵楊得勝四營進紮邠州之王家角合水之太白
苗村扼要防堵與慶陽防兵相機截剿等因欽此伏查逆回大
股盤踞吳旗鎮不特慶防喫緊卽陝邊定靖邠保一帶處處虞
其竄越刻下楊得勝一軍駐紮河上原尚在王家角之前三十
里旣與吳旗鎮道路相通可堵逆蹤回竄之路又與慶陽防軍
聲勢聯絡足成掎角之謀若得魏添應率部協同會剿更可共
壯聲威卽餉道亦可無虞梗阻至於定邊一路頃據探報靈州
金積堡等處逆匪紛竄擾及紅柳溝羊圈山等處多用官兵號
衣旗幟營壘密布其南山一帶亦有賊蹤出沒搶糧滋擾臣因

鄆太愚一軍現籌進攻吳旗鎮未能刻期前往復派延綏鎮總兵陶茂林挑選兵丁千名馳赴柳樹澗安邊堡兩處扼要駐紮據稱柳樹澗爲甯條梁屏蔽請將甯條梁防兵移紮該處庶期兵力稍厚足資兼顧臣卽咨商翁同書酌量調派扼堵以固脣齒而重邊圉所有派兵堵剿王家角竄匪仍遁回甘現籌進攻吳旗鎮踞逆並添兵扼堵定邊要隘緣由理合恭摺由驛馳

奏伏祈

皇太后

皇上聖鑒訓示謹

奏

附探明擒匪竄擾情形分兵扼堵潼商疏

再臣頃奉七月初九日

上諭劉蓉因雷正綰等軍爲金積堡回匪所挫逆勢猖狂鳳邠一帶邊防喫緊令劉厚基五營先行暫紮鳳翔惟東面潼關一帶空虛特甚殊爲可慮著卽迅飭劉玉興等軍速赴鳳翔替出劉厚基之軍星馳潼關東面之金陡關扼守並由該撫迅籌添兵馳赴商雒一帶嚴防要隘等因欽此維時臣適接潼商道蔣徵陶署商州協副將謝正球等探報擒逆大股由汝甯寶豐魯山一帶竄至南召之大石嶺盤踞其後股擒首牛洛洪任柱亦於六月二十一二等日相踵而至邊馬已由內鄉縣屬馬山口

西竄浙川廳之板橋川等語是商南防務視潼關尤形喫緊省邊僅有親兵營一軍不得不移緩就急當卽飭令劉厚基督率所部馬步五營星夜馳赴商南縣屬之武關一帶扼紮並飭該地方文武會集兵團實力防堵富水竹林三要等隘一面飛札前帶隴軍之在籍知州黃加焜招募勁勇兩營會同該處團練扼堵山陽縣屬之漫川關等處以期周密潼關一隘無兵可撥不得已抽派省標新兵千名檄飭游擊陳照臺胡得成帶赴金陵關防堵正在料理起程之際適報雷營潰卒已竄郿縣意圖遁入南山邱時成馬隊頗單勢難兼顧乃復改派中軍彭體道帶領胡得成等三營併趨蓋屋繞出賊前適值勦辦事竣擬

仍派胡得成等剋日前往惟省城根本重地太覺空虛應俟黃
鼎之彝字兩營到後改赴金陡關替換回防乃爲周慎耳陝省
兵力旣單而又迫於西北兩路之防計自略陽鳳寶汧隴邠長
以達鄜延定靖彌互二千餘里處處當置防兵所有湘果英毅
鎮西雄毅義字各軍僅敷分布而東路之潼關商雒又復喫緊
如此實有兼顧不遑之勢前准湖北撫臣鄭敦謹咨稱南召魯
山之賊竄及棗陽邊界復有另股由新野竄逼襄樊所有荆紫
關一帶雖派有總兵楊朝林駐軍光化老河口猶恐鞭長莫及
此外無兵可撥仍請由陝派兵堵禦等語是鄂省無可借助之
兵現據劉厚基武關來稟探悉擒首張總愚陳大喜等竄入宛

境四處蔓延刻下南陽之瓦店鎮平之賈宋鄧州穰東青化各處均有大股賊蹤而內鄉之楊營寨灌漲鋪俱有邊馬騷擾並聞該逆有俟後股匪至會合西竄之語伏思逆蹤奔突無常初無一定趨向獨恃各省嚴扼邊界使無虛隙可乘始能制其死命陝省兵力祇有此數欲爲增竈之計苦無籌餉之方惟有督飭劉厚基等激勵各營將士並分飭潼商各屬多集團練實力協守以期保固邊防仍乞

皇上天恩不時敕令河南撫臣吳昌壽轉飭統將陳國瑞張曜等軍時時兼顧堵其西竄陝疆之路則逆勢無可旁趨不能突出網羅之外而陝省凋敝殘區亦得以仰仗

威福藉固邊陲實於大局有裨至於劉玉興所帶英毅一軍已由漢南陸續拔發計日可抵鳳翔除飭速赴邠長一帶扼紮並飛催總兵蕭德揚分率湘果三營進紮汧隴候補知府黃鼎率所部驍字兩營改赴金陡關防堵外所有探明捻逆竄擾情形及分兵攔堵商雒潼關各緣由理合附片陳明伏乞

聖鑒訓示飭遵謹

奏

附請飭楊得勝仍駐河上原疏

再臣頃奉

諭旨飭令楊得勝一軍進紮鄜州之王家角合水之太白苗村

會合慶陽防兵相機扼紮以期聲勢聯絡等因欽此查太白苗
村距臣前奏之五里鋪計程五里由五里鋪至楊得勝現紮之
河上原計程十五里中祇一山之隔而逆回巨股現距保安所
屬之吳旗鎮眾踰萬餘鄆太愚以一軍由金湯獨進正慮眾寡
遠不相敵若令楊得勝進紮太白苗村則相距太遠萬一吳旗
鎮踞匪分軍沿河埂上趨直踞河上原則楊得勝後路斷絕鄆
太愚軍勢孤危鄆州之隘口既失而慶陽之運道亦梗殊非行
軍所宜除將地勢情形咨明楊能格查照外所有楊得勝一軍
應令扼紮河上原緣由理合附片陳明伏祈

聖鑒謹

奏

附派軍赴隴防堵疏

正封摺聞據署隴州知州湯敏稟報甘省逆回數千現竄清水所屬之張家川距隴境不過百里勢殊猖獗等語除飛檄劉玉興英毅一軍先赴隴州擇要堵禦並飭查此股逆回究由何路竄來再將詳細情形具奏外理合附片陳明伏祈

聖鑒謹

奏

訊明已革游擊尙無棄城逃走情弊疏

同治四年七月二十八日

奏爲訊明城固縣城失守案內已革游擊並無棄城逃走及臨

陣退縮情弊懇

恩免其治罪准予畱營效力以觀後效恭摺奏祈

聖鑒事竊臣於同治二年十月由四川巴州行營具

奏查明漢中城固兩城失守情形請將失律將弁分別參辦一

摺欽奉同治二年十二月二十四日

上諭陝西略陽營游擊王其發四川儘先游擊楊發祥均著革職拏問交劉蓉嚴行審訊如有棄城逃走及臨陣退縮重情卽著嚴參懲辦等因欽此時值王其發等於遣散兵勇後先期回籍養傷養病經臣備文移提嗣准湖南撫臣來咨據統領奇勝軍總兵黎得勝稟請將王其發暫畱湖南軍營差遣等情臣因

該革員王其發係奉

旨革職。鞫問之員未便畱楚。差遣復經咨催迅速來陝聽候查辦。去後嗣據王其發楊發祥先後來陝投到。當經飭委西安府知府呂儁孫查訊緣由。王其發籍隸湖南祁陽縣。由行伍投效軍營。屢立戰功。累保參將。同治元年五月。經總統漢南諸軍已革陝西布政使毛震壽飭募奇勝軍中營管帶。勦賊於克復上元關後。咨補略陽營游擊。旋因勦辦洋縣踞逆。藍大順獲勝。並克復寶斗二山。經前撫臣瑛棨先後保奏。以副將升用。並加總兵銜。二年七月間。復飭添募左右兩營。駐紮距城固縣二十里之沙河營一帶。防堵楊發祥籍隸四川城口廳。由行伍派赴廣東。

貴州及本省征勦有功累保至以游擊儘先補用

賞換花翎同治元年因在四川進攻青神縣周逆失利奏參革職是年八月投效毛震壽軍營管帶定南軍助勦藍逆疊獲勝仗並攻克寶斗二山經前撫臣瑛榮奏保仍以游擊補用二年六月間毛震壽飭令移紮城固縣屬之姜灣協同靖逆軍防堵漢江南岸是年八月二十日漢中府城被賊攻陷漢中南北兩岸遍地皆賊二十一日探報髮逆分股下竄各營會議分途抵禦王其發統帶奇勝軍由老關廟一帶堵勦中路靖逆建威鎮威定洋各營分堵左右兩路王其發以中路爲城固衝要督率三營由沙河營以上扼要堵禦二十三日黎明賊隊蜂擁來撲

王其發調派中營擡鎗劈山礮扼守隘口連環轟擊揮令左右
兩營分隊由小路出奇鈔截自未至酉死力併拒無如賊悍且
多愈來愈眾勇丁枵腹禦戰傷亡過多至二十四日午刻逆眾
大股撲至王其發親冒矢石首先衝陣手刃黃衣賊目二名不
意逆賊從旁持矛刺中王其發右手腕右骹重傷血流當時昏
暈墜馬經弁勇救護衝出而楊發祥營壘亦被該逆攻撲當經
該游擊激勵弁勇死力堵禦無如賊勢浩大更番圍營晝夜不
能收隊兼之兵力太單首尾不能兼顧勇丁傷亡甚多探報該
逆另股已由左路繞出攻陷城固縣城管帶鎮威軍之副將白
鳳鳴定洋軍之守備顏作棟力竭陣亡王其發負傷甚重楊發

祥力不能支眾勇傷亡衝散不少隨各收集殘兵趨赴青石關
毛震壽行營驗明王其發傷痕因與楊發祥所帶勇丁均已疲
乏不堪分別遣撤王其發楊發祥亦各因傷因病請假回籍調
養毛震壽當將城固縣城失守情形稟報經臣據詳

奏參奉

旨革職拏問並據西安府查訊明確尚無棄城逃走臨陣退縮
重情由藩臬兩司會覈具詳前來臣覆訊無異並據城固縣紳
士候選知縣王喆等投具公呈以楊發祥入陝以來軍令尙嚴
並無任聽勇丁搶劫等情查此案已革略陽營游擊王其發四
川儘先游擊楊發祥於城固縣城被陷之時該員等俱在城外

禦賊因眾寡不敵勇丁枵腹力戰傷亡過半王其發復身受重傷查與毛震壽原稟尙屬相符茲據訊明並無棄城逃走及臨陣退縮重情亦無縱勇搶掠等弊情尙可原業經革職應請免其治罪該二員平日打仗尙稱奮勇合無籲懇

皇上天恩仍准其畱營效力以觀後效出自

踰格鴻施除飭漢中鎮道查明顏作棟等陣亡實在情形另行請卹並將其餘應行查辦員弁分別咨提訊結外所有訊明已革游擊尙無棄城逃走及臨陣退縮重情仍請畱營效力緣由理合恭摺具奏伏祈

皇太后

皇上聖鑒訓示謹

奏

附請開復胡得成原參處分疏

再查副將銜湖北候補參將胡得成前隨西安將軍多隆阿援陝入關嗣值多隆阿因傷開缺該參將送樞進省料理一切迨後穆圖善率部援甘派令該參將督解軍火運至定邊交收旋因染患瘧疾請假回省調理痊愈之後適值陝省撫標挑選新兵需員管帶經臣標中軍參將彭體道稔知該參將年壯勇邁稟請派委管帶中左兩營逐日操練臣觀其辦事實心善於撫馭適值右營游擊懸缺需人當經委令暫署篆務該參將訓練

士卒迄無懈志先後帶隊剿辦竄匪潰勇均能不避艱險奮勇
前趨而於省城彈壓巡防亦頗認真頃據稟稱奉文行知穆圖
善以該參將由西安押解軍火行抵定邊縣告請病假不候批
示徑回湖北顯係取巧規避奏參奉

旨革職等因臣查參將胡得成押解軍火既已交收清楚並無
貽誤而因病請假亦會稟明祇以距營較遠不及守候批示急
切回省調養與有心規避擅自離營回籍者不同穆圖善亦不
知該員尙在陝省效力以爲徑回湖北跡同專擅其以規避參
劾原爲整肅營務杜絕效尤起見惟該參將在陝頗著勤勞人
亦謹飭現復派赴金陡關防堵同屬效力戎行更非規避可比

合無仰懇

天恩俯准將副將銜湖北候補參將胡得成開復原參革職處分仍畱陝西撫標右營游擊署任以昭激勸臣爲營務得人起見是否有當理合附片陳奏伏祈

聖鑒訓示施行謹

奏

請開復咸長二縣被參處分疏

同治四年八月初九日

奏爲咸長二縣供支過境兵差車馬查明並無玩誤懇

恩開復原參嚴議降調處分以昭平允恭摺仰祈

聖鑒事竊據署咸甯縣事准升鄜州知州託克紳署長安縣事

准升磚坪廳通判馬綸篤會稟接閱邸鈔同治四年閏五月二十日內閣奉

上諭聯捷奏請將玩視軍法之地方官嚴議一摺陝西咸甯縣知縣託克紳長安縣知縣馬綸篤於聯捷統兵起程時並不將口糧車輛如數給發實屬有心玩誤託克紳馬綸篤著交部嚴加議處欽此查咸長二縣附居省會爲山西河南湖北四川甘肅等省及直隸山東西口前後藏滇黔往來衝途在承平之日供應大小差事人夫馬匹每歲所費不下二萬餘金然其時物阜民安商賈輻輳額徵錢糧年清年款廉費役食夫馬工料均可按額畱支藉資津貼雖歷任不無賠累尙能通融撐搯自同

治元年髮逆竄擾於前回匪叛亂於後到處蹂躪肆行橫殺烽
煙滿目赤地千里人亡業敗十室九空馬騾牲畜隻蹄無存里
局因之渙散兵差百倍尋常該署咸甯縣託克紳於二年十一
月奉委到任正值兵燹地丁絲毫無收食糧顆粒皆罄庫儲如
洗領項虛懸市鎮蕭條鋪戶關閉適將軍多隆阿統領各營進
剿逆回馬步官兵雲屯霧集迨後攻克蓋屋解圍鳳郡並搜捕
汧隴一帶餘匪兵勇往來晝夜奔馳凡有各差均經會同前署
長安縣各任並馬綸篤設法辦理毫無貽誤本年四月二十日
陝甘楊總督抵省二十五日聯參贊接踵而至軍興以來縣等
供支過境兵差向祇照例支給一日口糧次日卽按例定車馬

應付起程從無逗遛多日支發口糧及勒索供應席卓茶水轎夫人役等項卽如楊總督駐省月餘縣等僅備公館此外日用一切食物概由楊總督自行購買西行車馬亦係總督重價自雇並不向縣索取釐毫詎聯參贊到省後卽遣人至縣勒折酒席錢文縣等因係歷來所無未經應允當備公館七所備送酒席三日共用上等魚翅席七卓中等海參席十七卓小滿漢席一卓魚肚頭席二卓三日以後因無起行之期始將席卓停止每日仍勒令供應轎夫吹手礮手聽差家人雜使差役數十餘人及七處茶水油燭計住四十八日共用錢七百四十餘串至五月初二日楊總督起節聯參贊亦定初六日西行遣弁赴縣

令供大車四百餘輛運載軍裝縣等面求減省不依並將縣等辦差家丁兵書看押勒具並無帶車一輛甘結縣等被逼難堪隨卽派役分往鄰縣重價雇覓車輛統計縣等辦理此差支給一日口糧銀一百二十四兩四錢九分有零車二百零八輛夫三百一十餘名騾馬一百匹頭自問供應不爲不豐車輛不爲不足而橫被枉揭心實不甘理合稟覈昭雪俾免負屈無伸等情到臣比因參贊大臣聯捷曾有咨會不准州縣濫支濫應何致例外苛索當卽批飭軍需局司道確查去後茲據該局司道詳覆遵查道光二十六年奉准兵部奏定章程嗣後滿洲綠營遇有征調務須遵照定例乘騎本身官馬一概不准援引成案

給與車輛其歷年給車之案全行註銷又同治四年正月奉署
陝甘總督都興阿奏明每營壯勇五百名共給車二十輛如無
車地方改給騾馱四十頭各等因照辦在案今參贊聯捷所部
黑龍江馬隊官兵五百三十四員名勇丁三百八十名成長二
縣於其到省支給一日口糧銀一百二十四兩零並酒席油燭
等項用錢七百四十八千零以後駐省口糧均係隨營糧臺委
員帶銀支發是以該二縣不復籌給至聯捷統兵西行起程時
該二縣因官員兵丁跟役例有騎馱鹽折銀兩馬兵應騎本身
例馬軍裝器械向有沿途驛站腳夫運送俱不應重支車輛馬
匹人夫致礙報銷隨按聯捷單開勇丁七百二十名之數遵照

都興阿

奏定章程備辦大車二十九輛先期守候乃聯捷位高氣盛不允所請該二縣勢難違抗無奈雇覓大車二百零八輛馬騾一百匹頭人夫三百一十六名始行分起前進並於瀕行勒令丁役具結按例覈算該二縣供支此項兵差尚多支車一百七十九輛馬騾一百匹頭夫三百一十六名委無玩誤情事誤被參劾眾爲稱屈且查該員託克紳馬綸篤平素居官勤奮當此地方殘破支辦來往兵差轉運各省解甘糧餉均尙著有微勞等情具詳請

奏開復前來

臣

查參贊大臣聯捷前次統兵西行係在陝甘督

臣楊岳斌起程數日之後民間車馬甫經楊岳斌自用重價雇去倉卒無可周轉該二縣以該參贊行期促迫需用繁多卽令差役分赴四鄉覓雇時值久旱得澍民間正藉騾馬耕犁官役誼索大滋擾累當經臣將此情形婉向該大臣面商酌定大車八十輛分作兩起行走乃聯捷起程之後所部兵勇或去或留或前或後紛紛多日始得無事現據咸長二縣稟其格外苛索隨飭司道逐細確查按例覈算不特並無貽誤抑且多支車輛馬騾人夫並復採訪輿論悉數相符是該二縣辦理此項兵差旣無違玩遽予劾參殊失平允相應據實奏陳可否仰懇天恩俯准將署咸甯縣知縣准升鄜州知州託克紳署長安縣

知縣准升甄坪廳通判馬綸篤被參嚴議處分均予開復以順輿情而示持平如蒙

俞允該員等現准部咨降調開缺尙未擬補有人應請照例仍畱本任合併聲明所有查明知縣供支兵差無誤枉被參劾緣由理合恭摺具

奏伏乞

皇太后

皇上聖鑒訓示飭遵謹

奏

附報籌撥甘軍餉銀軍火數目疏

再 臣 疊 奉

諭旨籌撥甘肅軍需雖值窘乏萬分不敢稍存膜視業將同治四年閏五月分撥解過援甘各營餉銀軍火數目附

奏在案茲據軍需局司道詳開同治四年六月分共解支過援甘各營餉銀二萬一千五百四兩火藥一萬七千斤火繩二萬五千丈鉛丸一萬八千五百斤腰刀一百把竹桿四百根白布大帳房五十架均經分別委解給領取有迴文爲據臣覆查無異除仍飭該司道等竭力籌措源源接濟外所有陝省同治四年六月分解支援甘各營餉銀軍火等項數目謹繕清單恭呈御覽理合附片陳明伏乞

聖鑒謹

奏

奏潰勇入陝拒殺官兵派軍兜剿疏

同治四年八月二十日

奏爲竄隴逆回已回甘境陶營潰勇復入陝疆不服開導拒殺官兵現已派軍馳往兜剿謹將大概情形恭摺奏祈

聖鑒事竊臣前據隴州知州湯敏探報甘肅逆回竄至清水所屬之張家川滋擾距隴境不遠等情當經調派總兵劉玉興英毅一軍前往堵禦並附片陳明在案嗣據湯敏稟報該逆係由甘肅狄河馬營義綱川等處回竄張家川分股竄至距川城一百一十里之馬鹿鎮地方嗾經數日旋即仍由甘肅清水縣境

向義綱川一帶竄去臣以該逆雖經回竄赴甘而距隴尙不甚遠仍應嚴密堵禦旋准陝甘督臣楊岳斌咨稱甘肅提督陶茂林所部駐防金縣各營現經商明移交統帶於七月十八日飭委總兵彭楚漢前往點驗接統詎該勇等不服約束一經點驗卽各攜帶器械紛紛散去由安定一帶行走其勢必趨陝省請卽嚴密堵禦等語嗣據隴州稟報該潰勇已由馬鹿鎮竄至城下詢係陶營總兵仇有道所帶勇丁因不願換員接統相率潰散共計六營其中川勇約有三營由馬鹿鎮分道或走寶雞或出南站等情臣當飭總兵邱時成督帶撫標馬隊馳赴鳳翔一帶會同劉玉興相機堵剿並檄駐防鳳縣之總兵蕭德揚在於

寶雞隘口堵截一面飛咨漢中鎮總兵蕭慶高派兵防堵南山各隘以杜竄擾頃據劉玉興稟稱該潰勇約有三千餘眾竄至寶雞縣東關該總兵因其沿途尙未十分滋擾隨傳頭目李劉二姓來營反覆開導曉以大義該頭目願聽招撫約於十六日呈繳軍械至期劉玉興列隊以俟該勇大股同來正在點名之際詎該勇臨時猝變該營幫辦文案戴貴定攜帶關防案卷上馬出營卽被圍殺搶去關防文案我軍措手不及傷亡勇丁百餘名被搶號衣百餘件我軍持矛抵格殲斃數十名現仍麕聚東關等情接閱之下不勝駭異查該叛勇在甘臨點潰散已屬目無法紀及至陝境猶復不遵開導竟敢拒殺官兵搶劫關防

文案號衣實屬叛迹顯著亟應從嚴剿洗庶足以儆兇頑而杜禍萌除已添派中軍副將彭體道督率撫標三營官兵並飭邱時成馬隊馳往寶雞會同劉玉興實力兜剿務祈悉數就地殲除勿任漏網紛竄致滋蔓延外所有逆回已退甘境潰勇復入陝疆不服開導拒殺官兵現已派兵馳往兜剿緣由理合先將大概情形恭摺馳奏伏祈

皇太后

皇上聖鑒訓示謹

奏

官軍克復吳旗鎮並攻剿定邊竄匪獲勝疏

同治四年八月二十日

奏爲官軍克復吳旗鎮擒斬逆酋並迭次攻剿定邊竄匪獲勝
情形恭摺仰祈

聖鑒事竊臣奉到同治四年八月初四日

上諭劉蓉奏擊退甘回進攻吳旗鎮覽奏均悉甘省逆回由合
水竄入邠州所屬之王家角經鄆太愚楊得勝整軍進剿該逆
聞風遁回而吳旗鎮大股逆匪尙盤踞未動該處逼近陝邊定
靖邠保一帶均虞竄越劉蓉現飭楊得勝駐兵河上原以防賊
回竄鄆太愚率所部四營進攻吳旗鎮踞逆惟兵力較單必須
甘省分兵會合始能收夾擊之效劉蓉請派魏添應一軍會同
截剿惟該軍前在金積堡敗挫後能否再振著楊岳斌督同楊

能格斟酌情形就近調撥一軍會同鄆太愚等將吳旗鎮踞逆
實力剿洗毋畱餘孽等因欽此維時接准楊能格來咨以回逆
有復竄東華池之信魏添應一軍勢難分身請酌撥數營會合
慶防各營相機堵剿等情臣查慶陽防兵既屬無可借助而陝
省各營又已分布邠隴鳳略商雒一帶尙虞單薄礙難抽撥因
卽飭令楊得勝駐紮河上原之雄毅一軍就近聯絡慶防各營
以壯聲勢一面檄飭鄆太愚就現有兵力進剿吳旗鎮踞逆務
期悉數殄除並飭定邊各營實力防堵以靖邊氛茲據鄆太愚
稟報該軍由保安進紮金湯鎮相距吳旗鎮四十里八月初一
日據探靈州逆回由紅柳溝新安邊一帶分股一由吳旗鎮大

路直撲金湯一由劉家坪瓦社袁家溝小路繞出金湯之後鄆
太愚督率中軍鐵騎兩營由洛河川進攻吳旗鎮並派左右兩
營由馬營西溝塔等處進剿劉家坪此路山徑叢雜經保安縣
知縣劉樹義帶領民團以爲鄉導初二日黎明中軍鐵騎兩營
行距吳旗之八里小川口地方與該逆前鋒馬隊相值我軍步
隊列陣施放鎗礮馬隊由右翼包鈔賊勢不支紛紛敗退我軍
奮勇追殺衝入吳旗鎮斬殺多名該逆退出河邊逆首惠喜中
率領悍賊數千人抵死抗拒鐵騎營參將孫士立持矛大呼衝
進賊隊將逆酋惠喜中橫擊落馬登時擒獲餘賊敗退過河淹
死甚眾中軍游擊周萬祥奮不顧身帶隊直追手刃數賊逆眾

慌亂越山竄遁當將吳旗鎮克復其劉家坪瓦社袁家溝等處
逆匪亦經左右兩營擊敗擒斬不少餘逆由亂石莊野雞窪一
帶遁去訊據逆酋惠喜中供稱金積堡巨逆馬化龍蘇玉寶馬
生彥等令其與馬成海揀選精銳數千分股圍撲該營以通入
陝之路等語當將該逆等正法此役共計陣斬數百名生擒首
從十餘名落水死者不計其數奪獲騾馬旗幟器械多件現飭
孫士立馬隊駐紮吳旗鎮隨時偵探以備堵剿所有步隊各營
仍紮金湯鎮以固後路而資援應此鎮西一軍剿賊獲勝克復
吳旗鎮擒斬逆酋之情形也至定邊防軍疊據副將段登雲稟
稱於七月初五日探有馬賊二十餘名由南山打糧勢必取道

璩家灘當經知會副都統西們克西克副將趙有勝各派馬步
隊伍前往截擊是日黎明行抵該處適遇賊騎由南而至西們
克西克趙有勝督隊鈔襲東西兩路游擊殷華庭都司李楚英
由中路衝殺該逆抵死抗拒殷華庭奮勇爭先持刀陷陣連斃
悍賊數名因刀柄砍折被賊矛傷右脇猶復裹創力戰李楚英
催隊殺入賊始披靡共計殲斃三百餘名生擒王得魁一名解
赴翁同書行營正法奪獲騾驢二十餘頭刀矛無算各軍亦有
傷亡是月二十三日探報由山中竄出賊馬千餘騎距輒井堡
僅四五里勢甚危急段登雲復會同西們克西克趙有勝派撥
馬隊分路馳赴截剿該逆遙見官兵卽向東南奔竄我軍催隊

緊追直至甌井堡東南十五里之姬家灣地方前有數十丈深溝該逆路窮勢蹙墮溝跌死者不計其數我軍三面堵殺共斃賊二百餘名生擒十餘名解赴翁同書行營正法奪獲器械騾馬無算此定邊防軍屢次勦賊獲勝之情形也臣查甘軍自金積堡失利後逆焰益張驤東犯時有窺伺陝疆之意頃聞黑子城一帶降回蠢動雷正綰督兵會勦李旺堡竄匪勢不能兼顧東防而慶陽各營亦難抽撥以助陝力鄆太愚段登雲等軍分防保安定邊兩處兵力本單今幸疊挫凶鋒賊蹤未敢深入邊境賴以保全鄆太愚所部鎮西一軍在陝幾及兩載前次防堵商南布置甚屬周備此次克復吳旗鎮擒斬逆酋勦辦尙稱

妥速段登雲一軍駐防定邊亦已年餘且與趙有勝等屢次出
隊剿賊屢有斬馘不無微勞可錄該二軍防剿甘邊地瘠糧乏
寒苦倍常自應隨時量爲獎勵以鼓其奮勉之志可否仰懇
天恩准臣擇尤保奏以示鼓勵之處出自

高厚鴻慈除飭各營認真堵剿勿形疎懈以固邊防外所有克
復吳旗鎮擒斬逆酋並屢剿定邊竄匪獲勝緣由理合恭摺馳
奏伏乞

皇太后

皇上聖鑒訓示謹

奏

附捻逆復竄鎮平內鄉派兵防堵疏

再臣前將捻逆竄擾情形飭派記名提督劉厚基督率親兵馬步五營馳赴商南縣屬武關一帶扼堵緣由附片奏

聞在案嗣據潼商道蔣徵陶並商雒各州縣探報該逆在鎮平縣賈宋地方被官兵擊退竄赴南陽以東白河一帶官兵駐紮賈宋及老河口等處現有豫軍張曜宋慶分途追剿一股竄入汝甯府屬其後股已竄確山西平一帶相去內鄉漸遠頃又據各路稟探該逆復竄至鎮平之賈宋昆坡一帶邊馬擾及內鄉縣之公義寨距城僅數十里而鄧州新野交界之天成寨鄧州所屬之南窪子桑莊五龍鎮等處均有賊蹤新野所屬之崗頭

塚頭二寨被逆攻破盤踞勢甚猖獗等情查該逆股數既多東奔西竄迄無定向陝省各營分布保定邠隴鳳略一帶防剿尙虞單薄苦於無可抽調之師以益東防仰荷

天恩屢諭河南撫臣吳昌壽迎頭堵擊毋令竄陝不勝感激之至現在逆捻復竄鎮平擾及內鄉商雒邊防又形喫緊臣惟有督飭劉厚基激勵將士實力扼堵並飭各地方文武會集兵團協守富水竹林三要漫川各隘以固疆圉一面飛催彝字營黃鼎速赴潼關以重防務理合將捻逆復竄鎮平內鄉情形附片陳明伏祈

聖鑒謹

奏

劉中丞奏議卷十一終

劉中丞奏議卷十二目錄

請飭川省速辦捐輸以濟甘餉疏

請假回籍修墓疏

會奏甘省軍情猝變請籌兵餉嚴備疏

附密籌布置疏

附催辦川捐疏

附奏調金順等馬隊來陝助剿疏

附據報涇州危急派兵防堵疏

撫輯雷營潰軍事變稍定疏

甘軍廣築圖犯陝疆疏

附請揀固原提督疏

附潰勇圍竄湖北分路堵剿疏

附遣撤黔勇回籍疏

附請飭河南山西各辦硫磺協濟軍火疏

保奏官軍擒獲首逆出力員弁疏

附奏陝省力難籌撥成祿軍餉疏

附報解成祿軍營棉衣火藥疏

附奏畱養察哈爾馬匹疏

附請議卹李萃林等病故各員疏

官紳捐資助賑請獎疏

附報籌撥甘軍餉銀軍火數目疏

官軍追剿叛卒擒獲首犯遣散餘黨疏

附報堵截甘肅潰勇疏

附請撥京藥以濟急需疏

附派員署理藩司疏

堵剿逆回情形稍鬆疏

附請畱延廊防軍疏

附請交卸後回籍疏

劉中丞奏議卷十二

湘鄉劉 蓉著

請飭川省速辦捐輸以濟甘餉疏

同治四年八月二十日

奏爲援甘軍餉窘乏殊常陝省萬難設措請

飭四川督臣督飭司道查照川局現辦勸捐章程會同委員妥籌速辦以資接濟而維大局恭摺奏祈

聖鑒事竊

臣

以甘餉難籌曾於同治三年十二月奏派革職

營藩司毛震壽會同四川藩司江忠濬永甯道恩祥署川東道覺羅恆保就川省設局舉辦捐輸欽奉

諭旨允准在案嗣於本年三四月間接據毛震壽稟報已經稟

請督臣駱秉章會商該司道等派委員紳分赴各府州縣設局勸辦漸有端倪五六月閒復接稟報現由各州縣分派捐辦約可三十萬金惟五月以前雨澤愆期驟難收集以後盡力籌畫當可源源解濟等語維時正值甘餉萬分枯竭無可籌撥聞信之餘不勝慰幸詎意七月中旬忽接川局委員函稱捐輸一事現經釐捐總局鹽茶道啟芳等詳請制軍通飭各府州縣此次援甘軍餉祇准自向籍隸陝甘之官幕紳商量力捐助不得累及川省紳糧不准委員與地方官借印會銜傳集紳糧議捐攤派擾累閭閻如敢抗違卽行參辦經此通飭之後捐事萬難措手等語接閱之頃焦灼萬分竊維分捐攤派本屬違例之事而

勢處萬難亦有不得不勉籌共濟者陝省殘破情狀久在
聖明洞鑒之中上年多隆阿穆圖善等委員就同州鳳翔府屬
派辦捐輸派捐糧石已屬搜括無遺今春雷正綰張集馨復奏
派委員就鳳翔三水等處每縣指派三四萬至五六萬不等並
於寶雞韓城等處設卡收抽釐稅本年閏五月楊能格雷正綰
復奏請派撥陝屬常社食糧二萬石運解慶陽糧臺陝省倉糧
已罄無可籌給顧念甘軍饑窘不得已就甘泉各處義社倉穀
竭力如數湊撥嗣復經楊能格咨派委員丁佩璐劉寶燭指赴
耀州鄜州大荔澄城郃陽宜君韓城朝邑甘泉白水中部洛川
三水膚施同官安塞保安延川安定靖邊綏德米脂清澗神木

懷遠府谷邠州乾州長武淳化富平醴泉咸陽三原永壽興平
涇陽武功隴州汧陽寶雞麟遊四十二州縣中派捐麥糧每縣
或一二千石至三千石不等扣折銀兩運解臣以各州縣凋敝
之餘藜藿不飽勢不能再事搜括迨接見委員詢悉軍營情狀
苦不可言從前每人日給灰麪一斤各軍士日食三餐不得一
飽迨後軍糧益匱每名僅給灰麪半斤搭放榆皮四兩苜蓿四
兩且有不繼之時因念荷戈之儔窮困至此實屬從前軍營所
未聞不得已查照來咨札飭各州縣會同委員妥爲勸辦州縣
官傳集里長紳民按糧攤派奪窮民口吻之餘粒供甘軍饑困
之殘生各縣紳糧每來省城攔輿哭訴臣亦祇得告以甘軍困

乏情形諭以脣亡齒寒之義如竟置之不顧萬一兵潰回猖卽欲求一日之生聚而不可得忍心苦口開諭再三各紳糧亦祇得含淚以去然而閭閻苦累情形有不堪涉想者矣現又准穆圖善咨稱甯夏餉乏糧匱囑札延榆綏鄜四屬籌辦軍糧按月解濟並擬派延安榆林兩府每月各解糧十萬斤鄜州綏德兩州每月各解糧五萬斤通計月需三十萬斤委員守提悉率不已秦民困苦至此豈復能堪然當此無可奈何之時亦未敢置諸漠不相關之列也川省地方繁富視陝西何止霄壤之別從前辦理捐輸均係按糧攤派緣錢糧科則最輕而中不殷實之家比戶相等故官司祇捐富室而民間自樂分攤其糧數可及

貢監從九者卽由一戶獨承糧稍少者或兩三戶共派一從九之數或四五戶合成一貢監之捐由各花戶自擇一人承受議敘職銜歷辦捐輸悉從此例至於各州縣支應夫馬之局團練防堵之費均照錢糧分派甚至地方官私虧之款賠累之貲亦由民間按糧分攤但平日官聲稍優亦且欣然聽命是川省辦理捐輸向與他省迥異非因協濟甘餉之故始創爲按糧捐辦之圖也竊思川陝兩省均與甘境毗連秦蜀黎民莫非

朝廷赤子在各疆臣畫地自守或有畛域之分而我

皇上一視同仁初無厚薄之判譬如人家兄弟貧富攸殊則使之推有濟無分多潤寡固爲父母者大公無私之道不得因門

戶各別遂至痛癢無關駱秉章素顧大局何至秦越人肥瘠相
視或者地處豐饒竟不知甘省艱窘情狀遂至如此之極抑或
進言者別具衷曲熒惑聰明致改故常之度也臣以陝疆殘破
焦慮逾年曠職辜

恩日增慙悚比值甘省提餉之吏日集於門索糧之書日接於
目而庫款罄竭無可轉輸並准湖南撫臣李瀚章咨稱東征局
釐金一項業經出示停止礙難再抽川局捐輸又復中變束手
仰屋絕無一綫可恃之源早夜憂煎肺灼肝鬱心火上炎竟夕
無寐蓋兩月於茲矣茲得蒙

恩開缺如釋重負以後事體似可聽新任撫臣之裁度顧念各

路防軍欠餉特鉅英毅軍積欠至十一月之久前由襄城拔赴鳳翔竟以索餉譁譟斬參將以下十員而後行現在旦夕嗷嗷張頤待餉萬一趙長齡接任之後各軍竟以無餉渙散貽誤大局則臣雖去任尚有餘責不得不代爲規畫先事綢繆伏祈皇上聖慈俯念陝境艱難協甘無力

敕下四川督臣駱秉章督飭藩司江忠濬永甯道恩祥署川東道恆保等會同毛震壽仍照前辦勸捐章程妥籌速辦俾得集成巨款藉資接濟勿壞已成之局致滋譁潰之虞庶幾趙長齡得所藉手尙可以展布從容而微臣獲息仔肩亦幸免乎後咎餘責不勝祈禱懇切之至除飛咨新任撫臣趙長齡會商駱秉

章安速籌辦外所有甘餉萬難設措請

敕四川督臣督飭司道查照川局現辦勸捐章程會同委員妥籌速辦以資接濟而維大局緣由謹縷晰附驛陳

奏伏祈

皇太后

皇上聖鑒訓示飭遵謹

奏

請假回籍修墓疏

同治四年八月二十日

奏爲恭謝

天恩仰祈

聖鑒事竊臣於同治四年八月初十日准軍機處遞到本年八月初二日

上諭前因劉蓉於明白迴奏摺內語多過當有乖敬慎且於記憶未清之詞率行入奏當經降旨交部照例議處茲據吏部奏稱劉蓉應比照言官條奏失體降一級調用私罪例議以降一級調用毋庸查級紀議抵等語劉蓉著照部議降一級調用不准抵銷餘依議欽此跪讀之下感悚難名伏念臣湘楚庸材遭逢

殊遇昇以封疆之寄受命以來將及兩載仰賴

聖主威福陝境以次肅清而田地荒蕪未盡招徠墾闢之術閭閻凋敝迄無休養生息之期欲飭吏治而積弊仍多欲籌餉需而軍儲屢竭才疏任重慙報

國之無方能索智窮徒積憂而成疾雖

微臣

自顧迂庸不職彌

皇上俯念時勢維艱不責旦夕之效而

增曠廢之愆每撫膺以自傷覺辜

恩之特甚前奏措詞失當自蹈愆尤

聖德寬仁僅施薄罰因材而篤

天恩曲予以栽培知過必更

宸訓永承夫敬慎誓貞晚節仰答

深仁查新任撫臣趙長齡到任尙需時日臣惟有時加警惕益
矢忠貞在任一日仍當勉盡一日之職匪特東西各路邊防不
敢稍涉疏懈卽吏事民事亦當隨時整飭不敢弛廢紀綱稍存
五日京兆之見現將經手事件逐一清釐俟趙長齡到省交卸
仍將現在辦理情形及將來規畫事宜詳悉商告冀藉後任幹
旋之力稍弭前日曠職之愆區區愚忱庶用自竭抑臣竊有私
情瀆請者臣自咸豐九年十月在湖南本籍丁臣父艱十年八
月營葬甫畢卽經撫臣駱秉章奏調隨赴四川軍營旋蒙
特恩補授川藩晉擢陝撫遠離故土六載於茲自維墨經從戎
旣未能在籍終制而兩弟早世家無次丁窀穸之藏迄未修葺

念邱墓之遠隔寘寤寐以難忘祇以軍務方殷仔肩特重未敢
陳情自便現在蒙

恩開缺稍得寬閒合無籲懇

皇上恩施賞假四箇月俾臣暫回湖南本籍修治墳墓稍盡人
子私情如蒙

聖慈俯准臣俟交卸後卽由湖北取道回籍假滿之後謹當匍
赴

京闕瞻仰

天顏稍伸依戀之忱圖效涓埃之報所有微臣感悚下忱恭謝
天恩並懇

賞假回籍修墓各緣由謹摺附驛陳

奏伏祈

皇太后

皇上聖鑒謹

奏

會奏甘省軍情猝變請籌兵餉嚴備疏

同治四年八月二十六日

奏爲甘省軍情猝變陝西局勢可虞請

旨籌撥兵餉嚴備非常恭摺由驛會奏仰祈

聖鑒事竊

臣

等現接署涇州知州林發深涇州營都司孫登策

學正王善治訓導蘇亮節等八月二十二日會稟據稱署固原

提督雷正綰前因進攻金積堡各營兵勇大挫失利欽奉

諭旨將該提督革去幫辦以示薄懲詎意該提督跋扈不臣統帶各營弁勇由固原起程赴涇聲稱清算糧餉經固原州知州蔣牧諭以大義竭力勸阻該提督立將蔣牧細殺隨即帶隊起程職等刻即會商閉城捍禦奈城中官兵甚少城關居民張皇失措其勢不可終日伏望迅派重兵星夜馳援以解倒懸之急並稱探聞該提督已令回酋穆三圍攻慶陽遣赫明堂占踞平涼文員均被戕害等語臣等閱稟之餘不勝駭異查雷正綰由行伍効力軍營累保至實缺提督幫辦甘肅軍務朝廷所以相待之意至爲優厚卽金積堡敗挫之後亦未深加

譴責何至如該州所稟遽存跋扈不臣之志且聞該提督平日性情尚非獷悍強橫之比何至狂悖妄行喪心至此惟據稟業已戕害職官分遣回酋攻踞城池則乖謬情形亦可概見前值陶營潰卒二千餘人竄近寶雞焚掠滋擾旋據鳳縣稟報張華所部黔勇三千餘眾亦由秦州潰散竄近鳳縣之吳寨一帶經臣蓉檄飭總兵劉玉興率英毅五營總兵蕭德揚率湘果三營分投堵截旋復添撥省標邱時成馬隊二起彭體道步隊三營前往協剿現據劉玉興等稟報陶營叛卒業經該鎮率師追剿由寶雞退趨隴州南境香泉新店子等處距吳寨僅四十里恐此兩股勢將合併等語今雷正綰心懷叵測變出意料之外萬

一收此兩股潰卒合併所部思歸之眾二十餘營直犯陝疆氣焰炎炎實有猝難禁禦之勢查陝省西路防軍現駐略陽者道員蕭德綱兩營駐鳳縣者蕭德揚三營駐漢中者蕭慶高本部兩營駐隴州者劉玉興五營駐鄜州之河上原者楊得勝馬步四營駐保安之金湯鎮者鄆太愚馬步四營駐定邊者段登雲馬步三營東路防軍駐商南之武關者劉厚基馬步五營駐山陽之漫川關者黃加焜新募兩營均在扼堵喫緊之際不得不外固藩籬萬難抽動現存省城者僅臣蓉衛隊一營並城守營兵五百人及奴才德興阿駐防滿城之馬步各隊腹裏空虛庫儲罄竭萬一潰軍淹至實屬難以支持伏祈

聖慈敕下西安將軍都興阿甯夏將軍穆圖善迅撥金順西們克西克兩起馬隊馳赴陝省邠長一帶相機扼堵並

飭四川督臣駱秉章就建昌鎮總兵周達武部下抽派總兵李輝武所帶楚軍步隊五營卽隨新任撫臣趙長齡由川赴陝以護省垣而資調撥其口糧卽由川省源源解濟庶幾稍資備禦藉固根基除密飭彭體道率師回省布置並札各防軍及各府縣隨時嚴備由臣等察看情形相機調撥備豫外所有甘省軍情猝變陝西局勢可虞請

旨籌撥兵餉嚴備非常各緣由謹合詞由驛馳

奏伏祈

皇太后

皇上聖鑒訓示飭遵謹

奏

附密籌布置疏

再查雷正縮自率師赴甘以來與臣處音信常通六月以前書問不絕自金積堡敗挫之後臣慮其軍械喪失驟難整頓前後四次派員撥解火藥鉛彈火箭火彈之類爲數不少該提督竟無一字咨覆迨所部劉正高潰卒王得順段炳春等竄入陝境經臣勦辦之後勒令降眾八百餘員名回甘歸伍効力自贖該提督亦無一字答復臣以爲武夫失志心懷怏怏亦屬恆態惟

聞其日與回酋赫明堂等同榻喫煙情最親密並收納所獻回
女不以軍事爲念竊慮其情志荒迷勢難振作以後陝甘局勢
深爲可慮不謂其蠢惑狂悖竟至如此或爲部下將弁迫脇所
致亦未可知現值陝省腹地空虛無兵堵禦不得不爲急來緩
受之圖擬卽選派向與該提督熟識之員持函前往諭以
朝廷威德開示利害暫爲羈縻勿絕之計冀其稍知悔悟尙有
轉機一面催調各軍密爲布置伏祈

皇上降旨傳諭該提督備述從前

恩遇之厚飭令約束將弁共相奮勉但能顯立功效仍當立霽
恩施並不將其狂悖情形遽卽宣露仍一面

敕令駱秉章速撥李輝武所部步卒五營並調金順等馬隊兩起星速赴陝亦祇以雷陶張華等營潰卒旬結逆回紛竄陝境爲詞但得該提督觀望徘徊遷延時日爾時所調馬步各軍旣已先後抵省卽使果有他變亦可從容指揮不致蔓延爲患至

臣前蒙

恩開缺雖經陳請

賞假回籍現值邊陲警報時聞因未敢偶涉疏懈卽將來趙長齡到任交替之後臣亦必與會商一切布置周妥始能放心回籍不敢祇爲一己自便之圖遽置地方大局於不顧區區愚忱伏祈

聖鑒謹

奏

附催辦川捐疏

再陝省庫儲窘乏情形業經臣疊次陳奏比因川局援甘捐項
既經毛震壽辦有成緒旋復中變又經臣於八月二十日將陝
甘軍營窘迫各情及川省歷辦捐輸章程縷晰入
告籲懇

聖恩敕下四川督臣駱秉章督飭藩司江忠濬等查照原議會
商妥辦以濟要需在案現准穆圖善咨撥兩月軍餉專派驍騎
校如琨來陝守提並據函稱甯夏軍營糧餉兩缺困苦殊常刻

值秋深氣肅饑寒交迫軍士怨咨眾情解體不但各無鬪志且將立見潰譁之虞接信之餘不勝焦灼目下又值雷營潰卒大股麇來而司庫蕩然卽本境防軍亦已難期用命萬一甯夏各營相率渙散陝甘大局何堪涉想不得已再乞

皇上天恩復飭駱秉章會同新任撫臣趙長齡速籌妥辦務及原籌捐款三十萬之數源源解濟庶甘軍不至全潰陝事尙可支持且此項出自民間捐輸並不取諸司庫於川省事體無損而鄰封獲惠已多臣由前日言之或謂其私於秦隴而自今日降調開缺之時言之其爲地方大局起見較然著明伏祈

聖鑒謹

奏

附奏調金順等馬隊來陝助剿疏

查

奴才

舊部西們克西克馬隊三百餘名由山西管帶來陝駐

紮省垣嗣因甘肅北路喫緊經穆圖善商同

奴才

先將此起馬

隊撥赴訥欽軍營復由該將軍部下撥來金順馬隊三百餘名

以作移緩就急之計迨穆圖善奉

旨勦辦甯夏回逆仍將金順馬隊帶往彼時因陝境漸就肅清

未敢強畱茲值大股潰勇東犯自應就近飛調此起馬隊以顧

眉急查金順本係西安副都統曾經帶隊畱陝之員而都興阿

軍營尚有杜噶爾常順沙布都爾札布訥依楞阿壽昌等馬隊

足敷攻剿合無仰懇

天恩垂念疆圉孔亟

俯准金順西們克西克馬隊迅速來陝以資助剿除一面飛咨都興阿穆圖善並檄調金順西們克西克各帶本隊星夜馳援外謹合詞附片陳奏伏祈

聖鑒飭遵謹

奏

附據報涇州危急派兵防堵疏

正封摺間接據邠州長武縣知縣張景福二十四日稟報雷正綰馬步各軍業已圍撲涇州城垣鄉民紛紛逃竄涇州距長武

僅及百里勢殊可危等語除分飭劉玉興邱時成等馬步各營
前往防堵外謹附片陳

奏伏祈

聖鑒謹

奏

撫輯雷營潰卒事變稍定疏

同治四年九月初八日

奏爲雷營潰變弁勇逼涇搶掠經守城文武懲辦撫輯事變稍
定惟逆回踞城猖獗仍撲涇州謹將詳細情形據稟馳奏仰祈
聖鑒事竊臣前接署涇州知州林發深等稟報雷軍變亂情形
業經會同署西安將軍由驛馳奏請調馬步兵勇來陝防剿在

案臣於拜摺後卽專弁函致雷正綰導以忠義曉以利害囑其約束士卒退守平固如有急須剖白之隱衷不妨具摺自陳等詞懇切開導去後尙未接該提督函覆旋據署涇州林發深統理雷營軍務儘先提奏提督周顯承等疊次稟報雷正綰於八月十八日聞金積堡失利被議之信心頗不平部將記名提督胡大貴副將雷恆李高啟等挾制謀變遽卽撤隊由八營進趨固原將知州蔣牧細縛防城武弁金占元及兵勇二百餘名同時殺害城池交赫明堂占踞城內塵市搶掠一空旋由固原東下平涼將由涇解往鶴齡軍營之餉銀二萬二千四百餘兩悉數搶奪並解赴成祿軍營之火藥鉛彈火繩竹竿等項一併劫

去二十三日該叛勇馬步各隊陸續竄至涇州城外一二十里及三四十里左近川下原上逐處盤踞擄掠北原村堡多被踏毀幸城內先有兵勇數營該牧與周顯承等預將城防布置周密妥盤獲來城謀爲內應之副將何成蛟先行正法二三四等日李高啟率同守備匡文武等馬步各數十騎直至西北城門約周顯承出城說話意圖哄開城門爲誘脇同叛之計周顯承正詞拒絕城上將士均不爲所搖惑旋將匡文武設法誘擒並將夥搶鶴齡餉銀之都司周有文於城外緝獲搜出餉銀九百七兩四錢當卽訊明均行正法維時雷營將官在涇養病者記名提督譚玉龍劉正高記名總兵劉効忠陳義已革總兵劉車

龍總兵銜副將賈炳培周模善等十餘員均皆併力協心登陴
防守叛將胡大貴雷恆李高啟所帶馬步弁兵多其舊部相從
日久之人當經周顯承譚玉龍等諭以順逆招撫收集七八營
解散回籍者又二三營於是逆黨勢孤胡大貴雷恆李高啟知
眾心瓦解事已無成亦各率眾遁去二十六日雷正綰親至涇
州城外十里鋪邀周顯承出城面晤周顯承因派周模善等前
往據述雷正綰言此次語言偶失檢點胡大貴李高啟等乘機
生變致有此舉現在惟有力挽大局曉諭兵勇趁早回心免釀
巨禍但求發麩萬斤立即拔營回赴固原與賊決戰誓拌一死
以報

朝廷情詞哀惻聲淚俱下實屬出於至誠周顯承當卽派弁運麩萬斤前去雷正綰旋率所部於二十七日回赴平涼惟聞回酋穆三赫明堂楊大娃子已率所部大隊回眾由固原前來李高啟等復與合併經雷正綰涕泣開導誓之以死不肯聽從現查雷正綰所存兵勇不過二三千人誠慮回眾兵單反爲脇制以後事勢仍未可知等情具稟前來伏查雷正綰自隨多隆阿由皖鄂入陝以來艱辛百戰功績昭然赴甘以後屢著勲勞兼值餉絀糧艱行軍尤苦乃因喪師被議稍懷快悒胡大貴雷恆李高啟竟敢迫脇生變由平固直趨涇州意以爲周顯承譚玉龍等均屬雷營舊部城池唾手可得由此擁眾長驅直犯陝境

不難大肆鳴張幸周顯承等忠義爲懷與林發深協力固守招撫部眾解散羽翼倉卒定變化險爲夷胡大貴等知所謀不遂亦卽氣奪以去此皆仰賴

皇上威福遠被而周顯承等忠貞效順之忱亦不可沒合無籲懇

天恩立加鼓勵儘先提奏提督周顯承深明大義力遏狂氛記名提督譚玉龍招收部眾共消巨患該二員官階較大可否賞給一品封典周顯承並

賞賜物件以示優隆記名提督劉正高前有被參交部嚴議處分可否准其寬免記名總兵劉效忠陳義二員可否

賞加提督銜總兵銜副將賈炳培可否以總兵補用副將周模善可否

賞加總兵銜已革總兵劉車龍可否開復參將以觀後效補用知府署涇州直隸州知州林發深可否以道員補用其餘在事出力文武可否准其擇尤保獎以彰忠順之忱並使各營將士共仰

朝廷威德益凜然於順逆之分伏候

宸斷至於胡大貴本係降賊已保至記名提督雷恆李高啟均以勇丁保至副將乃敢倡議謀叛實屬罪不容誅應請立予革職俟拏獲後卽行就地正法以昭炯戒雷正綰於部將謀變未

乞
能力卽懲辦以遏亂萌自屬咎無可辭如能收斬胡大貴等並
曉諭回酋赫明堂穆三楊大娃子速戢邪心使就馴服仍當叩

聖主逾格鴻施念其前日徵勞寬免處分以示終始成全之至
意至續竄涇州逆回爲數甚眾除飛飭周顯承譚玉龍等竭力
堵截並會同署西安將軍德興阿另摺馳奏請調馬步兵勇前
後截擊外所有雷營潰變弁勇逼涇搶掠經守城文武懲辦撫
緝事變稍定各緣由理合恭摺由驛馳奏伏祈

皇太后

皇上聖鑒訓示謹

奏

甘回屬集圖犯陝疆疏

同治四年九月初八日

奏爲甘省逆回大股屬集圖犯陝疆請

旨分撥馬步各軍前後截剿並催山東協餉以固陝邊而維大局恭摺會奏仰祈

聖鑒事竊臣等頃接涇州知州林發深稟報雷營叛將胡大貴李高啟等勾結回酋赫明堂穆三楊大娃子各帶馬賊千餘分由鎮原甯州崇信三路圖竄陝疆現據提督周顯承稟報靈州逆回馬化龍又率大隊馬步各萬餘騎突至鎮遠之新城鎮直達涇州之北原圖分南北兩路竄犯陝西涇州兵力新集勢難

堵禦請速撥大軍截勦等情前來臣等竊查陝省西路防軍均當扼隘嚴備之際萬難抽動而且多係步隊實亦難禦騎賊奔突之勢前經奏調副都統金順西們克西克兩軍現尙未聞起程信息他省騎兵尤難速集再四圖維惟有籲懇

天恩迅飭甯夏將軍穆圖善帶領本部馬隊親兵督同金順西們克西克兩軍繞由延廊疾赴邠長截擊合計馬隊可及七百余騎尙可少資馳驟至該將軍所帶步卒除衛隊親兵二百名外其餘各營仍請畱駐該處併歸西安將軍都興阿統轄則於甯夏大勢仍無妨礙穆圖善久在多隆阿軍營向與雷正綰周顯承譚玉龍等相熟洽計尙可聯絡聲氣收撫潰卒更資指臂

之助其或該逆已入陝境並懇

敕下陝甘督臣楊岳斌迅派河州鎮總兵曹克忠督率馬步全軍卽由鹽茶逕趨平涇跟蹤躡剿臣等亦卽分撥馬步隨同穆圖善等前後夾擊以期掃盪逆氛共消肘掖之患至於餉精一事需用甚急而司庫如洗實屬無可籌給查惟山東庫款頗裕舊欠部撥協陝之項計十餘萬未經撥解伏懇

聖慈敕下山東撫臣閻敬銘迅卽籌撥十萬兩委解來陝以濟燃眉之急不勝祈禱懇切之至所有甘省逆回大股麇集圖犯陝疆請

旨分撥兵餉以固陝圉而維大局緣由理合恭摺由驛會奏伏

祈

皇太后

皇上聖鑒訓示飭遵謹

奏

附請揀固原提督疏

再查雷正綰一軍現既潰變雖經周顯承譚玉龍等收集十二
三營而素無紀律終難期其得力雷正綰卽無他意而已近暮
氣部曲離心亦斷難期其振作甘肅東路平慶涇一帶若無重
兵鎮壓不但甘軍難收夾擊之效卽陝境亦有竄犯之虞臣嘗
熟計各省武職大員相去既遠又各當有事之秋勢難抽調而

南人不慣麪食往往視甘省爲畏途多致中途潰散查惟四川
建昌鎮總兵周達武勇略夙著其所部楚軍十五營紀律頗嚴
素稱勁旅該總兵已保記名提督如蒙

聖恩簡放固原提督實缺使率所部赴甘必能得其死力其部
將李輝武及各營弁勇相從日久恩信相孚亦當不至渙散而
且同屬楚軍使併歸督臣楊岳斌節制則事權不分氣誼自洽
查該總兵現紮甘肅文縣規勦松潘夷務與陝甘相去絕近松
潘山勢峭峻九月卽已降雪必須來年四月始可率師進勦置
勁兵於無用之地亦殊可惜四川餉充糧足楚軍之所樂趨如
蒙

敕下督臣駱秉章另派得力將官赴楚募勇不過明年二月卽可逕抵松潘如此一轉移閒甘軍可期復振之威陝省或無後顧之患其月餉暫由川省接濟俟到甘以後仍由慶陽糧臺給發則川省不致大累而慶臺亦得以稍紓其力臣爲陝甘大局起見是否有當伏祈

聖鑒施行謹

奏

附潰勇圖竄湖北分路堵剿疏

再查陶營潰勇兩股竄入陝疆其一起不服開導拒殺官兵當將派兵馳往堵剿大概情形由驛具

奏在案旋據總兵劉玉興稟稱該叛勇於八月十六日乘夜逃竄金陵川一帶該總兵率隊追剿直至隴州所屬之縣頭鎮地方斬殺百餘名生擒二十餘名奪獲原失關防各件我軍亦有傷亡該叛勇由赤沙渡河飛奔圖擾鳳縣徽城等語維時適接稟報雷正綰全軍猝變勾結逆回赫明堂等竄踞固原平涼進撲涇州情形萬分喫緊陝邊邠長一帶空虛不得不移緩就急當飭劉玉興率部馳往邠長邱時成馬隊暫紮鳳翔以資策應將彭體道撫標三營調回省城布置防務一面檄飭駐防鳳縣之總兵蕭德揚等就近堵剿此起叛勇嗣據節次稟報由百花川竄至鳳縣唐藏之月股潰勇於十八日竄據李家莊黃家觀

一帶經該總兵會同毛福益等率隊分路夾擊殺斃騎馬潰卒百餘名馬數十匹餘眾跪地乞撫查係陶軍提選中前右後及茂字各營共計潰卒遊勇二千七百餘人夫三百餘人當經勒令繳出鎗礮旂幟刀矛等件查出倡首之尹得升李老三兩名立即正法餘俱分別籍貫遠近酌給川資派兵押送出境其由寶雞竄出叛卒派令毛福益率隊堵擊於姬家坪殲斃三百餘名奪獲馬匹軍械甚多該匪由田家溝奔入砦灣場我軍奮勇追勦立將該場攻開眾匪沿山逃遁我軍追至於關爺嶺該匪列隊抗拒相持半時之久斃賊數十名遊擊蕭集玉瞥見匪首執旂在後督隊率勇衝入賊陣連刃擊鼓賊二名帶傷而回旋

即殞命此股叛勇多籍湖北江南河南各省其意亟圖竄回鄂境計所餘尙千餘人被勦之後復折向寶雞縣觜頭地方沿山狂竄據拏獲賊供在陝不敢停足有由興商急竄湖北之說等情臣查該叛卒由甘潰散不服開導屢次抗拒官兵實屬罪不容誅豈可稍事姑息況刻下豫省捻逆紛擾逼近鄂陝邊界誠恐該逆逸出勾結爲患當經飛飭駐紮商南武關之記名提督劉厚基扼要截擊並咨檄興漢兩鎮及甯陝廳營派兵集團併力兜勦總期就地殲除以免勾結而靖地方所有陣亡之花翎遊擊蕭積玉請

旨敕部從優議卹以慰忠魂理合將陶營潰勇沿途抗拒圖竄

湖北現飭各路堵剿以期聚殲而免勾結緣由謹附片陳明伏
祈

聖鑒謹

奏

附遣撤黔勇回籍疏

再臣於同治四年七月十八日接據甘肅臬司林之望稟稱該
司所部張華一軍多係獷悍頑徒早擬遣撤因防剿殷繁勉畱
撫馭今該勇等因聞調赴肅州之信咸懷畏懼不願遠征又接
黔省來函知其鄉土被賊蹂躪歸思尤切遂於六月初二日擁
眾哭訴固求發餉遣歸察其情形斷難復用若加威脇強畱必

致相率潰變業已稟請督臣楊岳斌奏撤等情前來臣查張華所帶均係黔勇本屬桀驁難馴既不願赴肅州相率思歸畱之徒增擾累當經批令該司妥速裁撤資遣回籍以免別滋事端因思該弁勇等由甘回黔必由漢南一帶行走誠恐沿途騷擾隨卽分別移飭漢中鎮總兵蕭慶高陝安道何丙勳派兵集團彈壓防範一面分咨陝甘督臣楊岳斌四川督臣駱秉章查照去後茲據蕭慶高何丙勳並署漢中府知府楊光澍先後稟稱張華所帶黔勇三千餘名先在秦州高橋地方頗不安分迨至白水江一路尙屬馴帖已於八月十五十六等日陸續行抵略陽縣境經派防略陽之道員蕭德綱等湘果兩營在於河次收

繳刀矛器械多件其大隊勇丁由江口雇船從陽平關一帶逕
赴廣元其餘零星各隊亦由水陸分行均經派員護送出境張
華此次帶勇過略毫未滋事等情具稟前來除分咨楊岳斌駱
秉章知照外理合附片陳明伏祈

聖鑒謹

奏

附請飭河南山西各辦硫磺協濟軍火疏

再據軍需局司道詳稱竊查陝西向不多產硝磺每當配造火
藥採辦維艱同治二年間因需用軍火浩繁無從購買硝磺經
前撫臣瑛榮

奏請河南月解火藥二萬斤火繩二萬盤山西月解火藥一萬斤火繩一萬盤奉

旨允准在案嗣准豫省解過火藥二萬斤晉省解過火藥一萬斤此後均未續解現在甘省軍務萬分喫緊本省邊防亦甚戒嚴各路軍營紛紛調撥軍火刻不容緩陝局製造火藥所需硝斤尙能設法搜求而硫磺一項甚屬缺乏雖出重價無處採辦每擬仍請豫晉兩省照前協濟軍火以應急需第刻下豫省正在勦辦捻逆晉省現值辦理河防竊恐自顧不暇難期協濟惟查豫省之彰衛懷三府屬晉省之太原府一帶均係出產硫磺之區採買較易請飭河南山西兩省每月各辦硫磺五千斤運

解陝局以資配造而應急需等情具詳請

奏前來臣覆查無異相應據情奏懇

皇上俯賜飭令河南山西各撫臣自同治四年九月起每月各辦硫磺五千斤運解陝省以資配造軍火而應急需除咨明各該省查照外謹附陳口明伏祈

聖鑒飭遵謹

奏

保奏官軍擒獲首逆出力員弁疏

同治四年九月初八日

奏爲查明官軍攻破八里坪等處賊卡擒獲首逆曹燦章餘黨悉數殄滅在事出力員弁遵

旨擇尤保獎恭摺仰祈

聖鑒事竊臣前奉同治三年四月二十八日

上諭劉蓉奏官軍分路追剿生擒首逆餘匪一律肅清一摺首
逆曹燦章竄擾陝南西澇八里坪等處築卡抗拒經該撫派令
提督蕭慶高督兵分路前進該逆負隅益固官軍兩路鈔襲斃
賊三百餘人匪眾憑寨拚死抗拒兵勇奮力搶上將逆寨攻破
斃賊四五百人生擒偽巡部都統數人解散千餘人並弋獲曹
逆等眷屬多口餘逆悉向老林逃竄官軍前後夾攻斬殺甚眾
曹逆薙髮潛遁至玉皇廟山窩官軍四面圍攻立將曹逆生擒
餘逆奪路奔竄官軍搜斬殆盡陝南一律肅清辦尙爲妥速

所有在事出力員弁著准其擇尤保獎毋許冒濫等因欽此比
值各營勦辦竄踞盤屋一帶蔡啟兩逆旋復追勦入山越境圍
攻甘肅階州軍事喫緊未及查明保開茲據蕭慶高等將出力
員弁擇尤開單請獎前來臣查湘果彝字兩軍及甯陝營兵團
分途追勦曹逆股匪馳驅深山窮谷之中歷時兩月之久忍饑
苦戰卒能屢克堅寨俘獲元兇餘逆悉數盪平漢南藉以安謐
實非尋常勞績可比蕭慶高等已荷

逾格恩施分別獎賞其餘出力員弁自應量予獎敘用昭激勸
今核其勞績等次擇尤開單未敢稍涉冒濫合無仰懇

天恩俯准給獎以示鼓勵除將擬保干總以下各弁咨部核獎

外所有查明攻破八里坪等處賊卡生擒首逆出力員弁擇尤請獎緣由理合繕單恭摺具奏伏乞

皇太后

皇上聖鑒訓示施行謹

奏

附奏陝省力難籌撥成祿軍餉疏

再臣接奉同治四年八月初三日

上諭成祿所部各軍現由甘省取道西進克日出關剿賊需餉浩繁必須寬爲籌備方不致停兵待餉致誤軍行卽著官文駱秉章劉蓉吳昌壽鄭敦謹王榕吉於各該省按月各籌撥銀數

千兩酌定數目一面奏聞一面迅速派員如期運解成祿軍營源源接濟等因欽此遵卽檄飭藩司林壽圖籌議去後茲據該藩司詳稱奉撥前項軍餉自應趕緊籌畫酌定數目詳請委解何敢稍形推諉惟陝省自遭兵燹以來平原各州縣蹂躪殆遍歲入錢糧均經分別蠲緩司庫早已空虛目下軍務雖漸肅清而甘回豫捻分擾邊疆勢甚喫緊且時有甘省潰勇竄入滋擾或調兵防堵或勦撫兼施無一不需糧餉兼以援甘各營軍火餉項尤須按月協濟支絀情形日甚一日雖此項軍餉月止數千爲數無多而當此凋敝之餘自顧尙且不遑若再按月添籌成營餉銀實屬無可挪湊若將本省急需之款均勻減發不惟

舍己芸人力有未逮且慮顧此誤彼關係匪輕因思山西川楚等省均有奉撥成營軍餉各該省現在情形悉較陝省爲勝惟有詳奏請

旨飭部將陝省應解上項軍餉勻派山西湖北等省協濟則他省僅費有限之資而陝省藉免貽誤之咎如此通融辦理庶餉項不致無著等情詳請具奏前來

臣覆查屬實理合據情奏懇

天恩飭部將陝省應解成祿軍餉在於湖北山西等省酌量勻撥俾陝省稍紓喘急不致貽誤要需曷勝感幸謹附片陳明伏祈

聖鑒訓示飭遵謹

奏

附報解成祿軍營棉衣火藥疏

再臣昨奉同治四年八月初三日

上諭成祿現擬振旅西征著劉蓉派員製造火藥五千斤趕辦
棉衣袴五千件派員運赴甘省毋得推諉干咎等因欽此遵卽
飭局如數製造運解去後茲據軍需局司道詳稱遵查飭辦成
營棉衣袴理應足數趕辦解甘以備應用惟查現在陝省撥解
各路軍餉浩繁司庫如洗以故本省邊防各營兵勇逼近甘境
應需寒衣均因無款可籌未能製辦第查提督成祿現當振旅
西征更屬寒苦不得不先其所急並查該營兵勇爲數無多現

經派員製造棉衣袴各三千件足敷支給一俟造齊卽當派委
妥員解赴甘省交收至奉撥火藥五千斤前准成祿來咨卽行
先籌火藥一千斤火繩三千丈鉛丸一千斤派弁解往甘肅軍
需局轉解在案所有未解火藥趕緊製造續行報解等情具詳
請奏前來臣覆查屬實除飭該局將棉衣袴並火藥趕造齊全
迅卽委員押解赴甘一面咨明成祿查照外理合附片陳明伏
乞

聖鑒謹

奏

附奏畱養察哈爾馬匹疏

再臣於同治四年七月二十日准察哈爾都統阿克敦布副都統廉至咨稱理藩院遵

旨調撥阿巴哈那爾貝子桑齋沙拉特多布捐輸聽調馬一千匹解赴甘肅督臣楊岳斌軍營交納等因派撥四等台吉委梅楞吹鍾札普三等護衛哈木蘇木驍騎校託特迪通事濃不勒帶兵十五名管解頭起正額戰馬五百匹餘馬六十四匹四等台吉班濟爾驍騎校通阿拉克通事哈索齋爾帶兵十四名管解二起正額戰馬五百匹餘馬六十四匹於本年八月二十九日行抵西安省城應卽催趲前進惟查赴甘程途必由涇州固原一帶行走現值雷正綰部下將弁胡大貴雷恆李高啟等帶領隊

伍潰變勾結穆三赫明堂各股回酋竄踞固原平涼等處涇州
戒嚴西路梗塞未便任其輕率前進致滋他虞當經飭令截留
在陝派員點驗兩起馬匹連餘馬共計八百一十三匹內有病
馬五十二匹其餘詢係沿途倒斃以致短缺馬二百五十五匹
隨飭軍需局查照章程籌撥麩料交署城守協副將林春派撥
弁兵妥爲餵養一俟赴甘道路疏通卽行由陝另委員弁解赴
楊岳斌軍營交納以昭妥慎所有該解員兵丁未便在陝久候
當經給咨先令回旂銷差除咨明阿克敦布等並楊岳斌查照
外理合附片陳明伏乞

聖鑒謹

奏

附請議卹李萃林等病故各員疏

再補用總兵李萃林副將銜參將會呈祥擬保知縣候選府經歷蕭嶸三員隨征日久屢立戰功在陝攻克漢中郡縣並蓋屋縣屬樓觀臺等處逆壘頗著勞績現均先後在營病故殊堪憫惜相應請

旨敕部將李萃林會呈祥蕭嶸均照軍營病故例從優議卹以慰忠魂理合附片陳明伏乞

聖鑒謹

奏

官紳捐資助賑請獎疏

同治四年九月初十日

奏爲官紳捐資助賑懇

恩獎敘以示激勸恭摺仰祈

聖鑒事竊

臣

於同治三年由蜀入秦收復漢中之後目覩哀鴻

盈野餓殍載途旣乏庫款可籌又無倉儲可發子遺災黎枵腹

垂斃深堪憫惻爰檄署漢中府知府楊光澍設局勸捐買米施

粥以冀暫起瘡痍免填溝壑凡有紳民輸將踴躍者准照捐米

章程核實請獎於同治三年二月十七日具

奏三月初二日奉

旨撫卹賑濟各事宜著劉蓉遴派妥員督飭地方各官實力舉

辦餘著照所議辦理等因欽此欽遵在案旋據前任陝安道張由庚倡同傅鴻勳等共捐米價庫平足銀四千五百九十四兩當卽如數發局遴派妥員採辦米石於漢郡城鄉市鎮及城洋襄沔各縣分設粥廠按日施散並分飭地方官紳廣行勸辦賑恤一面飭令購覓蘿蔔油菜籽種乘時播殖以資接濟窮民賴以餬口幸免失所流離該官紳等於漢南災黎垂危待哺之時均能慷慨解囊捐資賑濟起殘生於溝壑洵好義而急公自應量予獎敘庶足以昭勸激而示鼓勵核計所捐銀數與捐米章程相符據捐餉局司道議詳請奏前來合無仰懇天恩俯准給獎飭部填給執照以示鼓勵再此案係官紳捐資

賑濟請免造冊報銷除將部飯照費循例解部一面飭造各官紳履歷咨部核辦並將各屬捐賑官紳查明另核請獎外理合恭摺具奏伏祈

皇太后

皇上聖鑒訓示飭遵謹

奏

附報籌撥甘軍餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治四年六月分撥解過撥甘各營餉銀軍火數目附

奏在案茲據軍需局司道詳開同治四年七月分共解支過援
甘各營餉銀二萬六千二百四十兩火藥一萬七千斤鉛丸一
萬斤火繩二萬五千丈火蛋四百箇大紙火箭六百枝竹噴筒
一百箇小紙火箭一百枝白布單大帳房二百架擡鎗鳥鎗三
百桿銅噴筒四十箇花藥火藥餅二百枚二號銅火箭二百枝
引線二萬莖均經分別委解給領取有迴文爲據臣覆查無異
除仍飭該司道等竭力籌措源源接濟外所有陝省同治四年
七月分解支過援甘各營餉銀軍火等項數目謹繕清單恭呈
御覽理合附片陳明伏乞

聖鑒謹

奏

官軍追剿叛卒擒獲首犯遣散餘黨疏

同治四年九月二十五日

奏爲官軍追剿陶營叛卒擒獲首犯殲斃悍黨餘眾悉數遣散現已一律肅清恭摺奏祈

聖鑒事竊查甘肅提督陶茂林所部各營潰卒前由寶雞一帶竄入姬家坪等處沿途拒殺官兵圖竄湖北當經續撥弁兵沿途堵剿大概情形奏報在案臣聞該叛卒多係兩湖強悍之徒既被我軍躡躡意圖竄回鄂疆若聞商州一帶扼堵嚴密勢必竄入南山繞由華陽小路越興安而竄湖北於是飛飭總兵蕭德揚會同總兵毛福益各率所部星馳往追分途截擊以期一

鼓殄除茲據稟稱該叛卒果已竄踞華陽附近之茅坪地方其大股麤聚郝家坪分紮沿土壩鄔家壩長壩李七灣土壩子王家寨等處上下十餘里肆行焚掠勢甚猖獗適值漢中鎮總兵蕭慶高所派營官蕭德見帶領新中營由畱壩江口繞道馳至會勦該總兵等商明欲攻郝家坪必須先破土壩鄔家壩一帶各壘方能分道直上約定是夜四更捲旂息鼓三鼓進兵蕭德見一軍潛出郝坪之左以攻沿土壩毛福益一軍由對河王家寨下渡江潛出郝坪之右以攻茅坪蕭德揚督率前左右三哨並親兵各隊由鄔家壩潛出郝坪之前以攻長壩復派後哨兵勇埋伏河邊以防王家寨土壩子各逆渡河包鈔我軍後路籌

商既定遂各率隊分道疾進時方寅夜各處叛卒不知我軍多
少驚亂失措共計殲斃六七百名餘黨悉向郝家坪奔走蕭德
揚等激厲士氣仍分三路乘勢進擊該叛卒卽在郝坪列隊死
拒鎗礮齊發木石交加我軍奮不顧身前者受傷後者復進遂
奪郝家坪外卡各叛卒遁入內卡少頃復分左右兩路突出悍
黨數百名拌命死拒蕭德揚等麾軍猛撲許以重賞有進無退
當經哨長孟學文蕭呈祥百長趙明魁各率哨長奮矛當先短
兵繼進連刺悍卒二百餘名餘俱紛紛潰退我軍乘勝殺入內
卡又斃數百名並將首逆王正明趙達廷曾益三吳有亮徐益
元賴裕和潘濟盛等擒獲其餘潰勇並對河王家寨土壩子等

處潰卒懼失計各將旂幟刀矛等件一律呈繳跪地乞撫訊
係脇從情尙可原逐名點驗共計二千三百餘名隨即帶回華
陽並就其中挑選精悍之卒二百餘名收錄歸伍餘俱按其籍
貫遠近酌發川資遣散分起派兵押解出境沿途護送回籍均
尙安靜行走不敢滋事各營勇丁亦有傷亡等情具稟前來
查該首犯王正明趙達廷等於甘省更易將領點驗接管之時
膽敢率眾潰變沿途肆擾及至竄入陝疆猶復不遵開導拒殺
官兵實屬愍不畏法除飭蕭德揚將該犯王正明等解省督同
司道訊明正法梟示以昭炯戒外此次蕭德揚等各營追剿叛
卒俘獲首要悉平餘黨辦理尙屬妥速在事出力員弁可否仰

懇

天恩量予獎勵彙入前次彭體道等剿辦潰卒案內擇尤保奏以示激勸之處出自

逾格鴻施其陣亡弁勇飭令查明另行彙案請卹所有甘軍追剿叛卒擒獲首犯殄斃悍黨餘眾悉數遣散緣由理合恭摺馳奏伏祈

皇太后

皇上聖鑒訓示謹

奏

附報堵截甘肅潰勇疏

再現據鳳縣知縣郭建本稟稱探有甘肅潰勇竄至三岔廳之壺泉馬頭相距鳳境計五十里並據兩當縣函稱叛將胡大貴所部千餘人擾及秦州地方等語臣查三岔廳秦州等處均與陝疆毘連自應嚴加防範除飭現紮鳳縣之總兵蕭德揚就近探明扼要堵禦並咨會漢中鎮總兵蕭慶高派兵截剿勿任蔓延滋擾外理合先將探報情形附片陳明伏乞

聖鑒謹

奏

附請撥京藥以濟急需疏

再查上年勦辦蔡啟二逆需用軍火甚鉅陝局籌辦維艱曾經

臣奏派京藥五萬斤奉

旨俞允嗣准工部奏明酌撥火藥二萬斤解陝備用雖未能如所請之數亦藉此稍資接濟現在雷營叛將胡大貴等勾結逆回赫明堂等竄擾平固逼近涇州窺伺陝境臣調集英毅親兵湘果十餘營分堵邠長鳳翔三水瀋化各路涇州周顯承等收募各勇亦計十有餘營加以駐防河上原之雄毅四營金湯鎮之鎮西四營定邊之段登雲三營均值堵剿喫緊之際而且楊岳斌穆圖善成祿曹克忠等各軍迭次催提皆須協濟查陝省存儲火藥早已分撥淨盡庫款又甚支絀籌造每形拮据況秦中素不產礮採辦尤屬艱難昨已奏撥河南山西二省按月協

解硫磺現尙未准報解當此軍務緊要待用火藥甚殷據軍需局司道詳請奏撥京藥以濟急需前來除飭該局設法採辦儘力製造藉顧目前外相應請

旨敕部速撥火藥五萬斤委員兼程押解來陝以資急用理合附片陳明伏祈

聖鑒飭遵謹

奏

附派員署理藩司疏

再藩司林壽圖現奉

諭旨著照部議降三級調用等因欽此查該司曾於本年五月

十三日具稟呈稱母張氏體羸多病時患氣厥之證近以就養來秦不習水土兼之年逾七十氣血衰耗舊恙發而愈劇秦中醫藥弗良屢投寡效該司自幼失怙終鮮兄弟別無侍奉之人懇乞據情代

奏准予開缺俾得奉母歸養稍遂烏私等情臣以其時陝省多故庫儲奇窮吏治餉糈諸資襄助再三慰勉期以共濟時艱旋值

欽差來秦查辦事件遂不敢復有陳請茲已蒙

恩開缺自應照例派員接署俾得及早交替回籍所有陝西藩司一缺擬委督糧道劉齊銜署理其督糧道一缺擬委候補道

沈鵬元署理惟該藩司前經督臣楊岳斌奏派督辦後路轉運局事務亦須派員接辦以專責成查有試用道岳雲溪才局穩練勤慎小心堪以委令接辦該員與新任撫臣趙長齡係屬兒女姻親例應迴避惟委令辦理甘省糧臺轉運事務似與本省差委不同於例初無防礙除分別檄委並咨明楊岳斌查照外理合附片陳明伏乞

聖鑒謹

奏

堵剿逆回情形稍鬆疏

同治四年九月二十五日

奏爲官軍堵剿逆回獲勝涇長一帶情形稍鬆恭摺馳奏仰祈

聖鑒事竊臣前將甘省逆回大股虜集圖犯陝疆請

旨分撥馬步各軍前後截剿並催山東協餉以固陝邊而維大局恭摺會奏在案惟查穆圖善等遠在甯夏勢不能朝發夕至而此閒逆氛猖獗亟應先就現有兵力嚴密堵禦以期保固陝疆門戶因飭記名提督周顯承督同譚玉龍等各軍實力堵剿並飭駐紮邠長之總兵劉玉興英毅一軍聯絡聲勢共相策應去後茲疊據周顯承稟稱該逆大股東竄盤踞新城黨原兩鎮其零星騎賊分股由豐台馳擾長武大路當經派撥譚玉龍等帶隊前往高家坳窰店截擊該逆旋即分竄靈州一帶復飭提督譚玉龍劉正高總兵陳義胡日盛副將張心揚李鳳崗龔得

勝閻定邦遊擊王心元前赴瓦雲驛截勦仍畱總兵譚玉明劉效忠副將賈炳培尹全仁張廷秀都司陳太平姚文卿守備黃監金等在涇揚隊操演震耀旂鼓以張聲勢該逆初意圖乘潰勇紛竄之際攻其無備伺隙東竄嗣見各處營壘嚴密相顧愕然不測我軍多寡隨由涇河川北竄李家堡適雷正綰所部各營亦已悔悟圖報仍駐平涼東四十里鋪堵其由崇信南竄之路總兵沈大興所部威武精選各營固守平涼九月初七日該逆復撲涇河川希圖東犯經譚玉龍劉正高督隊渡河以雄字前營胡日盛副新前營龔得勝義字中營閻定邦居左劉正高帶親兵馬隊及迅字五營親兵並雄字右營居右譚玉龍自率

親兵與周顯承親兵居中復派靖安營兩起馬隊爲左右接應
部署既定該逆馬隊向前衝撲譚玉龍等指揮各軍奮力抵禦
鎗礮環施賊勢稍卻張心揚李鳳崗馬隊分左右兩路鈔出共
計殺賊二百餘名生擒十名奪獲騾馬三百餘匹救出被裹難
民二百餘名其餘敗逆一股退竄鎮原之桐子鎮一股敗竄蕭
鎮我軍亦有傷亡其屯紮新城大股亦於初九初十等日攜帶
婦女退回固原及炭山青青溝沙木耳溝等處其荔家堡之賊
經我軍攻敗後亦由蕭鎮北竄等情具稟前來查此次逆回乘
雷營部卒潰亂之際勾引各路逆酋攜帶婦女希圖長驅以入
陝疆不意潰卒旋就招安倒戈相向而陝邊防軍亦已預先布

置無隙可乘周顯承譚玉龍等旋復督率各軍奪力截擊挫其銳氣以是逡巡引退除派撥馬步追勦並飭該提督周顯承等激厲各營士卒會合陝軍實力嚴堵一面查明陣亡弁勇照例辦理外所有官軍堵擊逆回獲勝涇長一帶情形稍鬆緣由理合恭摺由驛馳奏伏乞

皇太后

皇上聖鑒謹

奏

附請畱延鄜防軍疏

再臣頃奉同治四年九月初五日

上諭慶陽僅止數營不敷防剿楊岳斌遠在省城文報往返動逾數旬深恐鞭長莫及所有該處防軍及陝省派出之楊得勝鄆太愚等均著暫歸楊能格就近調遣以防不虞等因欽此並據楊能格以慶防喫緊咨請將楊得勝鄆太愚所部雄毅鎮西二軍抽撥會剿前來臣查陝邊自略陽以至定邊彌亘二千餘里處處均與甘肅毘連現值逆勢鴟張邠長一帶僅止英毅五營扼紮該逆旋趨靈州圖由三水竄犯陝疆每思就近抽撥楊得勝鄆太愚兩軍前來堵截又慮延鄜無備恐致顧此失彼之虞不得已抽調駐防商南武關之劉厚基親兵五營趨赴涇化所屬之通潤溝扼要防堵旋值豫捻復有西趨唐縣之信不能

不仍顧東防又復檄令回紮武關此外汧隴各隘尙乏防軍陝省兵力之單於此可見現查靈州金積堡環縣各處逆回巨股麇集窺伺延鄜日思狂逞專恃楊得勝鄆太愚兩軍分駐河上原金湯鎮兩處遙相聯絡以通慶陽糧路藉固陝省藩籬然兵數無多深慮單薄每藉該處團練虛張旂幟以助聲勢今若撤赴慶陽則鄜延門戶全虛若該逆乘隙紛竄陝疆則腹地立見糜爛反覆籌畫實有萬難抽撥之勢適據周顯承稟稱新城大股逆回已退入固原及炭山青青溝等處其分竄荔家堡之賊亦經我軍擊敗由蕭鎮北竄當經批飭督派譚玉龍一軍步隊五營劉效忠馬隊兩起跟蹤躡就近會合慶防各軍併力夾

擊庶慶防可期保固而延鄜邊境亦尙不致疏虞所有楊得勝
鄔太愚兩軍暫畱延鄜防堵以固藩籬並派譚玉龍等率隊跟
勦會合慶防各軍夾擊北路竄匪各緣由除飛咨楊能格查照
辦理外謹附片陳明伏乞

聖鑒訓示謹

奏

附請交卸後回籍疏

再臣前奉

恩旨著俟趙長齡到任後賞假四箇月回籍修墓欽此旋奉九
月初二日

上諭趙長齡屢經催赴新任諒必迅速起程到陝後著德興阿
劉蓉會商防剿事宜彼時劉蓉應俟防務稍鬆再行回籍等因
欽此欽奉之頃正值潰勇紛竄回勢猖獗之際警報頻聞不敢
稍涉疏懈況奉

諭旨諄諄爲臣子者豈敢祇圖自便不思仰稱

朝廷眷念邊陲之意茲賴

聖主威福遐被事變漸平各股逆回亦遂逡巡引卻陝境遠近
人情敕安臣以久病之餘心血凋耗肝鬱肺灼竟夕無寐積時
既久漸現怔忡秦中每屆冬初朔風剛勁迥異南方臣向患左
偏頭痛之證遇風而暈痛甚欲裂以故年甫五十髮禿齒衰自

維渥荷

殊恩涓埃未報而蒲柳弱質未秋卽萎私竊傷悼恐竟辜負栽培無復可以自効之日現值邊境漸靖責任稍寬聞趙長齡亦已於九月初十日由川起程計十月初旬卽可抵陝臣俟交卸撫篆將邊防要務辦理情形詳悉商度之後擬卽束裝南還先赴湖北就醫調理徐卽取道回籍除將經手事件趕緊清釐交替外謹先附片陳明伏祈

聖鑒謹

奏

劉中丞奏議卷十一終

劉中丞奏議卷十三目錄

軍營捐輸餉銀請廣學額疏

附加各原籍學額清單

查覆已革知府在任款蹟疏

附道府會稟歧異分案審理疏

附報籌撥甘軍餉銀軍火數目疏

保奏克復吳旂鎮出力員弁疏

附請將漢郡殉難州縣建祠旌獎疏

甘回竄擾平涇分路追剿疏

附密陳叛將情形暫行監禁疏

附遵查武關並未撤防疏

查明張集馨被參各款據實覆奏疏

附查覆陸塋稟訐龍常各情疏

陝西各路墾荒事宜疏

附遵 旨稍緩起程疏

劉中丞奏議卷十三

湘鄉劉 蓉著

軍營捐輸餉銀請廣學額疏

同治四年九月三十五日

奏爲軍營官兵捐輸餉銀援例懇

恩加廣學額並請開復處分其陣亡員弁勇丁請於死事地方
自立總祠以昭激勸而慰忠魂恭摺仰祈

聖鑒事竊查前帶湖南果健營道銜陝西候補知府易佩紳會
同前任四川隆昌縣知縣羅亨奎各在原籍湖南龍陽等縣及
江西武甯縣招募勇丁四千三百名由楚入川隨同已革陝西
布政使毛震壽赴援漢南於同治元年八月十一日抵陝二年

九月二十九日遣撤共計欠發餉項墊辦軍裝及養傷等銀二十一萬三百四十七兩因陝庫支絀異常無款可籌迄今未能補發茲據毛震壽稟稱易佩紳等念切時艱情殷報効請將前項欠餉悉數捐輸並請將陣亡弁勇在於城固縣地方自行建立總祠川楚各軍殉難官兵一體附祀以慰幽魂等情當經札飭軍需局司道會議去後茲據詳稱竊查前奉部文各省捐餉紳士除給予本身獎敘外凡一州縣捐銀一萬兩者准廣文武學定額各一名二千兩者准廣一次文武學額各一名一省捐銀十萬兩准廣鄉試文武中額各一名等因又准戶部議覆御史官亮奏軍需項內欠發墊發各款應否補造報銷案內聲明

欠發兵勇口糧現據江甯將軍富明阿廣西提督馮子材先後條奏或請給發餉項准照實銀請獎或請作爲捐款加廣原籍中額均屬深明大義踴躍急公惟各省情形不同欠發之餉亦多寡不一應如何設法清釐之處應請

敕下各路統兵大臣及各直省督撫體察情形迅速奏報俟奏報到日再由臣部酌核辦理等因通行遵照各在案今果健營易佩紳等所部弁勇請將欠餉等銀二十一萬三百四十七兩作爲捐輸洵屬急公好義自應照例加廣各原籍文武學額以昭激勸等情具詳請奏前來臣覆查無異除咨湖南江西各撫臣查照作爲該省士民在陝捐助軍餉彙入本省加廣學額中

額案內辦理外謹分繕具清單恭呈

御覽伏懇

飭部迅賜核覆至該營援陝以來屢立戰功先後陣亡員弁勇丁七百餘名均屬沒於王事情殊可憫合無仰懇

天恩俯准在於陝省城固縣地方自立總祠凡川楚各軍殉難官兵准其一體附祀以慰忠魂至道銜候補知府易佩紳前於漢南失利案內奉

旨革職畱營効力今所部果健營應領餉項數逾二十萬兩悉數捐輸雖屬各弁勇情殷報効實由該革員平日甘苦與共恩信相孚且該員墊製軍裝及墊發養傷共銀二萬二千七百餘

兩一律報捐尤爲難得可否准予開復革職處分之處出自
逾格恩施其各營應領卹賞銀兩現在餉項支絀無款可籌應
俟庫款稍裕再由軍需局核明籌撥所有果健營員弁勇丁捐
助軍餉援例加廣學額並請開復處分其陣亡官兵准其自立
總祠各緣由理合恭摺具奏伏祈

皇太后

皇上聖鑒訓示飭遵謹

奏

謹將果健營捐助軍餉請加各原籍學額數目繕具清單恭呈
御覽

計開

革職留營知府易佩紳捐墊發軍裝養傷銀二萬二千七百八十八兩請加廣本籍龍陽縣一次文武學額各十一名

湖南龍陽縣弁勇捐銀五萬二百兩請加廣龍陽縣永遠文武學額各五名

長沙縣弁勇捐銀一萬四千五十兩請加廣長沙縣一次文武學額各七名

善化縣弁勇捐銀一萬四千五十兩請加廣善化縣一次文武學額各七名

甯鄉縣弁勇捐銀一萬二千一百兩請加廣甯鄉縣一次文武

學額各六名

澁浦縣弁勇捐銀一萬二百兩請加廣澁浦縣一次文武學額各五名

保靖縣弁勇捐銀一萬二百兩請加廣保靖縣一次文武學額各五名

龍山縣弁勇捐銀一萬一百兩請加廣龍山縣一次文武學額各五名

湘潭縣弁勇捐銀六千五十兩請加廣湘潭縣一次文武學額各三名

湘陰縣弁勇捐銀六千五十兩請加廣湘陰縣一次文武學額

各三名

益陽縣弁勇捐銀六千五十兩請加廣益陽縣一次文武學額
各三名

武陵縣弁勇捐銀六千五十兩請加廣武陵縣一次文武學額
各三名

澧州弁勇捐銀四千五十兩請加廣澧州一次文武學額各二
名

慈利縣弁勇捐銀四千五十兩請加廣慈利縣一次文武學額
各二名

永定縣弁勇捐銀四千五十兩請加廣永定縣一次文武學額

各二名

瀏陽縣弁勇捐銀二千五十兩請加廣瀏陽縣一次文武學額
各一名

桃源縣弁勇捐銀二千四十兩請加廣桃源縣一次文武學額
各一名

沅江縣弁勇捐銀二千六十兩請加廣沅江縣一次文武學額
各一名

沅陵縣弁勇捐銀二千一百兩請加廣沅陵縣一次文武學額
各一名

永順縣弁勇捐銀二千五十九兩請加廣永順縣一次文武學額

額各一名

以上湖南省共捐銀十九萬三百四十七兩應請以銀十萬兩加廣湖南鄉試文武中額各一名餘銀九萬三百四十七兩歸入湖南各次捐輸案內核辦

江西武甯縣弁勇捐銀二萬兩請加廣武甯縣一次文武學額各十名

查覆已革知府在任款蹟疏

同治四年九月二十五日

奏爲查明已革知府在任款蹟恭摺覆奏仰祈

聖鑒事竊照前任榆林府知府劉廷鑑貪利營私行多詭詐經臣訪查據實甄別奏參並聲明在任抽收釐稅徵多報少且有

借端科罰民財入私肥已等事欽奉

諭旨先行革職聽候查辦等因欽此嗣經西安將軍署督臣都
興阿奏調該員赴營差遣又經臣附

奏暫留榆林面質案情虛實奉

旨允准在案嗣飭催署延榆綏道李義鈞署榆林府知府齊琮
會同查明稟覆批司會核妥擬去後茲據藩司林壽圖署臬司
官銘議詳請奏前來臣隨就李義鈞齊琮查稟各層逐加覆核
緣榆林額設落地稅向由知府經收商賈按照稅則交錢解時
易銀每起掣給稅票一張收錢一文名爲小票費歷久相沿該
革員尙係照舊辦理惟咸豐九年奉文抽收土釐歸府經理除

照卡則抽收釐錢外每土一兩亦收票錢一文名爲大票費此
項土貨俱係零星小販每起不過數兩至十餘兩不等核計所
收大小票錢僅敷紙張之用至咸豐十年奉文截擋土貨補徵
甯條梁稅課每百斤收稅錢四十千文同治二年改爲每百斤
收稅銀二十三兩並經前署延榆綏道何丙勳稟准每百斤提
耗銀一兩以充經費乃該革員並不遵照新章收銀仍舊收錢
掣給客商交銀稅票並有票錢名目顯係從申乘除侵蝕訊據
管稅家丁曹升稅書王聘三等僉供釐稅先係收錢同治二年
奉到新章改爲每百斤收正耗稅銀二十三兩有甘肅客商陳
敬禮販土過境投稅本官諭令婉勸該商以錢核算稅銀二十

三兩每兩作錢一千七百文合錢三十九千一百文。出火耗解費錢九百文。連每兩交票錢一文。每百斤共交錢四十一千六百文。該商應允交納。隨後又有客商豐盛魁等三起過境。亦卽查照完稅。計土稅四起共餘銀六百餘兩。質之該革員親供均屬相符。並稱因奉藩司飭將延鎮存兵不足軍械及征兵需用軍物概由地方文武勸捐製造。是以勸令土商以銀合錢並出火耗解費票錢。當時祇圖捐貲製械有益防勦。銀已交營並無侵蝕。入己情弊。隨移准延綏鎮中營覆稱。三年十二月十七日。劉廷鑑送交該營銀六百二十二兩七錢四分一釐。業已製成擡礮二位。擡鎗四十桿。烏鎗二百桿。腰刀二百把。其餘正在

趕造委員點驗屬實第事前並未報明而陳敬禮土貨一起最爲大宗事在三年二月遲至年底始同後三起移銀作捐難保非慮及浮收敗露爲此脫卸之計况勸捐製造軍械原因回氛逼近防守起見自應明白曉諭使其樂從又何必託名解費巧取且復多收票費並以銀折錢以錢合銀種種揆剝實屬鄙詐不堪又查永濟橋工一款係該革員倡同官民捐貲交紳士督工修理府署並未經手銀錢惟聞該革員有擅發充公之事訊據總理工程紳士賀鴻運供稱咸豐十年四月紳民因城外大河西靠沙梁水勢散漫淤沙壅墊日高逼水東移漫損民舍田地推求其故由於下流永濟橋匯出之水地高河曲不能暢流

以致沙壅受患公懇擇地另建新橋稟蒙劉本府倡捐錢五百千文派該紳與舉人楊墀春總理帳項監工計開山鑿石長一百二十餘丈寬六丈深四丈有奇上新橋一座於同治二年六月工竣共收官兵捐錢六千一串一百九十文內有府差張宗智罰錢二百千文共用六千五十八串三十文計不敷錢五十七串四百二十一文由該紳等捐墊等語並據該革員親供張宗智向充府差同治元年派令隨同前革榆林縣知縣楊廷翰查拏聚眾滋事之趙介退蕙不前犯未弋獲發縣懲究該差情願罰捐錢二百串文自行送交紳士以濟工用因其所患僅祇緝捕不力准予從寬發落當卽親往查看近橋數丈河

流尙爲峻駛其上流處所壅沙漲漫仍復未免是以不貲之費
擲之無用之地已屬不知緩急且復違例科罰咎尤難辭又查
兵米浮收剋減一款向係徵糧一石除收耗糧三升外加一五
入倉以備霉變鼠折嗣於同治元年花戶人等公稟求減該革
員曾於一五耗內減去三升泐石倉前歷年俱照減數徵收出
入一律平肩現在盤無虧短以上各款既經李義鈞等查訊確
切覆由兩司核議應卽擬結此案已革榆林府知府劉廷鑑在
任經管倉糧尙無不合惟於府差張宗智緝捕要犯不力並無
從嚴究懲率聽出錢修工含混完結已屬違例科罰至抽收釐
稅溯查當日改定新章每百斤收銀二十三兩原以三兩作爲

耗羨留備各項之用該革員既不遵辦輒以銀作錢以錢合銀
並巧立火耗解費票錢名目計土稅四起卽多收銀六百餘兩
如因捐製鎮營軍械何以稽遲日久始行移營支用顯係多收
少報物議沸騰恐至查出曲爲彌縫知府責任表率似此種種
營私詭詐實乖職守惟浮收卒歸公用尙無入己情弊業經革
職請免再議應否飭令前赴都興阿軍營聽候差遣恭候
欽定除供咨部外所有查明已革知府在任款蹟緣由理合據
實恭摺覆奏伏祈

皇太后

皇上聖鑒訓示飭遵謹

奏

附道府會稟歧異分案審理疏

再臣前摺正繕就時接據卸署榆林府候補知府齊琮稟稱革員劉廷鑑徵收土稅曾經訊問府書康鉞供係照依前署延榆綏道何丙勳等所辦該府與李義鈞意見不合礙難會稟等情臣查該道府等前稱何丙勳與已革榆林縣楊廷翰收過土稅雖據府書康鉞供出惟事由道縣承辦康鉞並非經手之人所供難據爲定未便因此案外餘情將查辦正案延閣等情附稟再尋確據另辦尙未覆到今齊琮又以何丙勳創始浮收正此案之根源非案外之餘情具稟伏思道員李義鈞派與齊琮會

查事件自應認真案款覈實何致案甫稟覆卽生歧異齊琮前
既會銜會印合詞會稟因何忽稱意見不合是否前稟專由李
義鈞主政抑或彼此實已商明另辦隨批藩臬兩司集證研鞫
而劉廷鑑亦卽以所遞親供漏敘此層稟訴其餘各款均未提
及自應先行擬結除將徵收土稅究竟始於何時飭司秉公徹
底確訊詳由新任撫臣趙長齡核辦外所有現在分案審理緣
由謹附片陳明伏乞

聖鑒訓示飭遵謹

奏

附報籌撥甘軍餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治四年七月分撥解過援甘各營餉銀軍火數目附

奏在案茲據軍需局司道詳開同治四年八月分共解支過援甘各營餉銀二萬一千五百兩白布單大帳房一百架火藥六千斤鉛丸五千斤火繩八千丈均經分別委解給領取有迴文爲據臣覆查無異除仍飭該司道等竭力籌措源源接濟外所有陝省同治四年八月分解支過援甘各營餉銀軍火等項數目謹繕清單恭呈

御覽理合附片陳明伏祈

聖鑒謹

奏

保奏克復吳旂鎮出力員弁疏

同治四年十月初一日

奏爲查明克復吳旂鎮擒斬逆酋並屢次攻勦定邊竄回獲勝
在事出力員弁遵

旨擇尤保獎恭摺仰祈

聖鑒事竊

臣

頃奉同治四年八月二十六日

上諭劉蓉奏克復吳旂鎮擒斬逆酋惠喜中並屢次攻勦定邊
竄回獲勝各等語此次陝西防軍鄒太愚等攻勦尙爲得手著
劉蓉仍飭該將領等妥爲防範毋稍鬆懈出力員弁准其擇尤

保獎等因欽此遵卽轉飭鎮西軍同知鄆大愚義字營副將段
登雲率部認真防堵並與甘省慶陽防兵聯絡聲勢以固藩籬
茲據該將領等擇尤開單請獎前來臣覆加查核該將領員弁
攻勦堵禦閱時旣久屢挫兇鋒自應量予獎敘以昭激勸謹繕
清單恭呈

御覽仰懇

天恩俯准給獎以示鼓勵除將干把以下各弁照例咨部辦理
外所有遵保鎮西義字兩軍出力員弁請獎緣由理合恭摺具
奏伏祈

皇太后

皇上聖鑒訓示謹

奏

附請將漢郡殉難州縣建祠 旌獎疏

再查上年漢中府屬州縣遭滇髮諸逆竄擾之害文武官弁死
事者多而最著者莫如署南鄭縣知縣周蕃壽西鄉縣知縣巴
彥善甯羌州知州金玉麟至今子遺士庶猶能稱頌而歌思之
周蕃壽當城圍已急先於署後穿鑿一井城破之日盡驅其妻
妾子女投入井中而自具冠服出坐堂皇爲賊刳腸決脰以死
巴彥善當藍逆倉卒竄犯之際慷慨登陴率吏民死守孤城歷
八晝夜援絕力竭城陷被執大罵不屈而死金玉麟自牧甯羌

循聲卓著城破身殞志節凜然死後賊得尸特爲具棺以殮且
張僞檄於觀上大書此係陝西好官該士民應將其靈柩好爲
照護安送回籍可見秉彝好德之良雖逆匪亦有未盡泯滅之
處臣以該三員臨難無苟免之心則平日修己立身與所以居
官行政亦必有異於俗吏之爲者當檄飭漢中道府採訪該三
員平生實蹟期爲撰集而表章之迄今逾年未據詳覆而臣且
夕卸篆未便聽其湮沒竊維軍興以來地方官嬰城罹禍以歸
忠義之林者何可勝道然或志矢堅貞或事由邂逅等爲一死
而道固殊焉該三員志節皎然非特予表揚無以別忠貞而激
頑懦伏乞

天恩特賜褒異

敕就漢中府城修建三烈總祠俾該三員合祠以旌素志而勵臣節實於世教有裨愚昧之見是否有當伏祈

皇上聖鑒訓示謹

奏

甘回竄擾平涇分路追剿疏

同治四年十月十三日

奏爲甘省逆回竄擾平涇搶劫糧餉經駐涇官軍分路追剿情形恭摺據稟馳奏仰祈

聖鑒事竊臣於月前曾將官軍堵剿逆回獲勝涇長一帶防務稍鬆情形奏報在案嗣據記名提督周顯承稟稱駐紮平涼各

營前經該提督稟請雷正綰飭派總兵沈大興統籌辦理其李
高啟雷恆所帶馬步各隊亦經併請交替接統免致擄掠村莊
敗壞營規並由該提督每月運解麩八千斤或六七千斤不等
源源滾運以資接濟一面酌派馬隊分赴涇州西南北三路鄉
村搽殺各處潰勇以免騷擾連旬以來稍覺安謐詎意九月二
十日逆回孫老五赫明堂馬雲和等帶領馬隊十餘名馳抵平
涼四十里鋪聲言迎接雷正綰前赴固原隨至馬良鎮與雷恆
李高啟等一處駐紮不知商議何事二十二日該提督委員帶
馬勇二十名護解餉銀一萬二千兩前赴雷正綰行營不意行
抵二十里鋪突遇逆匪竄來將所解餉銀悉數搶去護解員弁

僅止逃回馬勇九名其餘十一名及委員均不知生死下落並
將所解麪斤及騾馬民夫搶殺罄盡沿途百姓自白水驛至王
村一帶殺斃不少該提督當派譚玉龍劉効忠等帶隊馳往援
剿該逆望風北竄我軍復由豐臺玉都廟黨原分路追擊殺斃
賊四十餘名生擒五名該逆敗退新城二十五日周顯承親率
馬步派提標新左營迅字副中營駐紮黨原以斷該逆往來之
路二十六日逆回馬榮和等復由新城退走占城川竄越鎮原
之小線子屯子鎮一帶焚掠該提督復派隊赴荔家堡截剿並
令西峯鎮各營迎頭堵截探聞孫老五卽孫義洪係孫義寶之
弟現與楊大娃子馬生厭等各率逆黨占踞固原收拾城防修

整礮臺安放家眷意圖據爲根本穆三占踞炭山赫明堂占踞沙木溝孫義洪旋將投誠立功之張寶龍殺害與馬雲和合併共圖大舉該提督與譚玉龍等駐涇各軍已至十七營之多糧餉兩缺而雷正綰駐平之軍尙賴該提督設法運糧接濟慶陽糧臺所發餉銀僅截至上年四月止帳房軍火亦俱缺乏實難支持等情具稟前來查逆回孫義洪等竄擾平涇搶劫糧餉雖經周顯承派兵擊退惟該逆黨羽旣眾詭譎異常現旣占踞固原城池密布營壘勢必伺隙狂竄自在意中雷正綰旣有悔悟之誠何以仍聽雷恆李高啟等相與勾結如實係力不能制卽當急圖自拔與慶防之魏添應涇防之周顯承諸軍聲罪致討

庶幾大節昭彰不負

朝廷始終成全之意至雷正綰所部各軍餉項向由慶陽糧臺籌撥嗣值各營兵勇潰逼涇州情形喫緊周顯承等招安十餘營無可贍給臣不得已飭令涇州委員動撥督臣楊岳斌解存涇庫餉銀三萬兩暫資散放並將慶臺在陝屬州縣派捐米糧銀兩項下提撥銀一萬兩委員陳爾第前赴乾州各處採買麩麥接濟飢軍頃准楊能格來咨已由該臺撥發餉銀一萬八千兩解赴涇州惟涇防營數既多又須日辦麩糧運濟雷正綰平涼各營則餉絀難支自屬實在情形陝省艱窘異常以後但能協濟火藥各項其所需糧餉帳棚實難兼顧相應請

旨敕下楊能格趕緊籌撥餉銀源源接濟一面製造帳房運涇
備用以利攻剿除飭周顯承等督率現紮黨原西峯鎮各營認
眞防堵並飭總兵劉玉興率英毅五營移紮亭口鎮與涇防諸
軍聯絡聲勢以資備禦外所有逆回竄擾平涇搶劫糧餉經官
軍分路追剿請飭慶臺接濟軍餉緣由理合恭摺由驛具奏伏

乞

皇太后

皇上聖鑒訓示飭遵謹

奏

附密陳叛將情形暫行監禁疏

再臣頃據周顯承稟報叛將胡大貴已由涇州攜眷赴邠臣當
密派署中軍副將彭體道拏獲到省督飭司道連日研訊據胡
大貴供雷副帥因金積堡敗後撤去幫辦怨憤不平傳集諸將
哭訴雷恆立取頂帽擲地摔碎勒令各營開隊聲言誰敢抗違
便卽殺誰李高啟倡製大白旗二面上書糧盡餉絕官逼兵變
字樣雷恆並函召赫明堂穆三楊大娃子等共相煽亂伊曾勸
阻不聽威劫隨行當派雷恆爲頭隊李高啟爲第二隊沈大興
爲第三隊伊爲第四隊回目朱懷潮爲第五隊孟義德爲第六
隊趨赴涇州伊終覺事體不好心想脫身因於二十一日乘隙
私帶所部七百餘人由開城大灣逃赴隆德將情形稟知楊總

督蒙派秦國勝到隆收撫嗣雷副帥復來檄調伊聞雷恆句通
逆回孫義洪等欲來撲營遂移隊至涇州交秦國勝管帶復稟
楊總督請假攜眷回南並稱當雷恆等變亂行赴固原之時游
擊金占元力相勸阻當被雷恆殺死及其手下勇丁一百餘人
固原州官因從馬廠逸出未被戕害迨到平涼各營搶掠餉銀
二萬餘兩火藥四五車屬實伊實先受逼脇後自潛逃有平慶
涇道平涼府縣各官可證等情臣查胡大貴與雷恆李高啟均
係奉

旨拏獲正法之犯再三研鞫該犯堅稱事由雷正縮怨望所激
致雷恆李高啟乘機倡亂一面之詞殊難憑信惟既曾自拔赴

隆向督臣楊岳斌投誠復經該督特派秦國勝赴東路一帶察訪情形自必得其真確擬將胡大貴暫行監禁錄供咨候查覆至日由新任撫臣趙長齡覈辦庶冀案無遁情臣復思雷正綰渥受

國恩諒不甘心變節周顯承譚玉龍等舊隸軍麾擢升專闕一旦忘其薦舉之惠無故被以背逆之名情事介在可疑遠道不能懸揣故卽聯捷楊能格同在甘省所奏已有異詞臣亟思挽回大局是以貽書雷正綰曉諭部曲撫輯降回事有爲難不妨自剖昨奉九月二十七日

諭旨該提督本有奏事之責卽可據實入告並以周顯承所招

舊部統交調遣仍不得互相抵牾等因仰見我

皇上洞遠燭微但使能受範圍自可潛消反側惟雷恆李高啟
尚在左右固原城池已被逆回占據該提督部伍僅贖十營聞
頗爲回眾挾持不能自振而涇州招集馬步已至十六七營之
多此以順逆爲詞彼仍猜嫌未釋以後機局之轉移尤賴
聖明之操縱管見所及合併密陳伏乞

聖鑒謹

奏

附遵查武關並未撤防疏

再臣現奉十月初四日

諭旨本日據官文等摺內奏稱探聞甘肅潰勇入陝陝軍在寶雞口接仗失利陝省已飛檄武關商南防兵回省堵禦各等情事尙未據劉蓉奏報是否實有其事著劉蓉迅速查明具奏等因欽此查甘肅陶營潰勇一起三千餘眾於八月初間由馬鹿鎮竄赴隴州折趨寶雞縣經臣派總兵劉玉興率師前往堵禦劉玉興旋傳其頭日到營開導願聽招安約於十六日呈繳軍械正在點名之際該潰勇臨時猝變殺傷勇丁百餘名並幫辦之文案戴貴定一員屬集東關旋乘夜遁竄金陵川經劉玉興追至縣頭鎮殲斃百餘名生擒二十餘人該潰勇竄由赤沙渡河圖竄鳳縣復經總兵毛福益率師截擊於姬家坪殲斃三百

餘名奪獲馬匹器械多件該逆由田家溝狂竄我師追擊於巖
灣場復及之於關嶺殲除多名該逆復折向縣頭背沿山狂
走因拏獲賊供有在陝不敢停足圖由興安急竄湖北之語當
經臣飛飭駐紮商南武關之劉厚基及興漢兩鎮扼要截擊旋
慮其繞由華陽小道逕竄興安復經檄飭總兵蕭德揚毛福益
蕭德見會擊於郝家坪沿土壩茅坪鄢家壩等處斬馘數百名
擒獲首犯王正明趙達廷等正法其餘二千三百餘名跪地乞
降當經分別給資遣散回籍業於八月二十九月十一二十五
三次奏報在案該督臣官文等所奏寶雞口接仗失利等語自
係指此起潰勇而言當時但飭劉厚基就武關扼要截擊並未

調赴省城迨後雷營潰卒逼趨涇州逆回分股繞赴靈州圖由
三水入陝經臣飛調劉厚基武關防軍回紮淳化之通潤鎮堵
剿該軍行抵省城之時靈州情形已鬆旋聞東路捻蹤亦遠是
以暫畱省邊察看東西兩路情形緩急隨時調遣別無飛檄武
關防兵回省堵禦之事該督臣所奏自屬探報之訛所有遵
旨查明具奏緣由謹卽附片陳明伏祈

聖鑒謹

奏

查明張集馨被參各款據實覆奏疏

同治四年十月十三日

奏爲遵

聖鑒事竊 臣前奉密寄
旨確切訪查張集馨被參各款據實覆奏仰祈

聖鑒事竊

臣

前奉密寄

上諭前因張集馨奏山陽竄賊逼近商南李雲麟追斬無多全軍西行李雲麟所派之守備龍常於石泉一帶地方滋擾逗遛請旨革職並請將統帶礮船得力之周有全暫署陝安道篆等情先後降旨允准並飭令李雲麟回軍截剿竄匪矣茲據李雲麟臚陳張集馨居心險詐徇私廢公各款蹟奏參一摺據稱該京卿攻克山陽血戰二十餘次張集馨則奏稱並未出隊該京卿之軍入陝後張集馨不給餉需且劄飭各屬不准應付絲毫於營官則任意劄付撓亂將弁莫知適從張集馨曾受署石泉

令陸塋私惠署陝撫後惟其言是聽陸塋餽賊爲守備龍常所
許因誣龍常以退守時兵勇滋擾張集馨卽具奏參革並函致
陸塋以快其心周有全曾充長隨因夤緣陸塋得以署理陝安
道李雲麟統軍抵興安時該署知府謝復榮以奉有張集馨嚴
劄不准兵勇入城且云恐有通賊情事致各勇聞而驚疑各等
語李雲麟督軍援陝所需月餉楚省僅供其半張集馨身任封
圻理宜劄飭地方官設法接濟若果如李雲麟所奏則張集馨
有意掣肘不顧大局殊出情理之外惟李雲麟所稱楚軍解體
幾成不測未免意圖聳聽李雲麟於山陽竄賊未能追剿屢奉
嚴旨詰責今乃云非將士之不進實糧餉之不繼是否巧於藉

詞至龍常一員有無逗遛滋擾情事抑係張集馨偏聽誣劾周有全現已撤陝西道署任其從前有無夤緣陸塋陸塋有無隨同鄉民餽賊之事張集馨之劄飭所屬不准給餉不准兵勇人興安府城鈐制李雲麟部下將士究竟是何居心是否屬實著劉蓉按照李雲麟指參各節確切訪查秉公據實覆奏毋稍偏袒徇隱致有不實不盡陸塋如實有前項款蹟卽著撤任奏參原摺著鈔給閱看將此密諭知之欽此當卽欽遵密行藩臬兩司先將石泉縣知縣陸塋撤省一面提集人證會同督糧鹽法兩道隔別研訊臣於接見官紳隨時畱心諮訪細閱所參五款多係人所共見共聞之事曷敢豫存成見稍涉偏袒徇隱惟有

督率秉公博採互相參證以昭覈實而免屈抑嗣因案內人等遠在南山且多散處往返提傳致稽時日茲據該司道等審明分晰具詳臣復遂加確切察核如所參嫉能掩功一節原摺內稱該京卿攻克山陽血戰二十餘次親督各營於西河截其歸路賊始敗退此戰夾擊之力地方官民共見共聞張集馨奏謂是日並未出隊等語查李雲麟收復山陽之時張集馨曾經奏明該京卿督率楚勇並甘肅馬隊會同藍斯明兩路進攻斃賊無算逆勢不支乘夜順河東下當將縣城收復並請敕下該京卿趕將山陽敗匪殲除卽由興安逕趨石泉力籌堵剿迨後逆匪圖竄商州張集馨始奏李雲麟連日未曾出隊是

張集馨之奏報本分兩次案牘具存昭然可據李雲麟似祇見其後次奏稟遂疑張集馨嫉能掩功原參有因而未得其實又所參不顧大局一節原摺內稱張集馨於該京卿入陝軍火餉糈絕不顧問屢次咨商皆諉於山東河南四川三省協濟札飭興安不准應付絲毫等語卷查李雲麟原部三千三百人係由湖北給餉惟新募之隴軍正後奇右飛捷親兵及澄漢水師等營所需口糧軍火鄂省力難兼顧當經臣札飭署興安府謝復榮無論何項設法接濟並委員在於興商一帶辦理釐金捐輸俟有成數隨時撥解李雲麟行營以供隴軍澄漢等營月餉之用具摺奏明在案張集馨於李雲麟帶兵前赴山陽之時亦曾

經奏請派員隨營按照米捐章程就地勸捐接濟其札飭興安府不准擅動錢糧應付軍餉係屬通飭之件亦非專指李雲麟一軍而言惟各府縣既奉此札自必不肯通融迨後李雲麟咨商擬設糧臺張集馨以恐滋糜費回覆亦係爲撙節軍儲起見惟李雲麟督軍援陝本有主客之分張集馨既近膜視則屬員之心存觀望李雲麟呼應不靈均屬勢所必至無怪其以不顧大局指摘又所參乖戾謬妄一節原摺內稱張集馨於伊所部援軍不問事機可否凡伊布置無不任意撓亂並不籌商逕札營官以致各營將弁無所適從等語卷查張集馨於同治二年十月二十八日札飭參將胡文勝守備龍常等所帶健毅澄漢

水師隴軍正後等營均歸周有全統轄調遣維時正值漢郡失
守逆勢猖獗之際自係爲厚集兵力嚴扼要隘起見惟軍營旣
有主將張集馨並未咨商李雲麟抽撥兵勇而逕札營官且有
如敢故違立按軍法從事之語則將弁心懷疑慮似乎撓亂事
權又所參徇私廢法一節原摺內稱張集馨從前犯罪時受同
鄉陸莖私惠故此大署理巡撫刑賞黜陟惟陸莖之言是聽卽
於參劾龍常函致陸莖以快其心陸莖曾告安康典史蔡萬清
自鳴得意湖北候補知府周有全前充長隨夤緣陸莖進階因
得張集馨保畱署理陝安道印務統帶各軍等語訊據陸莖供
稱咸豐八年張集馨由甘丁憂回籍過陝伊因同鄉稟見一次

維時伊係候補人員焉有私惠至其署理巡撫伊在石泉並未進省從何干預公事龍常參革係奉批示函告素好之安康典史蔡萬清不過訴明冤忿有何得意周有全督勇克復茶鎮出力左膀帶傷自應據實稟報其署陝安道篆及繞帶各軍此係上司主政並無向伊夤緣情事質之蔡萬清亦稱陸塋致信與伊係在奉批之後別無他故查張集馨從前曾否收受陸塋私惠事無證據李雲麟何由而知周有全克復茶鎮張集馨按功奏獎亦無所用其夤緣惟查陸塋夾單密稟屢訐龍常之短又屢稱周有全之能張集馨既據陸塋之稟奏參龍常革職又奏保周有全暫署陝安道篆形跡之間似屬可疑惟周有全委

署陝安道缺並未到任旋經湖廣督臣將其改歸武職應無庸
議又所參激變軍心一節原摺內稱該京卿兵抵興安欲將義
勝兩營畱守郡城卽據興安府稟接奉張集馨嚴札外來兵勇
不准入城等語檢查案檔張集馨此次札飭亦言鑒於漢中城
固之失多由兵勇內潰之故但札內有該府何以聽人指揮等
語意似專指李雲麟而言查李雲麟入陝以後糧餉軍火旣不
應手又復不准進城其所布置動遭駁飭辦事實多掣肘之慮
其在山陽追賊之時餉項旣竭無力採辦各州縣又以未奉省
城札飭不肯代籌米糧則該軍之不能進力窮追由於糧餉不
繼亦屬實在情形以上各款經臣督飭司道悉心推求採訪輿

論考查案卷或事出有因或實有其事或因疑致誤在張集馨外任最久積習甚深其於軍營辦事艱難情形多不諳悉既已視同隔膜何能期其共濟而李雲麟列款糾參疑忿交加亦頗有言之過甚之處現在張集馨業經革職李雲麟兵勇亦已遣散可否仰懇

天恩均免置議之處恭候

聖裁所有遵

旨確切訪查緣由理合恭摺據實具奏伏乞

皇太后

皇上聖鑒訓示飭遵謹

奏

附查覆陸莖稟訐龍常各情疏

再臣前奉

上諭李雲麟另片奏石泉縣知縣陸莖於賊至則獻物以求和賊去則殺人以滅口該京堂派防石泉陸莖不令進城石泉爲李雲麟進兵要路果如所奏則實屬目無法紀關係匪輕前此龍常與陸莖互揭之案孰虛孰實著劉蓉將此次李雲麟參劾陸莖各情彙入前案一併秉公查辦據實覆奏原片著鈔給閱看等因欽此當經臣札飭藩臬兩司會同督糧鹽法各道提訊案內人證訊據陸莖供稱同治二年正月十七日髮逆竄至石

泉伊率在城紳民團勇嚴防扶遵二逆曾射偽諭入城需索貢物伊與紳民未理該逆在城北角壘牆晝夜鳴鑼擊鼓伊等恐其偷挖地道卽在城內建造木城適有西關謀食之軍犯張百齡由賊營逃回城邊喊救民勇弔進詢賊曾否開挖地道張百齡稱無其事詎二月初一日早地雷暴發震塌城垣十三垛幸賴木城得保無虞勇眾怨恨張百齡語言詭詐疑係奸細將其殺死報作賊礮傷斃維時伊正督飭民勇分擊攻城賊匪無暇親驗遂照民勇所報造入陣亡冊內後經查知因值交卸未及自請檢舉此外有方家寨寨長劉洪文給賊煙土被紳民於平定後稟伊訊實正法至守備龍常奉派兩月始到石泉因城小

被難民住滿又奉張署撫札飭不准外來兵勇進城欲令紮於城外龍常不在城外紮營竟赴池河旋往漢陰均未知會且聞該勇在途滋擾是以稟其逗遛退避鄭有貴先在石泉防城打仗出力曾許賞銀二百兩後因經費不足止給銀四十兩鄭有貴卽告辭回家伊與鄉民實無獻物求和亦無殺人滅口之事並據龍常供稱伊於八月奉李京卿派帶隴軍正後營兵勇前往石泉防守路過興安值曹逆竄擾安康縣境經府畱勅至十月十三日始抵石泉擬在城內駐紮陸塋以曾奉張署撫通札不准外來兵勇進城令伊駐紮城外藥王廟伊因其地無險可恃而池河地屬要隘向爲曹藍諸逆往來之路欲往駐紮陸塋

不允彼此口角爭競次早伊卽帶兵竟往池河旋奉李京卿調
赴漢陰均未知會陸莖各自起程至稟陸莖隨同鄉民送賊馬
匹紬緞實因在石泉時聽其傳言並無實據又據鄭有貴供稱
伊先在石泉防城隨同蕭祿帶勇出城接仗奪獲賊馬三匹未
及進城逆賊大股衝來伊將馬丟棄仍被賊逆牽去陸莖見伊
打仗出力許賞銀二百兩止給銀四十兩適有軍犯張百齡不
言賊挖地道致激眾怒殺斃隨又聽說是送逆賊馬匹紬緞求
和殺死滅口議論不一嗣因原籍安康家屬被害告辭回家迨
後投効李京卿大營派充哨官曾將風聞人言實向李京卿稟
過並非有意誣陷亦無實在憑據該司道等恐有不實不盡復

委接署石泉縣知縣林元薌遍訪紳民僉稱並無賊至獻物求和賊去殺人滅口取具紳民人等甘結加具印結呈齎等情會詳前來臣查龍常鄭有貴係原參稟許之人今反覆究詰皆供誤聽傳言無據可指是陸塋等並無饋賊之事尙屬可信軍犯張百齡因不實言賊挖地道致激眾怒殺斃現有署縣及眾紳民印甘各結可憑其非致死滅口亦無疑義查陸塋龍常平日辦事均有才能覲面之時兩不相下以致各挾意見因口角而成互訐現經查訊彼此互揭情形兩俱不實案無遁飾應卽擬結此案撤任石泉縣知縣陸塋被參饋賊滅口重情俱無其事卽稟龍常逗遛退避亦出有因其於軍犯張百齡激怒眾勇致

斃造入陣亡冊內亦由民勇所誤非出該員捏報第事後查知雖交卸未及檢舉究屬疏忽相應請

旨將陸塋交部照例議處惟該員係升用同知直隸州知州前在石泉團練堵剿實屬著有微勞經臣奏請

賞加知府銜欽奉

上諭陸塋飭查有案當俟查明覆奏時再行請旨等因欽此茲案已查明可否仰懇

天恩俯准照前請獎勵之處恭候

欽定已革守備龍常所稟陸塋隨同鄉民齊賊委係誤聽傳言其帶勇赴防中途被畱勦賊以及移禁池河調赴漢陰訊無違

遁退避縱勇滋擾情事該弁年力正強人亦勇往應請開復守
備甯營以觀後效鄭有貴妄指陸塋獻物求和殺人滅口實因
傳言致誤尙非有心挾嫌誣害且到案卽據實供明情同自首
又在石泉屢次帶勇打仗出力酌照不應重律擬仗八十據供
前在安徽軍營出力保舉藍翎把總未奉文札不足爲據應照
民人折責發落軍犯張百齡並非被賊轟斃應在陣亡冊內刪
除其從賊營逃回不言開挖地道幾至城垣莫保情本可疑已
被防城民勇殺死並免查究所有查明定擬緣由理合附片具
陳伏乞

皇太后

皇上聖鑒訓示飭遵謹

奏

陝西各路墾荒事宜疏

同治四年十月十三日

奏爲陝西各路墾荒事宜續派司道詳定章程設局督辦以專責成而規久遠恭摺縷陳仰祈

聖鑒事竊維陝省大難初平生聚爲要善後之法莫急於清查地畝招集流亡而地方之被害較深則辦理之艱難特甚臣前歲督師漢南曾經奏請清查叛產籌辦營田嗣據光祿寺少卿鄭錫瀛前署撫臣張集馨疊次陳奏均經奉

旨飭辦在案

臣

於上年四月抵任督飭各屬認真經理閱歷既

久利害相權其中窒礙之多端弊竇之疊出有不得不斟酌時勢妥爲變通者查近來諸臣條奏大旨不外設屯招佃兩端如鄭錫瀛疏陳以田給兵之議果能舉行則多開一處屯田卽可少費一營兵餉誠屬撙節軍儲之長策無如荷戈之士不習耰鋤驍悍之夫難安畝畝古者諸侯疆域大都不過百里征戍不越境戰爭不逾時故帶甲卽以赴敵釋械仍可歸田近則南北奔馳轉鬪或數千里東西征剿歷時至五六年欲行寓兵於農之法亦已難矣若欲按戶授田使戶出一丁以爲兵則比歲所稱敢戰之卒大都楚鄂之材故鄉自有生計旣不肯挈家遠徙而稻田麥地南北殊俗亦自慮遷地弗良勢難相強至於土著

之民向皆不習戰陳欲授田而驅以爲兵固未能驟期得力且
值兵燹之後土曠人稀求其負耒而農者尙不可得安有餘夫
執爰以充兵者乎漢唐以後屯政之興多在邊徼之地戍務閒
暇之時然兵興則屯興兵罷則屯罷雖擅一時之利難爲久遠
之謀至於前明屯衛之制乃在干戈旣息之後散兵歸農使之
漸營家室傳爲世業隨時訓練以建一代之規其效固非歲月
可呈而今抑非其時也陝省西同鳳各屬地處腹中旣與邊方
有別兵民錯雜易起爭端兼值豫捻甘回時虞竄越東防西勦
兵勇方罷於奔命尤未暇釋甲務農此設屯之難行也張集馨
招佃認墾以租抵餉之奏欽奉

諭旨與其招佃認墾不如作為屯田如能作為旗兵之產尤屬
合宜等因欽此旋又疏請於陝西省城招募勁旅三千名按兵
授田聽其招佃承種收租代餉誠如

聖諭所奏係為因時制宜豫籌備禦起見臣前疏欲仿旗租
之制意亦大略相同而籌畫經年卒亦未能照辦者大凡招佃
納租之舉宜於地闢民稠之時今則荒地太多遺黎太少各處
流徙來歸之民雖其自有產業尚多拋荒未種安有餘力佃耕
若欲招徠鄰省之氓則挈家遷徙所費猥繁而修築廬舍購辦
糗糧以及牛馬籽種農器諸項又復倍蓰况夫年豐歲歉不可
豫期竭終歲之勤勞或不足償其播種耕耘之費則顧慮已多

卽值豐年所獲優渥而租糧併納之餘爲數亦寡兼之租額既定歲歲輸納縱有贏餘終非永業細民利析錙銖能無較量故墾闢荒地與已耕成熟之業難易懸殊而招徠客民與附近比鄰之家情形迥別今地方官出示招募應者寥寥而謂以田給兵卽可以租代餉則亦侈虛談而不徵事實之故矣旗兵生計維艱如能授田作產當可漸冀充饒惟滿營安閒日久不諳農桑旣不肯躬親耒耜如使雇佃承種則所患又復如前自非竟歸荒蕪則或私相典賣故從來給產以贍兵終歸有名而無實况乎官私叢雜稽查不易兵民交涉疑慮尤多此招佃之難行也夫富國莫如盡地力而成務尤在順人心與其急求贍兵存

奢望於屯租而餉精終歸無著何如寬以待民使樂趨於隴畝而餉源或可自充欲民之樂於墾荒必使知有餘利欲民之有餘利必使得爲世業欲民之得爲世業必先明示限制詳定章程請得縷晰陳之大凡利之所在弊必相隨將開利源先防弊竇其或給產授田之際稍涉含糊胥吏侵漁不免以多報少官司粉飾又或以少報多且叛絕各產與有主之地錯雜毗聯殊難界劃侵陵隱占均所宜防此時田畝之數不清將來錢糧之數必絀若聽其虧短則中飽太多若督令全完則苛索彌苦此其弊在朦混者也逆回之叛產逃民之絕產其事似不相涉然其中回典漢業回叛而產屬漢民漢典回業漢耕而回已早叛

彼漢民之有契據可驗者固易剖析惟流離之後契據半多遺失鄉鄰又無憑證若不准承認則平民含無告之冤若概與通融則奸民有假冒之弊至於絕產一事或漢典漢業而原主逃亡或漢佃漢業而僅存佃戶甚或原主尙存婦孺有契據而不能指認佃戶雖能指認而又無契據花名冊籍無可稽查戚族里鄰多歸淪喪遂有察知業戶已絕託言契據遺失妄指他人田地爲己業者甚或囑託親舊彼此互相指證莫可究詰種種情形不勝枚舉此其弊在影射者也荒閒之地其鄰近村莊人煙亦必稀少不得不廣招鄰封遠境之民一體領種乃土民念其親舊既絕不忍以遺業遽屬他人不許客民耕種或詭稱親

舊在外希圖宕延而客民又恐土著欺陵往往相約成羣應募而至若令雜居耦處則平昔氣誼不治難驟聯以同溝共井之情若聽其結隊分羣則彼此門戶先成尤難期以講讓型仁之誼此時之布置未能帖然異日之鬪爭將成巨案此又弊在土客不安者也臣嘗謂以拋閒之曠土養待食之流民不惟安集可期亦且糗糧易足及觀窒礙之多端弊竇之百出有非尋常意料所能及智慮所能周者然事關民瘼法期經久既不敢蹈廢弛因循之習尤不敢存欲速見小之心前此屢經揀派司道大員設立營田總局令其檢查舊卷體察情形詳定章程由臣悉心酌核飭屬遵辦其中區畫之要約有數端一曰正經界仁

政以經界爲先而經界以丈量爲準陝省田地肥瘠不一科則未均其有主之地積久相仍未便紛紛丈量致滋擾累至於叛絕各產欲使賦役得平爭訟不起民獲各安其本業吏無格外之誅求惟有清丈地畝之一法現飭畫分段落編立字號凡客民之應募而來者清查來歷由局給予執照載明畝數多少錢糧若干以防詭混授田必限定數俾絕兼并包攬之萌給領必依次序期杜揀擇攬越之弊認墾既有先後編戶無分主客每十家設一甲長百戶擇一里長使相統率以任完納租糧均派徭役之責而平其爭訟申以條約則客民不得擅立村寨而土著不致倚眾相陵矣一日定限制叛產絕產界限先爲劃清叛

產概令人官絕產分別有無當佃轉同族親丁以及契據存
亡查明分晰核辦其業主之流徙來歸者自該地方被擾之日
起算定以三年流離不返卽行截止其客民之招種認墾者自
發給執照之日起算定以六年租糧及額卽爲永業規制既定
則官司既有遵循民情不至惶惑矣一日緩錢糧領佃之初闢
地開荒牛具籽種棚舍芻糧在在需費且經營於隔歲之前而
得食在半年以後歲收之豐歉難必而催科之迫促相隨臣嘗
飭同州府勸借牛種民有慮其無力完交畏不敢領者有旣領
而救死旦夕坐食無餘者困苦之情深堪憫惻恭查雍正六年
上諭安西沙州等處招民屯墾原爲惠養邊民之計今從民戶

到齊之日計算至辛亥之年乃例當輸租之期但小民甫經安插公私兼顧爲難著寬期二年於癸丑升科俾民力寬裕俯仰有資欽此仰見

聖恩廣被在遠不遺今關中爲西北形勝之區值頻年兵燹之後我

皇上如天之仁出水火而登衽席疊奉

特旨蠲減錢糧撫卹周至此次籌辦墾荒仍擬仰求

恩施凡客民所墾荒田俟承種一年之後酌量情形再行升科庶使新墾之民感

朝廷逾格之施無公私兼顧之慮實於招墾事宜大有裨益一

曰定租穀招墾地畝固以綏輯遺黎亦以備資軍食一年之內
正供尙須調緩自難更議取租惟此項叛絕各產旣已歸官卽
與民田有閒現議章程擬於正糧升科之後分別水田旱地科
則高下每年每畝薄取租穀以補倉廩之不足六年之後免交
租穀祇輸正糧準其作爲世業在小民分年輸納爲數甚微而
各路兵食紛繁亦資小補况六年卽行截止並非永遠加徵揆
諸民情自必樂於從事凡此數端皆就陝省現在情形妥籌辦
法不敢固執己見亦不敢曲徇人情不敢急圖近功亦不敢祇
安簡便惟有督飭司道勤求民隱期於弊可豫杜功在必行其
或情形互異不能不稍爲變通者再由該司道等會同商酌詳

請新任撫臣隨時奏咨庶於

國計民生兩有所裨用副

聖主軫念殘疆綏輯遺黎之至意抑臣猶有慮者西同鳳三府地居腹裏附近省城向來民風儉嗇而樸厚馴良最稱易治今土著編戶子遺無幾而招徠新集之眾來自遠方大都河南之陝汝湖北之鄖襄四川之巴南通等處爲多民氣雜揉良莠相半則風俗亦將爲一變矣土民之與客民旣慮難於相安卽客民與客民亦慮各不相協處置未盡其宜不特獄訟滋多亦恐囂競成習惟於編成里甲之後修明鄉約設立義學以禮讓型其父兄以詩書澤其子弟地方官復不時親臨而勸率之務使

涵濡

聖化比戶成風此其因勢利導潛移默化之功蓋有存於法令條告之外者其效固未可期諸期月之間而規畫設施要在還定安集之始早計豫圖若待其風會既成始爲挽救轉移之計則已後矣事有似緩而實急者故爲我

皇上卒陳之至臣所懇新墾荒田俟承種一年之後斟酌情形再行升科之處如蒙

俞允卽當刊刻謄黃遍行曉諭俾遠近之民感沐

皇仁樂於趨事除將現辦章程咨送軍機處備查外所有續派司道大員籌辦墾荒事宜緣由理合恭摺具奏伏乞

皇太后

皇上聖鑒訓示施行謹

奏

附遵 旨稍緩起程疏

再臣頃奉十月初二日

上諭劉蓉患病請俟趙長齡到陝後交卸就醫現在甘省逆回叛勇紛紛潰竄陝省邊防緊要劉蓉所部各營必須有得力統將嚴明約束足保無虞劉蓉方可卸責所有布置情形及一切應辦事宜著劉蓉與趙長齡悉心會商務期諸臻妥協方准起程不得急圖交卸致有貽誤等因欽此仰見我

皇上眷念陝疆審慎周詳之意

臣雖愚闇敢不仰體

宸衷勉竭愚慮查雷營潰變弁勇經周顯承等收撫八九千人但不激壞事機尙可徐規後效惟逆回股數尙多如孫義洪赫明堂穆三馬雲和任老五馬生厭楊大娃子諸逆酋均係陝回現在分踞平涼固原環縣靈州一帶無日不蓄狡逞之謀陝省邊防無時可懈臣所派防略陽鳳縣邠長鄜州保安靖邊各界之兵約計馬步二十一營而地勢彌互二千餘里尙有要隘未周之處苦於餉項乏竭難爲增竈之謀腹裏空虛每懷潛襲之慮要在酌量緩急隨時調度以濟兵力之絀現所派各路將弁才具各有優劣智略難期深遠要在處置適宜用所長而去所

短以盡偏裨之能至於得力統將本難其人就現在各員而論
惟漢中鎮總兵蕭慶高樸實老練資力較深各營將官往往係
其舊部尚可聯絡眾心而規畫全局控馭諸軍則仍恃撫臣之
悉心體察遇事權衡將來恩信相孚自可指揮如意大凡軍營
所圖惟名與利臣前因各軍餉糈久缺頗慮眾志漸攜是以兩
次陳奏請仍川捐舊章幸蒙

皇上諄諭再三照前籌辦但此項可資挹注則士氣自將奮盈
措置得宜必無他慮臣南人不習北方水土自入秦中無三日
不病者現所患怔忡之證晝輕夜重飲食日減精力愈疲急思
就醫楚北冀起沈疴今蒙

寄諭諄諄自應恪遵

宸訓聞趙長齡不日即可抵省臣卸篆後擬再畱住一月與趙

長齡悉心會商凡屬陝甘交界之區形勢險夷道路要隘與夫

逆回熟竄之路應行嚴備之處以至防邊將領才具短長性情

剛柔調度處置之宜緩急策應之要婉曲商畫纖悉備陳計不

過一月之後地勢賊情均可瞭然心目屆時臣即遵

旨南還藉息羸病之軀實戴

生成之德所有遵

旨稍緩起程緣由理合附片陳明伏乞

聖鑒謹

奏

御中
奏
御
覽
下
行

卷十三終

劉中丞奏議卷十三終

劉中丞奏議卷十四目錄

保奏攻剿蔡啟各逆出力員弁疏

附請獎曹克忠蕭慶高二員疏

開報援陝各營收支款目疏

附清單

恭報署任日期疏

會奏籌濟甘軍糧食疏

附請飭川省籌辦捐輸疏

附請提山東協餉疏

附請以林壽圖署理藩篆疏

附請催臬司迅赴新任疏

附請展緩大計疏

附請賞給紳士劉映菁匾疏

附籌解甘軍餉銀軍火數目疏

密陳涇州軍心危疑疏

附請飭據實查辦以服眾心疏

覆奏陝西叛產礙難變賣疏

附請催飭內閣戶部妥速議覆疏

密陳道府考語疏

劉中丞奏議卷十四

湘鄉劉 蓉著

保奏攻剿蔡啟各逆出力員弁疏

同治四年十月十三日

奏為查明官軍攻剿蔡啟各逆疊克堅壘擒斬要逆並收降追
殲偽黨甚夥在事出力員弁遵

旨擇尤彙保籲懇

恩施恭摺仰祈

聖鑒事竊臣前奉同治三年九月初五日

上諭劉蓉奏敗匪紛竄階州督軍越境窮追覽奏均悉蔡啟等
逆經蕭慶高等督軍追躡疊獲勝仗擒斬收降匪黨甚眾餘孽

劉中丞奏議卷十四

狂竄階州劉蓉現徼林之望力扼要隘並飭蕭慶高等越境窮追辦理尙屬認真在事出力員弁俟事竣擇尤彙保候旨施恩等因欽此旋因穆圖善所部各軍出力員弁先經保奏請獎渥荷

恩施而臣部各營正在追剿階州喫緊之際不免缺望經臣奏懇將攻剿蔡啟兩逆追擊出境勞績特作一案保獎俾免向隅於同治四年二月十一日奉到

批摺議政王軍機大臣奉

旨著照所請准其擇尤保奏毋許冒濫欽此茲據蕭慶高等開具出力員弁清摺請獎前來臣伏查偽武成王蔡逆昌榮著名

狡悍句合髮逆僞啟王梁成富等率黨四萬之眾由鄂省回竄
陝疆逼近省城經臣先飭記名提督彭基品等會同副都統金
順擊敗於灃河秦渡及追勦於鄂縣澇峪等處屢挫兇鋒逆遂
西趨分踞店子頭田峪樓觀臺黑水峪西駱谷一帶臣復會同
現任甯夏將軍穆圖善親督湘果英毅雄毅彝字親兵各軍與
河州鎮總兵曹克忠所部前後夾擊屢斬要逆僞統領甘潤任
蔡信並擒獲逆酋宋先富等多名逆始退出店子頭老巢過河
移駐焦家巷馬鹿村說經臺及樓觀東西各堡我軍移營環壘
進逼各將士冒暑衝鋒不避矢石連次進攻斬馘悍賊數以萬
計先後逼降僞將葉毓廣韋發謨黃義發陳文元陳兆書陳玉

林譚金華王洪興王克昌彭學進羅啟發徐昌先李春年蔣洪
順任洪興及中旗僞將鄭永和等各夥黨萬餘人連克堅堡掄
斬要逆楊必南等甚多迨該逆敗竄南山各軍冒雨疾追翻山
越嶺沿途斬馘收降又計七千餘眾該逆喘息未遑拋棄軍械
奔逃出陝潛襲階州其時逆黨存者不過四千之眾尋復越境
擊勦所有在事出力員弁實非尋常勞績可比自應量予獎敘
以示鼓勵謹擇尤覈實開單恭呈

御覽伏懇

天恩俯准給獎飭部註冊以昭激勸惟查湘果右軍各營於克
復階州後業經川省裁撤而曹克忠所部各營現在甘省勦辦

同逆相距大遠均未據開單請保前來應俟咨查明確再懇獎
敘除將擬保千總以下各弁咨部核獎並將陣亡員弁勇丁照
例辦理外所有查明攻勦蔡啟各逆疊克堅壘擒斬要逆並收
降追殲僞黨甚夥在事出力員弁請獎緣由理合恭摺具奏伏
乞

皇太后

皇上聖鑒訓示謹

奏

附請獎曹克忠蕭慶高二員疏

再記名提督甘肅河州鎮總兵曹克忠一軍於上年五月間經

臣奏明由隴防調赴鳳郿督率英毅彝宇各營截賊前竄之路
節節逼剿隨與臣等督飭諸軍夾攻蓋屋一帶計與蔡啟各逆
先後十餘戰屢破堅壘擒斬要逆收降偽黨多名均經隨時奏
報在案該總兵素稱驍勇膽識兼優實屬忠勤卓著又記名儘
先提奏提督漢中鎮總兵蕭慶高督率諸軍進止有度實屬謀
勇兼裕勤勞倍至惟該二員官職較大應如何獎敘之處非臣
所敢擅擬伏候

聖裁至曹克忠所部各營出力員弁已於另摺聲明容俟咨查
明確核實擇尤保獎以示鼓勵謹附片陳明伏祈

聖鑒謹

奏

開報援陝各營收支款目疏

同治四年十月十三日

奏爲

微臣

統帶援陝各營一切收支款目遵

旨核實分晰開具簡明清單謹請

敕部存案恭摺仰祈

聖鑒事竊

臣

前准戶部咨同治三年七月初十日奉

上諭所有同治三年六月以前各處辦理軍務未經報銷之案准將收支款目總數分年分起開具簡明清單奏明存案免其造冊報銷等因欽此仰見

皇太后

皇上洞徹利弊綜核名實之至意伏查臣於同治二年八月初一日奉

命統師援陝當卽募選親兵於八月十二日由成都起程其時四川督臣駱秉章派援漢南之師爲湘果中軍七營湘果右軍七營嚮導四營英字兩營桂字四營果毅兩副營臣行抵巴州卽聞援軍挫衄漢郡失守之信當卽收集部伍重整旂槍並咨商督臣駱秉章請將敗挫之後不甚得力各軍由臣裁撤募補務及原營之數其月餉口糧亦務符原協之數以期得力而利攻勦旋准駱秉章咨覆照辦臣因將英字前營裁撤改募馬隊兩起分撥湘果兩軍將英字中營改爲英毅中營桂字四營

改爲英毅副中前後左四營其嚮導四營概行裁撤另募五百人爲英毅右營合成英毅六營之數另派統領營官管帶又另募五百人爲長字營另募八百人爲雄毅營旋又咨商駱秉章調撥彝字營前來會勦因改長字營爲彝字副營均經咨川有案其月餉或由川省防勦局逕解各營支放或解由臣隨營糧臺轉發均於川省協餉項下開支由糧臺另案詳請咨歸四川造報其由臣自行添募之親兵五營驍騎營馬隊一起撫標新軍兩營果毅新軍兩營鎮西軍三營湘果新中一營又增募雄毅營一百人及同治三年五月以後撥畱川援之英毅六營彝字正副兩營雄毅兩營湘果中右馬隊兩起共一營應需糧餉

均照楚軍章程由陝餉項下開支通計自同治二年八月十二日起至同治三年六月底止總共收到四川湖南協餉及四川陝甘各項捐輸並動用本省庫款各計庫平銀三十三萬三千一百七十八兩二錢四分二釐九毫六絲九忽由臣隨營糧臺委員四川候補知府蔣若采等經營支發臣復隨時稽核不准稍有浮冒現據該委員等將二年八月十二日起至三年六月底止支發各營正項雜款總共支庫平銀三十三萬三千一百一十九兩五錢一分零五毫三絲七忽遵照戶部奏定章程開單前來臣逐加查核均係實用實銷委無絲毫冒濫除將贖存庫平銀五十八兩七錢三分二釐四毫三絲二忽歸入三年七

月以後由陝省糧臺另案照例造報外謹開具簡明清單恭呈御覽伏祈我

皇上俯賜飭部存案以備稽考所有開單具報援陝各軍收支餉項款目存案緣由理合恭摺具奏伏祈

皇太后

皇上聖鑒訓示飭遵謹

奏

謹將援陝楚軍自同治二年八月十二日起至三年六月底止各營收支餉項款目總數開具簡明清單恭呈

御覽

計開

一收四川解到勸辦陝甘捐輸庫平銀一十七萬一千六百二十九兩七錢二分八釐二毫一絲六忽

一收四川協餉庫平銀二萬五千八百九兩九錢一分二釐九毫三絲三忽

一收湖南協餉庫平銀一萬一千四百三十四兩二錢

一收湖南省局陝甘捐輸庫平銀五千兩

一收陝西藩庫撥到庫平銀二萬三千九百三十四兩五錢六分五釐

一收川陝各項捐項庫平銀十萬一千一百二十兩八錢三分

六釐八毫二絲

總共收庫平銀三十三萬三千一百七十八兩二錢四分二釐九毫六絲九忽

一支撫標親兵全營將弁勇丁二千八百名長夫一千八名共領庫平餉銀十一萬三千六百三十七兩八錢六分六釐六毫

一支驍騎營馬隊弁勇一百名長夫三十六名共領庫平餉銀三千四百四十五兩八錢六分六釐六毫

一支雄毅營弁勇九百名長夫三百二十四名內弁勇八百名長夫二百八十八名同治三年五月以前歸川領餉造報自五月初一日起撥支陝餉共領庫平銀一萬八百八十六兩六錢

六分六釐

一支英毅六營弁勇三千一百名長夫一千一百十六名同治三年五月以前歸川領餉造報自五月初一日起撥支陝餉共領庫平銀三萬五千九十兩八錢二分六釐六毫

一支湘果中右馬隊兩起共一營弁勇三百名長夫一百八十八名同治三年五月以前歸川領餉造報自五月初一日起撥支陝餉共領庫平餉銀五千六百八十兩

一支湘果新中營弁勇五百名長夫一百八十名共領庫平餉銀三千六百四十二兩一錢四釐六毫六絲六忽

一支彝字正副兩營弁勇一千名藤牌勇五十名長夫三百八

十四名同治三年五月以前歸川領餉造報自五月初一日起撥支陝餉至六月十六日止以後復撥歸川省支餉共領庫平餉銀九千七十七兩五錢九分七釐八毫六絲六忽

一支撫標新軍正副兩營弁勇一千名長夫三百六十名自同治二年十二月初四日招募成軍起至三年四月二十九日裁撤之日止共領庫平餉銀二萬七千三百六十四兩

一支鎮西軍中左右三營弁勇一千五百名長夫五百四十名共領庫平餉銀四萬九千一百三十二兩

一支果毅新軍正副兩營弁勇一千名長夫三百六十名自同治二年十二月初六日招募成軍起至三年三月二十二日裁

撤之日止共領庫平餉銀一萬九千八百八十兩

一支隨營偵探護餉勇役二十名共領口食庫平銀三百七十六兩八錢

一支陝西遣撤知府易佩紳果健營弁勇四千餘名酌給川資同籍共發庫平銀七千七百二十二兩七釐七毫二絲一忽
一支辦理漢南軍務四品京堂李雲麟借撥餉銀庫平二萬一千八百八十四兩一錢六分九釐六毫八絲四忽咨由李雲麟自行彙案造報

一支鹽糧馬乾書識長夫口食心紅紙張等項共領軍需平銀折實庫平銀三千六百四十三兩二錢一分五釐八毫四絲

一支各營領用藍袷帳房一百六十頂白單帳房一千九百八十頂隨帶鑼鍋什物二千一百四十分共用軍需平銀一萬九千六百五十三兩八錢四分四釐除扣減平一分實發庫平銀一萬九千四百五十七兩三錢五釐五毫六絲

一支號衣旗幟刀矛等項製辦工料價值共銀一千三百一十三兩九錢五分六釐四毫六絲除扣軍需平一分實發庫平銀一千三百兩八錢一分六釐九毫

一支採買戰馬四十八匹連鞍韉繩鐙共用軍需平銀六百八兩四錢除扣減平一分實發庫平銀六百二兩三錢一分六釐
一支採辦馬弓六十張戰箭一萬枝裝箭皮筒一百二十箇共

用軍需平銀三百八十四兩七錢二分除扣減平一分實發庫平銀三百八十兩八錢七分二釐八毫

一支採買令旗令箭耳箭戰鑼戰鼓更鼓粉牌巡籤等項共用軍需平銀十五兩二錢三分除扣減平一分實發庫平銀十五兩七分七釐七毫

總共用庫平銀三十三萬三千一百一十九兩五錢一分五毫三絲七忽

以上通共收庫平銀三十三萬三千一百七十八兩二錢四分二釐九毫六絲九忽

支銷庫平銀三十三萬三千一百一十九兩五錢一分五毫三絲

七忽

計餘存庫平銀五十八兩七錢三分二釐四毫三絲二忽歸入
三年七月以後支發餉銀另案造報

恭報署任日期疏

同治四年十一月初五日

奏爲恭報

微臣

署任日期叩謝

天恩附陳下悃恭摺仰祈

聖鑒事竊

臣

恭讀同治四年十月二十日內閣奉

上諭劉蓉著仍帶革職畱任處分署理陝西巡撫等因欽此同
日並准軍機大臣寄奉

諭旨劉蓉前有回籍修墓之請此次旣命署理巡撫卽著無庸

給假回籍以專責成劉蓉受朝廷倚畀重恩當益加奮勉於軍務地方各事宜實心辦理以圖報稱等因欽此

訓詞深切感悚莫名旋准撫臣趙長齡派委西安府知府呂儁孫署中軍參將彭體道賚送關防及

王命旗牌書籍文卷移交前來臣當卽恭設香案望

闕叩頭祇領於十一月初一日接任視事伏念臣以陋質過荷殊恩撫茲凋敝之區倏逾兩載愧乏安攘之策未展寸長前茲

陳奏失詞愆由自取迺荷

高厚之隆施謂是語言之小過釋肩旬日遽承

寵命重申負疚萬端胥賴

聖恩曲鑒臣何幸膺茲

異數超絕等倫即使頂踵盡捐猶慮涓埃無補陝省地曠人稀
兵饑餉竭東防豫警西逼回氛無可懈之事機有難寬之責備
臣既過蒙

恩遇敢不力疾從公冀稍濟於時艱或仰紓夫

聖慮惟臣所患怔忡之證愈積愈深勉強支持終虞隕越當茲
邊陲多故警報頻聞緩急機宜變遷靡定卽或精神夙健尙恐
思慮難周矧臣病軀何堪重寄再四圖維惟有顛懇

皇上俯念地方緊要迅簡賢員來陝接任俾臣暫息仔肩籍資
調理沐

鴻恩於再造何敢自外

生成顧羸病之久嬰實懼弗克負荷謹陳愚悃仰達

宸聰所有

微臣

署任日期理合恭摺叩謝

天恩並附陳下情伏乞

皇太后

皇上聖鑒訓示謹

奏

會奏籌濟甘軍糧食疏

同治四年十一月初五日

奏爲遵

旨籌撥倉穀勸捐麥糧暫濟甘軍目前之急仍通籌以後採運

接濟之法請

旨飭辦恭摺會奏仰祈

聖鑒事竊照同治四年十月二十日准兵部火票遞到軍機大臣字寄同治四年十月十五日奉

上諭甘省糧餉缺乏朝廷早深廛念茲覽楊岳斌所奏各營至以麪水充飢情形至此殊爲可憫陝西本年秋收旣尙豐稔卽著劉蓉按照楊岳斌摺內所請各情體察該省二中二等州縣設法捐辦麥糧運至甘省源源接濟並著於邠乾鳳翔鄜州各屬先提倉穀四萬石運交秦州涇州慶陽等處俟該省捐有成數再行歸款四川之保甯一郡毗連階州運糧較近著崇實駱

秉章於該府所屬籌米糧一萬石運赴階州以資軍食該將軍等當力顧全局迅速籌解不得稍有推諉楊岳斌摺著鈔給閱看等因欽此維時臣長齡業已接篆當卽會同臣蓉恭錄行知軍需局趕緊籌議去後茲據該局司道會詳本年閏五月間奉旨飭撥倉糧二萬石運赴慶陽糧臺當卽詳明在於附近甘省之甘泉膚施二縣倉穀內如數湊撥由慶陽糧臺自備運脚提解一面通飭西同鳳延榆邠乾廊綏等府州縣會同慶臺及雷營委員勸捐本色麥糧或改折麥價解往接濟現據西安屬之涇陽三原同州屬之韓邠澄朝等縣稟報麥價銀兩捐有成數已飭催齊趕解慶陽又穆將軍前奏由延廊各屬採辦軍糧比

因北山瘠苦額徵錢糧無多當由省城糧臺發銀五千兩派員解至延鄜買糧解甘是慶臺及穆營皆可稍資接濟惟楊總督與曹營所部各軍飢困異常自應遵撥倉糧以救眉急無如陝省鄰甘各州縣軍興以來各路援師以及招募勇丁過境口糧均係動支倉儲以致大半告罄刻下邠州長武鄜州保安定邊等處分軍擇要防堵俱應按日碾磨食糧支用已虞匱缺今奉撥四萬石爲數較多勢難照撥第甘省需糧孔急不得不於無可設法之中竭力籌畫擬飭令寶雞岐山扶風長武三水儘撥倉麥料豆共京斗二萬石分解秦州涇州交納聽候提用所需運費卽在轉運局收存各省協甘餉銀項下酌發派員解赴寶

雞等縣會同地方官僱備車騾兼程轉運俾免延誤一面體察上中二等州縣開列糧數分委幹員會勸紳糧以濟軍食惟陝省兵燹之後民氣未蘇勸捐非易容俟辦有成數另行具報等情會詳請

奏前來臣等伏查陝省各州縣倉糧經逆回蹂躪之後所存實屬無多迨多隆阿率師援秦日碾倉穀運濟嗣值甘省各營募勇過境並各路防軍撥支碾食之糧皆取諸此所屬實就罄竭間有倉底贖存餘糧又皆多年陳久霉變不復可食本年秋收較糴糧價稍平亦因人民稀少食齒不多之故比經訪查各鄉上戶收糧多者不過三千石中下各戶以次遞降或一二十石

至數石不等所入已微而食者亦寡故覺稍有贏餘非真有比
戶豐饒之象也比經穆圖善雷正綰楊能格先後派員勸捐至
再至三已覺筋疲力盡卽更委員勸捐所獲究必無多然而督
臣所部及曹克忠各營飢窘至於此極臣等目擊情形斷無坐
視不顧之理現雖竭力湊撥倉穀二萬石不過權濟燃眉之急
卽委員分路勸捐亦終屬望梅止渴之事臣等再三籌商惟有
別籌巨款以供採買轉運之資庶幾事歸實際可爲源源接濟
之長策現計鄰甘省分惟晉蜀較爲完富擬請由該二省每月
協濟援甘餉銀二萬兩由陝省分派道府大員設一局於漢中
採買米粟運解秦州設一局於鳳翔採買麥糧運解涇州由臣

督督飭省城司道共總其成仍再籌他省協款使每月約可十
萬之數以厚資本而資周轉庶幾隴軍可免譁潰之虞甘境尙
有肅清之望臣等極知四川山西均爲協餉所困漸有自顧不
暇之勢爲該兩省皆與甘境毘聯誼難膜視使甘事壞則不獨
陝不能支卽晉蜀亦決無倖全之理噬臍將及能無豫防所議
山西月協之二萬金容俟臣長齡抵晉撫任後察看情形竭力
籌辦源源解陝以顧大局其四川月協二萬之數相應籲懇
天恩敕下成都將軍兼署四川督臣崇實四川督臣駱秉章督
飭藩司從五年正月爲始如數按月協撥以供採買轉運之資
實於甘省危局有裨除仍督飭司道委員分路勸捐以濟急需

外所有遵

旨籌撥倉穀勸捐麥糧暫濟甘軍目前之急仍通籌以後採運接濟事宜謹合詞恭摺由驛馳奏伏祈

皇太后

皇上聖鑒訓示飭遵謹

奏

附請飭川省籌辦捐輸疏

再臣蓉前因甘軍窘乏殊常曾經兩次陳奏請將毛震壽前在川省籌捐款項三十萬之數照舊舉辦源源解濟欽奉

諭旨所奏自係實情目前甘省軍情緊急更甚於前崇實駱秉

章等務當力爲其難仍飭令藩司會同毛震壽將原籌捐款催
齊陸續解甘以支危局趙長齡已簡陝撫於甘省餉需誼應兼
顧著與崇實駱秉章悉心籌畫崇實駱秉章等尤當於民間剴
切曉諭務使民生軍餉兩無所妨方爲至善等因欽此欽奉之
下仰見我

皇上眷念西陲訓示周詳之至意維時臣長齡業已起程在途
當卽恭錄咨請兼署督臣崇實督臣駱秉章照舊舉辦並行知
川局司道及各屬道府欽遵辦理在案茲據毛震壽十月十一
日來稟稱該員因思回籍葬親曾經稟請將經手捐務歸併四
川舊設陝甘捐局接辦業於十月初三日將各項空白執照實

收分晰造冊移交總理陝甘捐局川東道吳鎬接收以冀事權
歸一諸臻踴躍嗣據吳鎬聲稱服官於蜀而代鄰省籌捐迄未
奉四川督憲札飭誠恐呼應不靈諸多窒礙未便遽行接辦等
語查甘省需餉甚急若復再事稽延於捐務既毫無裨益於餉
需卽大有關礙惟有仰懇咨明四川總督札飭司道接辦以專
責成等情稟請前來臣等竊思崇實駱秉章夙矢公忠必不忍
置甘省危局於不顧况疊奉

諭旨諄諄自應欽遵辦理刻值甯夏軍情緊急各營將士號寒
啼飢日有譁潰之慮每接穆圖善等咨函及該營來陝將弁傳
述該軍飢窘情形深爲酸惻臣長齡非身至秦中亦不知甘軍

窮苦情狀竟至如此之極而陝庫奇絀不堪言喻合無籲懇
皇上天恩敕下崇實駱秉章迅卽檄飭藩司江忠濬川東道吳
鎬等會同毛震壽速按舊章籌辦源源解濟俾免決裂之虞實
維

高厚之賜除由臣等婉曲咨請兼署督臣崇實督臣駱秉章迅
速札飭籌辦外謹復合詞附片陳明伏祈

皇太后

皇上聖鑒飭遵謹

奏

附催提山東協餉疏

再臣前因邊報警急陝庫奇窮曾經奏請山東舊欠協陝餉項先解十萬兩以濟要需欽奉

諭旨飭遵在案現經山東撫臣闔敬銘派員解到銀一萬兩雖亦藉資點綴惟時值歲暮天寒各路防邊將士艱窘萬分日來紛索欠餉絡繹道途而甘省曹克忠一軍忍飢苦戰遂解鞏昌之圍不得已湊撥銀二萬四千兩拯其飢乏其陶茂林原部欠解之餉現又欽奉

諭旨飭撥義不容緩本省防軍日虞譁譟近聞派防定邊之副將段登雲一軍已有投戈散去者雖經追斬數人尙不爲止司庫奇窘毫無入款可恃束手仰屋不知所以爲卒歲之謀因聞

山東庫儲頗號充裕現委知府銜卽補同知直隸州陸堃知府
用候補直隸州知州唐德埈兩員前赴山東守提前項協餉銀
九萬兩分作兩批趕於年前提到以資散給而固軍心伏祈我
皇上敕下山東撫臣閻敬銘卽飭藩司丁葆楨如數籌撥勿復
誘延庶陝軍可期安固而甘軍亦資分潤不勝懇禱之至所有
催提山東協餉緣由理合附片陳明伏祈

聖鑒飭遵謹

奏

附請以林壽圖署理藩篆疏

再降調藩司林壽圖現奉

諭旨著來京另候簡用欽此查林壽圖從前降調開缺當經奏請以督糧道劉齊銜署理其所辦督臣楊岳斌軍營轉運事宜亦經臣奏派試用道岳雲溪接辦在案茲岳雲溪以故鄉墳墓猝被黃河衝塌請假回籍修理而時值嚴冬餉需奇絀兵勇迫於飢寒時虞譁陝省糧臺事務本較繁劇劉齊銜向以糧道總辦糧臺現在極力支撐亦難兼理藩篆而臣以病軀復膺艱鉅若非得人贊助亦恐隕越貽羞又甘省製造軍火運解餉需等事向因經費支絀並未另設專局現又欽奉諭旨任在陝籌辦米糧秦隴唇齒相依既不能不趕籌接濟而事屬創始地處奇窮採買既艱轉輸尤為不易其中應行撙節及

斟酌情形移緩就急之處必須歸併藩司通盤籌畫一手經理
方臻妥協自非精明廉幹熟悉情形之員難期得力查林壽圖
在陝兩年遇事整飭不避怨嫌清操毅氣堪勝巨任一切要件
均能綜理裕如現因母老天寒卸篆後尙未起程合無仰懇
天恩可否俯准暫畱林壽圖署理陝西布政使篆務並令督辦
陝甘督臣軍營轉運事宜俟新任藩司鍾秀到任再行飭令遵
旨進京聽候

簡用之處伏候

聖裁臣爲地方緊要臂助需人起見謹附片具

奏伏乞

皇太后

皇上聖鑒飭遵謹

奏

附請催臬司迅赴新任疏

再陝省禍亂甫平瘡傷未起不獨鄰警頻聞須籌戰守而民氣凋殘吏治窳惰欲除積習以培元氣必須藩臬兩司均能公正廉明方足以資治理臣夙聞新授陝西按察使胡肇智清靜有守孤介不阿該員由福建道員升補斯缺爲日已久尚未聞起程信息恐因海道遼遠別致滯濡現在陝省地方較閩省尤爲緊要合無籲懇

天恩飭催胡肇智速赴新任俾臣得收指臂之助理合附片陳明伏祈
聖鑒謹

奏

附請展緩大計疏

再陝省本年

大計甫於十月十九日經前撫臣趙長齡接准部咨尚未轉行
卽值卸事移交到臣伏查三載考績係屬激揚

鉅典向由巡撫率同藩臬兩司將道府以下各官考察賢否實
蹟分別舉錯現在兩司印務均係道員署理同在應行考劾之

列合無仰懇

天恩俯准將此次

大計展緩至來年春間俟新任藩臬兩司如有一員到任屆滿三月再爲舉行庶黜陟咸可酌商辦理益昭詳慎臣仍畱心訪察貪劣不職之員隨時據實糾參不敢稍涉因循寬假所有計典懇請展緩緣由理合附片陳

奏是否有當伏乞

聖鑒訓示飭遵謹

奏

附請賞給紳士劉映菁匾疏

再陝省自被髮回各逆滋擾以後田地荒蕪民生艱窘急須及時墾種無如情形凋敝倉庫空虛當經省城司道設立訓農總局籌款借給咸甯長安兩縣窮黎牛種以資耕作此外州縣飭令各就地方勸導詳經前署撫臣張集馨奏奉

諭旨允准在案旋有三原縣富紳劉映菁捐出銀二萬兩爲該縣散給牛種籽粒之資並因出逃難民及陣亡團勇家屬人等聞賑歸來不敷散放續捐銀四千兩均經該縣前任余賡陽督率局紳核實散給並未假手吏胥貧民多沾實惠由現署知縣唐正恩查係民捐民辦例不報銷稟經藩司覆核詳請奏獎前來臣查三原縣兵燹之餘民多困苦該紳劉映菁獨力

捐銀二萬四千兩作爲牛種籽粒賑恤之資實屬好義急公查
劉映菁先捐道銜

賞戴花翎嗣於咸豐元年經其胞姪光祿寺署正劉賡瀛捐請
二品

封典職銜業已無可復加可否仰懇

天恩賞給匾額以示寵異而資觀感理合附片陳明伏乞
聖鑒訓示飭遵謹

奏

附籌解甘軍餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治四年八月分撥解過援甘各營餉銀軍火等項數目附

奏在案茲據軍需局司道詳開同治四年九月分共解支過援甘各營餉銀二萬七千六百零四兩一錢八分六釐火藥一萬二千斤火繩一萬五千丈鉛丸六千斤次號銅火箭五十枝大紙火箭五百枝火蛋三百箇斬馬刀三百把白布單大帳房四十架竹噴筒一百箇鳥鎗一百桿馬鎗五十桿馬刀一百五十把戰弓五十張撒袋五十副銅弓勒子五十副戰箭一千枝竹桿透甲錐各五十莖均經分別委解給領取有迴文爲據臣覆查無異除仍飭該司道等竭力籌措源源接濟外所有陝省同

治四年九月分解支過撥甘各營餉銀軍火等項數目謹繕清單恭呈

御覽理合附片陳明伏祈

聖鑒謹

奏

密陳涇州軍心危疑疏

同治四年十二月二十二日

奏爲涇州軍心危疑恐激事變據實密陳仰祈

聖鑒事竊

臣

於十二月十八日接譚玉龍據涇州各營將弁勇

丁僉詞稟訴前次全軍東退實由雷恆李高啟執持雷正縮令箭逼勒拔營刀砍頂帽網打營官逼令同叛金占元力諫不從

卽被雷恆殺害并殺兵勇一百八十名勒令拔發該勇等共知
大義難安已多闕散雷恆等知會回逆隨後趕來傳至平涼整
軍再進隨傳令先割髮辮共扯反旗直破西安各營哨祇得帶
隊繞越拋棄軍械逃到涇州會同整備城守此時情形眾所共
見乃臬司楊能格不聲明叛將之罪轉以各營係因雷正綰撤
去幫辦保舉絕望及以久缺糧餉相率謀變等詞諉咎兵勇現
在萬口紛騰眾心渙散大患卽在目前等語同日又據稟稱該
提督經督臣楊岳斌委以統領捷字馬步等營正在力籌整頓
忽接慶陽糧臺六百里插翼照會逼令全歸雷正綰統帶各營
以雷正綰方與逆回勾結不肯更入叛黨眾心惶惑疑慮莫知

適從楊臬司並欲將駐守荔家堡西峯鎮要隘之軍擅行撤調
於東路大局殊有關繫臬請飭遵等情前來臣查雷正綰率師
赴甘各營將士素隸軍麾曾經薦舉從征日久雖值糧餉匱乏
尙未離心自雷正綰失職怏怏口出怨望之言雷恆等倡始爲
非而士心始貳然初猶涕泣勸阻冀其保其令名繼因逼脅殘
殺始忍棄其主將舍私恩而急公義出萬死以圖一生蓋賴我
國家漸摩之澤人人至深故賤卒亦識尊親臨難能分順逆遂
藉涇州守禦之力暫釋
宵旰西顧之憂雷正綰自知眾心已去公論不容始自悔悟痛
哭有拌死報効之語

聖恩寬大亦既准予自新仍令率師勦賊而雷正綰郵書哀懇到處干求由是異論紛紜變幻百出昔聯捷曾以雷軍激變入告矣卽楊能格亦稱固原兵勇潰變慶涇情形危急請將雷正綰所部歸魏添應統帶矣楊能格又奏稱幸得周顯承鎮靜防堵將何成蛟等拏獲正法各營勇始各畏威折回並貽書周顯承稱其力保涇州撥亂反正厥功甚偉矣旋復爲雷正綰請復幫辦更授兵權又稱因周顯承把持糧餉致潰軍紛至涇州索糧此其前後矛盾固難逃

聖明洞鑒之中然使雷正綰果能感憤尚可重整軍威招撫部曲卽亦何必深求今叛將抗匿不交仍縱雷恆馬隊結連回酋

擾亂城鄉任聽李高啟步隊將平固兩屬村鎮堡寨攻燬殆盡
陝甘大道梗塞不通猶復日修私怨多起釁端是否悔罪反正
趙長齡在陝查辦諒能詳察前後情形剖白是非據實具奏不
至顛預遷就顧慮瞻徇更貽陝甘大局之患惟事有不得不據
實直陳者臣頗聞雷正綰自知聲名已裂士卒不附而叛將雷
恆李高啟又復礙難交出屢挽聯捷成祿楊能格德興阿代奏
或出關効力或赴楚豫勦捻蓋無可解免於甘省猶冀掌握其
兵符楊能格心慮雷正綰一離甘省則糧臺無所附麗無復專
摺奏事之權不肯代爲陳情且自管理糧臺祇顧慶防各軍不
恤涇州士卒屢因涇營請撥糧餉積啟猜嫌現雷正綰所贖馬

步不過千餘慶陽魏添應僅祇八營亦多虛伍獨涇州營數最多慮歸譚玉龍等統帶之後卽應交督臣楊岳斌節制又恐因糧餉勻撥不公或致糧臺被撤而平日藉口督辦慶防調撥營伍之私心不能自遂於是不計軍心之向背不顧事勢之順逆多生枝節專事抵牾必欲使涇防各營逼歸雷正綰統帶此則大局之可慮者也伏思唐時中興名將首推郭李然郭子儀當收復兩京之後朝廷釋其兵柄則怡然歸田及奉一紙詔書卽翩然就道以故當時服其忠誠後世仰其勳烈李光弼素與郭子儀齊名祇以失志怏怏稍違朝廷節度遂至將士不復稟畏威望因之少衰蓋君臣大義自在人心雖屬武夫粗材亦共知

名分森然不可干犯此萬古綱常所由維持於不壞者比歲東南用兵幾遍天下驍將武臣擁勁旅握兵權者所在有之然或喪師失律貽誤事機一經

朝廷譴責靡不帖耳懾伏獨雷正綰首冒不韙狡焉思逞而將士皆秉義弗從兵勇或投戈以去此蓋我

皇上德威遐被率土歸心實爲

宗社生靈之大慶今楊能格等祇顧僚友私情竟忘

國家公義始則曲爲掩飾繼則諉過他人罔上行私遂致淆亂黑白置陝甘大局綱常大義於不顧斯實事之不可解者春秋之義人臣無將今雷正綰等以么麼武弁敢犯非常論者以其

會擁軍麾欲以姑息從事不知

國家紀綱法度在所必行雷正綰罪重罰輕輒敢悍然不服向使各路將帥威望有大於此事權有重如此者相率效尤我

朝廷又將何以處之

臣

慮涇州各營既耻雷正綰背逆之名不

甘歸附又忿楊能格誣奏之語相聚驚惶如必逼歸雷正綰統帶不惟激成禍變將貽不測之憂抑慮敗壞紀綱更釀無窮之患燃眉之急噬臍何及既經譚玉龍據各營紛紛稟訴未敢壅於

上聞所有涇軍危疑情形理合由驛六百里密封馳

奏伏乞

皇太后

皇上聖鑒訓示飭遵至周顯承已來省城聽候查辦合併聲明

謹

奏

附請飭據實查辦以服眾心疏

再臣前奉

諭旨現在趙長齡計已起程著懍遵前次寄諭將周顯承被楊能格奏參各款有無冤抑逐一查明如何持平辦理之處並著趙長齡會商楊岳斌據實具奏毋稍徇徇等因欽此仰見我皇上審慎周詳之至意現聞趙長齡意圖急赴晉撫之任又因

楊能格續參周顯承在甯州催糧滋擾之案

諭旨至爲嚴切並未提及前參各款情節意欲迅速完結不復
查察前後情形與楊岳斌會商妥辦臣維前次雷軍潰退是否
係赴涇州向周顯承索取糧餉抑係雷正綰失職怨望率師東
犯實爲此案緊要關鍵現在涇州士卒議論紛騰楊能格多方
播弄事變所激關係匪輕相應請

旨敕下趙長齡暫緩赴晉悉心訪察前後確實情形仍會商楊
岳斌秉公辦理據實具奏庶期事歸平允厭服眾心實於大局
有裨是否有當謹附片陳奏伏祈

聖鑒謹

奏

覆奏陝西叛產礙難變賣疏

同治四年十二月二十八日

奏爲陝西各屬叛產變賣充餉窒礙難行恭摺縷晰覆奏仰祈
聖鑒事竊照同治四年十二月初七日奉到初二日

上諭楊岳斌片奏請將甘肅秦州一帶叛產變賣充餉著卽督
飭藩司遴派公正員弁認真經理期於兵民兩有裨益毋任胥
吏舞弊其陝西各處叛產如何辦理之處著劉蓉迅速妥籌具
奏楊岳斌片著鈔給劉蓉閱看等因欽此當卽欽遵轉飭營田
局司道妥議去後茲據詳稱陝西各處叛產前經籌辦營田係
屬限年交租俟六年之後租數交足准其永遠管業爲時甚緩

現欲改議變賣如果一律定價可以驟得數十萬金卽不必爲久遠之謀亦尙可救一時之急匪特甘省增此巨款陝餉亦藉以寬餘惟事須審乎時勢尤必量乎人情利弊兩權輕重自見今縱不豫防異日之弊端亦須真見目前之利益使此時果有懷貲待價之戶收實在之產輸現在之銀自於民軍兩裨若僅憑約略之空言難收確切之實效迨至歲月遷延章程紊亂欲變價而田無可售卽欲復限年交租之議而法亦難行此不可不熟籌而豫計者也臣與司道就陝省情形詳察通籌變賣一層有不能行者一有不可行者四請爲我皇上縷晰悉陳之陝省殷實之戶向爲西同鳳三府較多而受

回逆之害亦惟西同鳳爲最烈蓋因變起倉卒幾於靡有孑遺
富民之僅以身免者十之二三略存家貲者更寥寥無幾自本
年五月興辦營田當卽通飭郡縣清丈叛產開報畝數頒給章
程執照廣爲招募酌量等則准俟一年後每畝按則交租以六
年爲限滿限交足者換給契約作爲永業核計租之所值較民
間尋常價買不過十分之三而又寬以年限不致迫促並令有
力之家不待六年補足租額亦卽准作爲永業乃迄今半年以
來各州縣業經丈量報明有案者共計一千九百餘頃而認種
者僅九百餘頃此外尙有雜於民產炊煙斷絕無從查辦蓬蒿
滿目難以丈量者果能通體售賣就現已丈量地畝計算亦可

值二十萬金但議賣甚易而承買實難其人卽如限年交租價
值甚賤富商巨賈果有餘力何難照數交足承爲己業無論將
來招佃轉售均可獲利居奇乃迄今認種者尙不及半則其無
力承買不問可知細詢其故蓋因富厚殷實之家焚掠殆盡其
事後逃歸者或婦孺僅存或廬舍蕩燬現方急謀棲身餬口之
計家有地百畝者或經營墾種十數畝及三四十畝已覺力有
難逮以故荒蕪甚多不暇另圖置產此變賣荒產之所以不能
行也至所謂不可行者量地售賣必待富民本省旣已無人則
將求之鄰省然富民安土重遷不肯遠離鄉井間有貪取便宜
意圖包攬之輩又必合計其往來資斧及牛具籽種棚舍人工

坐食之費然後擇地之肥饒者價之賤薄者度足償其所費而
尙有贏餘方肯認買官欲速售則定價不得不減價減而良田
先售則瘠地之價不得不再減官司日有減價之議奸民愈存
希冀之心况有力者不能接踵而來歲月耽延拋荒更無人種
其弊一地之肥磽惟里胥糧正知之最悉平時早謀侵吞值此
籌餉維艱亦往往倡爲變產充餉之議謂數萬數十萬不難咄
嗟立辦其實不過欲乘官司急售之時圖遂平日之願所圖既
遂則又必借故展延於是田地日久日荒更無人問何能有濟
要需其弊二軍興以來各路兵差絡繹供支轉運地方官賠墊
不堪其間移緩就急亦有出於不得已者雖屬徵存正款且不

能免其虧挪此項變價之款陸續投收未可限以時日更屬難於稽查恐將來徒以濟州縣之急未能果濟軍務之急其弊三地方官不盡可靠胥役保長復與奸民講張勢必揀派賢員設局招買計現報有叛產者二十餘州縣不惟無此多員其一切薪水局費均須就中提取爲時既久所入不敷事必中止彼時再議招墾則良田已去瘠土猶存農民藉口有詞卽限年交租之議亦必阻格其弊四有此四弊此陝省變賣荒產之議所以必不可行今欲以數十萬畝之地遂變爲數十萬金之帑名雖足以動聽實則無以贍軍不若籌辦營田事雖紆徐然漸次開墾一二年後銖積寸累實有裨於倉儲六年之間辦理得人成

效要可豫計雖年歲豐歉不一難保無減緩之時而取之既薄所遺亦必不多利弊相權自不如籌辦營田較有實濟等情由營田兩局會詳前來臣查變賣利在富民招墾利在窮民今陝省殷實之家已成貧窶變賣之議不能不資於晉蜀各省而晉蜀富民匪惟安土重遷亦共知此項荒田本屬叛回所管之業今逆回方虜聚隴中日圖回竄是否力能堵禦尙未可知欲令蠲其可以私爲己有之金錢售此不知終屬誰家之荒產而且人地兩不相習利害究難逆睹徘徊觀望顧慮多端故自同治三年以來經署石泉縣知縣陸堃署隴州知州湯敏及舉人權以巽等先後條陳變賣充餉之議迄今竟無應者卽此次辦理

營田招墾納租已逾半年之久而遠方客民願望因循慮致耗其資斧未肯負未遠來况欲使之先輸地價空持契券此其不肯樂從不待再計而決而局詳利弊各端情形均屬將來必然之事與其存變賣充餉之奢望而畫餅不可充飢何如爲招墾納租之緩圖使積粟終能濟乏甘省待餉孔亟但有實效可期何敢竟拘成見第辦法既多隔閡卽軍餉究無補裨不得不據實縷陳仰邀

宸鑒所有陝省叛產變賣諸多窒礙緣由理合恭摺覆奏伏祈
皇太后

皇上聖鑒訓示飭遵謹

奏

附請催飭內閣戶部安速議覆疏

再臣前奉同治四年十月十九日

上諭劉蓉奏陝西墾荒事宜酌定章程以專責成而規久遠一摺著大學士會同戶部悉心妥議具奏欽此查臣於五月間飭令司道設立營田總局辦理墾荒事宜七月後經該局詳定章程刊發各屬十月後辦有頭緒始行縷悉陳奏旋奉

諭旨飭議迄今已逾兩月是否可照原議章程辦理之處伏祈皇上敕下大學士會同戶部安速議覆請

旨飭遵以便轉飭各屬趕緊籌辦事關地方久遠利弊未可稽

延時日理合附片陳明伏祈

聖鑒謹

奏

密陳道府考語疏

同治四年十二月二十八日

奏爲循例密陳道府考語仰祈

聖鑒事竊照司道知府各官例應於年終出具切實考語密

奏一次

臣

前蒙

恩授陝西巡撫現仍接署篆務每於接見僚屬畱心體察復於公牘中觀其條列事理並採訪輿論察聽官聲凡不能稱職之員俱經隨時參劾現在大小各員尙皆克勤厥職其司道暨各

府除藩司係林壽圖署理臬司胡肇智延榆綏道嵩壽均未到
任西安府知府呂儁孫業已開缺尙未揀調有員均毋庸出考
外所有現任道府等員謹就臣管見所及出具切實考語敬繕
清單恭呈

御覽伏乞

皇太后

皇上聖鑒謹

奏

劉中丞奏議卷十四

終

劉中丞奏議卷十四終

終

劉中丞奏議卷十五目錄

再保賢能牧令疏

附保舉所知以備採擇疏

候補郎中代叔捐贖遺罪疏

附報籌撥甘軍餉銀軍火數目疏

特參知縣操守不潔疏

固原回匪竄隴擊退情形疏

附東防擒匪情形疏

附請飭川省慶臺速撥甘餉疏

催江蘇等省協甘月餉疏

附請撤慶陽糧臺疏

遵旨覆陳疏

附請撥兵疏通平固糧道疏

伏奏勦辦潰勇出力員弁疏

附請飭侍衛壽昌回京疏

附續發西安滿營銀票疏

附西路辦事大臣借支養廉疏

附報籌撥甘軍餉銀軍火數目疏

會奏改設慶陽糧臺就要辦理疏

請獎派赴川省勸捐官紳疏

卷一百一十五

5015/12-11

附報籌解甘軍餉銀軍火數目疏

密陳甘肅省城兵變情形疏

附請隨時折閱甘省章奏疏

二
三
四
五
六
七
八
九
十
十一
十二
十三
十四
十五
十六
十七
十八
十九
二十

劉中丞奏議卷十五

湘鄉劉 蓉著

再保賢能牧令疏

同治五年正月十三日

奏爲再保賢能牧令懇

恩破格錄用以昭激勸仰祈

聖鑒事竊臣前次甄別府廳州縣各員奏請分別勸懲其龔衡

齡等五員業蒙

賞加道銜等因在案嗣經吏部奏援成案調取引

見所請官銜等項應無庸議咨行到陝在部臣遵守向章原以嚴防冒濫惟臣竊有請者自古布化宣猷親民莫如守令我

朝設官置牧課最尤重循良自習狃承平吏安窳惰芻牧之職不舉寇盜之禍以興

文宗因軍務未竣講求吏治咸豐十一年三月

特諭各督撫保奏道府州縣各官我

皇上治隆繼述凡經臣工薦達無不立沛

殊恩誠念吏事實握戎事之源安民必重牧民之選近日江南削平巨寇閩浙胥慶肅清其明效也陝省殘破之餘瘡痍未起將欲戢兵以弭盜尤在舉善以勸能顧投効戎行者或鑽營數月卽越級以得高官究心民瘼者雖積資累年仍潦倒而淹下吏於是僉巧之徒趨軍營而如鶩奔競之輩視職守以若羈而

潔清自好悃悃無華者卽績邁龔黃名齊召杜恥趨梯榮之路
終絕上進之階往往轉以去位爲高惟恐解官不速若復拘於
成格何以激勵人才臣前摺擬保各員或量請升銜或酌遷一
秩原不敢如軍營勞績之優僅以好爵相縻冀爲賢勞者勸旣
已格於吏議何敢再以瀆陳惟昨見山東撫臣閻敬銘疏奏近
來地方牧令之升途皆爲營員所占卽照例升調亦比前遲滯
致令盡心民事勤慎供職者人轉視爲迂途等語欽奉
上諭候補知州張廷揚等仍著俟補缺後以知府用等因欽此
仰見我

皇上察仕途偏重之弊開人才登進之階從此風氣藉以轉移

吏治必有起色查陝西情形較山東尤爲凋敝臣前保官銜視東省尙有差別未可仍拘吏議獨令向隅臣謹督同藩臬兩司採訪官聲博諮輿論重加刪減力求覈實於前保各員中擇其始終不懈表裏如一者三員再爲敷陳請

旨俯准將興安府知府前甯陝廳同知龔衡齡仍加道銜同知銜富平縣知縣孫毓林知州銜府谷縣知縣郎鶴鳴均仍以同知直隸州知州儘先補用該三員政績考語已具前摺臣復於通省州縣中考其治績證以輿論查有准升佛坪廳同知咸甯縣知縣柳坤厚在陝十六年歷任繁劇潔已愛民志節剛方循聲孚洽雖長官悍將無得干以私者毅然肫然有不畏強禦不

侮鰥寡之風准升孝義廳同知署乾州知州周相焯前宰大荔
距今數載民切去思當回匪猛撲蒲城力疾守陴賊不得逞赴
官不以妻子自隨閱二十餘年蓋如一日迹其廉勁堅慤足以
振式浮靡該二員請

旨均以知府儘先補用以上各員如蒙

聖恩俯允均擬無庸送部引

見俾邀

朝廷逾格之榮益爲牧令賢能之勸臣爲整飭吏治起見謹援
山東保案籲懇

恩慈伏乞

皇太后

皇上聖鑒訓示謹

奏

附保舉所知以備採擇疏

再自我

皇上御極求賢

詔書屢逮或按羅遺逸量授一官或拔擢閒曹破除常格固已
英才踵起吏治維新竊維大臣靖獻之義貴在以人事君

朝廷宵旰之求期於因材器使小知大受視其才識與爲權衡
則人盡其能而政日以舉臣夙知運同銜候選知縣鄧瑤殫力

先儒之學究心匡濟之猷抱負瑰奇不希寵利候選同知朱宗
程素潔堅貞篤實之操兼嫻孫吳韜鈴之略杜門事親無意仕
進該二員向爲曾國藩駱秉章李續宜等所識拔嘗以薦牘登
聞曾荷

丹宸紀錄並奉

特旨發往江蘇以知縣補用昔龐統非百里才當時論者謂處
治中別駕之任始克展其驥足查鄧瑤植品端粹績學淹通朱
宗程志慮忠純器識沈毅蓋皆方面表率之資溷跡下僚設施
不竟臣自從軍吳楚歷官秦蜀耳目所接諸道府中得如鄧瑤
朱宗程之比者僂指殆不數人而秦處兵火殘區吏狃苟安積

臣等與利除弊一切尤須整頓臣嘗留心物色輒歎才難今江蘇軍務已平可否

飭調鄧瑤朱宗程來陝量加擢用俾該員抒其蘊蓄仰酬

知遇之隆臣亦藉所匡勦冀收得人之效惟

恩施逾格出自

聖主鴻慈臣謹舉所知用備

採擇理合附陳伏祈

聖鑒謹

奏

候補郎中代叔捐贖遺罪疏

同治五年正月十三日

奏爲候補郎中呈請代叔捐贖遣罪摘敘緣事案由請

旨飭部核辦恭摺仰祈

聖鑒事竊照前准戶部咨開新疆贖罪章程照道光二十三年御史江鴻升奏定銀數三品以上捐銀六千兩有在外省具呈者令督撫將犯事緣由並贖罪原呈鈔錄咨部核其情節分別開列犯事案由及捐贖銀數按月彙奏恭候欽定仍遵上年欽奉

諭旨核減五成咨行陝西凡有官常各犯捐輸贖罪接濟甘餉者准其援照辦理仍逐案摘敘緣事案由具奏請

旨等因當經飭局遵照辦理去後茲據捐餉局司道詳稱據內

務府候補郎中文燕以伊胞叔已革陝西巡撫瑛棨因被多隆
阿穆騰阿張集馨劾發往新疆充當苦差道路不通在蒲守
候兩年有餘焦憂成疾無異縲紲困苦情形身代未能旁觀不
忍照三品以上減成捐銀三千兩呈請贖罪接濟甘餉等情具
詳請

奏前來臣查瑛棨先因回匪猖獗株守省垣奉

旨革職繼經原任西安將軍多隆阿前署撫臣張集馨等以屢
次飾詞奏畱馬德昭捏報戰功縱令虛報勇數通同朦蔽奏參
奉

旨發往新疆充當苦差並蒙

諭旨交臣覆查馬德昭實係力保危城其功難泯並無虛捏勇
數冒領餉銀入己等事瑛棨之保畱委實因公起見亦無通同
朦蔽情弊欽奉

上諭將馬德昭開復提督原官是前案原委已在

朝廷洞鑒之中今文燕遵照部議減成爲伊叔捐贖遣罪核與
奏定章程相符且瑛棨在陝官聲尙稱廉慎可否准其捐贖相
應摘敘緣事案由請

旨飭部核辦以便飭令捐交銀兩藉濟甘餉除將犯事案由並
贖罪原呈鈔錄分咨戶刑二部外所有候補郎中代叔捐贖遣
罪緣由理合恭摺具

奏伏乞

皇太后

皇上聖鑒訓示飭遵謹

奏

附報籌撥甘軍餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治四年十月分撥解過援甘各營餉銀軍火數目附

奏在案茲據軍需局司道詳開同治四年十一二兩月分共解支過援甘各營餉銀四萬六千九百四十三兩二錢七分八釐

鹽菜銀二百五十一兩三錢三釐俸裝等銀四百八十五兩四分三釐火藥七千五百斤火繩一萬一千丈鉛丸四千斤藍布大夾帳房四架藍布小夾帳房三十九架白布小單帳房七十架戰弓六十張戰箭一千五百枝烘藥三十斤白布單大帳房八十架紙火箭二百枝銅墳筒三十箇均經分別委解給領取有迴文爲據臣覆查無異除仍飭該司道等竭力籌措源源接濟外所有陝省同治四年十一二兩月分解支過撥甘各營餉銀軍火等項數目謹繕清單恭呈

御覽理合附片陳明伏乞

聖鑒謹

奏

特參知縣操守不潔疏

同治五年正月十三日

奏爲特參操守不潔致被紳民控告之知縣請

旨先行革職以便提省審辦恭摺仰祈

聖鑒事竊據藩臬兩司詳稱前聞麟遊縣知縣喬鶴年平日任
用官親門丁民情未能相洽紳民迭控多有牽涉句申等事當
將該縣調省察看茲據該管道府委員查得喬鶴年信任官親
楊國傑門丁李淵原李培霖藉該縣向抽煙土釐捐每畝錢約
四五十文遂按畝加抽煙土至一兩二錢間有差役令收盤費
錢二百文之處馬坊炭窩亦皆抽錢以致歇業此外自理詞訟

每案需費二千三百五十文並藉署內演戲酬神慶賀生辰各紳商送銀一兩至三四兩不等並有送錢文儀物者約八十餘處是其居官操守不謹任聽官親門丁勾串索賄實屬咎無可辭等情具詳請

奏前來臣查該縣地方屢遭髮捻回逆蹂躪民多困苦流離該員喬鶴年並不加意撫字輒於抽收種煙地畝釐捐信任官親每畝增收煙土至一兩二錢之多又復演戲做壽藉索禮銀並審理詞訟任令書差得受規費實屬昏庸不職尤難保無縱容需索情弊亟須澈底嚴究以儆官邪相應請

旨將麟遊縣知縣喬鶴年先行革職以便提同人證來省訊明

德辦所有特參操守不潔致被紳民控告之知縣緣由理合恭摺具

奏伏乞

皇太后

皇上聖鑒訓示飭遵謹

奏

固原回匪竄隴擊退情形疏

同治五年正月十八日

奏爲固原回匪竄擾隴州經官軍立時擊退謹將沿途追剿獲勝情形恭摺馳

奏仰祈

聖鑒事竊照甘省滋事逆回多係陝省回酋勾結麴聚平固窺伺邊防經臣屢飭毘連甘境州縣嚴密偵探妥爲防範並屬涇州畱防各營如遇警報卽行就近夾擊以固疆圉而免蔓延本年正月初一日接據隴州知州湯敏稟稱上年十二月二十四日有馬賊回逆千餘竄至該州之馬鹿鎮故關一帶占據民寨日出搶掠燒殺其上關曹家灣等處均有匪蹤焚掠擾亂假冒官兵希圖回陝等情臣卽派委總兵邱時成督帶省標馬隊並駐防鳳縣之總兵蕭德揚統率湘果三營飛速併趨隴州援應又飭英毅營總兵劉玉興分撥兩營由長武防所確探賊蹤會同協力截剿去後適該匪撲近城關該州率同文武及涇州勸

捐委員督勇開放鎗礮賊向南原斜趨後隊停紮黃家峪沙崗
子一帶另股踵至日聚日多約有三千餘人經統帶涇防兵勇
之記名提督譚玉龍等先接州稟卽派提督劉正高總兵譚玉
明帶領馬步七營馳往會剿匪眾抗拒我軍鎗礮齊施刀矛並
舉鏖戰時許賊勢稍卻前隊先已東竄我軍四面圍擊將後隊
全數殺斃約五六百人奪獲馬匹器械多件救出難民五十餘
人惟時賊之前隊由隴州杜陽鎮及汧陽縣屬草碧鎮遁還甘
肅靈臺縣之上店劉正高等仍卽緊追該逆見我軍馬隊無多
列陣回拒分股圍撲幸我軍勇氣百倍齊聲喊殺殲匪數十人
無如賊眾兵單抵死不退以致兵勇傷亡二十餘人正相持間

總兵譚玉明步隊追及靈臺縣亦督團勇繼至譚玉明隨令捷字後營副將方得元由左衝擊捷字新中營副將闔定邦從右而進自率親兵由後殺人賊營立斬執旂賊目一名逆勢披靡紛紛逃遁我軍隨後追殺斃賊二百餘人奪獲馬騾數十頭追至侯家寺因天晚收隊該逆分竄娘娘廟沈家河劉正高卽商請統帶靖安營總兵劉效忠督帶所部由涇星夜起程迎勦該逆倉皇無措連夜逃赴崇信縣安窰口我軍跟蹤追至沿途復殺賊數十人生擒逆回一名解涇訊供共賊三千餘人係逆日馬永和統帶由固原至靜甯隆德繞出隴州原圖直犯陝疆不料被官兵擊敗等語當卽正法示眾餘匪已竄平涼崆峒山仍

回固原州城汧隴一律肅清涇防馬步亦仍調回扼要駐守以備不虞各等情臣查此股逆回假冒官兵由固原繞至陝邊卽肆焚掠意圖長驅腹地幸賴涇防將士戮力同心力時擊退不致蔓延爲患勦辦尙屬迅速惟該逆自上年冬臘以來麇聚固原眾至數萬其蓄謀竄犯陝西已非一日當茲甘省麥糧垂盡無可攜掠之際勢必勾結大股分竄陝疆圖遂狡逞之謀除仍飭各將弁等會同涇防各軍加意堵禦俾固邊防外所有擊退甘肅竄陝回匪追勦獲勝緣由理合恭摺由驛馳

奏伏祈

皇太后

皇上聖鑒訓示謹

奏

附東防擒匪情形疏

再東防擒匪於上年冬間竄至河南浙川廳之構林關李官橋等處滋擾經臣檄飭記名提督劉厚基統領親兵五營馳往商州之武關分路扼守並飭補用道黃鼎督帶所部彝字三營紮於山陽鎮安交界之竹林關又飭駐防漫川關之定中營同知黃加焜添募一營與各軍聯爲犄角因思逆眾雖稱數萬大半裹脇而來陝東隘口繁多防不勝防計惟越境鵬擊挫其凶焰卽不敢復懷窺伺之心且楚豫兩省旣皆派兵躡勢將逼而

西竄正可迎頭截擊前後夾攻共收一鼓殄滅之效因飭黃鼎
率師由青山進趨荆紫關劉厚基率師由商南西坪以趨內鄉
黃加焜率師由鄖西趨江口上游扼丹水而軍並令約會楚豫
將領克期會剿秦攻其西楚攻其南豫攻其東北以期併力聚
殲劉厚基等既皆剋期分道出境旋據潼商鎮道探報前竄構
林關等處逆匪現已由襄樊東趨棗隨光固賊蹤亦已南竄黃
陂一帶距陝境均已稍遠臣維逆蹤飄忽無定各軍出境遠擊
頗慮糧餉難繼且聞西路回氛日圖竄犯陝境亦未便遠道長
征現擬檄令回駐原防察看東西兩處何路緊急卽往何路策
應以期有備無患所有東防捻匪情形理合附片陳明伏乞

聖鑒謹

奏

附請飭川省慶臺速撥甘餉疏

正封摺間接據甘肅提督曹克忠由鞏昌發來信函稱擒獲生
回供稱逆眾以糧食短絀無可擄掠共議回竄陝疆並稱有吉
字營勇丁從賊中逃出亦言安定各處逆匪均約於正月間由
蓮花城一路竄擾關中請飭嚴備等語並接涇防統將譚玉龍
稟報現據逃回勇丁面稱固原逆回勢已蠢動爲傾巢東犯之
計雷正綰所帶親兵逃來涇州者前後數百人其隨身所存贖
不過百餘人平涼所紮各營勇丁亦紛紛陸續來涇圖避逆回

之亂現在涇州糧食日絀而勇數日增設該逆猝然突至戰守
兩難請速籌接濟以救倒懸等語臣查甘省久未耕種糧食罄
盡不特官兵窮窘卽逆匪亦無可擄掠其蓄謀回竄陝境早在
意計之中現在陝省兵力單薄尙可勉力支持惟餉項奇絀積
欠太久實無以收飽騰之效而欲令兼顧涇州尤非力所能及
伏懇我

皇上飭催署四川督臣崇實督臣駱秉章趕緊督飭司道速將
前項勸辦撥甘捐輸銀兩催收迅卽委解十萬兩來陝以濟急
需並請

嚴飭慶臺楊能格速撥餉銀解赴涇州仍催甯州安化等州縣

將勸就糧石飛速運解涇州并交譚玉龍軍營以救然眉之急
庶於危局有裨謹附片陳

奏伏祈

聖鑒謹

奏

催江蘇等省協甘月餉疏

同治五年正月十八日

奏爲江蘇等省協甘月餉積欠較多待用孔急請

旨嚴催速解以拯饑軍而支危局恭摺仰祈

聖鑒事竊臣據署陝西布政使林壽圖詳稱西北軍務莫急於

陝甘糧餉奇窮尤莫甚於甘省前次楊總督統帶所部入甘曾

奉

諭旨於江蘇浙江湖南湖北等省按月派定協餉數目源源接濟而勇眾餉寡即使如期不誤已覺分潤無幾該署司管理轉運經權出入每逢甘省函檄絡繹頻催憂心如搗現查各省協甘之餉金陵原定月協三萬兩自五月起解至十月止以後遂無消息江蘇江海關則自六月至今僅解到三萬兩浙江月協二萬兩僅解到八萬兩已報未到四萬兩湖南月協一萬兩僅解到三萬兩湖北月協三萬五千兩僅解到二萬兩卽將代甘購買軍火布疋等項核計奏報價值亦不及六萬兩時值歲暮各省均無續報起解信息刻下陝甘總督所部親兵共計二十

四營始以麪水餬口近更連日斷炊饑困至極他如涇州防軍以及都營曹營成營皆須量爲兼顧迭奉飭令速運而來源不繼束手難籌且現擬於漢中鳳翔兩府採買軍糧並飭西安城守協副將林春在陝設局代甘製造軍火帳棚俱望於協餉內隨時勻撥需用繁多實有迫不及待之勢乃統計半年以來各省欠解援甘餉銀竟積至四十餘萬兩之多何以固軍心而支危局秦隴相隔寫遠平固大路梗塞文報繞道往來動輒數月若由局詳甘奏催轉致稽延時日自應由陝代催辦理等情詳請具

奏前來臣查陝西爲甘肅後路凡各營所需糧餉軍火等項雖

處極窘之際從不敢稍存畛域隨時竭力設法籌撥屢次奏明
在案無如倉庫兩空本境旂綠各營以及防堵兵勇積欠過多
歲律更新索糧請餉紛至沓來實屬應接不暇而甘省軍務之
急糧餉之窮又有出於尋常意計之外者兼之製造轉運在在
需費所有各省按月派定協餉即使源源解濟已覺分潤無多
儻再不能如期甘事能無決裂現在各軍飢困窮苦情形不堪
言狀若不急爲挽救轉瞬春深天暖逆回蠢動賊強兵弱實有
不堪設想之處惟有仰懇

天恩飭下江蘇浙江湖南湖北等省務將同治四年欠解甘軍
月餉及來歲按月應解之款兼新帶舊移速補遲加批旺解俾

得趕緊轉運庶期軍食既充眾心自固甘省局勢或可轉危爲安所有請

旨嚴催各省積欠甘餉緣由理合恭摺附驛具

奏伏乞

皇太后

皇上聖鑒訓示飭遵謹

奏

附請撤慶陽糧臺疏

再臣頃奉

諭旨糧臺支發軍餉關係軍心安危甚重如楊能格實有偏袒

誤事之處並著楊岳斌劉蓉隨時參奏等因欽此查楊能格自
辦理慶陽糧臺以來本祇專顧東路一軍比時各營將士轉相
傳說已謂其私於慶防各營於雷正綰前敵之軍支放甚少勻
撥不公臣以爲軍營悠謬之詞未之深信亦未及加詳察逮雷
軍潰變之後涇州收集營數最多雷正綰所存無幾而慶臺所
收各省協餉既不均勻分撥且於甯州安化已經勸就之糧亦
令逕解慶陽不許運赴涇州以致涇防軍士待哺嗷嗷旦夕譁
潰則其挾私心以撓大局旣以昭然可見比據周顯承鈔呈慶
防統將魏添應信函則尤有可怪者函中言慶陽糧臺所發各
營月餉無論哨官什長親兵正勇一概折錢三千六百文長夫

折錢三千文卽營官月支公費銀一百二十兩亦去扣平銀十
一兩僅發銀一百九兩各營所領之餉旣已如此而飭取冊籍
均要按照楚章哨官月領九兩六錢什長四兩八錢親兵四兩
五錢正勇四兩二錢長夫三兩之例彙造呈報且所領麪價每
名日支麥麪斤半每斤扣折錢二十四文又不按月支放等語
據此情形則楊能格支放軍餉不但有挾私偏袒勻撥不公之
端亦難保無藉公營私侵蝕肥己之弊相應請

旨敕下撫臣趙長齡會同督臣楊岳斌秉公確查據實奏參以
昭覈實而杜浮冒抑臣竊有請者自粵逆倡亂以來東南用兵
積十餘年所派統兵大臣類皆責成督撫凡一切選將調兵設

臺籌餉悉聽督撫自揀員弁酌量調劑爲督撫者旣躬任地方之責又深悉各路行軍甘苦緩急之故往往先以體卹州縣愛惜百姓籌備糗糧撫循士卒爲急統將或有治軍失律生事擾民者糧員或有徇私任意濫支浮冒者疆臣皆得以時稽察訪悉情弊撤而去之大者奏聞小則專決至於各路將領用兵之多寡一視賊勢之強弱爲權衡各路軍營需餉之盈絀一視行軍之緩急爲權衡或裒多而益寡或酌盈而劑虛旣可以統籌全局先事預圖耳目近則利弊易明責任專則事權無撓以故握兵者不敢萌擁眾自大之心司餉者不敢存予奪惟己之見軍興以來未聞有以不恤百姓不恤士卒之言上煩

聖聽者卒能掃蕩逆氛銷除巨患則皆委任得人事權歸一之
明效也自回氛西熾遣將入關而後此局爲之一變將兵者不
念民情之疾苦司餉者不知軍情之勞逸任地方者抑無以行
其統轄軍民兼籌兵餉之志門戶別而意見多歧事權分而賢
愚不等兵力未厚或多萃於不戰之區餉項久絀或虛糜於無
益之地當局者不得過問旁觀者莫可誰何民心軍心旣兩不
得其安餉艱兵艱或頻舉以入

告比歲甘省軍務所以未見起色其大端不出於此非事任分
而無所責成之故乎前督臣熙齡以總督辦理通省軍務自不
得不募選親軍設立隨營糧臺爲總攬全局之計迨熙齡去任

而糧臺一仍其舊所收協餉既祇爲隴東一路之圖而所養防軍亦僅爲保護糧臺之計侈虛名而無實效亦安用此以增糜費爲哉現在甘省各路軍帥以次裁損事權亦稍稍歸一或者遂屬事機轉關之會惟兵事餉事未可分圖可否撤去慶陽糧臺由督臣楊岳斌自擇一員經理以免分歧而歸畫一之處伏候

聖裁臣以大局安危所係苟有所見不敢不言冒昧上陳伏祈

聖鑒謹

奏

遵 旨覆陳疏

同治五年正月十八日

奏爲遵

旨覆陳仰祈

聖鑒事竊臣頃奉同治四年十二月二十八日

上諭雷正綰與周顯承同在一路附近軍營積不相能互相訐告勢必激成事端若令雷正綰前往甯夏軍營隨同穆圖善辦理軍務該提督與穆圖善前曾同隸多隆阿麾下共事有年諒可合力同心爲國家出力此係國家曲示保全之苦心著楊岳斌劉蓉斟酌情形速行覆奏如果事屬可行卽著先將朝廷恩諭宣示雷正綰令其酌帶隨身弁勇迅赴甯夏軍營仍著將朝廷委曲保全之意向該提督宣示令其感激圖報並傳諭該提

督不可專事招撫懈於防剿致爲回逆所乘貽誤事機等因欽此伏查周顯承與雷正綰同籍四川疊經保至提督委以總理營務捐辦軍糧重任閱兩三年彼此初無不洽之處逮雷正綰由紅溝率師潰變聲言直犯陝西以涇州安置眷口知州林發深等倉皇列稟告急並密陳城內現有周顯承譚玉龍劉正高等十餘員兵勇數百人皆雷正綰腹心舊部裏應外合危在旦夕請速撥邠長防兵以救合城生命等語旋據涇州委員陳爾第二十四日稟函言涇州情形危急幸周顯承譚玉龍等深明大義相與歃血定盟誓不從逆隨派兵登陴分守四門並招撫雷營馬卒千餘人入城固守當可無虞嗣復陸續招收一兩日

間部曲盡散雷正綰知事不可爲乃於二十六日親至城下痛哭悔悟言事由部曲妄爲今惟拌一死以謝天下但求給麩萬斤卽赴前敵並貽書周顯承附致衣箱什物以家口後事爲託周顯承憐其情詞哀切始爲稟陳事由胡大貴雷恆李高啟等迫脇所致且陳雷正綰有誓死報

國之語不期雷正綰還至平涼復被逆回煽惑變易初心反怨周顯承等招去部曲詆爲忘恩負義之倫周顯承仍每日接濟該營麩六七千斤雷正綰均以散給回部與逆酋孫義和赫明堂穆三楊大娃子等聯爲腹心並派雷恆李高啟分赴靈州金積堡收召陝回麩聚平固自上年冬臘以來眾至四萬餘人其

包藏禍心挾回自重行道之人皆能言之而陝甘大道梗塞至今由平涼以至固原遠近數百里村堡悉焚人煙斷絕蓋久已淪爲異域矣茲奉

恩旨飭令雷正綰前赴甯夏軍營隨同穆圖善辦理軍務誠屬委曲保全之苦心雷正綰如能遵

旨酌帶隨身弁勇迅赴甯夏亦屬釜底抽薪之良法臣謹卽欽遵恭錄

恩諭宣示雷正綰令其勉立功勳仰稱

朝廷推誠使令之意查穆圖善性情寬厚與雷正綰共事多年必能推念舊情曲加撫卹惟臣竊有慮者雷正綰旣與靈州金

積堡等處回酋潛相勾結難保不首鼠兩端穆圖善自收復甯夏以來意頗似偏重於撫比聞靈州逆回亦有投誠之信若不察其情之誠僞一惟雷正綰之言是聽實慮中藏叵測貽誤事機伏祈我

皇上密敕穆圖善詳慎體察勿稍偏徇庶操縱尙有權衡機謀不致宣洩思患預防斯爲妥善萬一雷正綰始終執迷不肯自

離巢窟遵

旨前行則是自外

生成大負

朝廷曲賜保全之德爾時逆迹昭彰

天威震怒竊計我

皇上亦將有以處之矣所有遵

旨斟酌情形覆奏緣由理合附驛密陳伏祈

皇太后

皇上聖鑒訓示飭遵謹

奏

附請撥兵疏通平固糧道疏

再臣頃奉

諭旨楊岳斌俟布置稍定後擬卽出省先赴北路自應首往靈州一帶將此路肅清則甯夏固原兩處之氣可通南北援應均

可靈便仍著該督察度情形何路喫緊卽先馳往何路援剿至
陝省各營兵勇與其防守本境何如進剿甘回肅清鄰疆卽以
自固藩籬著劉蓉卽飭廊定一帶防兵進駐慶陽並飭涇平各
營歸譚玉龍統帶由固原進剿靈州俾回匪各路均有牽制不
得肆出蔓延阻止官兵進攻之路等因欽此臣查甯夏未復之
先賊恃靈州相爲掎角誠得一軍逕搗靈州則甯夏喪其所恃
攻剿易於見功而南北聲勢相聯誠亦靈便之法今甯夏幸已
收復靈州亦有乞撫之說雖難必其情之可信而方當觀望律
徊之際尚可藉作緩圖惟固原被賊占據日久嘯聚愈多陝甘
咽喉早已梗塞比聞蘭州省城糧食奇窘麥石至七十餘金尙

苦無從購買紳民持金入市欲爲升斗之謀而不可得或相與
扶攜老幼投河自溺軍營弁卒日求麪水一餐而亦不可得則
相率逃散四方不復歸伍似此情狀省城實有坐困之虞臣曰
思運糧接濟而平固大道旣梗勢必由隴州小道繞越然計騾
馬馱運每石已須運價十六七兩仍有突被逆匪截奪之時其
由漢中採辦運赴秦州者又僅可供曹克忠一軍之食不能轉
解蘭州若不速將平固大道疏通則蘭垣官民兵勇勢將束手
待斃且平固所聚逆黨數萬人均係陝回無日不思還竄去臘
探卒回報卽有祇候春融雪消卽相率擁眾東犯之語昨已分
股竄擾隴州尤其明證現在雷正綰旣奉

恩旨前赴甯夏伏懇我

皇上敕下督臣楊岳斌酌帶親兵數營督飭曹克忠鞏昌之軍
進搗固原臣亦卽飭派劉玉興會合涇防譚玉龍之師由平涼
進剿以收前後夾擊之效幸而平固肅清運道無梗卽可由鳳
翔一路採辦糧食用車輛運赴蘭州旣以省節運費贍給飢軍
而陝回旣殲臣卽派撥各路防兵進紮甘境亦可藉無後顧之
慮陝甘境壤毘連誼切脣齒斷不可稍存畛域之私以後籌軍
籌糧籌運總須合兩省之力以圖之庶期事或有濟臣與署藩
司林壽圖等總當竭力協心顧全大局不敢以煩
宸慮惟各省協濟甘餉一節不得不仰恃

聖慈頻加催速使輸灌稍有餘潤庶展布可以自如至於慶陽防務總俟平固肅清經楊岳斌派員替換魏添應帶領防軍進剿之際臣亦卽遵

旨派兵前往換防秦隴事同一家無所用其推諉所有請旨撥兵疏通平固糧道以便轉運緣由理合附片陳

奏伏祈

聖鑒飭遵謹

奏

保奏剿辦潰勇出力員弁疏

同治五年二月十二日

奏爲查明官軍迭次剿辦甘省潰勇出力文武員弁遵

旨擇尤彙案保獎恭摺仰祈

聖鑒事竊照同治四年四五月間甘肅陶營潰勇六千人逃竄入陝沿途搶掠滋擾由寶雞狂趨盩厔經臣派撥署中軍彭體道等率師截擊旋會同督臣督率勦辦生擒首逆高文義伏法殲斃四百餘名招收馬步四千餘人並其餘黨遣散回籍七月雷營部卒二千餘人因索餉滋鬧糾眾東竄由汧隴擾及鳳郿焚搶淫掠經臣派飭總兵邱時成率領馬隊兩起並飭彭體道統率撫標三營會同駐防鳳縣之總兵蕭德揚等在於寶雞隘口堵截旋據彭體道等督隊痛加勦洗先後殲斃悍黨數百名生擒倡首潰竄之王得順羅應選段炳春閻大德等解省正

法並招撫八九百名勒令仍回甘省軍營効力自贖欽奉

諭旨勦辦尙屬認真所有出力員弁准其擇尤保獎等因欽此
八月陶營叛卒三千餘人復分兩起竄至鳳漢各境拒殺官兵
勢尤猖獗經臣飛咨漢中鎮總兵蕭慶高督飭總兵蕭德揚會
同提督毛福益蕭德見率湘果中左後各軍在於鳳洋兩縣地
方連次殲斃悍卒八九百名生縛首逆王正明趙達廷曾益三
吳有亮徐益元賴裕和潘濟盛周慶雲等訊明正法收撫二千
三百餘名分別資遣派員押解回籍亦經奏奉

上諭此次勦辦叛卒之出力員弁准其彙入彭體道等前案內
擇尤保奏等因欽此欽遵各在案伏查各起潰勇叛卒先後突

竄入陝所至焚掠滋擾向非在事文武員弁冒險爭先勦辦迅速則殘破地方又將復遭蹂躪之慘值此疆圉多故未便沒其微勞茲據各營將領查明核實具報前來除千把以下出力稍次各弁由臣咨部酌獎外謹將尤爲出力文武員弁繕列清單

恭呈

御覽合無仰懇

天恩俯准獎勵以昭激勸所有遵

旨查明擇尤彙獎緣由理合恭摺具

奏伏乞

皇太后

皇上聖鑒訓示飭遵謹

奏

附請飭侍衛壽昌回京疏

再臣接據侍衛壽昌函稱向在西安將軍都興阿軍營帶領馬隊防堵定邊陝甘總督奏調赴蘭訓練馬隊之副都統金順患病經都興阿將伊改派前往隨將定邊馬隊交營總貴陞接辦伊卽酌帶官弁兵丁十二員名於四年十二月初由定邊起程五年正月行抵西安詎值平固道路不通難以前進萬分焦灼等情臣查督臣楊岳斌奏調金順赴蘭訓練馬隊係因所調察哈爾馬匹無員訓練之故現查此起赴甘馬匹過陝除沿途

倒斃及疲瘦不堪戰陣外臆壯之馬共存七百二十餘匹業經督臣楊岳斌咨撥五百匹歸總兵劉效忠管帶操練其餘馬二百餘匹亦經咨商臣遴委副將洪殿元就陝募勇練習成軍現准督臣咨會調赴靜甯歸河州鎮總兵李助發調遣此外並無添募馬隊應須調員訓練之處是侍衛壽昌卽赴蘭州已無馬隊可帶而該侍衛前帶定邊馬隊又已移交營總貴陞接管臣因函商楊岳斌咨遣該侍衛帶同官弁十二員名一併回旂並飭署藩司林壽圖補給該員弁兩月鹽糧以便起程查該侍衛年力富强到京之後或照常當差抑或仍令前赴軍營差遣之處伏候

聖裁理合附片陳明仰祈

聖鑒飭遵謹

奏

附續發西安滿營銀票疏

再西安八旗官兵馬匹應支餉乾等項銀兩自同治元年七月以後軍務緊急需用浩繁司庫支絀未能全數給發接准西安滿營協領巴哈泰等咨由藩庫刷造庫平票銀十萬兩發交使用均已咨明西安將軍飭旗查照並經具摺

奏明在案茲據署藩司林壽圖詳稱現又接准滿營協領以各兵困苦異常仍請做照前案再發銀票自行覓售在於兵丁欠

發餉乾項下抵扣惟奉准部咨曾據署西安將軍德興阿具奏
銀票一項係該撫藩疏通捐途之舉非滿營先行咨取每票銀
一兩變通銀一錢有零而捐生照實銀上兌似益於捐生者大
濟於旂營者小等因在案伏思前項銀票本係協領援案請發
歷有案卷可考未識所稱疏通捐途是何意見且滿營兵餉業
已遵奉

諭旨月發四成實銀並將馬隊千名按照八五章程發給此外
尙有道倉不敷糧石折價銀兩暨本色米豆是旂兵每月所得
之項不但比較綠營各兵優厚卽核之征防各軍亦屬寬裕今
又據協領備文支發銀票並面述係奉將軍諭飭而來如果銀

票所值無幾該協領等豈肯疊次請發抵作餉銀該署司職司
度支當此現銀萬絀之時不得不照依來咨仍前刷發隨於同
治四年閏五月及十二月兩次續發庫平票銀一十二萬兩連
前共發過庫平票銀二十二萬兩仍俟支發欠餉時照數扣抵
等情具詳請奏前來臣查陝省軍興以來庫款撥羅殆盡當日
創設銀票實出於無可如何之勢若非該營自請何敢勉抑從
事今該協領等又請由司給發銀票十二萬兩諒因時會艱難
得此售價尙可稍濟困乏自應權宜變通以示體恤除咨部查
照立案外所有續發西安滿營官兵銀票數目扣餉作抵緣由
理合附片陳明伏乞

聖鑒謹

奏

附西路辦事大臣借支養廉疏

再據署藩司林壽圖詳稱現准喀喇沙爾辦事大臣札拉芬來
咨借支該大臣任內自同治五年二月起至七月底止六箇月
養廉銀四百兩本身鹽菜銀七十二兩跟役鹽菜銀三十六兩
除養廉扣成減平搭錢外共銀四百一十兩四錢又錢三十六
串文等因隨查卷檔同治二年上有烏什幫辦大臣伊昌阿於
署西安副都統任內奉准西安將軍會咨由司借支烏什幫辦
大臣養廉鹽菜米折等銀五百六十餘兩上年十二月間和闐

辦事大臣奎章暫署西安右翼副都統援照伊昌阿之案借支和闐辦事大臣分例養廉鹽菜等銀四百四十餘兩聲明在於陝西解甘餉內扣還歸款在案其餘辦事大臣路過陝省向無借支廉費之事亦無例案可稽目下陝庫萬分短絀應需援甘各營軍火餉項並本省邊防兵勇糧餉以及旂營兵餉製造採買等項均係刻不可緩之款正虞籌措維艱勢難再顧口外大臣養廉且由陝赴甘道路節節梗塞凡遇出關大臣既無可行之路又乏可繞之途現在暫駐西安省城非止該大臣一人若俱紛紛請借尤難支持惟該大臣札拉芬因已故參贊大臣聯捷各軍遣撤折回西安情形困苦實有山窮水盡之勢應否借

給養廉鹽菜庫款攸關未便擅專具詳請

奏前來臣查該大臣離京日久實緣道路梗塞暫難到任旅費

艱窘迥異尋常相應奏懇

天恩飭部覈議可否准由陝省藩庫不拘何款暫行通融借給在於解甘餉內扣還歸款抑或須俟抵喀喇沙爾本任始准支領之處迅速議覆請

旨以便遵循理合附片陳明伏乞

聖鑒謹

奏

附報籌撥甘軍餉銀軍火數目疏

再臣迭奉

諭旨籌撥甘肅軍需雖值窘乏萬分不敢稍存膜視業將同治四年十一二兩月分撥解過援甘各營餉銀軍火數目附奏在案茲據軍需局司道詳開同治五年正月分實因司庫一空如洗並未解支過援甘各營軍餉銀兩所有支過各營軍餉火藥三萬一千斤火繩二萬丈鉛丸三千斤火箭二百枝擡鎗七十五桿鳥鎗一百五十桿配搭大小藥壺盧俱全均經分別委解給領取有迴文爲據臣覆查無異除仍飭該司道等竭力籌措源源接濟外所有陝省同治五年正月分解支過援甘各營軍火等項數目謹繕清單恭呈

御覽理合附片陳明伏乞

聖鑒謹

奏

會奏改設慶陽糧臺就要辦理疏

同治五年二月十七日

奏爲慶陽僻處偏隅請移設糧臺通後路以籌全局遵

旨會奏仰祈

聖鑒事竊慶陽糧臺前已奉

命以署陝西布政使林壽圖辦理飭楊能格回甘肅按察使本
任旋准軍機大臣字寄奉

上諭劉蓉奏請撤去慶陽糧臺由督臣派員經理著楊岳斌會

同劉蓉酌度情形具奏等因欽此查臣岳斌統師入甘奏委林壽圖專司轉運迨該藩司被參降調復請調赴慶陽其時已蒙恩准暫署陝西藩篆兼辦甘軍轉運臣岳斌遠阻蘭州尙未及知比抵涇州營次接奉寄

諭與臣蓉往返函商竊維甘省地勢荒遐物力窮耗自昔調發取給中原溯乾隆嘉慶道光年間用師戎索之地芻茭糗糧甲帳丁夫細及牛羊駝馬皆聚數省之精力議擇四達之衝途建立精臺控制形勢而籌餉籌糧籌運用轉輸於四路不躡躑於一隅查慶陽塞嶺高昂民物窮瘡環縣以北並無水草入煙地勢幽阻隔閼故宜於設防而不宜於輦運前督臣熙齡初抵甘

時平固不守崇靈阻兵進不能達於蘭退不能屯於陝又其時
援甘之師雷正綰甫抵隴邊陶茂林尙次鳳郡故就慶陽奏設
糧臺多置委員以供調遣另募親兵以資防護蓋出於一時權
宜之計然軍糧所需尙向所屬徵輸今時將三載一州四縣之
民脂髓殆竭救死不暇實難責以餉軍慶陽一臺僅祇收發月
餉爲隴東一路之圖而防兵增至十二營委員多至八十餘員
徒滋糜費無裨大局此臣蓉所以有請撤糧臺之奏也臣岳斌
所部兵餉向賴東南各省解至湖北交署藩司唐際盛派員由
荆紫關轉解陝省交林壽圖轉運前進嗣因蘭州軍械不足工
料奇貴在陝設局製造或遇協餉未到權緩急以通有無挹彼

注茲未分畛域臣蓉籌畫軍糧代甘採買除漢中鳳翔二局外
尚擬在省招徠米販廣求儲侍并委林壽圖董司其事是雖未
有糧臺之名已寓糧臺之意伏查陝省幅隕襟帶東隴綰轂西
羌不獨延榆爲靈甯腰背邠鄜鳳漢實通鞏平慶三府之咽喉
近值境內肅清商賈漸集百貨所需較爲完備今若撤去慶陽
糧臺於涇州秦州慶陽等處設立分局派員轉遞而以西安爲
後路總匯則道里居中形勢利便並將製造採買轉運等局歸
併糧臺提綱領而分條目酌量緩急足免顧此失彼之虞相應
請

旨改爲甘肅後路糧臺責成林壽圖卽在西安辦理暫署陝西

布政使以期通籌全局呼應靈便臣蓉極知事體繁難責任綦重然值甘省賊勢縱橫軍情危急之際豈宜強分畛域自便私圖臣等惟有合關隴爲一家搏心壹志冀得憑藉

天威肅清邊圉如蒙

聖恩俞允伏懇

敕下山西河南山東四川各省卽將從前指撥慶陽糧臺協餉按月委解陝西藩庫臣岳斌亦卽將慶臺冗員裁汰酌留防兵五六營另派妥員接統將其餘各營歸併臣部調赴前敵一面飛飭楊能格迅速檢齊案卷派員移交並截清日期凡該臬司經手款目均令自行報銷免致前後轉轄所有臣等遵

旨酌度情形理合會銜由六百里馳遞伏祈

皇太后

皇上聖鑒飭遵謹

奏

請獎派赴川省勸捐官紳疏

同治五年三月十三日

奏爲派赴川省勸辦援甘軍餉出力官紳懇

恩獎勵以資觀感恭摺仰祈

聖鑒事竊照援甘軍餉萬分難籌前經臣奏派革職留營藩司

毛震壽馳赴四川設局勸辦旋據該革司札委官紳在省設局

並往外屬分局勸辦業經捐有成數旋奉川省通飭停止之札

該委員等因將已經填發部照各捐生設法催收亦得七萬餘兩陸續派員解陝接濟甘軍茲該革司以所收捐項雖尙未及十萬之數而各委員於奉文停止之後委曲求全竭盡心力具見能事現在移局陝甘公所接續舉辦應請先行獎勵風示將來等情開列官紳銜名六員具稟請

奏前來臣查甘省糧匱餉絀奇窘萬狀各省協濟之款既不能以時如數湊撥實賴捐輸一項以周其急而濟其艱然非得本省官紳竭力勸助亦無以啟其踴躍報效之忱今幸該委員等委曲籌捐收有成數亦屬著有微勞我皇上俯念西陲軍餉奇絀疊次

諭飭四川督臣設法籌辦近聞該督臣崇實駱秉章仰體

宸衷亦已飭屬照舊舉辦如蒙

懇 聖慈先將此次出力官紳量予鼓勵實足以策效將來合無仰

天恩俯准將尤爲出力之四川嘉定府知府朱慶鏞

賞加道銜卸署四川巴縣事打箭鑪同知王臣福

賞加知府銜陝西試用知縣孫汝錡

賞加同知銜提舉銜不論雙單月選用通判張繼書不論雙單
月選用通判廖敦誠均請以本班歸部不論班次遇缺卽選揀
選知縣傅燮請以知縣儘先卽選以示觀感而策後效至己革

陝西藩司毛震壽畱營數載奏派赴川總辦援甘捐輸雖未能收及原籌三十萬之數而昕夕籌畫往返奔馳從事兩年實屬辛勤備至可否併懇

恩施准予開復道員抑或

賞還二品頂戴之處出自逾格

鴻慈所有懇

恩獎勵川局勸捐官紳以資觀感緣由理合恭摺具奏伏乞

皇太后

皇上聖鑒訓示飭遵謹

奏

附報籌解甘軍餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治五年正月分撥解過援甘各營軍火數目附

奏在案茲據軍需局司道詳開同治五年二月分共解支過援甘各營餉銀一萬三千一百六十四兩二錢九分八釐竹桿三千莖火藥四萬三千斤火繩二萬丈鉛丸二萬斤劈山礮子一千斤戰箭四千枝白布大單帳房三百架藍布大夾帳房十架大紙火箭二百枝擡鎗八十桿烏鎗一百五十桿均經分別委解交納取有迴文爲據臣覆查無異除仍飭該司道等竭力籌

措源源接濟外所有陝省同治五年二月分解支過撥甘各營
餉銀軍火等項數目謹繕清單恭呈
御覽理合附片陳明伏乞

聖鑒謹

奏

密陳甘肅省城兵變情形疏

同治五年三月二十五日

奏爲甘肅省城兵變情形傳聞異詞謹籌酌事勢緩急請

旨權宜辦理恭摺密封附奏仰祈

聖鑒事竊臣頃於三月十三四日聞甘省有差弁齊送藩司林
之望摺件過陝據述三月初三日蘭州省城因兵勇爭糧互鬪

殺斃文武員弁甚多事勢危急等語臣隨函致慶陽督臣楊岳
斌詢問虛實並遣弁分途查探信息十八九等日接准督臣函
稱此次省城兵變之事並未接有司道稟牘惟據提臣曹克忠
來函言省標弁兵於初三日起事殺斃督署幕友軍需局委員
及將弁親兵均被屠害聞有逃出者於初四五日搜殺淨盡糧
臺銀錢武庫軍械及督署所存鎗礮鉛藥等項擄掠一空城內
鋪店被搶者亦復不少現將開花礮位安放四門城關緊閉回
弁馬福陳應春等俱已到任並具摺稟勒令藩司林之望等繕
寫具奏查其起釁原由多係從前省標營員及向在秦州帶勇
之副將張玉春等從中播弄等語查據提督羅進賢及由省城

逃出紳士王夢熊等稟述情形大略相同蘭省標兵回部居其
大半回弁馬福陳應春等向與外回勾通前署督標中軍副將
趙秉鑑陰爲主持藉乏糧激怒軍心同時起事既變之後羣弁
謹呼某人宜作某官某員應署某缺逼勒藩司林之望給札到
任並勒令飾詞具奏司道各官皆被禁脇等語核其情形殆與
曩歲滇省局勢相類現聞北山回逆已駐近省黃河北岸之廟
灘子河狄回逆已駐近城之尖山子一帶督臣楊岳斌憤省城
逆黨內訌變生肘腋急思率師回省勦辦屬臣設法運糧接濟
臣維固原回氛方熾現復勾結河狄悍黨相與合併並聞靈州
金積堡各路陝回亦均移紮韋州等處聲勢相聯若該督臣率

師逕趨蘭州各路逆回或併起以躡其後斯時前逼堅城後迫
強寇運道中梗實無制勝之策因再三函商督臣欲爲救護省
城之謀總以疏通糧運爲急宜先將平固掃盪糧路暢通然後
鼓行而西則聲威旣壯逆志自懾彼叛兵且將不戰而逸卽不
然而城中空無糧儲勢不可以久支斯時或以計誘或以力攻
收復之功易於反掌誠不宜以孤軍憤進致犯兵家之忌且該
兵弁被人誘脇急之則合緩之則離卽有外援要不能運糧相
濟故其勢易衰而難久也惟自初三迄今時逾兩旬卒未接司
道各官稟報正在疑慮籌畫之際忽聞林之望又有摺件由驛
轉遞到陝臣因欲悉蘭州情狀爲隨機應變之計急令取而閱

之則尙係三月初六所發據其所陳各情與前次摺弁口述大致略同而證諸各處稟報傳聞之說頗相歧異臣愚竊謂應變之法當協權宜此時省中官弁既不願楚軍進城若使楊岳斌率師前往或更激成他變句引外回則省城反爲可慮不如因勢利導暫爲目前羈縻之計臣現飛函馳商督臣卽派曹克忠酌帶七八營逕趨省城如能彼此相安卽可入城協守其不然亦可暫紮城外扼河而軍斷其內外句結之謀伏祈我皇上傳諭藩司林之望約束弁兵堅守省城以待援師之至毋使省外逆回乘機關入致失根本之地一面敕下督臣楊岳斌督師掃盪平固各處逆回肅清東路務期轉

運糧餉接濟省城以安兵眾之心並

飭提臣曹克忠自帶數營赴省駐紮與林之望協力防守仍

密諭楊岳斌暫將省城弁兵變亂情形從緩查辦則無論彼中

情形之虛實尙協此時辦理之機宜臣愚昧之見未度可否謹

具密封附同林之望原摺由驛馳遞伏祈

皇太后

皇上聖鑒訓示飭遵謹

奏

附請隨時拆閱甘省章奏疏

再甘省去京城道路僻遠經此次擾攘之後事機變幻亦必多

端在省司道各官既被禁制不能與外間通信其中實在情形已非外間所能周知尤慮非

朝廷所能遙度臣擬嗣後隨時酌察如蘭城內外仍前阻隔司道不能自行其志以後遇有章奏過陝請仍得就近拆閱隨將外間所聞情形敘述附陳以備

聖明裁酌雖自知資性顛愚智略淺短不能仰贊

高深然值甘事多變陝省同與安危不敢不藉竭愚慮謹先附片陳明是否有當伏祈

聖鑒訓示謹

奏

劉中丞奏議卷十五終

劉中丞奏議卷十五終

劉中丞奏議卷十六目錄

防軍勦賊獲勝移營進紮疏

附定邊防軍截擊逆回疏

甘省逆回挈眷東竄情形疏

劾營員馱法營私疏

酌定營田考課章程疏

附調唐炯來陝襄辦營田疏

查覆已革提督棍責捐生情形疏

附請改派大員祭告西嶽疏

附報籌解甘軍餉銀軍火數目疏

甘回還竄請飭督臣先清東路疏

附陳逆回礙難安插陝境疏

附帶印出省赴涇疏

逆回巨股竄陝現籌勦辦情形疏

附官軍進勦進戰獲勝疏

附陳拆閱甘藩章奏臚陳情形疏

陝省藥局被焚請飭鄰省撥解疏

劉中丞奏議卷十六

湘鄉劉 蓉著

防軍剿賊獲勝移營進紮疏

同治五年三月二十九日

奏爲防軍疊次剿賊獲勝現飭移營進紮聯絡聲勢以厚兵力而備防剿恭摺奏祈

聖鑒事竊照陝省靖邊保安等縣均與甘肅慶陽所屬壤地相連經臣札飭鎮西軍扼隘守禦本年二三兩月疊據統帶鎮西軍知府銜卽選同知鄆太愚稟稱二月初十日甘肅韋州蒙城踞回竄至鐵角城地方肆出擄糧焚殺當派左右兩營並鐵騎營馬隊中營親兵哨令該縣武舉解聖語等挑選熟悉路徑精

壯團丁百名爲鄉導由小路捲旂前往十二夜三更行抵賊營我軍乘其不備四路撲入殺賊甚多餘逆紛紛敗奔當將鐵角城收復乘勝追至石家崖審陳家臺首尾夾攻該逆前後受敵勢不能支我軍勇氣十倍直前圍殺殲除殆盡約共斃賊數百名生擒數十名奪獲牲畜旂械多件時已黃昏人馬飢困因收隊就地屯紮探得田百戶亮馬臺等處踞逆尙多總兵洪輝堂副將孫立士參將鄭春元督率三營於十三日天明進攻亮馬臺而回酋蘇文世楊春海業已列陣相待並分股埋伏於田百戶以鈔我軍之後洪輝堂等察知其情卽令鄭春元率左營與團丁由左翻山截擊伏逆而自與孫立士各督所部及親兵哨

分中右兩路前進該逆馬步千餘蜂擁撲來我軍開放連環鎗礮擊斃悍賊多名大呼搏戰而前孫立士由右包鈔該逆立即奔潰適鄭春元已將伏賊殺敗會合追殺十餘里始行收隊是役約殺賊數百名陣斬紅袍逆酋數名奪獲騾馬旂械極多我軍陣亡三人受傷十餘人惟時探聞正西尹家岔西嶺背等處尙踞大股因少休息將生擒各逆解交鄆太愚研訊據供固原賊營乏食傳令禹王城下馬關蒙城各處辦糧交納該三處逆酋馬萬春白文義馬家喇喇商議分赴定靖吳旂一帶掠搶糧米行至鐵角城亮馬臺打仗被擒等語鄆太愚當卽就地正法隨添派中營七成隊馳往會剿是月十九日各營向西南橫進

六十里之杜家大岔卽有馬步回逆千餘前來抗拒我軍中營鐵騎堵住莊口施放鎗礮左右兩營分擊山頭該逆抵死不退鏖戰一時之久適我右山之兵繞出其後該逆始行收隊維時天晚未便窮追該營官等連夜商議直搗賊窟當派左營爲頭隊以鐵騎營爲接應由川路進中右兩營分爲左右翼由兩邊山路進二十日黎明行抵西嶺篝火器齊發一擁而入該逆驚惶莫措由桃家岔敗竄我軍跟蹤追殺十餘里猝遇逆賊大隊縱馬衝突左營勢不能支回退數里鐵騎營趨前接應適中右兩營業已趕到由兩邊山上殺下約計三時之久該逆始行奔潰我軍呼聲震天人人奮勇追殺二十餘里盡數追出甘境並

將槐家岔茱草畔等村莊小巢十餘處一律搜殺掃盪肅清是
戰約計斃賊近千生擒二十餘名訊明正法我軍陣亡四人受
傷十六人奪獲騾馬牲畜旂械無算救出難民數百名等情具
稟前來臣查鎮西軍此次連日血戰以少擊眾疊獲勝捷勦辦
尙屬迅速惟該逆糧食缺乏時圖竄陝難保不再懷窺伺現在
各路股數及韋環交界之木瓜城一帶盤踞甚多並有各路潰
勇在內均距陝邊不遠該軍堵禦西北勢難兼顧南路臣現飭
雄毅軍總兵楊得勝督率所部聯絡該軍會同勦辦並查金積
靈州一帶陝回俱已竄踞平固各路所存土著甘回近有赴甯
夏投誠之信是定邊縣境情形較鬆因檄駐該縣之義字營總

兵段登雲一軍移紮鐵角城白家屯等處嚴密堵剿以厚兵力而固疆圉除將此次鎮西軍出力員弁存俟彙案請獎外所有防軍疊次剿賊獲勝現籌聯絡會剿緣由理合恭摺由驛具

奏伏乞

皇太后

皇上聖鑒訓示飭遵謹

奏

附定邊防軍截擊逆回疏

再頃據統帶義字營總兵段登雲稟報二月二十四日探得定邊縣屬馬家畔有回逆一股搶糧滋擾當卽選派馬步奮勇隊

五成會同總兵趙有勝營總貴陞各馬隊馳往撲剿行抵該軍不遠卽派參將殷華廷帶奮勇二百伏於溝西參將李楚芳帶奮勇二百伏於溝東該總兵自率奮勇三百前往誘敵該逆卽率領馬步悍賊前來接仗我軍且戰且退該逆不知是計蜂擁來追兩路伏兵突出同聲吶喊鎗礮齊施該總兵回旂奮進趙有勝貴陞馬隊亦到四面圍殺斃賊一百數十名生擒十餘名奪獲旂幟十二手擡槍十三桿小鎗二十五桿刀矛八十餘件驢畜三百餘頭當卽乘勝追擊該逆四散奔竄因其地多深溝峻嶺日晡收隊而返查點我軍陣亡五品軍功陳元龍民人李崇玉兩名受傷勇丁十三人訊據生擒賊供該逆等共踞韋州

城內眾約二千餘名因糧食不給派出各處擄掠前隊已先折
回韋州當卽正法等情具稟前來除飭該軍移紮鐵角城會同
鎮西軍實力防剿外所有定邊防軍截擊搶糧回逆緣由合併
附片陳明伏乞

聖鑒謹

奏

甘省逆回挈眷東竄情形疏

同治五年三月二十九日

奏爲甘省逆回挈眷東竄現派鳳寶各路防軍並撥省標馬隊
馳赴鳳隴會同涇軍截剿以遏逆氛恭摺奏祈

聖鑒事竊

臣

於本年三月二十四日接准陝甘督臣楊岳斌八

百里咨稱據駐紮靜甯之河洲鎮總兵李助發稟報西路大股賊匪逼近州城三十餘里之文家坪當於十八日出隊進剿該匪旋向山峽之內奔竄約計馬隊數千分列前後輜重眷屬居中行走揆察賊勢將由蓮花城故關隴州一帶入陝現飭涇防提督潭玉龍派隊剿捕屬卽撥營兜剿以收聚殲之效旋接譚玉龍牘稱探係靜甯回逆馬隊約三四千由隆德沙棠堡南駛向蓮花城張家川等處竄越其會甯股匪繞南東竄勢亦必由蓮花城故關直趨隴州現派劉正高譚玉焜帶馬步四營繞前截剿各等情臣查甘回叛亂半由陝回勾結刻值糧食乏缺蓄謀東竄早在意計之中茲既挈眷窺陝繞道故關勢將勾合巨

股以圖狂逞查鳳邠汧隴各路隘口紛歧處處虞其竄越臣於
接准督臣來咨之日卽經飛檄駐紮鳳翔之湘果左翼軍總兵
蕭德揚駐紮鳳縣防軍總兵蕭德見駐紮長武之英毅軍總兵
劉玉興各率所部就近堵截現復添派省標總兵邱時成副將
洪殿元馬隊兩起馳赴鳳隴會同各路防軍及涇州會剿之師
分途迎頭截擊期將此股逆匪悉數殲除以靖邊患而紓

宸廑所有逆回竄陝分派兵勇馳往會同防剿緣由理合恭摺
由驛具

奏伏乞

皇太后

皇上聖鑒訓示謹

奏

劾營員散法營私疏

同治五年三月二十九日

奏爲特參缺額扣餉散法營私之總兵請

旨先行革職查辦追繳侵款以懲貪婪而肅營規恭摺奏祈

聖鑒事竊

臣

接據統領英毅全軍記名提督劉玉興轉據管帶

前營候選從九品劉鴻烈稟稱竊英毅前營向係記名總兵蕭
祥勝管帶上年九月告假交卸後委該員接管查點勇數額缺
虛伍甚多一切軍裝器械短缺不少蕭祥勝於交卸之後仍畱
未歸每將省局所發該營月餉任意截扣每月去銀千兩共計

收去銀三千五百三十二兩零開單呈報並稱參將蕭玉田代
追尾銀通同舞弊以致該員接管之後月餉所存無多卽欲添
募勇丁製備軍械苦於無銀可給無從整頓等情具稟前來臣
查英毅一軍欠餉特久營務頗形廢弛迭經臣改派統領營官
冀資整頓卒無起色方不解其何故茲據稟稱所領月餉銀兩
多被前任統領營官私行截扣且將前日缺額虛伍之數冒作
出息軍營積弊至於此極無怪接手之員無從整頓總兵蕭祥
勝當前日管帶之時既已虛伍缺額虧短軍裝猶敢冒領月餉
至收去銀三千五百餘兩之多實屬玩法營私未便姑容相應
據實奏參請

旨將記名總兵蕭祥勝卽行革職由臣咨明湖南撫臣派員前赴湘鄉縣本籍押解來陝追繳侵款訊明究辦至參將蕭玉田代追尾銀通同舞弊各情現經檄飭軍需局酌派道府大員認真查辦澈底根究以期痛革夙弊容俟查明蕭玉田有無分肥情事再行嚴參以示懲儆外所有特參總兵缺額扣餉玩法營私緣由理合恭摺具

奏伏乞

皇太后

皇上聖鑒訓示飭遵謹

奏

酌定營田考課章程疏

同治五年三月二十九日

奏爲陝省各屬墾荒事宜謹遵

旨准部議酌定考課舉劾章程以昭勸懲而期實效恭摺仰祈
聖鑒事竊照陝西各路墾荒事宜前經臣酌議辦理章程條款
具奏奉

旨飭部會議茲於本年二月初六日接准戶部咨會同大學士
逐條議准惟區畫得法尤須經理得人始能歷時久遠收無疆
之美利非得循良牧令果力精心與爲終始誠恐貪者適便其
中飽庸者適遂其因循請

敕臣督飭司道遴選府廳州縣各官專辦墾荒事宜嚴定考成

秉公舉劾力求實效等因奉

旨依議欽此當卽檄行營田總局司道轉飭各屬欽遵妥辦並將緩行升科之處刊刻謄黃曉諭各在案伏思陝省當兵燹之後沃土久荒民力重困州縣爲親民之官苟有慈祥愷悌之心應以招徠開墾爲急乃自上年設局刊發章程以來將近一年之久屢經札催飭辦不啻三令五申而各州縣非故意含混冀便私圖卽假手吏胥視同文具誠如部議非嚴定考成認真舉劾則庸懦者相率偷安賢能者無由自奮惟操之過急旣恐稍知愧奮者欲改勉而無從覈之未精又恐工於飾非者得藉詞以自遁臣與總局藩司林壽圖鹽法道黃輔辰體察情形公同

商酌謹擬四條縷呈

聖覽一查同治四年閏五月設局辦理西同鳳延邠乾鄜七府州叛絕各產廣爲招墾當經通飭頒發格式限日將各鄉已種未種田畝填註齋呈並令將未奉章程以前承種地畝趕緊清丈造冊註明認種年月先行報局酌示又定每月初十以前將上月招墾田地若干申報總局且慮認墾之戶先後不齊令其請領執照隨時填給仍將照根繳局以便隨時稽查立法不爲不備州縣果能實力奉行無所瞻顧自能漸臻妥速乃自設局以來填註格式者寥寥多係叛絕兩產俱無之地其將未奉新章前承種地畝造報者不過數處而按月呈報者則惟長安一

縣陸續呈繳照根者惟渭南一縣推原其故非視爲具文卽意存含混故有屢催不報者有至卸任時忽報種數千畝者有已填呈格式又復飾詞撤回者有催領執照迄未請領或領照而不按時填給呈繳照根者積弊滋多殊難枚舉至叛絕各產例應入官其租糧均應一體輸納查各州縣查辦叛產雖未必清丈無遺尙不致有心欺隱惟絕產一項肅清之後或業主逃歸或親友認領訪查得實原准領回第被害輕重不一其一鄉百數十里百數十村一旦慘爲灰燼靡有子遺豈戶戶俱有親族而州縣官統以承繼有人爲詞其中不實不盡弊竇尤多今若遽加嚴劾尙慮未能折服其心自應寬其既往明示限期自此

次文到日起予限三箇月責令將填註格式截定新章造冊補報未領執照者趕緊請領按照認種之日填發仍將照根呈繳其尙未清丈或丈而未明或遺漏未報或被奸民朦占續經查出地畝均於限內逐款報明不准藉詞延宕如係新舊交替之際准其展限一箇月並遴委幹員照章分查出具切結倘有互相欺隱一併懲辦庶幾功過分明舉劾平允一被災最重荒產較多人民稀少之區地方官能分別叛絕各產清丈得實冊報不虛自奉新章一年內一律墾種或在八成以上設長編甲辦理妥協查無變法徇私各弊卽由該局存記無論實缺署事暫免離任俟承種一年限滿果能照章輸納租糧未種之地漸次

招徠其明幹勤能畱心民事者由該局詳請奏懇破格保獎其墾種七成以上辦理妥協查無上項情弊照前辦理俟承種一年期滿租糧不致短少未種之地亦漸次報墾者奏懇從優議敘六成以上者准記大功僅及其半者先予記過未及半者先行摘頂勒限四箇月一律招墾限滿墾種在七八成以上開復記過摘頂處分責令按月報墾已種之田一年限滿租糧無缺未種之地陸續招墾漸有成數仍照前分別議敘其勒限已滿仍無成效藉詞妄議更張規避處分者察其情節輕重撤任分別辦理如有乘便營私等情卽行奏請從重交部議處一被災稍輕荒產較少或民貧地瘠之區叛絕各產地方官清查得實

冊報不虛自奉新章一年內設法招徠一律墾種或在八九成以上辦理妥協其或稍有變通係稟經總局酌示查無變法徇私各情亦由局存記察看可否畱任俟承種一年限滿果能按章輸納租糧未種之地漸次報墾酌其田畝多寡情形難易由局詳請保奏給予升銜其墾種六七成以上查無上項情弊一年限滿租糧無缺未種之地漸次報墾者分別從優議敘或給予升獎僅及其半者先記大過未及半者先行摘頂勒限三箇月一律招墾限滿墾種在七八成以上開復記過摘頂處分責令按月報墾其已種地畝一年限滿按章輸納租糧續墾之地漸有成效酌其多寡難易給予升獎或記大功勒限已滿尙無

成效藉詞妄議更張冀圖便己者察其情節輕重撤任分別辦理若地方民氣漸復州縣官於叛絕各產並未親身履勘實力招徠任聽胥保詭隱漁利屢經嚴查迄不據實呈報者與玩視民瘼無異擬奏請從重交部議處一州縣辦理營田既有勸懲該管府州均有督率之責自應一併考課如知府直隸州自奉新章之日起督飭所屬廣爲招墾一年期內合計墾種在八成以上查無遺漏均能按限輸納租糧無侵虧挪移等弊由局詳請奏懇優獎合計墾種不及六成或有因循苟且辦理未善之員不爲據實稟揭亦由局開送該管府州職名奏請懲辦以上各條寬其既往定期限而予以自新課其成功酌勸懲而使之

知警獎勵論功之大小薦剡不得濫邀處分視咎之重輕彈劾亦昭平允揆情準律各有區分據該局司道會詳前來臣查摺徠開墾事關民瘼原屬地方官職分應辦之事必待嚴加考劾已屬自問難安如再不知振興豈能置之不議况前此之延宕既已從寬則後此之科條不容不密該司道所議舉劾章程尙屬妥協除咨部立案外理合恭摺具

奏伏乞

皇太后

皇上聖鑒訓示謹

奏

附調唐炯來陝襄辦營田疏

再陝省此次籌辦營田事體繁重良由曠土太多人民太少一切規模區畫均與創始不殊上年設局之初經臣派委鳳邠道黃輔辰專司其事遇有更置事宜卽與藩司林壽圖會商具詳該道學識深遠謀畫周詳類能實力實心綜理條貫無如所辦西同鳳延邠乾鄜七府州屬地太遼闊各州縣牧令蹈常襲故往往畏憚繁勞不肯躬履畎畝勘校丈量或假手吏胥聽其與鄉保里長胡同作弊不肖者或更以欺飾隱匿爲營私罔利之圖此時之勘校不清則將來之錢糧徭役必多偏輕偏重苦樂不均之處至於積弊旣深卽使後有良吏欲加整頓而其道無

由故其所繫於民瘼爲最重也臣維體國經野貴粟重農最爲王者疆理天下之要道宋時或專設屯田使營田使等官俾司一路農田之役其立制頗爲慎重今卽未能議復此制亦當倣其意以行之特派道府大員遍歷各州縣所屬村莊督飭牧令相度地壤高下等則酌定賦額清釐經界省吏胥之煩擾垂經久之規模使遠方新徙之民安其樂利雖有不肖牧令無可欺飾隱匿以行其私則一勞可以永逸實爲今日墾荒之急務惟查陝省現在候補道府人員實無堪勝此任者蓋非有精明強幹之才則不能清釐弊竇非有清毅堅卓之節則不能董率屬僚而非有慈祥愷悌之誠亦不能曲體細民隱微疾苦之情以

盡勞來安輯之術兼是數者故臣反覆籌度而難其選也伏查四川候補知府唐炯器識沈毅才略英邁篤學勵志嘗以濟時澤物爲心亮節清操不存慕祿希榮之見前署綏定府知府卓著賢聲政成民洽聞現已卸任回省臣維陝省營田事宜關係久遠利弊如以黃輔辰總司局務提挈綱領而使唐炯遍歷州縣督率責成如宋時營田使之制必能曲盡美利區畫咸宜合無仰懇

皇上天恩俯念陝省要務需才非僅一時便利之舉

敕下四川督臣准調候補知府唐炯來陝襄辦營田事宜以定規制而垂久遠實於秦民大有裨益臣爲要務需才起見是否

有當伏祈

聖鑒飭遵謹

奏

查覆已革提督棍責捐生情形疏

同治五年四月十一日

奏爲遵照部議覆查已革提督棍責捐生發縣管押致令羞忿
自盡情形請

旨飭部酌議懲處恭摺奏祈

聖鑒事竊照已革甘肅提督陶茂林前在鳳翔縣勸捐將職員

趙聯甲棍責看管致令羞忿服毒身死經

臣

參奏奉

旨陶茂林著交部議處欽此旋經兵部擬照官員犯不應重律

杖八十私罪降三級調用因已另案革職所議降級之處應行
註冊並查勸捐助餉本屬因公而擅用棍責有干例禁此端一
開各直省紛紛效尤實屬不成事體請

旨飭

臣

確查趙聯甲是否已革提督陶茂林應行棍責之人如

何羞忿自盡詳細情形據實奏參以儆兇暴而遵體制等因奉
旨依議欽此行知到

臣

當卽欽遵飭查去後茲據署臬司官銘

轉據委員西安府知府呂儁孫查訊詳細情形具詳前來

臣覆

加察核緣同治二年十月鳳翔府城被回匪圍困經陶茂林統
兵擊退解圍時值軍餉缺乏陶茂林札委署麟遊縣莊治安在
郡城設局辦捐飭傳鳳翔縣富戶五品銜趙聯甲交莊治安勸

諭捐輸趙聯甲因郡城被圍年餘曾經捐過守城經費不允再捐軍餉出言挺抗莊治安回明陶茂林於次日將趙聯甲傳營面勸趙聯甲口出不遜任意頂撞陶茂林生怒卽將趙聯甲棍責四十發交鳳翔縣唐霈派役楊泰淡祥帶至縣門西首劉澍店內看管趙聯甲堅不允捐有在該店對門居住之白挺常相往來趙聯甲素吸洋煙每向劉澍白挺愁歎聲稱責押傷顏難以見人生不如死劉澍等各向勸慰詎趙聯甲羞忿莫釋遽萌短見於十二月初九日夜四更時分乘看役楊泰等熟睡潛服煙膏毒發聲哼楊泰等驚覺喊同劉澍白挺救治罔效移時殞命逐一推尋委屬實在情形毫無疑義此案已革甘肅提督

陶茂林帶兵勦賊本無管轄士民之責而職員趙聯甲係屬紳士亦非提督應責之人乃因其抗捐軍餉出言頂撞輒行棍責發縣看管日久不釋以致趙聯甲羞忿自盡雖事屬因公究係任意作威濫責釀命應如何議處示懲之處請

旨飭部議覆飭遵所有遵議確查原案詳細情形理合恭摺具

奏伏乞

皇太后

皇上聖鑒訓示謹

奏

附請改派大員祭告西嶽疏

再臣接准禮部咨開恭照同治元年

皇上登極欽奉

恩詔致祭

西嶽等祀又同治三年江甯克復欽奉

諭旨告祭

嶽瀆迄今未將兩次告祭日期報部等因咨催到臣遵查陝省

致祭

西嶽先派副都統保慶旋因該員休致經前撫臣瑛榮奏奉

諭旨俟軍務稍鬆派穆圖善前往致祭嗣穆圖善升授荊州將

軍又經臣奏請另派大員奉

旨改派德興阿前往致祭均早移知欽遵在案茲准部咨臣復
催據署西安將軍德興阿以前奉

諭旨派德興阿前往致祭時值陝疆未靖前西安將軍都興阿
左翼副都統金順均在甯夏軍營操防緊要未便帶印出省現
在左翼副都統圖明額雖已蒞任該署將軍如往告祭往返約
需兩月有餘應行奏請交卸印務方資慎重抑或

奏請另改派大員前往相應咨覆酌辦等因前來臣查陝省兩
次告祭

嶽瀆爲期已久應將告祭日期咨部彙奏惟甘肅軍務方殷逆
同時思回竄陝省滿漢兩城俱有防禦及應辦事宜西安將軍

現係德興阿署理如其出省致祭往返需時實於操防有礙應
否仍令德興阿往祭抑或改派左翼副都統圖明額之處恭候
訓示遵行爲此附片具陳伏乞

聖鑒謹

奏

附報籌解甘軍餉銀軍火數目疏

再臣疊奉

諭旨籌撥甘肅軍需雖值窘乏萬分不敢稍存膜視業將同治
五年二月分撥解過援甘各營餉銀軍火數目附

奏在案茲據軍需局司道詳開同治五年三月分共解支過援

甘各營餉銀二萬二千九百八十三兩一錢五分六釐火繩一萬丈鉛丸四千斤均經分別委解交納取有迴文爲據臣覆查無異除仍飭該司道等竭力籌措源源接濟外所有陝省同治五年三月分解支過援甘各營餉銀軍火等項數目謹繕清單

恭呈

御覽理合附片陳明伏乞

聖鑒謹

奏

甘回還竄請飭督臣先清東路疏

同治五年四月十八日

奏爲甘省大股回匪併力回竄請

飭督臣緩赴蘭州先清東路以扶危局恭摺仰祈

聖鑒事竊維陝回在甘蓄志逞謀將圖回竄非一日矣前此逆酋赫明堂等愚弄雷正綰左右將肆其奸仰賴

國家威福荷戈執殳之士深明順逆自決從違萃處涇州誓相死守雷正綰亦交納叛將俱正刑章我軍方將更新壁壘籌備糗糧節節進取詎其存心陰狡乘蘭省標兵乏食回弁馬福等倡亂之隙既旬通北山賊黨復聯結河狄等處逆眾逼近蘭垣蓋策我以根本重地不容忍置

朝廷震怒必將嚴責督臣返旆西征楊岳斌亦必畏罪圖功率師還顧則將墜其狡謀自困於糧餉皆絕孤危無援之地及奉

諭旨祇令林之望固守待援乃變而悉眾東趨用其分途竄擾之計蓋蘭州標協弁缺皆叛兵所自署置文員自藩司以下爲所禁制凡遇陳奏章疏移行公牘必先授橐閱看而後發此皆據前後逃出紳民所共述眾口一詞其於

廷寄指授機宜固已無不寓目矣臣初謂蘭州兵變陝回或不預謀乃連日接據曹克忠譚玉龍及平涼慶涇邠長汧隴等處文武員弁紛紛稟報河狄固原會甯諸逆相率蠢動隆德失陷莊浪被圍靖遠華亭并形危急現復擾及慶陽府屬之西峯鎮焦村等處駸駸將入陝疆並據曹克忠牘稱逆酋孫義章等將前所收降之馬德馨及舊在該提督隨營撥歸雷正綰之總兵

劉玉昌等數人戕斃復逼脇靜甯蕭何城等堡降回隨同起事譚玉龍亦稱隆德失守後據逃出外委劉作棟等面陳實因雷正綰營中糧臺委員回官馬姓者乘夜開城搆變則該逆等之始而狙伏繼而蠡起先發難於蘭州誘督臣以必救復四出而紛竄圖併力以趨秦固不待智者而後知此時爲陝甘兩省計宜姑置蘭州爲緩圖專用力於東北杜平固出竄之路通慶涇饋運之途後顧無虞然後轉戰而西即使省垣曾爲賊踞而旁邑盡下不難復此孤城況今內釁雖生尙未顯然外叛急則互相死守緩則自有轉機督臣忠誠果毅出於性生自從事戎行遇敵無所卻顧雖屢建奇功總以殺賊不盡爲憾昔曾國藩嘗

語臣云東南用兵以來諸將臨陣或須激勵以行至於塔齊布楊岳斌者忠勇絕倫浩不可遏必先反復勸誠屬其從容將事如促之使戰卽迫之於危蓋成敗利鈍之弗計而奮不顧身久爲海內所信服近藩司林壽圖至自慶陽具述該督臣自聞三月三日之變憤恚不食惟矢捐軀報

國迨回涇後曹克忠畫緩取蘭州之策諸將進暫顧東路之議皆毅然堅持矢志不奪臣竊憂之查邠鄜汧隴竇轉餉之咽喉平固慶涇爲通甘之門戶今甘省北自涇州至慶環六七百里東自蘭州至涇州一千一百餘里賊勢縱橫接連陝境若督臣繞由秦鞏南路深入省垣無論前阻堅城後環賊壘糧斷援絕

勢無瓦全而現在隴東一帶如譚玉龍張在山等均乏統馭之才通計四十餘營分布平涼慶陽涇州等屬二府一州之地勢既遼遠事無稟承值此逆氛浩大之時勢必觀望前卻稍有疏虞卽將驅入汧隴邠鄜盡棄前功是督臣此時之去留實係兩省之安危且以賊勢衝之陝回狡悍自知爲

天討所必加甘回闇柔實多爲陝逆所迫脇今甯靈慶環平固河狄各路陝回既皆屬萃隴東苟趁此時奮力勦洗將陝省悍黨掃盡無遺則甘回勢將聞風自戢棄械投誠事機轉關莫切於此惟有籲懇

天恩迅飭楊岳斌務審先後緩急之宜耐心忍性廓清東北先

將華亭甯州等處保護無虞以次克復隆德莊浪剪除強寇庶
可移師西向由平固靜會進規皋蘭誠不宜銳意西趨致誤機
局至現在蘭州城內各兵業經曹克忠購辦雜糧麥麩隨時解
送足示羈縻該提督駐紮鞏昌馬營一帶距省匪遙即可藉其
聲威暫爲鎮撫臣爲維持關隴大局起見理合恭摺馳陳伏乞
皇太后

皇上聖鑒訓示謹

奏

附陳逆回礙難安插陝境疏

再臣現准甯夏將軍穆圖善函稱自抵甯夏細審軍情知回眾

與髮捻各逆迥不相同髮捻人數雖多易聚易散回眾與漢民
犬牙錯處各省皆然聚則一呼羣起散則無地可歸推究禍變
所由又起於漢回讎殺漢民向工膚愬聲氣聯絡每以回民悖
逆控官而狡詐回目又以官兵助漢滅回爲詞煽惑愚民激之
生變若不真分良莠示以大公非但誅不勝誅且恐良回亦難
安身更與莠回附翼勢將盡成死黨膠固莫解刻下甯夏漢回
已經次第安插歸業事勢較有轉機其靈州回目馬化澂等亦
已望風納款率眾投誠並據馬化澂稟自陳從前雖被回弁
馬兆元逼脇生變並未隨同攻城旋即擒斬馬兆元約束金積
堡回民安靜待撫其上年雷曹之挫係陝回馬生彥等糾眾抗

拒與伊無干現捐修渠工銀八十兩米糧十五萬斤並呈繳鎗礮軍械五百餘件馬一百四十餘匹陸續運交大營求保生命該將軍現派幹員馳赴靈州查勘該處軍械馬匹有無隱匿酌核辦理並稱現今納款投誠獻城繳械如馬化澂馬萬選赫壯圖等皆係甘回其狍狝犯順到處滋擾如馬生彥楊文智任老五孫義章等皆係陝回急之則合而爲一緩之則分而爲二該將軍擬俟甯靈一律肅清察看賊勢何路喫重移師遄征事關西北大局應與地方官妥籌綏輯屬臣酌畫函覆辦理等情臣維我

皇上一視同仁業蒙疊降

諭旨但分良莠不分漢回該將軍所述辦理情形實能仰體
朝廷德意惟以臣愚見度之此時甘回可撫而陝回實無可撫
之機蓋甘回素多愚懦自安耕鑿此次搆難實爲陝逆所迫脇
其情既有可原且與漢人搆怨初不甚深投誠之後有田可種
有屋可棲父子妻孥足保無恙其情亦較可信但使地方官善
加約束安插得宜自可解散逆黨以孤莠回之勢至於陝回狡
悍性成屢撫屢叛倡亂以來屠戮漢民以鉅億計亦自知罪大
惡極爲天地所不容即使

朝廷曲加寬宥而陝民之子遺僅存者念父兄之痛思子弟之
仇刻骨刺心亦必不能對宇望衡相安無事且各屬叛產多經

招徠墾種卽彼虔誠歸命亦斷不能將客民已墾之田拱手相讓如謂劃分畛域使漢自漢而回自回又不能取各屬倖存之漢民勒逼移徙空其地以待降回之歸且前日之怨毒旣深則將來之猜嫌易起今西安省城所住回民約計五千餘眾彼尙安分自守未與逆黨相通然與漢民同城耦處已不免彼此猜疑開導撫綏頗煩心慮况欲令已叛已亂之逆眾還歸於被屠被焚之故居則他日安插之難不待再計而決矣現查逆酋孫義章馬生彥等正在勾結巨股陝回悉眾東犯之際且復迫脇靜甯蕭何城等堡降回隨同起事其情形尤堪痛憤惟有約會各路大兵痛加勦洗以堅甘回向化之心俟將元惡大憝翦除

既盡餘黨或有悔悟之誠然後再爲綏輯之計至該將軍所稱
靈州馬化澂投誠各情呈繳器械馬匹爲數無幾誠慮尙有隱
匿未必出於真誠既經該將軍派員查勘當可得其實迹竊查
收撫回眾莫如近日曹克忠洮州之役較爲妥協其所繳器械
馬匹既多並將首逆二十八人縛出梟斬隨於造冊點驗之際
據該處紳民指出素行凶惡滋事者一十五人就地正法勒令
造具戶口冊籍編立保甲連環互結俾與漢番居民共釋嫌隙
似此辦理周詳當可悉弭後患除由臣函覆穆圖善並將曹克
忠來牘咨商該將軍查核照辦外伏祈我

皇上敕下穆圖善詳察情形分別辦理並派撥馬步二十餘營

駐紮靈州鹽茶交界之地俾與督臣楊岳斌東路各軍遙爲聲
援旣以絕陝回馬生彥等句結之路亦以堅甘回馬化澆等歸
順之誠實於大局有裨愚昧之見是否有當伏祈

聖鑒謹

奏

附帶印出省赴涇疏

再臣頃接督臣楊岳斌函稱現值蘭州事棘擬卽率領親軍繞
由鞏昌前往勦辦所有隴東一帶防務屬臣代爲規畫布置並
約臣前赴涇州面商一切如不能往當卽日引軍西趨等語臣
查現在甘省機局隴東賊勢萬無舍此前進之理而該督臣憂

憤填臆奮不顧身大有不可復畱之勢臣於拜摺後擬卽馳往
涇州與督臣面商緩急先後之宜共決進止戰守之策刻值豫
省捻匪倏遠倏近東路潼商之防仍未可稍涉鬆懈臣擬畱涇
七八日商定規模仍卽回顧省城以便居中調度所有臣衙門
日行咨移事件照例暫飭藩司林壽圖代折代行緊要軍情仍
由臣酌核辦理所有微臣帶印出省赴涇緣由附片陳明伏乞

聖鑒謹

奏

逆回巨股竄陝現籌勦辦情形疏

同治五年四月二十五日

奏爲逆回大股分竄陝疆謹將現籌勦辦布置情形恭摺馳奏

仰祈

聖鑒事竊查甘省逆回擊眷東竄並旬結各路大股併力圖犯
陝疆業經臣於三月二十九四月十八兩次馳奏並將臣帶印
出省赴涇與督臣楊岳斌商辦戰守情形附片陳明在案臣於
十八日由省起程十九日行抵醴泉接據派赴隴州記名提督
劉玉興稟報回逆大股於四月十五六日竄入隴境十七日分
由溫水溝原子頭兩路撲出當卽督率所部英毅軍三營分布
北山根一帶列陣迎擊鏖戰數時該逆突出馬隊從山背包鈔
繞出右營之後致被傷亡二百餘人裹去數十人劉玉興當率
前左兩營退至城下奮力抵禦將賊擊退是夜該逆復擁眾併

力撲城劉玉興紮營城外拒守鎗礮齊施署知州湯敏亦督兵團憑城開礮轟擊賊知無懈可乘始行卻退等語臣當飛飭記名提督邱時成帶領省標馬隊蕭德揚帶領湘果左翼軍步隊由鳳翔前往堵剿該提督等行抵汧陽探悉隴州撲城逆匪續被擊走退踞距州西四十里之咸宜關而汧陽境內寇家河一帶已有賊蹤竄擾旋逼縣城邱時成蕭德揚等督率馬步各營分布堵禦相持良久陣斬逆賊五人賊始披靡追逐十餘里而還是夜探知該逆大隊聚踞寺溝一帶該提督等約於二十一日黎明潛師掩擊行至距城五里之保安堡逆眾已率馬步蜂擁而來蕭德揚督飭毛福益蕭集山張映衡蕭玉田等步隊直

陷賊陣邱時成督率周宏謨邢大發等馬隊左右馳突賊亦分
派馬步拌死抗拒復調寺溝凶黨繼進自辰至申鏖戰四時殺
斃數十人該逆且走且戰追至新興鋪始收隊回營其時寶雞
一路先經臣派總兵蕭德見副將王九齡兩營扼紮縣頭鎮要
道以杜逆蹤東竄現據鳳翔縣唐霈霖稟報該逆偵知大道已
經防守遂分馬賊繞由汧陽北山小路竄踞距城十里之鹽坎
堡一帶並據探報岐山境內亦有邊馬往來等語竊查前擾甘
肅甯靈慶環平固河狄之賊蓋皆陝省西同鳳三郡土著之回
近因隴中蹂躪殆遍糧食垂盡又復轉相勾結挈眷東趨自三
月以來徘徊於華亭崇信靈臺莊浪之間窺伺陝疆已非一日

刻值新麥登場意圖分路回竄飽掠狂逞若非厚集兵力痛加
勦洗則哀鴻甫集風鶴頻驚其爲患胡可勝計臣現駐乾州值
署西安將軍德興阿派撥佐領色靈阿帶領滿城馬隊二百員
名前來助勦適督臣所派副將洪殿元新練馬隊二百餘匹正
將赴甘臣並飭令由歧山前赴鳳翔以資防禦並飛調潼關防
軍記名提督劉厚基親兵五營候補道黃鼎彝字三營星馳前
趨鳳郡會勦尙慮該逆騎隊太多非步軍所能遏截復飛咨督
臣楊岳斌派撥總兵劉效忠帶領馬隊兩三起由邠乾進截其
前并撥步軍七八營由汧隴追躡其後冀合兩省之力殄此狂
氛則陝省旣除腹心之憂甘省亦消肘腋之患所有逆回巨股

分竄陝疆現籌勦辦布置情形謹具摺由驛馳

奏伏祈

皇太后

皇上聖鑒訓示謹

奏

附官軍進勦連戰獲勝疏

再正繕摺封發閒接據邱時成蕭德揚稟報回逆於二十一日
擊退後仍盤踞汧邑之新興鋪寇家河等處經該提督等會商
於是夜三更各派六成隊伍偃旗息鼓乘其不備蕭德揚率所
部居前潛抵賊巢令蕭集山毛福益蕭玉田張映衡等各帶隊

四面舉火邱時成率馬隊從後策應該逆驚惶遽卽騎馬出堡
向草碧鎮一路奔竄天色昏黑未便窮追二十二日探知該逆
由草碧鎮小道竄向鳳郡黃里鋪一帶邱時成當派鹽提舉銜
候選通判周宏謨率三起馬隊繞出黃里鋪之側而自率二起
馬隊由大路進攻蕭德揚復率步軍營哨各弁分路夾擊該逆
見四面追至盡向洛城河灣一帶奔竄我軍馬步並進斃賊約
數十名生擒二名周宏謨督隊在後遇賊力戰眾寡不敵受傷
殞命二十三日該提督等復躡追至離郡城二十里之柳林鋪
該逆復列步隊相持而以馬隊分伏村堡我軍策知其詐蕭德
揚當率馬隊直前掠陣邱時成卽督馬隊張兩翼防其包鈔鏖

戰移時賊騎果於村莊兩面鈔出我兩翼馬隊奮前迎敵往來
衝突復斃賊數十名始各收隊訊據生擒賊供此起逆匪頭目
爲崔三袁奎所帶馬賊四千餘騎均係陝西老回並有甘省潰
勇千餘並雷恆馬隊在內訊明後當卽正法等情稟報前來除
飭該提督等奮力擊勦迅殄逆氛並查明傷亡兵勇照例辦理
外其陣亡之鹽提舉銜候選通判周宏謨隨征多年力戰捐軀
深堪憫惻應請

旨交部從優議卹以慰忠魂所有官軍追賊連戰獲勝緣由理
合附片陳明伏祈

聖鑒謹

奏

附陳拆閱甘藩章奏臚陳情形疏

再臣前因蘭州兵變在省司道各官多被禁制不得自由請嗣後遇有章奏過陝仍得就近拆閱隨將外間所聞情形敘述附陳以備

聖明採擇業經欽奉

諭旨允行在案臣此次出省赴涇取道咸陽醴泉乾州一帶途次適逢甘肅藩司林之望奏摺夾板兩件同時過陝當卽就取拆閱其四月初二日所發之摺言擊退逼城逆回情形陝中殊無所聞或因相距已遠音信阻隔之故至謂自初三變後兵民

皆視楚軍如仇若仍照舊屯紮恐其尋衅積怨各不相安請以
省城左右防勦責成雷正綰曹克忠兩人將楚軍各營全數調
赴東路由督臣親自統帶等語竊查楚軍自赴甘省紀律頗嚴
與地方百姓甚覺相安必不致爲兵民所同仇惟自標兵變亂
以來仍舊紮駐省城左右實爲兵回之所共忌該藩司所請將
楚軍全數調赴涇原一帶似係出於近省兵回之意非出本情
惟陝回近已悉萃隴東若改派曹克忠分軍移護省城而撥楚
軍併力東勦以通糧道亦似尙協此時權宜應請
敕下督臣楊岳斌籌酌辦理其初六日所發之件言北山回酋
馬士彥一股傾心投誠請准其歸併甯夏一帶與馬化澂等一

律辦理或另就甘肅回居舊地妥爲安插以安反側等情查此
起逆回由陝入甘屢撫屢叛此次投誠之說實難遽信該藩司
代爲陳請自係姑爲釜底抽薪之計查蘭州省城糧食向恃北
山秦旺川一路接濟馬士彥盤踞日久若果能將此地退出使
省城糧米不致乏絕亦尙未爲失策所慮該逆酋別蓄狡謀姑
以甘言誘我則以後變故仍未可知至甯夏靈州一帶向被陝
回迫脇近日甘回相率投誠其情形較爲可信若使馬士彥復
居其地實慮句結煽誘并壞穆圖善現辦之局似不如另擇甘
肅回居舊地暫爲安插以示羈縻以後再察情形真僞隨時處
置應請

敕下甯夏將軍穆圖善會同督臣楊岳斌妥商籌辦臣頃接據甘肅提臣曹克忠來函言比與林之望日有信函往來並購辦麥麩雜糧隨時解送蘭州接濟今查林之望摺內言致曹克忠文函凡十餘次僅接三次覆函而上次所降

廷寄諭旨摺內亦無已經奉到之言是外間文牘信函多被守城弁兵拆閱阻遏亦可概見謹附片臚陳情形附同林之望原摺二件由驛馳

奏伏候

聖裁謹

奏

陝省藥局被焚請飭鄰省撥解疏

同治五年四月二十五日

奏爲陝省藥局被焚請

飭鄰省撥解火藥以濟要需恭摺具奏仰祈

聖鑒事竊照本年四月十六日巳刻風雨交作忽聞省城東南角雷聲大震各街房屋衙署俱各掀動旋見煙氣上冲臣卽督同司道文武各員親往查勘至清軍廳地方瞥見附近房屋盡行倒塌詢之街市居人僉稱火藥局忽被雷火轟擊等情旋據西安清軍廳同知張鴻績稟報製造藥局全行震塌計存火藥十萬六千零二十八斤硝一萬九千九百七十四斤磺二萬一千一百七十斤柳炭四千九百三十一斤悉被焚燬無存在局

工匠六名撫標領藥弁兵十餘名同時轟斃震塌倉廩民居多
閒壓傷人口多名除飭司派員詳細查驗酌量撫恤並管局人
員有無別故應否賠補另行詳辦外查火藥爲行軍要需況值
回匪紛竄需用尤急即使設法趕造而修理碾房購覓工料亦
屬緩不濟急惟有借資鄰封暫行接濟由軍需局司道會詳請
奏前來相應請

旨敕下湖北河南山西各撥火藥三萬斤迅派妥員解陝以資
攻勦而濟急需爲此恭摺具奏伏祈

皇太后

皇上聖鑒謹

奏

劉中丞奏議卷十六終

劉中丞奏議卷十七目錄

官軍剿賊獲勝追擊出境疏

附陝境東北扼截回匪情形疏

附請飭蔣凝學暫駐涇州疏

請蠲緩舊欠錢糧疏

附籌解甘軍餉銀軍火數目疏

逆回復竄隴州迎擊獲勝疏

附請撥甘軍馬隊助剿疏

附催調金都統馬隊疏

附防軍剿賊獲勝疏

附請飭四川等省撥銀以濟急需疏

官軍勦賊迭獲勝捷疏

附陳譚營譁潰情形疏

附保安防軍擊賊獲勝疏

請將隨征陣亡員弁捐建昭忠祠疏

附請殉難紳士合建專祠疏

附籌解甘軍餉銀軍火數目疏

官軍踏平賊巢疏

附譚劉兩軍迭獲勝仗疏

附請飭浙江廣東撥餉協濟疏

劉中丞奏議卷十七

湘鄉劉蓉著

官軍剿賊獲勝追擊出境疏

同治五年五月初二日

奏爲官軍剿賊獲勝已將回逆追出陝疆現籌布置邊防事宜
恭摺馳陳仰祈

聖鑒事竊臣前月二十日行抵乾州正值逆回犯陝曾將布置
防剿並連日接仗各情形馳

奏在案嗣據各路探報回逆分前後兩股招誘潰勇結隊東趨
前股係逆酋崔三統帶約四五千人叛弁袁奎等附之已竄鳳
岐一帶後股係逆酋穆三統帶約萬餘人叛弁李朝慶附之亦

陸續由水落城故關撲出分踞隴境臣卽飛飭記名提督劉玉
興會同署隴州知州湯敏嚴密堵禦督飭記名提督蕭德揚邱
時成各率馬步隊迅掃鳳翔各處踞匪仍令總兵蕭德見副將
王九齡兩營扼紮縣頭鎮以杜偷越渭河之路一面催調記名
提督劉厚基候補道黃鼎副將洪殿元等各率馬步星集鳳郡
聽候臣親往督辦正移赴間接據蕭德揚邱時成稟報該逆崔
三等於二十三日被勦後退屯董家河孫家堡一帶經該提督
等商於是夜派提督蕭集山參將蕭玉田以步隊攻董家河都
司張鳳山把總李華以馬隊策應提督毛福益副將張映衡以
步隊攻孫家堡守備邢大發以馬隊策應當將兩堡攻開斃賊

百餘名逆回紛紛向汧屬之老爺嶺翻山逸去邱時成卽率馬隊回顧鳳郡蕭德揚獨督步隊跟蹤躡躑二十四日追至汧屬之倉房溝因該處山高林密恐中賊伏當卽諭營哨各弁分張兩翼作左右包鈔之勢而令張映衡率健卒數十名向前誘敵引過山灣眾軍齊起奮呼猛撲逆首崔三馳馬督戰被我軍戳傷右手勢不能支率隊狂奔當經追斬五百餘人奪獲騾馬百餘匹牛驢百餘頭拔出被擄難民千餘人二十五日追至甘肅靈臺縣之新集鎮探悉逆眾盡夜分竄四散始振旅而還其後隊穆三巨股方踞隴州近城白牛堡太沖堡等處徧刈麥糧窮搜牲畜部眾散處民房並未紮有營壘劉玉興偵知其情當與

署知州湯敏共商以賊眾我寡非乘夜斫營不能制勝議於二十五夜銜枚捲甲掩其不備湯敏當率團丁由小路進發劉玉興分四成隊伍守城自率六成隊伍由大路疾趨約以舉火爲號三更時分兩軍併集鼓譟直前鎗礮齊施穆三驚寤見我軍四面環集不測虛實急率其眾向西遁去自相踐踏死傷者約二百人遺棄騾驢牛羊甚眾比據稟報隴州境內亦已一律肅清等語伏查甘省飢窘殊常陝回食匱計窮垂涎故土已非一日各處潰卒游勇亦以野無所掠圖取陝糧雖經諸軍扼剿暫時卻退難保不伺隙仍圖狂逞頃據探報逆回由靜甯西北曹葵川一帶糾結東趨者二三萬人臣現派黃鼎率彝字全軍紮

踞隴州蕭德揚率湘果左翼軍駐紮汧陽蕭德見王九齡兩營
仍紮寶雞汧陽交界之縣頭鎮劉玉興率英毅營洪殿元率精
騎營馬隊駐紮邠州之亭口鎮而以邱時成與色靈阿滿城馬
隊共紮鳳翔郡城以備游擊策應之用並咨催記名提督漢中
鎮總兵蕭慶高進紮鳳郡以資統率其劉厚基一軍暫駐省會
兼顧東西兩路防務查隴州汧陽與靈臺崇信交界之區林谷
深邃山徑紛歧現飭各軍先派精卒探明途徑並逆匪巢窟所
在再爲越境鵬擊之計除查明陸續傷亡士卒分別卹賞外其
在事出力員弁可否由臣存記彙案擇尤請獎之處出自
天恩所有官兵勦退逆匪布置邊防事宜理合恭摺由驛馳

奏伏祈

皇太后

皇上聖鑒訓示謹

奏

附陝境東北扼截回匪情形疏

再此次回逆東趨分路狂逞本緣甘糧匱竭同時並舉爲牽制我師之計頃據派防保安之鎮西軍同知鄔太愚稟稱回逆盤踞吳家口三合掌一帶經該員於四月十九日督率馬步各營分途迎剿該逆聞風遽委牲畜先遁追至鐵角城始行收隊并據派防定邊之總兵段登雲稟稱回逆竄踞黨家原藥王洞狼

兒溝等處該總兵率參將殷華廷李楚英並駐防該縣之馬步各軍整隊進攻斃賊百餘名餘眾逃竄各等語臣以賊蹤飄忽來去無常特飭該二將聯營犄角時出奇兵越疆狙擊冀絕逆匪窺伺之萌茲又接據派防鄜州邊境之總兵楊得勝稟報四月二十四日回逆由油源竄至二將城其後路大股亦俱蠢動距該營約百餘里該總兵現已派隊進駐合水縣之華池隘口列陣以待等情飛報前來查該逆股數眾多沿邊窺伺東北各路山徑叢雜防不勝防陝省兵力既單惟有督飭防邊各將互相策應相機迎剿以靖逆氛而固疆圉所有陝境東北扼截回賊各情形合併附陳伏乞

聖鑒謹

奏

附請飭蔣凝學暫駐涇州疏

再臣頃准督臣楊岳斌函稱現接甘肅提督曹克忠專弁函致
縷述蘭州城外逆回卻退城中飢窘該提督擬赴省城鎮定羣
情不難力將城池反正惟軍中乏食無糧可裹是以未能起程
須督臣親至鞏昌辦糧接濟庶可抽身前往且現紮安定金縣
各軍待哺嗷嗷亦虞飢譁遂於四月二十八日單騎西行囑臣
暫將東防事宜代爲維持俟該督臣將省事布置周妥卽再赴
東路商辦防剿等語查臣此行本期與楊岳斌商度隴東戰守

事宜今督臣既赴鞏昌自可無庸前往涇防爲東路總匯現當
回逆紛竄潰卒游勇蜂起滋事之際不可無得力大員鎮壓適
值布政使銜甘肅安肅道蔣凝學率所部楚軍二千餘人行抵
武功臣卽檄飭由邠長逕趨涇州駐紮該道於軍事機宜諳練
甚深尙可藉以調護諸將截遏狂氛除由臣函商督臣並約將
鞏昌糧運布置定妥後仍卽速還涇州會籌肅清東路事宜以
維大局外理合附片陳明伏祈

聖鑒謹

奏

請蠲緩舊欠錢糧疏

同治五年五月十二日

奏爲查明前被賊擾州縣舊欠錢糧仍難併徵懇

恩再予分別蠲緩以紓民困恭摺仰祈

聖鑒事竊照陝省西安同州鳳翔漢中興安商州邠州乾州等
府州屬自同治元年軍興以後地方悉被蹂躪小民死亡過半
廬舍蕩然田土荒蕪業將元二三等年民欠錢糧及應徵各款
先後

奏懇

恩施分別蠲緩在案當茲庫儲萬絀需餉浩繁之際陝省歲入
向以地丁爲大宗舍此別無可籌隨將四年地丁錢糧嚴飭各
屬設法催徵滿冀時和年豐踴躍完納以佐急需無如凋敝特

甚牛籽價昂小民苦無餘貲地畝未能全種兼值上年雨澤愆期夏秋兩收均形歉薄加以兵差絡繹閭閻疲於供支困苦情形不堪言狀其中被擾稍輕之家收穫之戶均已量力輸將陸續解司撥用餘欠地丁正耗錢糧俱係無力災黎且有叛絕各產乏人佃種以致驟難催納現據各屬紛紛稟請蠲緩臣與藩司覆加訪察委係實在情形在地丁錢糧雖爲兵餉要需而事關民瘼又難置之不顧况五年新賦開征日久完納甚覺竭蹶若令新舊同時並征民力實有未逮查得咸甯等縣前此被擾最重所有舊欠錢糧即使緩至秋後或分年帶征終恐徒事追呼有名無實祇增百姓之累無裨軍餉之需自應權其輕重分

別等差據實

奏請蠲緩以蘇民困而培元氣據藩司林壽圖具詳前來相應
籲懇

天恩俯准將咸甯長安高陵咸陽臨潼涇陽等六縣民欠同治
四年地丁正耗折征銀兩本色糧石全行豁免其被擾稍輕之
三原縣民欠四年地丁正耗本色糧石自五年起分作三年帶
征渭南醴泉興平鄠縣華州蒲城華陰等七州縣民欠四年地
丁正耗折征銀兩本色糧石分作兩年帶征蓋屋藍田鳳翔寶
雞大荔邠州三水長武南鄭褒城沔縣城固略陽西鄉甯羌留
壩等十六廳州縣民欠四年地丁正耗折征銀兩本色糧石均

緩至本年秋後帶征此外尙有藍田邠州三水長武永壽武功等六州縣民欠三年地丁正耗前已緩至四年秋後帶征並請展至本年秋後帶征以示體恤除飭司嚴行各屬查明民欠確數造具冊結並此後或有續經查出應行蠲緩之處隨時另案詳辦外所有查明被災各廳州縣民困未蘇懇請再予蠲緩舊欠錢糧緣由理合繕摺具奏如蒙

俞允一俟奉到

恩旨臣卽飭司刊刻謄黃徧行曉示務期實惠及民無任吏胥隱射滋弊合併聲明伏乞

皇太后

皇上聖鑒訓示飭遵謹

奏

附籌解甘軍餉銀軍火數目疏

再臣迭奉

諭旨籌撥甘肅軍需雖值窘乏萬分不敢稍存膜視業將同治五年三月分撥解過援甘各營餉銀軍火數目附

奏在案茲據軍需局司道詳稱同治五年四月分共解支過援甘各營餉銀二萬四千兩鹽菜銀二千八百九十六兩四錢五分三釐二毫火藥九千二百斤擡鎗小鎗子一萬斤火繩二萬四千丈擡鎗一百桿小鎗二百桿白布單大帳房二百架藍布

夾大帳房二十架鉛丸六百斤均經分別委解交納取有迴文
爲據臣覆查無異除仍飭該司道等竭力籌措源源接濟外所
有陝省同治五年四月分解支過援甘各營餉銀軍火等項數
目謹繕清單恭呈

御覽理合附片陳明伏乞

聖鑒謹

奏

逆回復竄隴州迎擊獲勝疏

同治五年五月十七日

奏爲逆回大股復竄隴州謹將分派馬步各軍連日接仗獲勝
情形並咨請陝甘督臣甯夏將軍各撥馬步大枝赴陝會剿緣

由恭摺具奏伏祈

聖鑒事竊

臣

於五月初二日會將擊退逆回出境並布置邊防

還赴省垣各情形馳陳在案

臣

於初四旋省初五六日接據記

名提督劉玉興隴州知州湯敏等陸續稟報後隊回酋馬生彥
孫義章等糾集靖遠靜甯固原隆德各處巨股攜帶家眷勾結
叛卒眾約三四萬人於初三初四等日陸續竄至隴州其前起
敗竄之穆三崔三馬萬祥等亦卽折轉盤踞故關咸宜關神麻
鋪曹家灣太沖峪王馬觜高領子白牛峪高寺庵蒲峪川等處
一帶村堡蔓延數十里聲稱先據隴州爲巢穴拌死竄擾陝中
等語先是臣派記名提督蕭德揚率領湘果左翼軍駐紮汧陽

副將洪殿元率領精騎營馬隊駐紮邠州之亭口鎮均在鳳翔未發逮聞回逆還竄之信當卽會同派紮鳳郡之邱時成各率馬步於初四日拔赴隴州臣亦飛催黃鼎督率彝字全軍並前紮縣頭鎮之蕭德見王九齡兩營兼程前進以厚兵力初五日劉玉興湯敏在隴州城內盤獲奸細張思永等供稱該逆約於是夜三更攻城伊卽於城內舉火內應劉玉興等當卽訊明正法一面督飭弁勇團練登陴防守是夜三鼓月色微明該逆果蜂擁來撲城上鎗礮齊施瓦石並擲直至天明知內應謀洩始行卻退而其肩股已向東竄維時蕭德揚邱時成洪殿元各率馬步於初六日黎明由草碧鎮拔發適與此賊相遇當卽列隊

衝擊該逆勢不能支奪路向西奔竄蕭德揚等亦卽分路追擊該逆且戰且走追至杜陽河地勢寬平該逆之後隊增添踵至復回旗排列馬隊來撲我軍亦分布整隊禦之鏖戰數時之久洪殿元手刃悍賊數名各軍奮進共計斃賊三四百名生擒八十餘名奪獲旗幟騾馬甚多該逆悉向隴州敗竄劉玉興亦督隊出城夾擊於是城外之賊亦相率遁去蕭德揚等駐軍晁家坡逼賊而營初七日大雨滂沱未能出隊初八日蕭德揚邱時成等正商出師會鄴探卒飛報高陵子麻黃鋪一帶逆賊已率馬隊前來蕭德揚登原瞭望遙見樹林村堡內隱隱有旗幟埋伏因命參將蕭玉田列隊北阜以禦北路之賊張映衡率右營

當其中路劉玉興毛福益蕭德見王九齡等各率隊伍排列河干蕭德揚邱時成洪殿元等督率馬步親兵往來策應並飭隴州團練分站後面以壯聲威該逆見我軍陣勢齊整隨將藏匿樹林馬賊左右鈔出我軍屹立不動相持數時賊氣頗疲乃傳令分股猛撲喊聲大作該逆紛紛敗竄當經追殺數十名生擒十餘名我軍亦有傷亡初九日黎明該逆憤前敵之敗調集各路馬步悍賊約二萬餘人以馬賊當先步賊在後由小河東南隅鈔出我軍營壘之後蕭德揚邱時成劉玉興洪殿元等以賊勢數倍於我督飭馬步各自爲陣勢如長蛇該逆馬隊眾多往來馳驟我軍皆堅陣不動俟其逼近始將鎗礮轟擊該逆見無

隙可乘遂悉向北面太陽溝併力衝突參將蕭玉田奮勇衝鋒
手刃數名悍賊百長夏忠堂周玉龍率隊繼進賊勢披靡正在
鏖戰蕭玉田忽中洋鎗登時隕命蕭德揚急率前左兩哨橫貫
賊陣截爲兩段適黃鼎督率彝字全軍趕到隨即整隊繼進士
氣愈奮共計斃賊二百餘名賊眾紛竄帶傷而逃者無數我軍
傷亡亦多初十日探悉該逆分股一由王家背竄踞蒲峪焦家
山太沖峪白牛峪一帶圖犯寶雞一由閻家灣竄踞白家灘麻
子山把關口溫水溝一帶圖趨汧陽蕭德揚黃鼎劉玉興等亦
卽移營由北而南自晁家坡至南原河岸分築十餘壘以禦之
是夜該逆圖乘我軍列壘未定分股來撲蕭德揚黃鼎等亦卽

出隊分據山梁伏兵壘外約俟賊抵營地出擊持至夜半該逆終不敢前十一日該逆復分馬步數起各萬餘人直衝晁家坡及南原河岸蕭德揚卽率師先據坡頂分派蕭集山張映衡蕭德見王九齡毛福益列於太陽溝左右布置甫定賊騎衝突而前我軍立施鎗礮抵禦斃賊約數十名逆眾死戰不退我軍用礮轟擊連中白巾賊酋兩名墜馬餘眾扶創飛奔洪殿元策馬追逐左腕中鎗不及而返當賊之撲南原河岸也黃鼎卽派張玉文黃友忠趙雲鳳列隊以待鏖戰三時之久斃賊二十餘人邱時成見賊勢可乘立率馬隊鈔擊賊悉敗退此初八初九十一等日連戰獲勝之情形也查此次逆回因甘省糧食窘

乏由靜甯靖遠會甯隆德固原渭源華亭莊浪各處糾結黨羽棄城挈眷空壁而來意圖因糧於陝眾至四五萬人我軍逆擊於隴州者合馬步計之不滿七千而該逆馬隊已分股由麟遊繞至鳳翔屬之橫水鎮石羊鋪汧陽屬之杜陽鎮巴都等處臣現飛飭劉厚基率親兵五營折赴鳳翔以遏橫水石羊一帶之賊并咨催漢中鎮總兵蕭慶高率湘果三營趕赴寶雞以截杜陽巴都一路之匪甚慮兵力單薄不敷分布萬一該逆繞赴鳳翔闖入腹地則陝省全局俱爲震動現復飛咨督臣楊岳甯夏將軍穆圖善各撥馬步大枝赴陝會剿庶幾兩面夾擊卒收合圍聚殲之功此次參將蕭玉田奮勇捐軀深堪憫惻應請

旨交部從優議卹以慰忠魂其餘傷亡弁勇容俟臣查核照例
 辦理所有回逆大股復竄陝疆各軍連日接仗情形並咨調派
 撥馬步大軍赴陝會剿各緣由謹繕摺由驛六百里馳奏伏乞
 皇太后

皇上聖鑒謹

奏

附請撥甘軍馬隊助剿疏

再查逆酋馬生彥前據靈州金積堡今歲三月竄陷靖遠孫義
 章久踞固原其尸股竄陷隆德今皆棄城挈眷東竄其他靜甯
 會甯渭河華亭莊浪首陽場蕭河城等處之賊亦皆互相糾結

傾巢而來計陝回之擾甘者所存無多就賊勢而論前散而今聚因思歸之眾懷狂逞之心所謂必死之寇其勢若不可禦就剿賊方略而論與其令賊分踞城池遍布要害剿一處復有一處翦一股又聚一股攻城搗堅曠日持久又不若使賊麇聚一隅合圍野戰之易於奏功且逆眾前擾甘省陝邊到處設防每思派兵越境鷓擊苦於防兵難撤糧運難通今幸竄入陝邊正可變防爲剿轉運軍糧亦易爲力誠合陝甘兩省精銳併力圖之或亦天滅此賊之會現值賊馬萬騎到處充斥伏懇聖恩卽飭甯夏將軍穆圖善先撥副都統金順督率各起馬隊迅由定邊取道邠長趨赴鳳翔隨卽分撥得力步隊繼進並

敕下陝甘督臣楊岳斌先撥現駐秦州之記名提督王得勝一軍由蓮花城趨赴隴州仍抽調各路得力勁旅親督會剿如能於數月之間將此巨股悉數殲滅則甘回固將聞風款附而陝回餘孽懾於先聲亦成迎刃而解之勢事機之會不可稍遲伏乞

皇上聖鑒訓示飭遵謹奏

附催調金都統馬隊疏

正封摺開接據鳳翔府知府蔣斯岱記名提督劉厚基稟報逆回馬隊於十四日黎明由汧陽黃里鋪竄至距城數里之十家

營古城一帶當經派防郡城之西安滿營佐領色靈阿帶隊出城甫抵玉皇閣逆騎千餘四面鈔至參領恩祥匹馬當先帶傷陣亡我軍奮勇衝擊鎗箭齊施斃賊多名奪獲賊馬二匹適劉厚基由武功兼程馳至列隊東南隅接仗賊騎分三股撲來各營分頭截擊一鼓猛進殺賊數名奪獲賊馬十餘匹生擒二名餘眾悉遁劉厚基整軍入城忽聞探報後路管解軍裝車輛弁勇被賊圍困開花銅礮二尊被賊搶奪該提督立率親兵馳往救護突入重圍該逆馬隊愈來愈多層層包裹劉厚基往來馳突殺斃悍賊數十名身受矛傷十餘處卒將礮位車輛奪回然賊勢頗已蔓延隴州各軍被賊隔斷兩三日不通音問等語查

該逆以大隊牽制隴軍另以騎賊繞路紛竄誠慮闌入腹地益肆鴟張別無騎兵可資抵禦查惟穆圖善所統甯夏馬步五十餘營休息日久而金順所領馬隊最爲得力現在靈州續經招撫安帖相應請

旨速催金順帶領各起馬隊兼程來陝以資掃盪黑龍江參領恩祥力戰捐軀殊堪憫惻并懇

敕部從優議卹以慰忠魂謹復附片陳明伏祈

聖鑒飭遵謹
奏

附防軍剿賊獲勝疏

再臣於五月初二日曾將派防保安定邊鄜州之同知鄆太愚
總兵段登雲楊得勝等迭次剿賊情形附片陳明在案嗣據鄆
太愚段登雲稟稱四月二十日探報甘省逆回董福祥高萬鎰
叛弁曾得勝等聚眾萬餘竄踞安化屬之棗子礪王家坳范家
坳黑老虎山一帶地方距金湯鎮吳旗鎮東花池等處各百有
餘里該二將定議越境會剿各率隊伍前進二十二日辰刻抵
王家坳該逆設伏要隘列隊山頭懸互十餘里我軍分路併擊
並出奇兵越溝翻嶺橫擊其腰該逆勢不能支敗至范家坳路
徑稍平膽敢回旂復抗我軍直前猛撲陣斬悍賊十餘名始紛
紛奪路逃竄我軍追殺十餘里賊屍枕藉計斃賊千餘名解散

脇從亦以干計並截獲賊酋眷屬就地正法我軍亦有傷亡二十五日回逆由甘屬之三道川竄擾蔡家澗龍鳳掌林家園吳家水口等處該二將商於二十六日親率各營由頭道川二道川三道川捲旗而進出其不意四面掩擊該逆左右衝突奪路狂奔我軍跟蹤追殺勇氣百倍計斃賊五百餘名墮崖落澗死者無數日暮始收隊回營又據楊得勝稟稱四月二十六日由華池拔營馳赴安化屬之申明亭探報回逆新被鎮西軍擊敗聞我軍猝至望風披靡向元城子一帶竄去該軍追奔十餘里整隊而回等情前來查此股回逆馬隊眾多東擊西竄飄忽靡常該處地勢遼闊山徑紛歧防不勝防該將等身先士卒越境

鵬勦潛師掩擊邊陲藉以肅清實屬著有微勞鎮西軍迭次冒險遠征勞績尤著所有尤爲出力員弁可否由臣查核彙案保獎出自

天恩其傷亡弁勇容俟臣查核辦理所有防邊各軍越境勦賊迭獲勝仗各緣由謹附片由驛具

奏伏祈

皇太后

皇上聖鑒訓示謹

奏

附請飭四川等省撥銀以濟急需疏

再陝省司庫支絀異常各路防軍欠餉早在十月以外現值防
剿喫緊之際尤難使枵腹荷戈而逆回糾眾東趨人心惶擾各
州縣地丁錢糧更難催收現復催調各路大軍來陝會剿需餉
浩繁實慮無可挹注伏懇我

皇上敕下四川山西湖北三省各解銀五萬兩以濟目前急需
並

飭卽速委解勿或諉延實所禱切伏祈

聖鑒謹

奏

官軍剿賊迭獲勝捷疏

同治五年六月初六日

奏爲官軍奮力擊賊迭獲大捷踏毀賊巢數十處逆勢大蹙現
籌調撥諸軍前扼後截併力痛勦各情形恭摺馳

奏仰祈

聖鑒事竊臣於五月十七日會將回逆大股紛竄隴州馬步各
軍接仗獲勝請撥甘軍會同勦辦各緣由馳陳在案比日接據
蕭德揚黃鼎邱時成劉玉興等稟稱該逆大股仍駐隴境銳意
東竄該將等商於十四日分路進攻預令毛福益先夜率六成
隊伍直過太陽溝口逼賊而營天明壘甫就該逆出馬隊數千
蜂擁來撲蕭德見王九齡率隊接應張映衡乘虛直撲太陽溝
蕭德揚自率親兵直撲高陵子邱時成洪殿元各率馬隊左右

包繞前進該逆將步隊退匿林中而以馬隊迎戰我軍鎗礮齊
施刀矛繼進賊騎稍卻復出步隊拌死抵禦張映衡翻上太陽
溝從山坡鈔下喊聲震天我軍愈擊愈奮該逆勢不能支紛紛
敗竄維時黃鼎劉玉興由南原河岸進攻白牛太沖兩峪賊巢
賊出步隊千餘排列山梁峪口馬隊左右林立幾於無懈可擊
黃鼎立派黃友忠趙雲鳳等各率隊伍分路並進賊騎屹立自
如張玉文督率藤牌親兵分兩起連環衝入賊陣賊騎四面圍
裹籐牌猱伏不動俟賊馬逼近始從陣中躍出施放短礮刀牌
並進下斫馬足上刺人身黃鼎劉玉興等奮勇直前兩面夾擊
該逆大敗而去是日計共斃悍賊六七百名奪獲牛馬軍械無

算我軍亦有傷亡黃鼎等當卽察看地勢於十五日移彝字營
進紮太冲峪口河岸各營皆派隊助築遠賊出而營壘已成賊
不敢近復於是夜派都司徐占彪帶奮勇數十名各持短刀掩
撲賊巢殺賊十餘名奪回太冲峪小溝一帶村莊十六日探知
該逆已分股踞紮遂玉村竄至杜陽鎮及汧陽屬之草碧鎮而
十四日繞撲鳳翔之賊經劉厚基奮力擊敗派營窮追亦連夜
退抵該處文報糧道均被梗塞十七十八兩日各軍出隊接仗
略有斬獲逆騎逡巡引退時督臣所派總兵劉效忠馬隊三起
步隊一營已抵隴州蕭慶高親率所部亦抵鳳翔兵力稍集彼
此緘商約於二十日會勦遂玉村大股賊巢十九夜黃鼎密派

徐占彪陳金彪挑選奮勇百餘人銜枚疾趨各持利刃多帶火
器潛襲白牛峪而自領親兵伏於峪口策應徐占彪等潛入峪
口探聽逆巢寂無人聲因率眾猱上山坡繞進數里一聲吶喊
火蛋火箭四圍齊發徐占彪等揮刃直入逢人便殺峪外伏兵
舉火鳴笳遙爲聲援該逆夢睡驚醒不辨虛實自相蹂躪拌命
奔逃我軍立將磨台山上棗園下棗園閻家台伐牛坡王家灣
等處賊巢盡行焚燬計斃賊二百餘名天明始行收隊二十日
劉效忠張玉文蕭德見王九齡黃友忠等各率馬步分爲三路
劉厚基亦飭親兵等營由草碧杜陽向逸玉村一帶進發兩面
夾擊蕭德揚黃鼎劉玉興邱時成洪殿元分列南原作爲疑兵

使該逆不能首尾相顧我軍直抵遂玉村該逆排列隊伍以馬賊往來衝突劉效忠等督勇奮擊洋鎗洋礮連環施放陣斬賊十餘名鏖戰三時之久始行敗去我軍追殺十餘里斃賊約五百餘名是日申刻蕭德揚探知距隴城三十餘里之屈家山白家灘麻子山史家鋪周家渠陳家巢廟溝里瓦房河一帶均有零星股匪盤踞肆行擄掠因密飭前左兩營進擊白家灘右營及果中左營進擊屈家山自率親兵與劉玉興王九齡等居中策應黃鼎邱時成洪殿元等列隊南北兩原閻家灣以牽制各路之賊僱覓嚮導月夜潛行各袒左臂爲號四鼓行抵該處該逆散處村莊不及提防張映衡等一湧而進刀矛並舉斃賊多

名隨卽堆積麥草放火焚燒煙焰障天該逆張皇無措爭相竄匿我軍跟蹤搜捕斬殺殆盡踏破賊巢十餘處天已破曉正擬整隊回營忽神泉堡蒲峪川王馬觜等處踞逆飛率悍黨數千前來鈔截蕭德揚劉玉興等分頭迎勦我軍勇氣百倍斃賊多名各營復出隊來援賊始敗回老巢是役計殺賊又六七百名奪獲牛馬甚多我軍傷亡亦數十名二十三日蕭慶高率所部及劉厚基之軍均次隴州連日察看地勢審度賊情議先清東南一帶巢穴以杜該逆紛竄汧鳳之路二十七日五鼓蕭慶高派所部會同蕭德揚劉玉興兩軍並劉厚基撫標一軍劉效忠馬步四營均於隴南梁甫川會齊由遂玉村前進又飭蕭德綱

蕭長青由八渡鎮趕赴遂玉村以備各軍策應又囑黃鼎彝字
等營邱時成洪殿元馬隊兩起並列隊於南原河壩晁家坡等
處以牽制西路之賊布置已定蕭德揚等直抵遂玉村分三路
進攻該逆分途抗拒我軍鎗礮齊施吶喊猛進賊勢不支悉向
楊家溝越嶺以遁我軍三路齊馳追殺數十里當將遂玉村一
帶賊巢數十處概行埽盪追至寬灘河距該逆老巢穆家莊不
遠遙見馬步悍賊麤聚該處勢同負嵎我軍一擁而前銳不可
當該逆大敗立將該處老巢攻燬方南路各營之進擊也麥棗
峪王馬鬣等處各出馬步隊千餘直出太沖峪口包截我軍後
路黃鼎等督隊迎擊斃賊多名賊殊死拒不退各勇望見山後

火起知我軍業已得手勇氣百倍猛撲奮擊併將該逆勦敗時
值日暮收隊計共斃賊五百餘名我軍傷亡亦數十名二十八
日蕭慶高知逆膽已寒我軍銳氣方盛商知各軍黎明出隊飭
蕭德見王九齡彭緒慶隨同蕭德揚左翼各營由神麻鋪前進
而以劉玉興劉效忠馬步各營繼之劉厚基率撫標各營黃鼎
率彝字各營由王馬背前進而以邱時成洪殿元馬隊二起繼
之蕭慶高自率親兵營並蕭德綱蕭長青等列隊西門河壩居
中策應蕭德揚等分路進攻高陵子張家莊陳家莊神麻鋪神
泉里逆巢該逆齊出抵敵我軍四面環擊陣斬悍賊三百餘人
逆眾奔潰悉向曹家灣老巢竄去我軍跟蹤躡擒斬無算趁

勢湧至曹家灣將老巢登時攻開該逆大股退竄故關維時黃
鼎劉厚基等亦各率隊伍直搗王家觜殄賊極多賊眾自知不
敵悉向蒲峪川狂奔我軍賈勇奮進隨將蒲峪川攻破餘逆均
竄咸宜關斯時勢同破竹正思會搗故關咸宜關兩巢忽然天
降大雨鎗械沾溼祇得收隊回營是日凡斃賊二千餘人奪獲
牛馬軍械糧石無數拔出難民六七百人各處鄉民寨堡被困
者數十村均已解圍各等情前來臣查此次回逆四五萬盤踞
隴境蔓延五六十里逆酋馬生彥任老五孫義章李大帥馬星
福蘇蛤兒崔三穆三鄒保和海子馬等糾思歸之眾併力犯陝
誓不返顧其兇鋒若不可遏茲幸旬餘以來我軍晝夜攻擊踏

毀賊巢埽盪數十里殺斃悍賊數千名逆勢已覺窮蹙現查所
踞故關一帶在隴州西北隅與清水華亭境壤相接誠慮再經
痛勦卽由此路竄逸臣前咨請督臣飭派現駐蓮花城之提督
王得勝一軍由馬鹿鎮前來會勦期預截其還竄之路此時該
軍如已前來則前扼後擊當可共收合圍聚殲之效除再飛催
王得勝兼程前進並飭蕭慶高督率諸軍併力痛勦以靖逆氛
外所有官軍擊賊迭獲勝捷踏破多壘逆勢已蹙現籌前截後
勦各情形謹繕摺由驛馳奏伏祈

皇太后

皇上聖鑒訓示謹

奏

附陳譚營譚潰情形疏

再臣於五月十八日接據駐紮平涼之總兵沈大興稟報譚玉龍所部勇丁於十三日在華亭譚潰聲言欲赴西安索餉現已行抵隆德等語旋接涇州文武陸續稟報探悉該潰勇已到平涼尙屬安靜經提臣雷正綰收雷陳義閻定邦等七營其餘五六營行至距涇州六十里之花家莊駐紮亦未滋事現經涇局委員趕辦麥麪前往安撫等語臣以該營勇丁動輒譚潰若不許其招撫既恐激成事端然但一味優容亦恐後難驅策當經批飭傳諭各營責以大義必須顯立功效庶可稍益愆尤然慮

事變紛紜之會未能處置得宜復飭藩司林壽圖馳赴涇州相
機辦理以該藩司總辦甘省糧臺與各營官尙相聯屬且能周
悉其情狀而曲協其權宜也二十一日林壽圖帶印出省行至
永壽臣旋接據安肅道蔣凝學稟稱譚玉龍於十九日到涇見
該道自陳因病誤公深自引咎今願率眾赴陝勦賊立功自贖
蔣凝學因其情詞懇切當令卽率所部六營於二十日由崇信
趨赴隴州會勦等語其時涇防總兵陳德隆因聞隴州賊勢浩
大亦率所部八營由邠乾前來助戰臣以該二軍由甘來陝不
知能否與陝軍相洽因飛飭林壽圖卽由永壽折赴鳳翔料理
糧運並令調護諸將與蕭慶高商畫進勦機宜今譚玉龍一軍

段登雲各派幹弁健卒以三四十騎或七八十人爲一起或預伏村莊擒其攜糧之眾或疾趨山隘截其巡哨之人數日之間迭有斬擒十七日偵知馬穆二逆率領馬步悍賊數千期於十八日會撲金湯鎮鄆太愚當派鄭春元埋伏李家坳洪輝堂埋伏腳踏川均於黎明起行距金湯或十里或十餘里不等鄆太愚自督親兵及鐵騎營前趨白口川巖陳以待時屆日中果見馬賊千餘蜂擁來撲當卽施放連環鎗礮斃賊多名該處隄路逼窄迂曲不便馳騁洪輝堂忽由右路衝出揚旂鼓噪勢若山崩該逆紛紛敗竄我軍追殺二十餘里直至齊家台地方始行收隊而該逆步隊之在後者亦被鄭春元同時擊敗計斃賊共

百餘名生擒數十名奪獲騾馬軍械無算我軍傷亡數名鄭春元亦帶矛傷幸無大礙二十一日夜鄔太愚復派洪輝堂鄭春元黃廷藻等分率左右鐵騎三營由南路進剿雙廟子一帶而自率中營揚隊李家坳以牽制白寶大股踞匪黎明鄭春元等行抵雙廟子地方奮勇殺入施放火器該逆猝不及防紛紛狂竄我軍追殺二十餘里斃賊極多生擒二十餘名立將李家曲趙家碓等處賊巢數十處悉數埽盪餘逆悉由白寶竄去又據段登雲稟報五月十八日諜報大股回逆竄抵頭道川恐其勾結南路高萬鎰等夾攻吳旂鎮段登雲卽於是晚虛布旂幟於南路山巔以疑高逆次日五鼓密飭李楚英由頭道川左嶺進

殷華廷由右路進自率親兵及馬隊沿川而上行十餘里正遇該逆馬步大隊飛奔前來我軍迎頭截擊鏖戰逾時李楚英殷華廷自左右嶺上吶喊而下直鈔賊後該逆喪膽狂奔我軍追殺數里因恐南路有失收隊回營而高萬鎰聞風亦於是夜潛蹤遁出計斃賊百餘名生擒二十餘名奪獲器械甚多查點我軍並無亡傷二十二日逆回復由二道川三道川兩路而來麇集該處段登雲出隊迎擊該逆遙見我軍到來捲旂而退該將等追殺數里方欲整隊回營忽接探報距吳旂鎮二十餘里之土窩川有馬賊千餘順川飛竄而出段登雲當卽移師往勦酉刻抵該處適與賊遇我軍賈勇奮進鎗礮齊施該逆不知官兵

多少自相踐踏回頭亂竄我軍追殺十餘里因天色已晚未便窮追卽於該處金沸坪枕戈待旦至二十三日始行收隊計又斃賊百餘名奪獲騾馬器械甚多我軍受傷者亦有數名各等情前來臣查此股回逆素與隴州大股聲氣相通其約會同時分路犯陝固在意中雖經該將等扼隘繞擊迭挫兇鋒而逆黨驚悍成性飄忽靡常實屬無時可懈且當甘省滿目荒蕪無糧可攜之際必不肯束手待斃此時防務未可稍弛除飭該二將嚴密防範保固邊疆外所有保安防軍連日擊賊獲勝緣由謹附片由驛具奏伏乞

皇太后

皇上聖鑒訓示謹

奏

請將隨征陣亡員弁捐建昭忠祠疏

同治五年六月十二日

奏爲漢南各處節次陣亡員弁勇丁籌擬捐建昭忠祠分別列祀以彰義烈而勵人心恭摺仰祈

聖鑒事竊據記名提督漢中鎮總兵蕭慶高稟稱該鎮由川統領湘果中軍援陝自漢中油房街至八里坪以及盤屋焦家巷並階州等處勦辦曹蔡啟三逆先後百有餘戰內總兵蕭舉臣張怡輝蕭慶泗譚能德蕭桂祥賀蘭桂副將蕭慶有夏有勝李鎮山徐宏勝李凱章鄧光華並同知蕭積玉以及參游都守干

把外委共計陣亡三百餘員名勇丁一千四百餘名該鎮忝列
戎行頻年以來藉其死力殄滅羣兇一將之功未竟百夫之骨
早寒迄今追維實堪慘惻擬與標路各屬籌捐款項在於漢中
府城建立昭忠一祠酌撥民間所遺絕產田地取納稅石作爲
春秋祭賽之資並將援勦四川秦隴暨湘果右軍陣亡人等連
積勞病故之河州鎮總兵何勝必一併附入俾昭忠節等情具
稟請

奏前來臣維成仁取義固志士之常懷效命捐軀尤武夫之大
節比年賊匪肆擾荼毒蒸黎凡在死事職官陣亡弁勇莫不仰
邀

賜卹渥荷

恩施洵足以作士氣而慰貞魂今援陝甘文武各官將弁勇丁或刀矛及身而首不回或矢石貫胸而目不眩知臨難毋苟免咸視死以如歸雖職位之不同實節烈之無愧可否仰懇

天恩俯准所請在於漢郡捐建祠宇將陣亡文武官員將弁暨積勞病故之河州鎮總兵何勝必合祠列祀並將各勇丁一體附祀由地方官春秋致祭以彰忠盡而勵人心出自

鴻慈所有漢南等處節次陣亡員弁勇丁捐建昭忠祠分別列祀緣由理合恭摺具

奏伏乞

皇太后

皇上聖鑒訓示飭遵謹

奏

附請殉難紳士合建專祠疏

再平利縣四品封職余輝遠前於同治元年十二月閒川捻等匪竄擾陝西圍攻興安該職督勇登陴守禦月餘備極辛勤嗣值府城失陷該職巷戰捐軀當經前撫臣奏請

賜卹並附祀前興安府知府林映棠專祠在案茲據郡屬紳士蔣常垣等公呈平利縣在籍贊善銜翰林院庶吉士邢景周帶勇禦賊被害曾經都察院奏奉

上諭建立專祠該紳等擬將余輝遠與邢景周就平利縣城合
建一祠由本地自行捐辦等情由藩司林壽圖查明具詳前來
臣查邢景周余輝遠兩員同隸平利均以紳士捍賊殉難今該
紳等請以平利之紳士歸併平利之專祠既屬眾論咸孚足使
義烈並著可否仰懇

天恩俯准合建一祠以順輿情而慰忠魂之處理合附片陳明
伏乞

聖鑒飭遵謹

奏

附籌解甘軍餉銀軍火數目疏

再臣迭奉

諭旨籌撥甘肅軍需雖值困乏萬分不敢稍存膜視業將同治五年四月分撥解過援甘各營餉銀軍火數目附

奏在案茲據軍需局司道詳開同治五年五月分解支過援甘餉銀一萬兩鹽菜銀三千兩均經分別委解交納取有迴文爲據臣覆查無異除仍飭該司道等竭力籌措源源接濟外所有陝省同治五年五月分解支過援甘各營餉銀等項數目謹繕清單恭呈

御覽理合附片陳明伏乞

聖鑒謹

奏

官軍踏平賊巢疏

同治五年六月十七日

奏為官軍攻剿逆回大獲勝捷踏平故關老巢並跟蹤追逐出
陝擒斬極多謹將現籌越境追剿情形恭摺馳陳仰祈

聖鑒事竊臣於六月初五日會將官軍擊賊大捷逆勢已蹙並

籌前截後剿各情形由驛馳奏在案我軍自五月二十七八迭
破賊巢之後二十九日大雨傾注山水驟發未能出隊午後稍
霽即據探報暨逃出難民供稱前踞咸宜關之賊恐我軍四面
圍擊均已歸併故關一帶老巢意圖合力抗拒等語蕭慶高當
即飛催現住曹家灣流渠場等處馬步各軍均於四鼓出隊圍

同治五年六月十七日

奏

攻故關老巢六月初一日黎明蕭慶高自率親兵由州城前往督戰各營陸續到齊先將姚家店一帶逆巢埽盪卯刻馳抵故關該逆羅列馬隊二萬餘人出巢迎戰蕭德揚卽率所部由中路進劉玉興繼之蕭德見王九齡彭緒慶由左路鈔擊蕭集山毛福益由右路鈔擊劉效忠率馬隊四面策應我軍鎗礮齊施逆眾死拒不退鏖戰逾時適劉厚基黃鼎邱時成洪殿元等大隊齊到蕭德揚劉玉興等擂鼓催戰各軍賈勇爭先四面吶喊衝入賊陣立斃當先悍賊七八百名逆眾不支紛紛棄巢分三四路敗竄當將故關攻克我軍分途追殺黃鼎劉效忠各率所部及彭緒慶王九齡毛福益張玉文等追至馬巒坡沿途斃賊

極多該處山路崎嶇逆眾擁擠不前騎賊均下馬拋棄婦稚徒步而竄我軍跟蹤緊追左右截殺屍骸枕藉蕭德揚劉玉興各率所部與邱時成洪殿元蕭德見由唐家河追至上岔口該逆回旂轉鬪蕭德揚等各率隊伍四面鵬擊賊忽大敗掩殺十餘里賊屍盈路復追至馬家溝路徑迂迴山石嵯峨該將等飭令弁勇踐踏賊屍而進該逆奪路奔逃有殺眷自刎俯首乞命者我軍直追至出境三十里地之廟灘地方劉玉興孟學文等又分路追至秦家園斬馘甚多劉厚基一軍由右路直追至長甯驛匪眾自相踐踏屍橫遍野溝渠皆滿餘孽拋棄輜重婦女狂竄是日計共斃賊萬數千名奪獲騾馬橐駝牛羊共計二萬餘

頭軍械糧石無算我軍亦有傷亡是晚蕭慶高卽飭各軍分紮唐家河秦家園馬巒坡一帶並飭近地寨堡居民負取拋遺糧石以濟民食初二日探報故關左右唐家河馬巒坡關山上下尙有賊騎游弋或數十人或百餘人查因我軍追剿捷速有由各小徑逃避者有由張家川折回尋覓頭目眷屬者蕭慶高當飭各軍均派隊伍於各處山原村堡搜捕餘孽黃鼎蕭德揚彭緒慶王九齡等復於馬巒坡嚴家鋪等處搜捕截殺斬馘又千餘人初三日晚回紮三岔河正擬越境窮追忽報上關鐵馬河一帶另有股逆眾萬餘人續由華亭竄至盤踞擄掠譚玉龍督帶捷字六營適抵該處與賊接仗已獲勝捷殲斃不少而賊來

愈多眾寡不敵劉厚基當卽星馳赴援蕭慶高隨派蕭德見隨同蕭德揚劉玉興黃鼎劉效忠邱時成洪殿元等卽於初四日前往會勦是日逆眾悉銳圖撲蕭軍譚玉龍正在督軍鏖戰營官副將方得元參將余炳忠等五員戰歿於陣勇丁死者一百餘名勢正危急劉厚基率隊突至大呼陷陣譚玉龍亦卽督勇奮擊共將該逆勦敗追奔十餘里斬馘甚多各等情稟報前來臣查此股回逆竄踞隴境蔓延六七十里眾至四五萬人垂涎故土銳意東歸其勢燄鴟張已成必死之寇無復反顧之心幸賴各將領同力同心士卒用命旬日之間將該逆老巢悉數掃盪追逐出境前後斃賊以二萬計臣前咨請督臣飭派王得勝

由蓮花城赴馬鹿鎮會剿以收兩面夾擊之功嗣聞省喫緊
王得勝一軍已經曹克忠調赴蘭垣以致餘孽得由張家川竄
往清水一帶據訊生擒賊供崔三李偽大帥均帶重傷或供李
大帥已經殲斃又陣斬逆目鄒保和馬福星傅阿渾等十餘名
實屬該逆從前未受之大創所有此次尤爲出力員弁相應籲
懇

天恩俯准由臣核實保奏以示鼓勵其陣亡將士容俟臣查明
照例辦理現據各路探報逆黨後隊由靜甯竄至華亭者復數
萬人前股已踞華亭屬之尖骨山臣現飛飭漢中鎮總兵蕭慶
高會同藩司林壽圖督飭陝甘諸軍先將尖骨山一鼓盪平再

規會剿之法其敗竄清水之匪已飭陳德隆帶所部八營繞赴秦安扼紮以護秦州運道除飭各軍分扼要隘並派兵越境剿辦外所有官軍大獲勝捷踏平回逆老巢並分路追剿獲勝各情形謹繕摺由驛馳

奏伏乞

皇太后

皇上聖鑒訓示施行謹

奏

附譚劉兩軍迭獲勝仗疏

再臣頃據譚玉龍稟報六月初三日拔赴距隴四十里之赤延

鎮地當華亭上下兩關往來要道探悉該逆盤踞上關白楊林
尖骨山一帶擾及崇信縣屬之神峪河眾約萬餘人正在擄糧
見我軍突至卽行狂奔回巢初四日丑刻令各營偃旂息鼓裹
糧進攻秦國輔親率精銳直抵巢外拋擲火蛋該逆夢中驚醒
猝不及防我軍飛躍入巢刀砍矛刺斃賊數十名立將白楊林
各逆巢盡數踏毀餘逆翻山越澗而遁我軍跟蹤追殺直至上
關該逆傾巢而出漫山徧野當令秦國輔胡日盛張士榮方得
元彭家元對陣轟擊又派余炳忠桂洪元從右路山坳繞襲賊
巢攻其必救自率親兵往來策應秦國輔等督陣猛攻喊聲震
天賊勢稍卻我軍乘勢疾趨勇氣百倍維時余炳忠等已由山

劫鈔出至上關該逆回救各軍鼓譟而前方得元深入賊叢手
刃數賊胸受矛傷數處登時陣亡余炳忠躍馬當先身中洋礮
傷重垂斃適劉厚基帶撫標各營從鐵馬河馳至我軍愈奮一
湧而入遂將上關賊巢平毀隨卽追至下關又將逆巢攻克餘
眾悉向尖骨山一帶竄去是日卽令各營駐紮下關正在修築
牆壘該逆又出馬隊數千蜂擁來撲我軍靜立不動待其將近
始用鎗礮連環轟擊傷斃逆眾多名賊乃逡巡引退是日共計
斃賊千餘名陣斬白巾黃衣賊酋一名生擒五十餘名奪獲騾
馬百餘匹救出難民七十餘口我軍戰歿弁勇亦百餘名訊據
生擒賊供稱此股逆酋係渭南余阿渾馬阿渾所統男婦約二

萬人定欲竄回陝西就糧各等語訊明後當卽就地正法初五日黎明該逆復出馬賊兩路分鈔逼近營壘我軍憑壘施放鎗礮斃賊約數十名逆眾陸續退回初六日會同劉厚基將附近零股逆賊擊敗亦有斬獲因查該逆老巢現踞華亭尖骨山又於踞巢十里外密布巢穴重設卡隘當與劉厚基籌商非節節掃盪不足以遏兇鋒初八日夜密約兩軍五鼓出隊銜枚疾趨以撫標營攻其右捷字營攻其左初九日辰刻劉厚基進抵王家山該逆嚴扼山口要隘湧出悍逆數百負嵎相抗另以馬賊千餘由右路包鈔營官羅洪德唐本朋揮軍直前登時奪卡其後路包鈔之賊亦被營官文星明張榮華擊敗譚玉龍亦將左

路賊卡燒燬該二將登高瞭望見萬山叢雜之中賊營棋布山罅巖隙巢穴潛通因揮兩軍長驅入山痛勦逆眾節節退拒追至暖莊川巨巢山勢險阻溝塹重疊賊騎五六千出巢迎敵我軍賈勇奮攻鏖戰數時賊復下馬步戰短兵相接譚玉龍引軍從左路鈔出逼巢而陣該逆飛躍下山勢甚兇猛當飭各營迎勦左右截殺該逆愈聚愈眾劉厚基復率礮隊助擊立斃悍賊數十名賊遂大奔追殺二十里始行收隊是日計共斃賊千餘名平燬賊巢十餘處奪獲騾馬軍械無算生擒二十餘名訊明後就地正法我軍亦有傷亡又據安肅道蔣凝學稟稱奉督臣札調前赴秦州行至華亭適遇回逆攻撲縣城遂駐該處扼勦

雖迭獲勝仗而賊眾兵單未能痛加勦洗各等情前來臣查此
股回逆本與前股勾結東竄因聞踞隴大股業經我軍痛勦狂
奔游弋徘徊未敢深入查尖骨山雖係華亭地界然距隴州不
數十里唇齒相依甘省一日有事則陝省一日不安臣現飭隴
州馬步各軍星馳前進期先將尖骨山逆巢勦除淨盡然後進
規華亭會合蔣凝學兩面夾擊冀合兩省之力稍紓邊境之憂
此次陣亡副將方得元已革副將銜參將余炳忠游擊殷得高
夏得勝林得勝都司邵至咸等奮勇捐軀實堪憫惻相應請
旨交部照例議卹以慰忠魂其餘傷亡員弁容俟臣查明彙案
照例辦理所有譚玉龍劉厚基迭獲勝仗各緣由謹附片由驛

具

奏伏乞

聖鑒訓示謹

奏

附請飭浙江廣東撥餉協濟疏

再臣現接蕭德揚黃鼎稟報探聞陝省逆回顏余兩酋在靜甯攻破李助發營壘後帶慣戰馬隊萬餘步隊數千各挈家眷銳意東竄來陝又探聞前次敗竄張家川之賊復飛調固原一帶逆黨數萬意圖再犯陝疆連日以來馬鹿鎮長甯驛大小關山秦家莊唐家河等處時有賊騎游弋窺伺又接林壽圖十二日

隴州來稟稱探悉崔三句結馮馬各逆酋續由固原華亭而來
初在隴境西北日來賊多股分或由馬峽口漸趨鐵馬河以窺
故關或由神峪河馮山堡漸趨赤延鎮以窺白巖嶺又獲奸細
詢知張家川敗賊句結各股圖率餘黨來犯咸故兩關此處隘
口不可無兵防守合計隴州馬步僅止十七八營現與蕭慶高
會商擬以陳德隆一軍分防故關咸宜關曹家灣等處換出湘
果左翼彝字各軍進剿上下關神峪河一帶逆匪甚慮賊眾兵
單不敷分布等語臣維賊勢軍情瞬息變換自應相機布置惟
逆黨如此繁多我軍究嫌單薄查前次迭奉
諭旨飭甯夏將軍穆圖善抽撥得力馬步赴陝會剿固不得不

催速前來又臣前因賊竄隴境曾派員赴河南汝甯一帶招募馬隊兩起旋又派員前赴安徽亳州一帶添募馬隊一起計月內均可抵秦現因各軍奪獲賊馬甚多復令挑選臚壯堪任戰陣者募立馬隊期湊足二千騎之數庶足與逆賊馳逐於平原曠野之間又咨請穆圖善派撥總兵鄭啟貴率所部三營移紮保安屬之吳旂鎮替出鄆太愚一軍並咨督臣楊岳斌轉飭慶陽統將張在山抽撥三營駐紮鄜州之河上原替出楊得勝一軍來赴邠隴以資防剿竊計以上各軍調到馬隊募齊之後所需月餉實屬無款可籌而現在前敵各軍欠餉均逾十箇月之久無可支給日虞譁潰旦夕仰屋焦灼徒深查上年粵匪汪海

洋等竄擾閩粵調集大軍會剿需餉尤繁今此股早經蕩平計
餉需可資挹注頃臬司胡肇智由閩到任臣當面詢各省協餉
情形據稱浙江一省月協督臣左宗棠軍營餉銀十四萬兩其
後減至八萬按月轉解賊平之後遂以停止比見兩江督臣曾
國藩籌議鮑超軍餉摺內有欲騰出浙江廣東餉銀以大批協
解甘肅等語竊查甘肅軍務實因餉源枯竭軍無鬪志各省月
協之款多不能如數解濟而採運軍糧耗費尤鉅兵飢將餒是
以迄無起色現在各路逆回均以飢窘圖還陝西如能就陝邊
剿滅一股即可爲甘省減除一股臣現籌厚集兵力越境剿賊
亦欲靖甘境以固陝疆無分畛域所慮餉糈無著莫遂遠圖合

無籲懇

皇上天恩敕下浙江撫臣馬新貽月協餉銀六萬兩廣東撫臣
蔣益澧月協餉銀四萬兩卽從六月爲始按月委解湖北藩庫
交收仍由甘肅糧台解赴陝省由藩司林壽圖酌量分撥陝甘
各營以贍飢軍而維大局一俟華亭清水靈臺崇信各處逆氛
肅清之後卽可將此項協餉撥歸甘省以符原議臣與督臣楊
岳斌商辦陝甘軍務通力合作從無彼此之分除由臣會同楊
岳斌商馬新貽蔣益澧照議籌辦外理合附片陳奏伏祈
皇上聖鑒訓示飭遵謹

奏

劉中丞奏議卷十七終

劉中丞奏議卷十八目錄

陝省教堂基址迄無確據疏

附陳撥還教堂利害情形疏

附請飭遣員徑赴秦州疏

西路大臣患病請回旂調理疏

附催穆副都統迅速赴任疏

附籌解甘軍餉銀軍火數目疏

陳病難痊愈請開缺回籍調理疏

附請將撫篆交藩司護理疏

查參疏防藥局委員疏

附請丁憂副將暫畱署任疏

附籌解甘軍餉銀軍火數目疏

請獎克復階州出力員弁疏

附請羅寇兩員照舊給獎疏

附請將黃有忠羅應旒兩員改獎疏

附請開復張開鑑疏

統兵大員病故請卹疏

附請補漢中鎮員缺疏

查明已革知府勞績疏

附略陽縣知縣城池失守免議疏

附請開復知縣張守嶠疏

彙報官軍越境鵬勦獲勝疏

附截擊偷竄回逆疏

附覆奏派兵防堵武關情形疏

五五ノ二五三ノ一ノ目録

劉中丞奏議卷十八

湘鄉劉 蓉著

陝省教堂基址迄無確據疏

同治五年六月十七日

奏爲查明陝省教堂基址迄無確據屢商換地抵償始終堅執故違條約謹將先後商辦情形恭摺具

奏仰祈

聖鑒事竊臣前於二月十四日欽奉同治五年二月初七日
上諭總理各國事務衙門奏查還陝西教堂請飭速辦一摺各
省還天主教堂舊址原係按照和約辦理自應早爲完結以免
外國人借口陝西省已歷五年尙未辦結迭經總理各國事務

衙門咨催該撫僅以西安教堂並無實在憑據未能照辦城固教堂則因教主未到莫可籌商等詞聲覆今該國公使以陝西因循未辦請立限六箇月期內交還著劉蓉迅飭該地方官將查還西安城固原有教堂速行設法辦結並立予限期毋得再四延緩此係照約辦理事件該撫務當認真籌辦將此案及早了結免致外國人嘵嘵不已以符條約等因欽此伏查此案經前撫臣督飭藩臬兩司查得西安省土地廟什字街草廠菴有已故翰林院編修張大相父遺住房屋一所買自費張王等姓改併一宅數世同炊是否係天主教堂舊基無案可稽該教士亦未指明四至畝數何年因何毀壞切實憑據可否酌量撥給

空閒地畝少許令其照依條約建造等情詳由前任撫臣瑛棨於咸豐十年九月咨呈總理各國事務衙門旋准咨覆該教士若果安分傳教自可酌撥空閒地畝聽其自建等語同治四年復准總理衙門咨催辦理經臣節次催飭藩臬兩司督同西安漢中兩府查照辦理旋據兩司轉據西安府暨咸甯長安二縣調查新舊契據實係費張等姓輾轉售買並無天主堂遺址此外府縣又無的實憑據礙難清還必須該教士呈出地基畝數糧冊方能仿照山東浙江成案按數撥還等情具詳前來其城固教堂基址已經改建書院查有碑記可憑從前曾有就城外三里之大河壩地方給予地畝抵還之議屢經催飭漢中府並

委員前往妥籌辦理旋據稟稱傳到教人左大元等皆以教主未到不敢擅議爲詞經臣批飭催速商辦並將詳細情形咨覆總理衙門在案嗣復面飭西安府轉飭高陵縣查察可抵之地與該教士籌商辦理旋於本年二月接准總理各國事務衙門來咨法國照會請於六箇月期內交還完竣經本衙門具奏請旨飭催並鈔錄原奏咨會到臣隨又飭催趕緊設法籌辦去後嗣據西安府知府呂儁孫呈據署高陵縣知縣陸堃詳稱二月十一日親往城西通遠坊會見主教高一志言及省城教堂一事據稱張宅係教堂舊基索要數載未與上年赴京呈訴已蒙總理衙門允還該令當卽告以所指基址並無確據卽以一面

之詞爲憑亦應遵照咸豐十一年七月通行條約年久轉相售賣勢難給還按照原基畝數另行查地抵給與該主教面商不願三月十一日差人往請該主教來縣會議回稱外出二十三
日備文移會僅據教士龔三峯函復云該主教現往西鳳治理教務須至五月初開始還如不寬此日久當請回署商辦當經該令復函轉致請其速回直至四月十二日始准高主教移稱來移仍係不將原基歸還復以鄉地抵換前已言明不能抵換何庸會商等語該縣因查南關外三里舊有回寺一院前後四進兩廂計房二十六間甚覺軒爽復請高教士至署再三相商反復勸導該教士固執前言總以非省內張宅基址不可且云

案經伊國公使知會通商衙門伊亦不能作主該縣復於五月初一日親往會商並將山東浙江成案原文指出給看告知南關回寺房基及餘地共計十一畝零全數抵給而高教士心意不滿該縣知其意存推延復許給渭河叛產一處計房五間以冀早結不意仍復不允又於初七日專函往約束縣婉商旋據該教士函稱昨逼勘定日期復商以回寺原房並地基十一畝零抵換籌思再三會亦無益卽再商百次終不能換等語查該教士所指張紳住宅前曾督率咸長二縣會勘張紳係道光年間買自費張各姓其費姓於嘉慶年間買自何人展轉售賣代遠年湮契據遺失無從稽考姑就所指之地丈量計地七畝有

零今在高陵縣與該教士附近村莊撥地相酬係遵浙江山東成案仿照辦理其價銀亦無庸籌還原所以敦和好而杜衅端乃該教士總欲索還原基無論毫無確據難以憑空退給卽欲勉如所請而地係民業地方官亦萬難抑勒使從况現擬所撥高陵回寺屋宇高大木料煥新又與該教堂相近事旣甚便卽以畝數計之又復有盈無絀曲意遷就反覆相商正可及時了結詎該教士意在要挾故違和約殆欲以遷延之咎盡歸於地方官不知是何居心等情徑詳前來臣伏查英法各國與中國通商傳教載在條約共相遵守凡屬教堂舊址查有案卷可憑者自應分別交還如因年久轉相售賣勢難給還原基亦須按

照原基畝數另行查地抵給此其委曲通融之故原以曲全和好加惠友邦業經山東浙江辦有成案今該教士所指西安府張紳宅基府縣均無案卷可稽卽該教士亦不能呈出實在憑據原可置諸不論不議之列比因欽奉

諭旨飭令設法辦理立予六箇月限期不得不轉飭府縣曲意遷就以期依限完結茲據該府縣詳稱業與該教士晤商數次議以高陵縣城三里外南關回寺地基抵償查據該教士所指張紳宅基丈量計地七畝有零今所議抵之地廣袤十一畝有零兩相比絜既多出三畝有奇且該處新建回寺四進兩廂共有房屋二十六間料木煥新規模宏廠餘地既甚寬濶價銀無

庸籌還以此抵償實屬委曲遷就之至乃該教士始則託詞赴
鳳治理教務繼則諉諸該國公使知會辦理伊亦不能作主了
結終且有即使再商百次亦必不能抵換之語必欲得省城張
紳宅基而後快意無論張紳宅基已歷數世地方官勢難抑勒
相從且以漫無憑據之詞斷無遽卽讓還之理似此故悖條約
意在要挾轉瞬限期屆滿該教士又將以地方官因循不辦爲
詞除將詳細情形咨請總理各國事務衙門查核照會該國公
使恪守條約以全和好外謹將前後商辦曲折情形縷晰備陳
恭候

宸斷至城固縣教堂基址是否可以依限辦結之處容俟該府

縣稟覆到日再行妥議陳奏所有查明西安教堂舊基無據可指疊商換地抵償堅執不遵各緣由理合恭摺具奏伏乞

皇太后

皇上聖鑒訓示飭遵謹

奏

附陳撥還教堂利害情形疏

再查西洋崇奉天主漢時卽有祆廟之名其流傳最爲久遠同紇部落至唐會昌閒始入中原亦奉天主所奉經典大抵多同如祠廟不供神像祭祀不敬祖先葬埋不用棺槨之類亦無弗同者同治元年陝省回變蜂生渭北高陵首先煽亂凡屬漢民

村莊無不焚燬漢人男婦無不傷殘至今蔓草荒煙幾無寸椽片瓦獨該教人所居高陵通遠坊五村毫無凌犯屋宇廬舍巋然獨存謂係同教之人不加戕害由是漢民之畏死避禍者往往投入彼教冀獲倖存是其同類相護亦既顯有明徵矣西安省城回民所居街巷共十三坊計戶三千餘家計丁五千餘口生齒繁多人煙稠密自逆回搆亂以來頗虞暗中勾煽內變潛生所恃彈壓得宜羈縻有法使奸細無從牽引庶彼此尙可相安顧莠回每多於良回革心尤難於革面此城中紳民所爲早夜惴惴者也今若使法國教堂居然設立城內實慮潛相勾誘爲禍蕭牆且前此既有不加傷害之情日後必有陰相庇護之

勢從教黨類實繁有徒出入城門不容究詰將來或擊外回以
入城或挾內回以出省稽查嚴緊則恃彼教爲護符防範疏虞
則委前功於盡棄種種後患難以悉陳矧今各路逆蹤已逼陝
境妖氛旣熾隱患尤深外回之戀彼田園設心還竄猶內回之
懷其族類援手恐遲際此擾攘多故之秋宜圖消弭未萌之患
省城根本之地所係匪輕以故城內士紳屢赴府縣呈訴不但
張紳宅基萬難強讓卽欲就省城別購基址另建教堂亦有勢
難相從之處非若粵蜀各省別無隱患可虞可以聽其自便也
竊查總理衙門原奏總以條約爲憑今旣仿照成案另撥相當
之地與該教士數四婉商而始終堅持意存要挾竊慮該衙門

未悉陝省情形稍涉游移卽成後患不得不據實密陳伏懇我
皇上敕下總理各國事務衙門堅持條約換地抵償之議勿使
更有覬覦卽欲別議通融亦祇宜就省外設法所謂兩害相形
則取其輕際此賊氛不靖內患方殷該教人旣不免窺伺叵測
之情卽總理衙門亦實有調護爲難之處時勢所迫利害相權
臣亦頗費苦心非敢固執已見謹復密陳此中情形仰祈

聖鑒伏乞

睿斷施行謹

奏

附請飭遣員逕赴秦州疏

再臣現奉同治五年六月初七日

上諭總理各國事務衙門奏請飭催遣員田興恕赴戍等語著崇實駱秉章查明田興恕若尙在川省卽由該將軍等速派幹員押解出境若已出川界卽由楊岳斌劉蓉查明行抵何處派員轉解甘肅邊境守候西路稍通押令赴戍安置該將軍等接奉此旨著卽迅速查明一面勒限起解一面據實馳奏不得再四遷延等因欽此查臣頃據漢中府縣探稟稱田興恕已於上月由四川劍州起身行抵廣元縣不日卽將入陝等語查由廣元前赴陝甘大道必由棧道經由鳳翔轉趨邠州長武以達涇州道路遼遠時虞梗塞不如卽由甯羌略陽逕赴秦州較爲便

捷臣現擬派員前赴廣元縣諭令該遣員由甯羌州折趨略陽縣就赴秦州守候西路稍通再行押令赴戍安置免因道塗梗阻逗邁陝境致令外國人得以藉口是否有當謹先附片陳明伏乞

聖鑒謹

奏

西路大臣患病請回旂調理疏

同治五年七月初九日

奏爲西路辦理大臣患病難痊據情代

奏請

旨仰祈

聖鑒事竊臣頃於同治五年六月二十四日准和闐辦事大臣奎章遣家丁王升呈稱家主於元年十一月出京行抵直隸清苑縣因西路不通截畱嗣遵新章改由北路張家口仍復不能前進旋奏請隨同原任參贊大臣聯捷出關赴任奉

旨准行旋即折回於四年五月至陝西省城經聯捷委派辦理後路糧臺並經署西安將軍德興阿奏署西安右翼副都統迨交卸後查自陝赴甘道路梗塞自維出京已近五年未克到任日夜焦急本年正月陡患脣風調治無效加之手足麻木舊日便血之證亦復舉發現在下脣及兩手足心均各潰爛飲食坐臥須人扶持實非一時所能痊愈惟有援照西路各員中途患

病三月以上報明地方驗明代奏之例懇請開缺回旂調理一俟病體就痊卽當求

賞差事勉圖報效呈請代爲陳

奏候

旨遵行等情臣卽札委鹽法道黃輔辰前赴該大臣寓所驗視旋據黃輔辰詳稱驗看得該大臣形容消瘦口脣暨手足心均皆潰爛行坐臥起動須扶掖語言亦甚費力委係患病屬實詳請核辦前來臣覆親往看視見其面色枯槁神氣消索言談臥起均形委頓是否能期痊愈尙未可知相應據情代奏可否准令該大臣奎章開缺回旂調理之處恭候

諭旨遵行所有據報患病委驗屬實緣由理合恭摺具

奏伏乞

皇太后

皇上聖鑒訓示飭遵謹

奏

附催穆副都統迅速赴任疏

再恭照同治元年

皇上登極欽奉

恩詔致祭

西嶽等祀又同治三年江甯克復欽奉

諭旨告祭

嶽瀆均已奉

旨派令德興阿致祭前准部咨催報兩次告祭日期時值德興阿署理西安將軍未便帶印出省而左翼副都統圖明額已經到任經德興阿咨商臣於本年四月十一日奏奉

諭旨告祭西嶽等祀著改派圖明額前往敬謹致祭欽此當卽恭錄知照該副都統圖明額正料理起程閒適德興阿蒙

恩簡放塔爾巴哈臺參贊大臣幫辦新疆北路軍務隨將將軍印信移交圖明額暫行接署該大臣旋即起身前往現在西安滿城惟圖明額一人兼值回逆壓境滿漢兩城應辦防務事宜

較繁是圖明額勢又難以分身伏讀邸鈔新授西安將軍庫克
吉泰已經

欽派督辦新疆北路軍務所有西安將軍印務已奉

旨派新授右翼副都統穆隆阿前來署理現尙未得來陝信息
相應請

旨飭催該署將軍穆隆阿趕緊赴任以便圖明額交卸印務前
往致祭事關典禮未可久延據圖明額與臣面商意見相同理
合附片陳奏伏乞

皇太后

皇上聖鑒飭遵謹

奏

附籌解甘軍餉銀軍火數目疏

再臣迭奉

諭旨籌撥甘肅軍需雖值困乏萬分不敢稍存膜視業將同治五年五月分撥解過援甘各營餉銀軍火數目附

奏在案茲據軍需局司道詳開同治五年六月分共解支過援甘各營餉銀一萬六千七百八十八兩三錢一分二釐鹽菜銀五千四百三十一兩六分一釐火藥二千斤火繩三千丈白布單大帳房八十架均經分別委解交納取有迴文爲據臣覆查無異除仍飭該司道等竭力籌措源源接濟外所有陝省同治

五年六月分解支過撥甘各營餉銀軍火等項數目謹繕清單

恭呈

御覽理合附片陳明伏乞

聖鑒謹

奏

陳病難痊愈請開缺回籍調理疏

同治五年七月初九日

奏為

微臣

患病日深難期痊愈懇

恩開缺回籍調理恭摺奏祈

聖鑒事竊

臣

自赴陝任以來積患左偏頭痛怔忡不寐之證業

於上年九十等月屢疏陳明在案十月交卸以後旋奉

恩旨嘗理撫篆自維病軀難膺重寄復疏請迅
簡賢員接任以資調理逮奉

恩諭飭令力疾從公以圖報稱感

聖恩之逾格卽盡瘁以何辭嗣茲以還勉力支持又逾八月屬
邊疆之多故輒奮勵以自圖冀竭愚忱稍紓

宸廑無如舊患怔忡積久增劇肌膚日覺羸瘦魂夢不得安謐
比月以來尤形委頓或值肝氣鬱勃則頭風暴發思慮焦煩則
目眚盡赤旣徹夜以無眠或日晏而未起不接僚屬至逾旬時
雖日日延醫時時弭藥刀圭屢進厥效茫如醫者謂由心氣久
損相火上炎非息心靜養一兩年斷難期其痊愈顧

臣受

恩深重被遇叨逾祇增艱鉅之投無可暇逸之日兼之資性顛
愚智術短淺每懷未形之患過爲先事之憂旣靡濟於時艱徒
自貽其伊感以故病有增而無減時以積而愈深若復貪戀
恩榮遷延歲月則百愆叢集諸務廢弛是貽戀棧之譏更切覆
餗之懼矧值邊氛未靖回患方殷苟謀畫之偶疏卽全局之盡
壞顧茲病體必誤地方再四圖維惟有顛懇

皇上天恩准開署缺迅卽

簡放賢員來陝接任俾

臣

獲還故里藉息病軀則以後待盡之

餘年實荷更生之

厚賜

臣

今五十有一齒髮初衰年力未暮或者仰沐

聖澤卒起宿疴數歲之間精神如故卽當趨赴
朝闕圖効馳驅未甘自棄於

明時終思仰酬夫

大德所有

微臣

患病日深勢難痊愈懇

恩開缺回籍調理緣由理合恭摺具

奏伏乞

皇太后

皇上聖鑒飭遵謹

奏

附請將撫篆交藩司護理疏

再查藩司林壽圖才識明敏精神強固均皆十倍於臣且涖任日久於地方情形軍務機宜諸能諳習臣現在別無經手事件如蒙

聖恩准予開缺請將巡撫篆務暫交該藩司護理俾得及早交卸回籍就醫實荷

聖慈是否有當謹復附片陳明伏乞

睿鑒謹

奏

查參疏防藥局委員疏

同治五年八月十三日

奏為查明疏防局存火藥硝磺被焚之同知從嚴參懲請

旨革職暫行畱任責成賠補恭摺仰祈

聖鑒事竊照陝省火藥局於同治五年四月十六日巳刻忽被雷火轟擊致將所存火藥十萬六千零二十八斤硝一萬九千九百七十四斤磺二萬一千一百七十斤柳炭四千九百三十一斤悉被焚燬在局工匠六名撫標領藥弁兵十餘名同時轟斃震塌倉廩民房多間壓傷人口多名當經臣將大概情形奏報一面請撥鄰省火藥以濟急需並聲明管局人員有無別故應否賠補另行詳辦嗣欽奉

上諭劉蓉奏陝省火藥局被焚一摺火藥被轟至十餘萬斤之多該管局人員漫無防範非尋常疏忽可比著劉蓉迅卽查明

嚴參懲辦等因欽此遵卽恭錄飭查辦理去後茲據軍需局司道詳稱督飭西安府勘得清軍廳署後建設火藥局一所後院審洞一座調查帳簿存儲火藥九萬八千七百八十八斤又碾藥房存收淨硝六千四百七十八斤磺二萬二百七十三斤柳炭四千九百三十一斤悉被焚燬詢之清軍廳同知張鴻績據稱前因倉猝約略計算具稟以致數目微有舛錯並無捏飾情弊提訊管局軍役孫義據供四月十六日巳刻風雨交作雷聲大震伊在局門看守正欲進內忽見雷火轟擊藥局甄石亂飛伊卽被震昏迷等語並查轟斃在局工匠六名撫標領藥弁兵六名壓斃十一名均卽棺斂飭屬領埋其震塌廟宇倉廩民房

傷斃人民亦經由司籌款撫卹修葬各費等情會詳請

奏前來臣查火藥收存之地防範自宜慎重今清軍廳局儲火藥硝磺柳炭雖係雷火轟擊事出意外該廳張鴻績以及經管人役查訊均無別情惟被轟計十餘萬斤之多軍火攸關未便諉諸天數相應請

旨將清軍廳同知張鴻績革職責令賠補火藥硝磺柳炭並修葺該局房以備要需而做疏忽現在逆回分竄需用火藥萬分緊急若任令開缺該員轉得置身事外應請暫行畱任以觀後效除將因公遇害之弁兵人役另造冊請

卹外所有同知疏防存局火藥硝磺等項被焚從嚴參懲緣由

理合恭摺具

奏伏乞

皇太后

皇上聖鑒訓示飭遵謹

奏

附請丁憂副將暫畱署任疏

再據總兵銜潼關協副將署撫標中營參將彭體道詳稱該員之母田氏於同治五年五月十六日在湖北原籍病故例應開缺回籍守制等情具請前來臣查彭體道由行伍隨原任西安將軍多隆阿進征皖鄂勦辦陝甘回逆屢著戰功迨署理撫標

中軍參將督捕游勇逃匪有犯必獲省垣賴以靜謐嗣復迭次
勦辦潰勇並在醴泉縣趙村地方會勦回竄回逆殲除殆盡經
臣奏奉

諭旨以副將畱於陝西儘先補用旋奏補潼關協副將仍署中
軍參將事本年五月逆回騎賊二千餘由邠長偷竄腹地又派
令帶兵馳赴涇陽三原等處星夜追勦該員謀勇兼優殺傷甚
夥餘逆喪膽潛遁出境不致蔓延爲患洵屬勇略邁眾不可多
得之員且平日督帶兵勇三營紀律極爲嚴明頃復添募一營
併歸該副將統轄當茲甘肅賊氛猖熾盤踞邊界時圖竄陝防
護省垣正值喫緊之際合無仰懇

天恩俯准將彭體道改爲署理潼關協副將仍畱署撫標中軍
參將在任守制實於防勦均有裨益是否有當理合附片具陳
伏乞

聖鑒飭遵謹

奏

附籌解甘軍餉銀軍火數目疏

再臣迭奉

諭旨籌撥甘肅軍需雖值窘乏萬分不敢稍存膜視業將同治
五年六月分撥解過援甘各營餉銀軍火數目附
奏在案茲據軍需局司道詳稱同治五年七月分共解支過援

甘各營餉銀一萬兩鹽菜銀三千兩白布單大帳房三十架鐵鍋六十口土洋藥二十斤均經分別委解交納取有迴文爲據
臣覆查無異除仍飭該司道等竭力籌措源源接濟外所有陝省同治五年七月分解支過援甘各營餉銀軍火等項數目謹繕清單恭呈

御覽理合附片陳明伏乞

聖鑒謹

奏

請獎克復階州出力員弁疏

同治五年八月二十八日

奏爲遵

旨查明克復階州擒斬首逆在事出力文武員弁核實開列清單保

奏懇

恩獎勵以昭激勸恭摺仰祈

聖鑒事竊臣於同治四年閏五月初五日准兵部火票遞到五月二十九日內閣奉

上諭劉蓉奏官軍攻克階州城池殲除首逆一摺髮逆蔡昌榮等自攻陷階州後增修壘卡意圖久踞經四川陝西甘肅等省官軍迭次攻擊先將三官殿龍王廟等處逆壘攻破遂由北山開挖地道數處剋期轟城胡中和等於五月十三日各派隊圍

守濠卡防賊竄逸時將黎明地雷齊發轟倒城垣數丈北路將士冒煙肉薄先登其餘各軍填濠豎梯猱升而上該逆拌死抗拒官軍扼巷截擊賊屍山積陣斬僞昭武王蔡昌榮分裂其屍並生擒僞天將陳姓等多名其玉皇觀賊壘及西南兩面礮臺亦經官軍攻破階城內外之賊悉數殲除無一漏網洵足以伸國法而快人心所有出力各員弁兵勇著劉蓉查明請獎候旨施恩等因欽此伏查此次克城殲除由四川派往勦辦者周達武江忠淑兩軍由陝西派往勦辦者湘果中右彝字英毅四軍除川軍業經督臣駱秉章遵

旨查明保奏外所有陝省四軍早經統將蕭慶高等開摺請獎

臣以所保人員過多迭飭核減至再至三近始查核確實謹將
在事出力員弁及採運軍糧官紳查照原摺核明分別等差繕
列清單恭呈

御覽伏祈我

皇上俯念各軍越境剿賊當階州瘠苦酷寒之地忍飢冒險負
盾荷戈積八年之辛勞靖三省之邊患准予特霈

鴻施以昭激勸除將干把以下各弁照例咨部獎勵外所有遵
旨查明克復階州擒斬首逆在事出力員弁核實保奏請獎緣
由理合恭摺附驛具

奏伏祈

皇太后

皇上聖鑒飭遵謹

奏

附請羅寇兩員照舊給獎疏

再知縣羅驤先由四川候選訓導調陝襄辦糧臺營務防剿出力於克復漢中府縣城池案內經臣奏請免選訓導以知縣歸部選用欽奉

諭旨俞允嗣接部咨改爲俟選缺後以應升之缺升用等語第查未奉文之先因攻剿蔡啟各逆出力業將該員奏奉

上諭羅驤著以知縣畱於陝西儘先補用並免交分發銀兩欽

此欽遵在案伏查前次免選訓導以知縣歸部選用之案既經部改俟選缺後以應升之缺升用則續得保案按章應另核獎茲因克復階州擒斬逆酋該員隨同出力著有微勞擬將攻勦蔡啟各逆勞績併作一案保獎請免選本班以知縣畱於陝西遇缺前補用並免交分發銀兩又四川同知銜永甯縣縣丞寇守智因克復漢南保奏奉

旨以知縣畱川儘先補用茲查克復階州該員隨同出力擬開永甯縣丞之缺仍畱四川以知縣歸候補班前補用合無仰懇天恩俯准將羅驤免選本班以知縣畱於陝西遇缺前補用免交分發銀兩寇守智開缺以知縣仍畱四川歸候補班前補用

飭部別分別註冊以示鼓勵之處出自

鴻慈爲此附片具陳伏乞

聖鑒訓示飭遵謹

奏

附請將黃有忠羅應旒兩員改獎疏

再據統帶彝字營畱陝補用道黃鼎稟稱該軍副營營官黃有忠先在湖南四川兩省勦賊出力累保至副將銜參將補用迨後隨同該道由川入陝派令管帶彝字副營赴援陝甘追勦曹逆燦章股匪迭破寨壘經

臣

奏奉

上諭總兵黃友忠著賞加提督銜並賞給捷勇巴圖魯名號欽此欽遵各在案查該員素不識字其名黃有忠既誤開爲友忠而副將銜亦誤開爲副將職銜名字均有錯誤又四川文生羅應旒前在甯陝廳屬勦辦曹逆出力擬請以訓導不論雙單月儘先遇缺卽選尙未出

奏旋於克復階州陣斬逆首案內經四川督臣駱秉章將擬保教諭作底保

奏奉

上諭擬保教諭羅應旒著以知縣儘先選用並賞加同知銜茲查副將銜參將黃有忠既未經保得副將應於追勦曹逆迭破

寨壘案內改爲免補參將以副將儘先補用其克復階州陣斬首逆該員戰功尤著應請改免補副將以總兵補用仍畱

賞加捷勇巴圖魯名號將所保提督銜註銷文生羅應旒前案應保訓導以擬保教諭作底於例未合請將前後兩次勞績併作一案獎勵以教諭歸軍功班不論雙單月遇缺前先選並

賞加五品銜仍將前保之同知銜卽選知縣一概註銷等情請奏前來臣查該二員均從征有年歷次衝堅陷陣無戰不先實非尋常勞績可比惟黃有忠所保官階錯訛羅應旒所保教諭於例未合殊不足以昭核實合無仰懇

天恩俯准將黃有忠以總兵補用仍畱勇號並將黃有忠名字

誤填黃友忠之處

飭部更正四川文生羅應旒以教諭歸軍功班遇缺前先選並
賞加五品銜以杜虛冒而昭核實敬候

宸裁爲此附片陳明伏乞

聖鑒飭遵謹

奏

附請開復張開鑑疏

再前代理城固縣候選知縣張開鑑先因縣城失守經臣奏參
革職畱營旋即隨同克復尙知愧奮復經奏請開復原參處分
免繳捐復銀兩欽奉

諭旨允准嗣准部咨該員雖已畱營並未准其免罪今僅止隨同克復並未另有勞績遽請開復原官免繳捐復銀兩核與章程不符應請撤銷奉

旨依議欽此臣遵查該員張開鑑以候選之員代理城固縣事維時賊逼城下無員可委本係從權該員接辦未幾城池遂失情較可原是以參

奏將其革職畱營以觀後效迨後該員帶團進剿隨同克復旋又隨同湘果中右兩軍設伏太王廟一帶殺賊多名生擒十餘人幫同官軍大破上元觀賊匪巨巢似卽部議所謂另有勞績此外在八里坪等處隨同湘果中營剿滅曹逆全股督隊克壘

生擒首逆並攻克階州擒斬蔡啟兩逆肅清漢南亦復身親行陣均係衝鋒冒敵克城殲渠迥非尋常勞績可比自應遵照部駁分別辦理茲臣謹按原定州縣失守處分章程以該員克破上元觀賊巢免于治罪其勦滅曹逆及攻克階州擒斬要逆計此兩次皆得越級保升前祇開復加銜尙屬從嚴無濫可否仰懇

天恩俯准將已革候選知縣張開鑑開復原官遇缺卽選仍免繳捐復銀兩並

賞加同知銜以昭激勸之處出自

鴻慈所有查明知縣失守畱營屢著戰功懇請開復緣由理合

附片陳明伏乞

皇太后

皇上聖鑒訓示飭遵謹

奏

統兵大員病故請卹疏

同治五年八月二十八日

奏爲統兵大員在軍營積勞因病開缺懇

恩優卹賜諡建祠以彰忠蓋恭摺

奏祈

聖鑒事竊記名儘先提奏提督漢中鎮總兵蕭慶高臣奏派總

統諸軍馳赴隴州旋將逆匪剿敗追逐出境進紮華亭屬之上

關地方圖搃逆回老巢本年七月二十四日該鎮親往暖莊嶺
察看地勢賊壘冒雨往還身體透溼回營卽患寒疾旋增喉結
咽痛各證醫藥罔效至八月十三四日自知不起傳知諸將至
榻前諭以未能掃靖妖氛酬報

君恩深抱遺恨屬令諸軍加意防範迅圖剿洗言訖嘔血而逝
並無一語與及家事等情由總理該軍營務記名提督蕭德揚
稟報前來臣查蕭慶高勇略俱裕曉暢軍機從戎十餘年轉戰
六七省迭著功績累保提督屢荷

聖恩賞賜物件茲值甘省軍務方殷正資爲關輔長城捍禦邊
境詎該鎮溽暑遘征積勞成疾大功未竟遽爾出缺殊深悼惜

查該鎮尙無子息除飭令親屬擇立後嗣並將身後一切妥爲料理外可否仰懇

天恩將記名儘先提奏提督漢中鎮總兵蕭慶高照提督軍營病故例從優議卹並乞

特恩賜諡入祀漢中前建祠宇以彰忠藎而慰軍心所有統將因病開缺緣由理合恭摺陳

奏伏乞

皇太后

皇上聖鑒飭遵謹

奏

附請補漢中鎮員缺疏

再漢中鎮總兵員缺駐紮南山林深箐密巡緝操防在在喫重額設馬步兵丁七千餘員名自逆蹤竄擾以後缺額過半屢思招募足額苦於無餉可撥因咨商該鎮蕭慶高卽以所部湘果各軍經臣飭令暫歸總理該軍營務蕭德揚節制所有漢中鎮一缺毗連甘境最爲緊要必須鎮將得人訓練調度始足以資整飭而固邊防查有記名提督蕭德揚謀勇兼優紀律嚴整記名提督劉厚基英勇絕倫辦事果決該二員久經戰陣馭兵得法可否仰懇

皇上天恩准於蕭德揚劉厚基兩員內

簡放一員借補漢中鎮總兵以資熟手而慰軍心之處出自
聖裁臣爲整頓營務起見是否有當伏乞

睿鑒飭遵謹

奏

查明已革知府勞績疏

同治五年八月二十八日

奏爲查明已革知府勞績卓著民情愛戴請

旨開復原官處分畱陝補用以示激勸恭摺仰祈

聖鑒事竊照道銜候補知府楊光澍前由鄜州直隸州知州委
署漢中府事失守城池奏請革職開缺嗣因漢中被陷時該員
先經毛震壽調赴行營旋即隨同大軍收復與在城防守不力

者究有區別奏奉

上諭楊光澍著免其查議仍革職畱任以觀後效等因欽此旋准部駁核與章程不符祇免查議仍照例革職畱營効力並撤銷畱任復經臣以漢中地方凋敝特甚該革員楊光澍人地實在相需奏蒙

聖恩改爲革職畱任仍署漢中府知府各在案本年四月間接據記名提督漢中鎮總兵蕭慶高稟稱楊光澍自回任後籌辦善後撫卹諸臻妥協補救得宜民情愛戴前此蔡啟兩逆擊敗由蓋屋突竄南山意圖復踞漢郡維時瘡痍甫起城守空虛該員聞警之餘督率官紳齊集兵練民團晝夜登陴逆黨大股迭

次來撲該員乘其喘息未定帶團出城迎擊會同該鎮各軍內外夾攻斬擒甚夥賊志不逞遂星夜從沔略遁赴階州以故危城得以保守予遺未遭擄掠迨後派辦階州軍糧該員設法購備長途源源接濟並籌款運解軍火多件毫無貽誤俾枵腹飢卒藉資飽騰迅收掃穴擒渠之效較在事行間者其力尤多四年四月甘省潰勇趨漢割麥該員扼隘防範一面招撫收繳軍器酌給路費分別押送出境人心均免驚惶商民安堵如故洵屬異常宣勤克贖前愆等情經臣札飭軍需局司道覆查相同並稱該員樸誠練達才識兼優爲知府中出色之員核議開復原官畱陝補用免繳捐復銀兩會詳請

奏前來臣查楊光澍樸質耐苦練達有爲前於漢郡失陷之際先已調營本與在城防守不同旋即隨同克復迨後賊撲城垣該員設法守禦剿擊擒斬甚多旋復督飭各屬採運米糧接濟階州各軍藉資飽騰卒殲巨逆實屬勞績卓著且素得民心輿論允洽洵爲知府中不可多得之員合無仰懇

天恩俯准將已革道員候補知府楊光澍開復原官革職畱任處分仍畱陝省補用並請免繳捐復銀兩以示鼓勵而資觀感
出自

鴻施臣爲愛惜人材起見是否有當理合恭摺具
奏伏乞

皇太后

皇上聖鑒訓示飭遵謹

奏

附略陽縣知縣城池失守免議疏

再同治三年八月間蔡啟兩逆敗入南山被各官軍跟蹤追剿該逆漏夜狂竄由沔縣斜趨略陽略邑先已兩次失陷城郭守具缺敝不全署知縣陳倫親率團勇赴接官亭堵禦因眾寡太不相敵遂護居民過河該逆紛紛闖入城中當經臣具摺

奏明在案茲據軍需局司道查明略陽縣城本早殘破迨同治元年被髮逆攻陷城內衙署廟宇等房全行焚燒城牆一律坍塌

聖中丞奏請卷十八
塌並無居民前署知縣陳倫於二年十二月抵任無款修城移
居南壩山寨與民共守三年八月初間蔡啟二逆竄至該員卽
督團勇在接官亭堵禦眾寡不敵保護民人過河其子陳世昌
中途遇害逆匪分股竄入城內旋經官兵追剿該逆因無可踞
守亦卽竄走該員又率團勇隨同官軍分布相公山隘口截擊
殲賊數百名生擒僞先鋒馬姓等十餘名就地正法並無聞警
先逃亦非防剿不力人民未被擄掠地方隨卽肅清情節實有
可原等情會詳免議請

奏前來臣查略陽城池旣早坍塌衙署房舍復被焚燬並無居
民直似荒郊曠野前署知縣陳倫於逆匪竄到之際眾寡不敵

移其民於山寨並督團隨同官軍分布擒斬要逆多名賊未據掠人民亦未滋擾地方可否仰懇

天恩將前署略陽縣知縣免其置議之處出自

鴻慈除將遇賊被害之陳世昌另案辦理外所有查明緣由理合附片陳明伏乞

聖鑒飭遵謹

奏

附請開復知縣張守嶠疏

再已革知縣張守嶠因前任鎮安縣知縣甫經接事卽值賊至無城可守致被撲陷旋卽克復殺賊多名經前撫臣瑛奏參

革職免罪旋經臣奏請畱營効力均奉

諭旨允准在案茲該革員督練護糧運送階州並押解軍火赴營迭次無誤又復隨同漢中鎮總兵蕭慶高在鳳縣收撫甘肅陶營潰勇經漢中府派令押解出境辦理諸極妥協且當大股竄赴洋縣郝家坪一帶復又帶團助戰擒斬甚夥實屬異常出力著有微勞可否仰懇

天恩准予開復原官以示鼓勵之處出自

鴻慈理合附片陳明伏乞

聖鑒訓示飭遵謹

奏

彙報官軍越境鵬勦獲勝疏

同治五年八月二十八日

奏爲彙報官軍越境鵬勦還軍截擊屢次獲勝已將尖骨山踞賊擊走現籌分兵防勦各情形恭摺由驛馳陳伏祈

聖鑒事竊

臣

於六月十七日曾將官軍追賊出陝隨籌越境鵬

勦情形並譚玉龍劉厚基在華亭屬之上關一帶迭獲勝仗各情附片陳明在案嗣據蕭慶高稟報已派陳德隆所部八營分守故關咸宜關四巘子等處其餘蕭德揚黃鼎等軍均於六月二十三等日自隴州拔赴上關十四日各軍逼賊而營譚玉龍劉厚基邱時成洪殿元等各率馬步隊伍分起站列以資衝突維時王家溝宋家堡暖莊村各路回逆傾巢而出眾約四五

千名蕭慶高督飭各營分路截擊麀戰三時之久始將該逆擊退於是各營趕築營壘時已未刻該逆忽出馬步悍賊潛由左右小溝鈔出直撲撫標各營當經劉厚基督隊猛擊各軍亦出隊伍策應逆勢不支紛紛大敗追奔十餘里斃賊二三百名我軍傷亡亦百餘名隴州距上關九十里我軍後路糧臺必由赤延鎮神峪河一帶經過該處路徑紛歧回逆時以馬賊往來標掠蕭慶高卽派劉玉興駐紮赤延鎮劉効忠駐紮神峪河蕭德綱蕭長青駐紮良舍鎮臣隨札調劉厚基回駐麟遊屬之麻夫站力顧後路糧運兼防逆蹤分竄時值陰雨連旬泥深路沒人馬均難前進二十四日雨霽蕭慶高約會各軍分路進擊蕭德

揚及蕭德見王九齡各營由宋家堡攻其中路彭緒慶洪殿元馬步兩營繼之蕭集山張映衡毛福益等由黎樹背進攻左路譚玉龍親率四營由小北溝進攻右路自率衛隊策應並調捷字四營列隊壘外以顧下關飭親兵兩哨伏於錫瓦梁右溝桑樹林間預防包鈔黃鼎率所部進攻杜家嶺并先期約會陳德隆飭駐四巘子兩營出隊牽制該逆見我軍四面並進大北山暖莊川之賊衝突齊出蕭德揚等首先破敵洪殿元率馬隊兩路包鈔逆眾悉向大北山上奔竄我軍步步仰攻鎗礮齊施而左右兩路之賊亦被譚玉龍蕭集山同時擊敗合追至大北溝搶上山頂立將山上及暖莊川一帶賊巢盡行焚燬我軍分據

三面俯瞰十字路尖骨山馬峽口各老巢內復出馬步萬餘人
蕭德揚譚玉龍等整眾待戰逆騎復分股繞出右路山坡潛由
桑樹林間飛駛而來希圖鈔襲我軍之後百長鄧光升等在兩
旁溝中猱伏不動俟該逆已過飛躍而出鎗礮刀子齊舉殲逆
數十名彭緒慶督隊策應蕭德揚等見逆眾數倍於我先用劈
山大礮連環轟擊傷斃悍逆頗多該逆死拒不退我軍趁勢下
山分道截殺譚玉龍坐騎被該逆洋礮擊倒蕭德見身先士卒
手刃悍賊數名張映衡率隊截殺賊勢大潰復將水磨子川壩
灣竈泥溝等處逆巢踏平黃鼎之進攻杜家嶺也逆賊大出馬
步相抗趙雲鳳直前接仗且戰且進追至磨坪川老巢該逆加

派馬賊數倍圍撲我軍黃鼎督飭各營分頭截擊復率親兵兩
哨左右衝殺賊眾大敗追殺數里收隊而還是日計斃賊六七
百人奪獲戰馬數十匹各軍傷亡無多二十五日黎明復合各
軍出隊會剿該逆鑒於先日之挫遂糾合張家原馬峪口九龍
鎮策底鎮各路逆巢蜂擁而出眾約二萬有餘分踞於暖莊嶺
磨坪川一帶設伏大北溝小北溝白窩溝水窩溝意圖包鈔我
軍蕭德揚蕭德見等率隊馳進逆騎衝突而來勢甚兇猛我軍
施放劈山大礮連環轟擊層層逼入暖莊嶺之賊復飛駛而下
拌死猛撲王九齡督飭哨隊并力齊進譚玉龍率隊於右路包
擊鎗礮如雨傷斃該逆數百人追殺直至嶺下維時磨坪川之

賊亦經黃鼎擊敗逆騎二三千由山後繞出包家山下馬步賊直撲我軍毛福益設伏兩旁戮其紅衣逆酋數名蕭集山張映衡左右鈔截殲逆數十名各軍湧進賊乃大敗而退是日計斃賊二三百人二十六日蕭慶高探知該逆四處擄糧是晚密飭伍雲浦挑選奮勇百名伏於張家溝村中四鼓後逆眾自下關飽掠而歸我軍吶喊齊出該逆猝不及防爭先逃奔殲逆二十餘名奪馬十餘匹糧米頗多二十七日蕭慶高預令王九齡伏於小北溝洪殿元伏於大北溝大軍直攻暖莊川逆眾排列嶺上以待蕭德揚等引軍佯退誘令下山回旂猛擊王九齡由右路殺出洪殿元由左路包截該逆拌命相抵譚玉龍張映衡復

於山頂壓擊而下逆勢不支遂大潰亂我軍乘勢追上直至山
茨峽以前始收隊而還而包家山磨坪川之賊亦經黃鼎蕭集
山毛福益等左右包鈔追逐十餘里統計兩日斃賊四百餘名
傷逆又七八百名我軍亦有傷亡正擬乘勝會攻尖骨山老巢
而該逆堅壁不出又值秋雨連綿急切不能進兵七月初六日
雨止蕭慶高復令各軍均由原路進擊該逆預出馬步二三千
人踞於暖莊嶺之上蕭德揚譚玉龍等分道齊進喊聲震天斃
賊多名登時搶上山頂趁勢撲下追過山茨梁什字道一帶將
各處逆巢燒燬而尖骨山馬峽口張家原孟家寨下各路踞逆
傾巢湧出隨於左近村堡樹木四處埋伏其右路擊敗之賊復

添馬步四五千人分道猛撲王九齡卽率辛定邦雷秀元等首
先衝鋒均受重傷忍痛督隊譚玉龍蕭德揚洪殿元等各率馬
步繼進將賊隊截爲兩段逆眾大亂爭先逃奔其左路潛伏之
賊亦經我軍誘出并分兵截其歸路該逆前後受敵拌死奔馳
會黃鼎彭緒慶毛福益等亦將包家山杜家嶺潘家堡各路逆
眾併力擊敗是役計斃賊四百餘名我軍傷亡三四十人維時
逆眾另股忽由紅渠川神峪河竄出擾隴北之青白嶺西梁灣
並汧陽之杜陽溝等處糧道梗塞劉玉興督隊進擊略有斬擒
藩司林壽圖時抵隴州將譚玉龍劉効忠兩軍調回防剿該逆
旋由神峪河竄至娘娘廟蔓延華亭崇信邊界上關兵勇不及

五千人分隘踞紮以守則有餘以戰則不足自初六獲勝以後
僅於十九二十兩夜密派黃鼎蕭德揚等夜襲賊巢獲兩小勝
而臣所調之楊得勝雄毅一軍鄔太愚鎮西一軍及穆圖善派
來助剿之西們克西克馬隊兩起沿途阻雨至七月二十日後
陸續到齊臣卽札飭劉厚基鄔太愚由高崖進剿娘娘廟譚玉
龍劉効忠由上家店白石川一帶掃盪前進楊得勝西們克西
克邱時成等由楊家河進剿神峪河使該逆首尾不能相顧以
收三路夾擊之功旋據楊得勝邱時成西們克西克七月二十
八九八月初四等日稟報業將神峪河逆巢攻克殺斃悍賊三
百餘名生擒十餘名奪騾馬三百餘匹譚玉龍劉効忠等亦於

八月初一初三等日連將上家店白石川等處股匪盡數掃盪
斬獲頗多初八日復會同劉厚基鄔太愚等攻走娘娘廟踞匪
燬其巢穴斃逆約百餘名奪獲旂幟牲畜甚多餘眾悉向尖骨
山竄去維時督臣楊岳斌親督甘軍將清水張家川一帶踞逆
擊走併趨華亭境內臣復嚴飭劉厚基譚玉龍劉効忠鄔太愚
等迅速引軍由下關前進會同上關蕭德揚黃鼎等軍逕搗尖
骨山老巢適淮楊岳斌來咨已派提督王得勝總兵傅宗先由
莊浪進攻華亭之西提督彭楚漢李助發由關山前進陳德隆
由唐家河三角城進趨馬峽口以攻華亭之南提督張在山由
安口竄進以攻華亭之北約臣軍由東路會剿十七日劉厚基

譚玉龍等率師行抵下關正在前進該逆突出馬步數千蜂擁而來當卽派兵分駐兩邊山腳施放鎗礮斃賊甚多劉効忠鄢太愚等復縱騎突進該逆立即敗潰我軍追殺七八里該逆後隊忽到各軍奮前迎剿復將逆眾擊敗追逐五六里計共殺賊五六百名生擒三十餘名奪獲騾馬軍械甚多探聞是日楊岳斌督軍在關山亦獲勝捷賊氣大挫又偵知官軍四路環集蕭德揚黃鼎等復於二十日移營磨兵川十字路一帶緊逼賊壘於是逆眾惶恐遽於是夜爬山分股奔竄約至山寨鎮合隊眷口老弱先行畱馬步悍賊斷後蕭德揚黃鼎楊得勝等聞信卽率馬隊先往馳擊步隊繼進並知會各軍出隊跟剿及抵尖骨

山而該逆前隊已去後隊正在紛逃參將孟學文等驟馬馳突截殺殆盡奪獲鎗礮牲畜不計其數當將尖骨山周圍窠穴踏燬維時各軍步退踵至蕭德揚黃鼎等督率跟擊甫及賊隊該逆回馬轉鬪往還數十次逆勢不支且戰且卻賊屍枕藉追至三十里鋪該逆大隊擁擠西們克西克邱時成洪殿元等馬隊會合截擊斃賊甚夥餘孽均向平涼隆德一帶竄走我軍馬隊亦有傷亡日已薄暮人馬飢乏始各收隊回營等情臣查此次逆回以甘省無糧可掠之故糾合各處巨股銳意東竄誓不返顧經前次隴上諸軍痛剿出境之後復徘徊於華亭崇信之間踞尖骨山以爲老巢旣逾兩月多方窺伺幸陝甘各軍以次雲

集正可圖合圍聚殲之功而該逆遽卽氣懾先遁現查華信一帶已無賊蹤該逆竄走平固難保不分竄慶涇各路臣現飭西們克西克譚玉龍劉効忠洪殿元等馬步各軍由邠長轉趨涇州裏糧進擊期與督臣楊岳斌併力會剿兼防竄擾慶陽之路其餘各軍仍分布汧隴麟遊邠長一帶要隘以防伺隙偷竄至此次出力弁員擬請附入前次保案擇尤彙獎都司譚仁曲衝入賊隊帶傷陣亡請

旨飭部從優議卹其餘傷亡弁勇俟查明照例辦理所有官軍越境勦剿還軍截擊屢次獲勝並將尖骨山踞逆擊走現籌分兵防剿緣由謹具摺由驛馳

奏伏乞

皇太后

皇上聖鑒訓示飭遵謹

奏

附截擊偷竄回逆疏

再臣於六月十七十八等日接據署乾州知州周相焯署長武縣知縣張景福等飛稟六月十五日探報回逆分馬隊二千餘人由靈臺屬之史家河偷竄邵寨及麟遊之雀木鎮一帶焚掠居民驚逃其後股大隊尙踞史家河各等語臣卽飛飭蕭德綱蕭長青邱時成洪殿元等由隴州星夜折回併力堵剿殊該逆

盡係騎賊疾如風雨十八十九等日已竄至永壽之監軍鎮義
井鎮醴泉之堯都乾州之王烏村等處臣慮邱時成等道途遼
遠緩不濟急卽飭署中軍參將彭體道督率省標兩營於十九
日拔赴咸陽醴泉一帶攔頭截剿該逆旋即折回咸陽之百都
鎮千都鎮東北狂竄十九夜彭體道親督哨隊銜枚疾趨將襲
之於千都鎮寅刻行抵該處該逆已於四更棄鎮先遁直趨涇
陽彭體道先率馬隊疾馳尾追行二十里詢據逃出難民供稱
該逆現在山西堡造飯相距僅十餘里彭體道專弁催促步隊
分路猛進該逆見我軍猝至不敢接仗紛紛鳧水渡河正擬趁
勢追擊忽然大雨如注祇得收隊暫息是夜雨止二十一日黎

明渡涇探知該逆現踞涇陽屬之塔底永樂店一帶彭體道自率中軍由永樂之北派游擊胡得成繞出永樂之南兩面夾擊將近賊巢該逆又復奪路狂奔擾及三原彭體道恐城池有失由間道疾赴三原防護而該逆已至魯陽鎮洪水溝夜間正在傳令襲擊又值大雨不能出隊二十二日寅刻馳抵洪水溝而該逆先夜已冒雨竄至方里鎮遂令各勇少息復行進發行三十里知該逆尙在該鎮造飯彭體道飭各勇四面圍裹自率親兵往來策應鼓角一鳴逆眾馬隊分爲五路出鎮衝突我軍鎗礮齊施該逆拌死相拒正在鏖戰百長游擊劉義安兵丁吳得勝等見賊勢兇猛畏縮不前各勇因之少卻彭體道立將劉義

安等斬首以徇我軍勇氣愨奮胡得成親冒矢石手刃悍賊數名是時蕭德綱蕭長青亦各率隊伍相繼而至士氣百倍喊殺震天該逆乃大潰而去是役計共斃賊一百餘名奪獲騾馬二百餘匹救出難民六七百人我軍傷亡亦數十名二十四日蕭德綱蕭長青胡得成胡明等分路追擊適臣所調楊得勝一軍已由鄜州拔赴淳化會同各軍躡蹤追剿該逆遂由三水小路連夜竄回平固各等情稟報前來臣查此股回逆由麟遊偷竄內地以大軍越境鵬勦相持未決特選悍賊窺伺長驅意圖牽掣我軍回顧以遂狡逞之謀雖其爲數無多而均係騎賊死黨且皆陝省土回熟習路徑十日之間馳突八九州縣彭體道

等督率兵勇晝夜窮追使該逆不得喘息雖未能盡數殲除而地方未遭蹂躪亦屬著有微勞可否酌保十餘弁附入隴軍前案獎勵以昭激勸出自

鴻慈所有回逆分股偷竄彭體道等率師追擊獲勝各緣由謹附片由驛具

奏伏乞

聖鑒飭遵謹

奏

附覆奏派兵防堵武關情形疏

再臣頃奉

上諭官文曾國荃奏訪察近日賊情請籌防西路一摺荆紫關等處有險可扼著劉蓉調派兵勇妥爲防範喬松年尙無起程信息該署撫在陝一日當盡一日心力不得存五日京兆之見等因欽此伏查捻逆張總愚等自七月以來竄擾南陽鄧州一帶屢據潼商文武各員稟報逆蹤時由南陽分竄南陽魯山邊馬擾至內鄉浙川等處地方倏往倏來蹤迹無定當經臣派撥候選同知直隸州黃加焜率定中營駐紮漫川關副將何玲必率親兵衛隊營駐紮竹林關又調撥記名提督劉玉興率英毅軍駐紮武關並檄商州知州陳作樞就地捐募團勇千名交署商州副將謝正球帶領協同防守其潼關一隘地勢險要較易

扼守現值西路逆回敗竄平固兵力稍可抽騰如聞此路有警
卽當籌撥一軍前扼金陡關以期周密將來鮑超大軍如已進
趨浙川逆騎旁駛仍當飛飭諸軍越境鵬擊以期共殄逆氛臣
在陝一日責無旁貸不敢稍涉懈怠仰勞

宸廑所有派兵防堵武關等處緣由理合附片陳

奏伏乞

聖鑒謹

奏

劉中丞奏議卷十八終

劉中丞奏議卷十九目錄

遵保定邊保安官軍出力員弁疏

附請飭升任臬司畱任一月疏

附籌解甘軍餉銀軍火數目疏

請飭西路大臣暫行回京供差疏

附請賞甘肅提督續假一月疏

奏催晉蜀兩省協甘餉銀疏

回捻同竄陝境疏

附畱程興烈一軍暫畱陝境疏

附請飭督帥撥軍助剿疏

附催蜀晉各省協餉疏

查明譚軍譁潰情形疏

附請暫緩裁撤譚軍疏

請獎省城及西同鳳三府防城出力官紳疏

附籌解甘軍餉銀軍火數目疏

彙報防剿情形請催霆軍入陝疏

附請飭喬松年就豫籌餉帶赴陝省疏

附陳山西臬司防河情形疏

附請飭穆將軍進紮涇州疏

附請飭曾帥改派劉楊各軍助剿疏

代催各省速解協甘餉項疏

附請甘肅後路糧臺事務暫由林壽圖陳奏疏

附請賞還林壽圖二品頂戴疏

附請將劉嶽曙等照舊保獎疏

附請將蕭存理保案照准疏

援例捐贖遣罪疏

遵保截剿鳳隴竄回越境追擊出力員弁疏

特參醴泉縣縱役浮收等弊疏

附審明已革提督劉正高潰勇情形疏

The image shows a blank ledger page with 12 vertical columns. On the right side, there is a header section with the following text: "NO. 1", "INVOICE", "DATE", "AMOUNT", "REMARKS". The page is otherwise empty of data.

劉中丞奏議卷十九

湘鄉劉 蓉著

遵保定邊保安官軍出力員弁疏

同治五年九月初十日

奏爲查明定邊保安官軍迭次越境剿賊獲勝尤爲出力員弁
遵

旨覈實保獎恭摺仰祈

聖鑒事竊臣前奉同治五年五月二十三日

上諭劉蓉片奏甘回竄踞安化屬之棗子碓等處同知鄔太愚
等越境會剿出奇制勝屢次獲捷鎮西軍屢次冒險遠征勞績
尤著所有尤爲出力員弁著劉蓉彙案覈實保獎毋許冒濫等

因欽此遵卽分飭鄆太愚暨總兵段登雲楊得勝等嚴密防剿
不可稍形疏懈嗣鄆太愚等又於五月十八二十一等日節次
扼隘設伏殺賊多名迭挫兇鋒亦經臣附片

奏報在案茲據該將領鄆太愚擇尤開單請獎前來臣覆加查
核該將領所部員弁防守定邊保安一帶克復鐵角城等處或
越境勦剿冒險遠征或預伏村莊出奇制勝閱時既久屢次立
功邊陲藉以安堵實屬著有微勞自應量予獎敘俾昭激勸謹
核實繕列清單恭呈

御覽仰懇

天恩俯准給獎以示鼓勵所有遵保定邊保安官軍實在出力

員弁請獎緣由理合恭摺具

奏伏乞

皇太后

皇上聖鑒訓示謹

奏

附請飭升任臬司畱任一月疏

再陝西臬司胡肇智現准部咨欽奉

上諭補授順天府府尹當經臣恭錄轉行遵照自應飭令交卸

赴京供職惟該司承審京控案件數起內三原縣職員胡礪金

一案牽涉各官情節較重該司正在集證研鞫漸有端倪臣因

患病日深蒙

恩准予開缺交卸在卽應將經手要件趕緊清釐若該司再行更替則盡係生手恐致要案延閣可否仰懇

天恩俯准臬司胡肇智暫畱一月之任責成該司速將京控案件趕緊訊結詳辦再令交卸北上以清積牘而免稽滯理合附片陳明伏乞

聖鑒飭遵謹

奏

附籌解甘軍餉銀軍火數目疏

再臣迭奉

諭旨籌撥甘肅軍需雖值窘乏萬分不敢稍存膜視業將同治五年七月分撥解過援甘各營餉銀軍火數目附

奏在案茲據軍需局司道詳開同治五年八月分共解支過援甘各營餉銀二萬五千三百四十兩一錢七釐鹽菜銀二千九百七十六兩九錢一分二釐均經分別委解交納取有迴文爲據臣覆查無異除仍飭該司道等竭力籌措源源接濟外所有陝省同治五年八月分解支過援甘各營餉銀數目謹繕清單

恭呈

御覽伏乞

聖鑒謹

奏

請飭西路大臣暫行回京供差疏

同治五年九月初十日

奏爲西路大臣因道路梗塞無從赴任陳情請

旨飭遵恭摺仰祈

聖鑒事竊照烏什辦事大臣覺羅慶明喀拉沙爾辦事大臣札拉芬葉爾羌兼管和闡協辦大臣常績喀什噶爾領隊大臣常明等均於同治四年四五月先後到陝覺羅慶明札拉芬常明旋隨前任伊犁參贊大臣聯捷由陝赴甘駐紮涇州辦理糧運迨聯捷因病開缺該大臣等無路前進仍於冬月折回西安迄今又近一年該大臣等不時來至臣署詢探西路通塞情形急

圖赴任無如前路梗塞不特由甘肅出嘉峪關節節阻遏卽欲由平涼固原前赴蘭州亦苦賊騎縱橫勢難飛越該大臣等屢議改道張家口前趨然聞科布多哈密一帶已極艱阻仍屬無路可通旋聞關外各城多半淪胥又已無任可到憂焦煩灼莫知所從竊維人臣効忠之義固無擇於東西而

聖君溥惠之懷每曲恤其甘苦向使該大臣等託故淹留飾詞規避不獨

朝廷不能曲從寬宥卽

微臣

亦當據實奏參至於情實可原未

便聽其失所今該大臣等欲効力而無地欲改道而無從欲進則有梗阻之虞欲止則蒙逗遛之咎而且旅費艱窘莫繼養殮

情迫勢窮誠出無奈臣嘗默察甘省賊情亦非難於殄滅顧以
餉項支絀糧運艱難勢非寬待一兩年難期掃盪至於肅清之
後振旅出關亦當就甘省招徠客民墾闢荒地積糧儲粟然後
可張撻伐之威計收效又當在四五年之後竊見該大臣等年
歲齒髮多在六十內外若使畱寓西安守候前進則日月侵尋
行迫遲暮徒嗟行役之邁迄無宣力之時從前奎章在陝晝夜
憂思至於口唇生疽手足潰爛亦由情懷鬱悶無地自効之故
雖蒙

恩准回旂未卜能否痊愈今該大臣等進退維谷行止兩難卽
不至焦思以成疴亦恐將頽然而就老歲月迢遞其何可期伏

思我

皇上體恤中外臣工無微不至自從

御極以來未忍一夫失所竊謂該大臣等情形如此宜在
聖慈矜憫之列合無籲懇

皇上天恩可否特霽

鴻施俯准該大臣等暫行回京照常差使一俟西路疏通仍飭
令各赴本任則於委任責成之中仍寓曲賜體恤之意如該大
臣等尚懷觀望卽坐以規避之罪從嚴懲辦亦將甘受無辭所
有西路大臣因道梗無從赴任陳情請

旨緣由謹繕摺冒昧陳

奏伏乞

皇太后

皇上聖鑒訓示飭遵謹

奏

附請賞甘肅提督續假一月疏

再臣前於九月初三日欽奉八月二十八日

上諭前因甘肅提督曹克忠患病曾經降旨賞假兩月令在蘭州城內安心調理毋庸遠道就醫並賞給人蔭四兩以示體恤乃該提督不候諭旨遽已赴陝來去自由實屬不曉事體著劉蓉嚴催該提督星夜折回甘省等因欽此查曹克忠於八月二

十一日輿疾來陝臣適接准督臣楊岳斌咨商催速折回當卽派員偕醫士前往診視據稱病極危篤心脈殆絕勢恐難期痊愈當經醫士投以黃連膽草等藥稍有轉機旋於九月初八日欽奉初三日

寄諭飭令該提督恪遵前旨折回甘省俾所部將士有所稟承奮勉立功以副委任等因均卽欽遵恭錄轉催去後嗣准曹克忠咨稱患病臥牀業將五月因蘭州醫藥兩缺不得已移往秦州冀圖痊愈不期在秦遍延諸醫僉謂病勢已深虧損太甚相顧束手因念與其羈畱甘界虛存調養之名何如移赴陝西或得痊愈之效隨於謝

恩摺內詳細聲明一面將提督印務齎送督臣行營轉交鄧全忠護理於八月二十一日行抵西安寓次延醫診視據稱心肝兩脈微弱欲絕現在服藥尙未大見轉機心神恍惚兩骸踈縮不能起立恐難如期銷假曷勝焦急等情咨臣就近代

奏續假兩月前來

臣

查曹克忠忠勇性成比歲勦辦甘回聲威

卓著迭奉

諭旨飭催自宜恪遵迅往且該提督所統營數較多現值督臣楊岳斌親率師旅駐紮崇華正資該提督分統大軍共圖掃盪因派西安府知府呂雋孫署中軍參將彭體道前往催速據稟稱親至該提督臥榻相視皮骨僅存肌膚如削輾轉牀褥起坐

維艱委屬實在情形且聞該提督病中謔語誦誦無非攻戰之事逮聞宣讀

諭旨奮然躍起旋即仆地暈絕其情狀實爲委頓惟甘省軍事方殷未便過爲寬緩可否仰懇

天恩俯准續行

賞假一月俾該提督得以安心調理一俟病勢稍輕即趕緊馳赴軍營督兵勦辦出自

鴻慈所有提督患病沈重懇請續假緣由理合附片陳明伏乞聖鑒飭遵謹

奏

奏催晉蜀兩省協甘餉銀疏

同治五年九月初十日

奏爲據情轉奏請

旨飭催晉蜀兩省協甘餉銀按月解陝以便乘時買糧運營接濟軍食而免飢潰恭摺仰祈

聖鑒事竊照甘軍糧餉缺乏前因陝省倉儲罄竭採買維艱經臣會同趙長齡奏奉

上諭所請由晉蜀兩省每月各協餉二萬兩之處卽著照數協撥以五年正月爲始按月措解不得少有遲誤等因欽此嗣經川省覆奏欽奉

上諭崇實駱秉章奏籌撥採辦甘省軍糧銀兩請解至本年五

月停止並請將協甘銀兩每月改爲二萬兩各摺片所稱四川
每月解陝銀二萬兩爲採辦甘省軍糧之用計每歲需銀二十
四萬兩川省庫儲罄竭不能籌此巨款且尙需按月撥解協甘
餉銀請將此項銀二萬兩自本年正月起解至五月止少紓川
力雖係實情惟陝甘自五月以後於甘省軍糧能否竭力籌措
無誤要需朝廷實難懸揣著崇實駱秉章劉蓉妥爲籌商定議
以恤鄰封等因欽此欽遵各在案茲據督辦甘肅後路糧臺陝
西藩司林壽圖詳稱川省應解上項銀兩陸續解到八萬兩未
解之數已屬寥寥刻下逆焰方熾兵勇雲集需餉萬分緊急卽
使按月協撥全數採買亦屬杯水車薪難資接濟兼之前因涇

防軍飢無項買糧曾飭陝省州縣挪用地丁正款先行購買以
應急需計亦在數萬兩之多現在各該州縣紛紛請領還款均
尙虛懸當此秋禾登場正可乘時購買徒以經費支絀籌辦維
艱應請川省仍照原案按月委解俾資採買此外山西應解銀
兩自本年正月起至今僅解銀六萬兩甚形遲緩等情詳請一
併

奏催前來臣查甘肅遍地賊氛正值勦辦喫緊之際各營軍食
全籍陝省購糧接濟而陝庫情形又值山窮水盡若非晉蜀兩
省力籌協撥坐見兵勇飢潰不特目前難以支持即將來新調
督臣左宗棠到隴亦恐難於展布惟有籲懇

天恩飭下四川省督臣將每月協甘採買銀二萬兩仍照原案按月解陝其山西省應解銀兩並請

旨催速補解按月接濟俾得及時買運庶甘糧不致缺乏各軍或資飽騰實於隴局大有裨益除分咨外所有據情轉奏緣由理合恭摺具陳伏乞

皇太后

皇上聖鑒訓示謹

奏

回捻同竄陝境疏

同治五年十月初七日

奏爲東西兩路捻回同時竄擾陝境現在籌辦防剿恭摺仰祈

聖鑒事竊臣前因回逆竄犯慶涇揔逆近在南陽深虞闌入陝疆而隴州緊要駐防各軍未便抽調當經檄飭同知鄔太愚總兵楊得勝提督邱時成副將洪殿元各率所部馬步紮駐邠長所屬之白吉原亭口鎮相機堵剿以防西路回患檄飭提督劉玉興副將何玲必同知直隸州黃加焜各率所部分紮武關竹林關漫川關等處並飭潼商道蔣徵陶督飭該地方文武員弁厚集兵力嚴防金陡關以防東路揔氛隨於九月二十五日接據邠州稟報回逆大股已踞甘肅涇州北原二十九日又據長武縣稟報回逆自涇州北原分股竄至甯州太昌鎮宮河其涇州之屯子鎮木瓜寺紅河川等處概係賊蹤臣慮白吉原等處

兵力單薄復咨請派赴隴防之副都統西們克西克率所部馬隊調候選道黃鼎所部步隊移駐邠長以資策應旣而宜君白水三水各縣陸續稟報回匪潰勇紛紛竄近邊境正在籌兵防剿之際忽接據潼商道稟報前竄山東曹州捻匪已於二十七日竄越陝州邊馬擾至閔鄉西關距潼關僅六十里當卽檄飭中軍彭體道帶領省城標兵三營馳赴潼關扼要防剿又慮該逆由潼峪一帶竄擾商雒不得不移緩就急復檄調漫川竹林兩處防軍何玲必黃加焜各率所部駐扼雒南并抽調駐防鳳翔之提督劉厚基率所部親兵移駐藍田以備策應初一日據蔣徵陶稟報捻逆已至閔底鎮距關止二十里大隊隨後蜂擁

而來不計其數又據稟報該逆偵知潼關有備折由蒿谷小路傍依秦嶺行走自東而西綿互數十里一股由太峪口趨南原望華陰狂奔一股由潼峪山路竄入訊據拏獲奸細供稱總頭目偽曾王在山東已被官軍擊斃大閻王李坤兒帶領萬餘人執紅旂白邊小閻王李隨兒帶領萬餘人執白旂黑邊偽魯王伍榜帶領二萬餘人執藍旂又有小頭目邱姓帶領千餘人執白旂均約向西南行走共撲省城連日又據華陰朝邑等縣稟報賊騎擾及公莊員莊泉店三河口等處初三日彭體道與賊遇於華陰之敷水鋪地方督隊接仗小有斬獲旋被賊騎包裹身帶矛傷退紮村堡又據商州稟報賊馬已至雒南之巡檢司

黃龍鋪並聞張逆有由魯山西趨竄擾漢中之說各等語臣查
捻逆在山東河南迭被官軍截剿早料其必致鋌而走險逼入
陝疆特以逆回日圖還竄陝省兵力過單不敷分布祇冀西路
稍鬆再行移師東向不虞逆騎飄疾猝由間道闌入現在該逆
大股分路狂竄而潼關以西平原路歧無險可扼若不厚集兵
力深虞難遏兇鋒且慮回逆偵知東路情形乘虛猛撲更覺首
尾受敵支撐不易除由臣檄調靖安軍劉効忠自涇州拔回與
鄆太愚楊得勝併力共扼邠長以固西路並抽調邱時成省標
馬隊蕭德揚湘果左翼軍及黃鼎之彝字營西們克西克之黑
龍江馬隊暫赴省東以顧眉急外合無籲懇

天恩飭令浙江提臣鮑超親督所部全軍分由潼商前進與陝軍合力迎擊迅圖掃盪並請

敕下河南撫臣李鶴年派撥勁旅扼紮陝州要隘以期前後夾擊或者終可殲諸嶠函之間至於襄陽鄖陽一帶均與陝境毗連並懇

敕下湖廣督臣官文湖北撫臣曾國荃派兵嚴備以固鄂邊兼防由鄖陽紛竄興漢之路仍飭山西撫臣趙長齡增設風陵渡上至龍門一帶河防以防偷渡晉境

臣雖病勢侵尋醫藥鮮效

然在任一日責無旁貸惟有力疾指揮諸軍相機截擊以挫兇鋒而顧全局所有東西兩路捻回同時竄擾陝疆現在籌辦防

勤情形理合恭摺由驛馳

奏伏乞

皇太后

皇上聖鑒飭遵謹

奏

附畱程興烈一軍暫畱陝境疏

再臣於十月初三日准軍機大臣字寄奉

上諭甘肅前派援陝之程興烈一軍著准其調回等因欽此伏查回逆現在分路東竄鄜延一帶正當喫緊所有隴邠各路防軍又因捻逆竄出太峪擾及華陰一帶地方復抽調赴省截剿

勢難顧及廊延所有現駐吳旂鎮之程興烈一軍相應請
旨敕下甯夏將軍穆圖善仍舊駐紮原處暫緩調回甘省以固
陝疆而維大局除咨明穆圖善查照外理合附片馳陳伏祈

聖鑒謹

奏

附請飭旨帥撥軍助剿疏

再臣所部楚軍共祇一萬四千餘人從前東西分防早已不敷
布置每值西路有警沿邊守隘各營不能調動必抽東路防軍
移緩就急以爲迎擊會剿之師以故東西分馳每苦鞭長莫及
現值西回東捻兩路同竄以防則無迎擊之旅以剿則無守隘

之軍踴躍萬分勢極棘手所以奏調鮑超一軍蓋出於萬不得已之計該提督卽能迅速西征計到關已在兩旬以後事機變幻尙未可知萬一鮑超又爲魯山一股牽掣未能整軍前來西路回氛又已闌入腹地則局勢糜爛不可支持伏懇

皇上敕下兩江督臣曾國藩通籌全局總期迅撥大枝逕旅星速來陝會勦其所需月餉仍由該處糧臺籌撥按月接濟庶陝事尙可徐圖局勢不至遽壞愚昧之見是否有當伏祈

聖鑒飭遵謹

奏

附催蜀晉各省協餉疏

再臣前因逆回大股竄逼汧隴防勦方棘而各營欠餉日久難資飽騰曾經奏請湖北山西四川三省各撥餉銀五萬兩委解來陝以濟急需業經欽奉

諭旨允准在案嗣准湖北督撫來咨期於秋冬閒竭力籌撥現尙未聞起解信息至於四川山西兩省迄今未准咨覆在各省司庫支絀或亦難於酬應惟臣所部楚軍欠餉均在一年以外艱窘情狀難以言傳臣旣窮於撫循徒以焦灼成疾雖暫時未至譁變已恐終於潰逃理勢昭然不卜可想現值兩邊同警戰事尤急而各營軍士月餉久懸窮苦飢疲襤褸若丐欲令啼饑號寒之侶更爲衝鋒冒鎗之倫雖使孫吳復生亦恐窮於驅策

現查司庫存項僅止數千目前無可點綴以後無從挹注文武屬僚相顧束手伏乞

皇上天恩敕下湖廣四川湖北山西各督撫務將上次奉

旨協撥之五萬兩趕於十月內委解來陝以支危局不勝叩禱之至謹附片馳陳伏乞

聖鑒飭遵謹

奏

查明譚軍譁潰情形疏

同治五年十月初七日

奏爲遵

旨查明譚玉龍原部勇丁譁潰情形旋經撫定在陝勦賊立功

願懇

天恩暫免治罪責令隨營効力以觀後效恭摺覆奏仰祈

聖鑒事竊

臣

前於六月初四日接准軍機大臣密寄五月二十

八日奉

上諭譚玉龍收領餉銀二萬九千兩僅發給各營一萬一千兩其餘銀數概行剋扣入己以致眾論沸騰俱懷怨憤又復縱令勇丁擄殺良民經楊岳斌派令王得勝接統其眾譚玉龍輒以奸詭之言聳動眾聽倡議向西安潰走此時恐已竄入陝境劉馨務當督率兵勇嚴密堵截毋任分竄各處蔓延爲患至譚玉龍等業已煽眾潰變且有至西安另圖大事之語豈肯聽劉馨

傳訊記名提督譚玉龍總兵陳義參將焦萬海均著卽行革職
 并已革參將余炳忠均著劉著設法擒獲就地正法等因欽此
 查譚玉龍原部勇丁譁潰臣於五月十八日接據平涇文武稟
 報卽派藩司林壽圖前赴涇州查辦旋據安肅道蔣凝學稟稱
 譚玉龍於十九日單騎來涇自陳因病誤公深自引咎願率所
 部六營赴陝勦賊立功自贖等語當經臣於六月初六日先將
 大略情形附片陳奏在案隨於六月十七日接准軍機大臣字
 寄六月十二日奉

上諭譚玉龍曾有前赴西安共圖大事之語此時又願赴陝西
 勦賊立功自贖恐非出於至誠劉著仍當遵照前旨斟酌辦理

陝西通志卷之七

七

等因欽此嗣於七月初一日又接准軍機大臣字寄奉

上諭譚玉龍率勇東潰疊經諭令劉蓉查辦何以尙未覆奏此次該革員率勇剿匪究竟該革員有無謀變所部各營是否尙思潰散著劉蓉迅速查明斟酌情形辦理各等因欽此旋准督臣楊岳斌咨送原參摺彙前來維時藩司林壽圖已由永壽折赴隴州軍營當經

臣恭錄

諭旨密飭就近確查情形據實稟覆以憑核辦去後旋據該司稟覆查譚玉龍前回涇州帶勇赴隴之時卽據涇州知州林發深及委辦糧局知府劉校書各將譚玉龍因病辭退統領離營後部勇飢潰情形及安肅道蔣凝學勸令力疾帶勇赴隴立功

自贖各情先後稟報惟未及剋扣糧餉眾勇怨恨及勒捐軍糧等情該司馳抵鳳隴適譚玉龍已到隴州當卽就近確查並於接見該營營哨官時分別探詢所稱情節大同小異因恐該營哨官久隸部下不無迴護復又密派員弁繞赴涇州一帶密訪並函致蔣凝學詢問實情據該道覆稱譚玉龍以前實有不是迨各營潰退趕下平涼一路尙未擾害譚玉龍單身回涇養病曾經親往探看伊頗深自引咎有聽候治罪之語時慮潰勇無所統屬別生事端因力勸其帶勇赴陝立功伊遂將退至花家莊之六營調集帶赴隴州會勦等語嗣該司所派員弁亦由涇州一帶折回據稟稱譚玉龍前於莊浪力戰解圍後因後路梗

阻軍糧不繼商同地方官紳勸捐糧石部下勇丁不免因飢餓
藉端搜索譚玉龍或不及知或知之而姑息未究迨四月杪患
病昏眩不能理事經總督派王得勝接統其眾五月初十日交
出統領關防飭令各營造冊呈交新任統將而各營弁勇以糧
缺紛紛訛言譚玉龍因已交卸不復管理連夜回涇次日各營
紛紛譁潰惟沿途尙無搶掠情事十四日眾至平涼追及譚玉
龍進見之頃或言不願在甘受苦受飢要散回家或言要到西
安投効另立功績譚玉龍涕泣勸阻並云爾等卽欲赴陝効力
亦當稟請撫軍飭調不可湧至涇州致滋驚擾各營始行紮定
傳言之訛遂有欲赴西安另圖大事之語彼時涇州文武得信

趕緊送糧藉得安輯十七日提督雷正綰由固原親往招撫遂
派陳義統帶譚玉龍始得脫身到涇謁見安肅道蔣凝學稟告
奮勇願在陝邊立功蔣凝學一面稟聞一面飭譚玉龍帶赴隴
州隨同陝防各軍勦賊自效至原參譚玉龍侵吞餉銀一節查
據前涇州營務處游擊秦國勝面稱上年代領餉銀二萬兩除
撥劉効忠募勇經費一千兩餘一萬九千兩存涇州庫中年終
由涇州糧臺分散各營其雷正綰劃撥九千兩亦先由涇臺委
員分散有各營印領帳目可憑至代各營製造軍裝器械稟明
在月餉內扣算今各營所領軍裝器械需銀尙多所取印領不
敷還欠譚玉龍處有各營領據帳目可憑不難清查惟尙未扣

算清楚是以未及報明該司遂加查核證以訪聞文武各員之言知譚玉龍從征多年打仗奮勇惟舊部不過十營驟令統領二十餘營未免照料不周向來遇敵則勇往前驅無事則因循緘默雖練隊尙稱整齊而教訓則不能勤慎迨當糧餉支絀之時懼怕營官索餉懶於接見亦或有之所用營哨官又未能一律挑選得力莊浪解圍後焦急成病迨王得勝接統之時各營勢將飢譁又不能善言撫慰輒因已經交卸潛行離營實屬武夫鹵莽不知大局惟於平涼安撫各營後單騎回涇深自引咎經蔣凝學責令帶勇勦賊卽已力疾赴隴逮到隴州卽率所部奮勇奪回上關等隘屢次立功似足以自明心跡現當勦辦喫

緊之際譚玉龍一軍未便遽行撤退既已深知愧悔帶罪立功
應請斟酌辦理各等情請奏前來臣覆查譚玉龍性近姑息尙
屬樸勇上年雷營潰變該革員布置涇防甚爲出力今於交出
原部譁潰之後自悔前愆旋卽力疾赴隴奪回上關等隘屢著
戰功亦屬稍知愧奮其欲赴西安另圖大事之語出於傳訛並
無謀變情事尙屬可信惟以曾任統領大員於所部平時既不
能極力整頓臨事又不能妥爲彈壓實屬咎有應得溯查甘軍
近年以來紀律久廢譁潰成風在督臣整飭紀綱不得不嚴行
懲辦以昭儆戒而臣愚竊以甘省軍事方殷使功不如使過若
遽置之重典未免沒其微勞不如予以自新庶使羣情觀感相

應請

旨將已革提督譚玉龍撤去統領仍責令該革員帶罪隨營自効以後能否益加奮勉仍由新任撫臣隨時察看具奏其余炳忠一員業已立功陣亡應無庸議焦萬海一員亦屢次打仗出力既已革職並請

恩施免其置議陳義一員現經雷正綰派充統領是否可期得力仍由督臣會商雷正綰查察核辦其譚玉龍所領餉銀支放帳目現飭糧臺催令造報逐細查核如有侵蝕情弊仍行奏參所有遵查譚玉龍原部勇丁譁潰情形獲咎後在陝剿賊立功遵

旨斟酌辦理懇

恩暫免治罪仍帶革職處分責令隨營効力以觀後效緣由是
否有當理合附驛陳

奏伏祈

皇太后

皇上聖鑒訓示飭遵謹

奏

附請暫緩裁撤譚軍疏

再臣前於尖骨山巨股逆回敗竄之後檄飭譚玉龍率所部六
營由隴州趨赴涇州屬之西峯鎮扼紮以防該逆竄擾慶陽之

路迨譚玉龍率師行抵長武適接甯州知州梁家鈺稟報逆回
與潰勇勾結竄擾該州屬棗社一帶請撥譚玉龍一軍前往援
剿當經批飭前進現當撤去統領一時難得更替之人擬俟該
處軍事稍鬆或另擇得力統將更換或并將該軍酌量裁撤仍
請以後察看情形隨時奏明辦理庶期處置妥帖不致別生事
端臣爲慎重軍務起見是否有當伏祈

聖鑒謹

奏

請獎省城及西同鳳三府防城出力官紳疏

同治五年十月十四日

奏爲查明陝西省垣及西同鳳三府所屬從前防守城池尤爲

出力官紳團首懇

恩量于獎敘以昭激勸恭摺仰祈

聖鑒事竊照陝省前於同治二年回匪時至撲城迫經擊追西
竄又值蔡啟二逆逼近省垣數年以來實由內外文武員弁督
率民團互相防剿獲保無虞而西安同州鳳翔三府尤賴官紳
民團嬰城固守奮勇殺賊得以保全境宇蕩平寇氛且查陝省
漢回雜處一旦回匪倡亂外擊悍賊內防叵測更與他省僅禦
外侮者迥不相同其防守辛苦亦較別省爲尤甚前經軍需局
造冊詳齎請獎臣以員數過多擬保太優駁飭確核嚴加刪減
茲據該局司道等覆詳請奏前來臣遂加察核尙無濫冒除漢

商邠乾各府州屬城防團練並省城軍需糧臺容俟令辦外所有省防暨西安同州鳳翔三府所屬迭次守城最爲出力官紳弁勇在防數年之久均各晝夜巡防不辭勞瘁或登陣擊賊力捍寇氛城池要地均保無虞洵屬著有微勞現值西回東捻竄擾方亟尤資紳團協守之力若不量予獎勵無以策效將來謹擇尤核實分繕清單恭呈

御覽
懇懇

天恩俯准獎敘以昭激勸而資策勵實荷逾格

鴻慈至其次等出力人員由臣酌量分別外獎給予功牌頂戴合併聲明爲此恭摺具

奏伏乞

皇太后

皇上聖鑒訓示飭遵謹

奏

附籌解甘軍餉銀軍火數目疏

再臣迭奉

諭旨籌撥甘肅軍需雖值窘乏萬分不敢稍存膜視業將同治五年八月分撥解過援甘各營餉銀數目附

奏在案茲據軍需局司道詳開同治五年九月分共解支過援甘各營餉銀三千兩鹽菜銀二千八百四十八兩七錢五分七

釐白布單大帳房一百架藍布夾大帳房十六架火繩五千丈
鉛丸一千斤火藥三千斤均經分別委解交納取有回文爲據
臣覆查無異除仍飭該司道等竭力籌措源源接濟外所有陝
省同治五年九月分解支過撥甘各營餉銀軍火等項數目謹
繕清單恭呈

御覽理合附片陳明伏乞

聖鑒飭遵謹

奏

彙報防剿情形請催霆軍入陝疏
同治五年十月二十九日
奏爲彙報東西兩路防剿情形請

旨飭催霆軍迅速入關以圖兼顧而支危局恭摺馳

奏仰祈

聖鑒事竊臣於十月初七日曾將東西捻回同時竄擾陝境籌辦防剿各情由驛馳陳在案嗣據已革提督譚玉龍稟報九月二十五日探悉回逆將由甯州屬之棗社平子鎮突犯邠長該革員卽率師由長武拔抵良平鎮遙見馬賊千餘正在圍攻民堡立時擊退次日出隊進剿該逆悉眾來拒我軍奮力猛擊斃賊二百餘名生擒七名奪驢騾三四百匹追殺二十餘里收隊回營隨卽整隊進攻平子鎮老巢將次得手忽另股回逆假充官軍從後鈔襲猝未及防傷亡弁勇百餘人該革員親督隊伍

四面衝殺賊始大敗遁去隨收隊折回長武老營又據總兵楊得勝候選知府鄆太愚等稟稱該逆因被譚玉龍擊敗勢遂趨向三水瀆化因會商各畱一營駐紮邠州共率各營馳赴三水屬之張洪鎮扼要堵剿初四日提督邱時成副將殷華廷洪殿元等各率馬隊繼至初五日探報回逆馬隊數千已至距營十餘里地方楊得勝鄆太愚等各率六成隊伍列陣以待殷華廷率馬隊埋伏村莊須臾馬賊蜂擁而來勢甚兇猛我軍施放鎗礮相持踰時該逆銳氣漸衰各縱馬步左右鈔截逆勢不支紛紛大潰我軍追殺十餘里斃賊五六百名生擒三十餘名奪獲騾馬器械無算我軍亦有傷亡各等語又據總兵段登雲及鄜

州知州田景瀛等稟報回逆分股狂竄中部宜君白水洛川各屬均有賊騎游弋其大股盤踞宜君屬之七里鎮店頭鎮等處段登雲於初五日自河上原拔發初六日抵中部探報該逆現在離城二三十里之太賢村一帶並有來撲中部縣城之語初七日整隊齊進該逆馬隊五六百人由西北兩路吶喊而來段登雲帶隊迎勦鏖戰踰時斃賊二三十名奪獲騾馬三十餘頭餘眾遁回甘境初八日探報馬賊千餘由洛川屬之相公河擄掠財物午後仍由太賢村原路經過離城十五里之王村衝衝段登雲傳令各營出隊截勦行抵該處天色向晦該逆正在休息不慮我軍猝至心驚膽裂我軍乘勢掩殺鎗礮刀矛火蛋噴

筒一齊並舉該逆倉皇無措自相蹂踐斃賊二百餘名生擒二十餘人救出難民五六百人時已二鼓未便窮追餘賊仍向店頭鎮竄去我軍亦有傷亡初十日復出隊進剿店頭鎮比及到時該逆遁去已遠遂令各軍倍道疾趨追及於二十里之白涉嶺地方逆賊回旗死鬪我軍鼓勇直前令馬隊循山繞出截其歸路賊遂相率大敗計殲斃一百餘名救出男婦七八百名獲騾馬二百餘匹軍械無算又准甘肅肅州鎮總兵程興烈牘稱九月二十三日據紳士李九錫稟稱距吳旗鎮七十里之杜家大岔地方日有回逆五六百名掠糧滋擾二十五日程興烈挑選精壯兵勇四百餘名乘夜拔發次日黎明逼近賊巢該逆以

離官軍較遠初不設備我軍一擁而進巢內悍賊拌死相抗各
弁勇奮力格殺餘眾狂奔亂竄追擊十餘里斃賊一百餘名生
擒賊目蔡興科賈長林等五名訊明正法奪獲牛驢一百餘匹
餘賊悉向鐵角城油鹽川一帶竄去十月初三日據拏獲賊探
郭正先供稱油鹽川踞匪多係潰勇有黃金林王大勝等倡首
令伊執名片勾結營勇入夥程興烈卽派隊裹糧前進初五日
行近該處遙見山頂有賊瞭望當派親信弁勇脫去號衣假稱
來赴郭正先之約該逆信以爲真我軍隨卽跟蹤排隊搶入賊
巢鎗斃矛戮約五六十名餘眾翻山越嶺而逃等語此西路防
軍截剿竄匪獲勝之實在情形也至東路捻逆竄踞華陰及南

原籍哈蒿峪一帶地方蔓延七八十里時思北渡渭河竄擾同
朝經山西派調防渭水師會同朝邑民團二三千人沿河堵剿
焚燬該逆所造木筏繩索撲過三河口迭有斬獲維時副將彭
體道駐擡頭堡游擊陳照台駐五方村相距十餘里文報不通
初四五等日該逆分股圍攻兩堡彭體道等依堡轟擊時出奇
兵鵬截均有斬擒初六日提督劉厚基率所部親兵等營自省
拔發初八日行抵渭南之赤水鎮猝與賊遇鏖戰多時斃賊六
十餘名我軍亦有傷亡因賊眾兵單未能前進仍復折回渭南
初九日劉厚基重懸賞格挑選奮勇夜襲赤水鎮踞匪斬獲不
少該逆卽於是夕遁去是日彭體道陳照台亦各將攻撲營壘

之賊奮力擊敗初十日臣所調隴邠防軍副都統西們克西克漢中鎮總兵蕭德揚提督邱時成候補道黃鼎等各率馬步全軍相繼到省臣慮各軍心力不一復委四川候補知府唐炯總理行營營務籌商進剿機宜又派候補道呂雋孫督辦各軍糧運並調提督蕭集山總兵王九齡兩營由鳳翔駐紮渭南防護後路糧道於是各將領率師陸續拔發十二日劉厚基率隊期與彭體道會合駐紮途次遇賊接仗斃賊亦十餘名會臣所派副將孫立士回赴亳州招募馬步各一營亦於初十日行抵潼關當即飭令暫駐關外相機防剿連日均獲小勝十三日劉厚基彭體道等前赴敷水鎮察看地勢該逆出隊數千前來衝突

該提督等斃賊復數十名獲馬亦十餘匹十四日蕭德揚西們克西克等行次華州十五日正在拔隊前進適該逆馬步大股約萬餘人來攻州城經唐炯會商諸將四面截擊各軍皆鼓勇直前一以當百喊殺連天聲聞數里逆勢披靡遂向東北狂奔我軍追殺十餘里斃賊五六百名奪獲戰馬八十餘匹並生擒賊目范春一名訊明就地正法十六日劉厚基彭體道等復獲勝仗十八日劉厚基等會合邱時成進紮太和鎮湘果彝字等軍亦進紮北洛村相隔尚二十里是夜唐炯與諸將會議以蕭德揚率湘果軍居左西們克西克率吉林黑龍江馬隊居中黃鼎率彝字全軍居右三路並進十九日黎明蕭德揚拔隊先發

西們克西克黃鼎等繼進行至敷水河遙見溝東樹林內賊蹤層層密布蕭德揚等列隊待戰黃鼎卽派三成隊伍將輜重解回老營該逆愈聚愈眾我軍屹立不動相持數時日已近午蕭德揚正擬就道旁空堡築壘休息忽然塵土衝天逆眾傾巢而出不可數計四面包裹復縱騎隊橫衝將我軍截爲兩段層層圍困逆黨繁多馬步不敵湘果各營弁勇死傷七八百人蕭德揚西們克西克等各率親兵隊左衝右突直至日暮始得潰圍而出黃鼎在賊圍中將所部分爲三隊背據深溝東盪西決麇鬪竟日至是夕二鼓乃得全師而歸當各軍之被圍也該逆忽分股攻撲北洛村營壘經唐炯兩次督勇擊退是役我軍傷亡

既多湘果軍營官張映衡毛福益迄無下落軍威稍挫尙幸該
逆經我軍賈勇鏖戰死亡亦略相當以是氣懾不敢復來逼撲
黃鼎蕭德揚等仍紮北洛村劉厚基彭體道等仍紮太和鎮迄
今相持未退華州以西尙獲安堵此東路各軍近日接仗之實
在情形也臣查西路回逆經官軍迭次擊敗漸已回竄甘境現
飭鄜延各屬厚集民團各扼要隘俾與程興烈段登雲兩軍協
力防堵又飭劉效忠嚴扼邠州譚玉龍力防長武與畱防麟遊
屬麻夫站之湘果三營聯絡聲威以截逆回入陝之路而抽調
邠防之邠太愚楊得勝洪殿元等馬步各營撥赴東路會剿以
厚兵力惟渭華一帶曠野平原向屬用眾用騎之地而臣前後

所調各軍不過萬人又分撥劉玉興何玲必黃加焜等扼防雒南賊馬萬騎疾如風雨實非步隊所能制勝是東路勦擒之師既無把握而西路防回之旅尤嫌單薄事機變幻殊未可知查鮑超劉秉璋等軍業於十月初間行抵廬氏閩鄉一帶逮聞張總愚等已入陝境鮑超遂領軍退回南陽劉秉璋亦折趨新鄭雖荷

諭旨迭次催速入關迄無音耗臣頃接鮑超覆函謂探聞賊意欲竄湖北擬率所部赴宛南迎擊是該提督竟無西來之意關隴殘破向非各省將士願赴之區使僅一方有警臣亦當竭力措拄不敢乞援鄰封今東捻既擾潼華紛紛狼突西回仍踞慶

涇耽耽虎視專恃本省現有兵力萬不能支合無籲懇

天恩嚴催鮑超所部霆軍迅速入關會剿以圖兼顧而支危局
實切叩禱至此次記名提督漢中鎮總兵蕭德揚失律喪師雖
由眾寡不敵而恃勇輕進究涉率忽相應請

旨將蕭德揚撤銷提督並摘去翎頂以示薄懲而觀後效至西
們克西克係因湘果軍牽涉致敗請免置議除將陣亡將士弁
勇查明請卹外所有彙報東西兩路防剿情形請催霆軍迅速
入關會剿緣由理摺由驛馳

奏伏乞

皇太后

皇上聖鑒訓示飭遵謹

奏

附請飭喬松年就豫籌餉帶赴陝省疏

再臣頃奉

諭旨喬松年現在行抵何處著卽趕緊馳赴新任妥籌防剿劉
蓉俟喬松年到任後仍當與之會辦軍務不得遽行回籍置身
事外等因欽此查撫臣喬松年已於九月二十日由皖起程惟
聞取道汴梁恐爲賊氛梗塞不免濡滯現值陝疆事棘羣情震
悚臣亦不敢急求交卸遽作置身事外之圖惟軍事尙可竭力
支持而庫儲罄空軍餉奇窘絕無一綫可恃之源際此雪虐風

警各弁勇鶉衣百結枵腹前驅實無以作其敵愾之氣賊強兵
餒其何可支查河南前奉協撥陝西漢南軍餉自同治二年七
月起至三年十月准部咨停止共應解協陝餉銀十六萬兩僅
解到六千兩山東應解協陝月餉銀十八萬兩僅解銀五千兩
經臣於上年十月奏奉

諭旨飭山東先撥銀十萬兩嗣准先後解銀五萬亦尚短銀五
萬兩臣極知該二員均爲捻氛滋擾庫儲未能充裕惟值陝事
危迫萬不能支之際不得不少求分潤以甦涸轍合無籲懇
天恩敕下山東撫臣閻敬銘河南撫臣李鶴年速將此項協餉
欠項儘數籌解以濟急需並

敕喬松年就在河南與李鶴年竭力籌畫但能湊撥四五萬兩帶赴陝省亦可稍贍飢軍藉支危局不勝迫切懇禱之至謹附片馳陳伏乞
聖鑒飭遵謹

奏

附陳山西臬司防河情形疏

再查捻酋張總愚現踞華陰復分布悍黨紮踞迤南及華山廟等處地逼渭河同朝各屬實形喫緊臣前請

旨飭山西撫臣添設風陵渡上至龍門一帶河防原慮該逆撲過渭河偷渡晉境嗣經山西臬司陳湜派撥礮船駛赴三河口

一帶梭巡防護並親赴各處督同朝邑紳團嚴備北岸迭有斬獲卒能扼賊竄犯同朝之路防河不如防渭實爲扼要堵截之法然庸才每多圖私自便不肯冒險經營該臬司獨能越境扼防布置周妥固非臣初意之所及也惟渭河水淺冬月天寒深慮流凍成冰竟非礮船所能爲力而民團非仗兵威心志每難自固陝中兵力太單無可抽撥臣現函商該臬司派撥步隊四營分紮渭河北岸以壯河干團防之氣並令將礮船上下梭駛敲擊河冰庶期水陸相依兵團協力以保同朝之門戶以固晉省之邊陲實爲兩便除咨明山西撫臣趙長齡並行知臬司陳湜查照辦理外理合附片陳明伏乞

聖鑒飭遵謹

奏

附請飭穆將軍進紮涇州疏

再查慶陽涇州一帶前經督臣楊岳斌派委雷正綰張在山等所部各軍分布防勦通計該二軍與周顯承等駐涇之師約可三十八營共一萬九千人兵力實不爲單第聞各將領意見紛歧苦不能洽紀律亦不整嚴以致逆匪紛竄無能截勦現在逆回巨股麇萃鎮原洪河川一帶而零股分竄甯州正甯合水環縣及涇州之北原各處逼近陝邊日圖狡逞查慶陽一郡在甘省較爲完善之區今歲收成頗爲豐稔臣每與藩司籌商必撥

兵爲甘省保全此郡庶期甘軍糧食尙可就近籌辦而陝省門戶亦可藉圖安固不期捻氛忽犯潼華不得不抽調各軍前資截剿而西路紛竄之匪但能擊使出疆已屬萬幸刻值慶陽甯州正甯各府縣紛紛乞援實無力可以兼顧楊岳斌遠去蘭州方籌軍規剿河狄甘涼各路兵單餉竭萬不能顧及隴東其派駐靖遠通渭馬營之王得勝李助發彭楚漢等軍原以防此股逆回西竄之路勢亦萬難抽撥晝夜圖維正增焦灼忽奉十月

二十日

寄諭陝省東西兩路同時喫緊劉蓉勢難兼顧且該省兵力甚單不敷分布穆圖善現在中衛自應先其所急回顧陝省西路

卽著該將軍暫緩前赴蘭州仍與劉蓉悉心會商先將陝甘毗
境竄匪迅圖殄滅如陝省兵力空虛該將軍所部有無就近可
以抽撥援應之處並著相機調度等因欽此莊誦之餘仰見
聖慮周詳無遠弗屆實非臣愚籌畫所及惟現值事機緊急未
可緩圖伏乞

皇上天恩再賜催速甯夏將軍穆圖善卽率所部得力馬步各
軍迅由鹽茶趨平固進紮涇州督飭雷正綰等軍截剿東竄逆
匪以杜回捻勾結合併之謀並督令張在山等軍竭力保護慶
陽免使蹂躪完善之地庶微臣得以全力專辦捻匪無復西顧
之憂而各軍賴有統率隴東藉資保障實於陝西機局大有裨

益現據周顯承等稟報逆回因邠長廊延各路未能深入復分
遣馬賊由涇州中原竄至崇信雙廟集一帶意圖窺伺隴州等
語查隴防各軍均經徹赴東路僅止麟遊屬之麻夫站紮有三
營勢難分撥臣現飛飭紮駐鞏昌之總兵陳德隆就所部德字
八營中分撥四營赴隴堵剿不知能否相及除咨商楊岳斌並
檄飭陳德隆遵照辦理外理合附片馳陳伏祈

聖鑒飭遵謹

奏

附請飭會帥改派劉楊各軍助剿疏

再臣頃讀

寄諭曾國藩令劉銘傳潘鼎新張樹珊馳剿東路股匪鮑超劉秉璋楊鼎勳劉松山專辦西路股匪等因欽此現據探報楊鼎勳一軍早到陝州劉松山一軍亦抵內鄉皆去陝境絕近惟劉秉璋一軍有折回新鄭之說該三軍合計營數尙不如鮑超之多而紀律較爲嚴整剿辦必更奮迅鮑超旣無意入關陝省殘破地方亦恐不堪其擾伏祈

聖恩敕下曾國藩改派劉秉璋楊鼎勳劉松山三軍來陝會剿劉松山卽由商州前進劉秉璋楊鼎勳卽由潼關前進當較迅速得力此時張逆專恃馬賊馳騁若能併力會剿扼諸潼關之南原潼谷蒿谷一帶澗谷之間則逆黨無可施其馳突之技或

可全數殲除卽不然而逸出豫境仍令鮑超分扼閩鄉盧氏及
浙川之荆紫關一帶截其去路亦不難悉數聚殲愚昧之見是
否有當伏祈

聖鑒飭遵謹

奏

代催各省速解協甘餉項疏

同治五年十月二十九日

奏爲據情代奏請

旨嚴催各省速將積欠協甘餉銀迅籌撥解以濟急需而維大
局恭摺仰祈

聖鑒事竊臣頃據陝西布政使林壽圖詳稱總督楊岳斌所部

各軍餉銀會奉

諭旨由湖北每月協銀三萬五千兩湖南每月協銀一萬兩江西每月協銀二萬兩江蘇江海關每月協銀一萬兩浙江每月協銀二萬兩江甯每月協銀三萬兩統由湖北糧臺解陝轉運蘭垣嗣將江甯之銀撥給甯夏大營一萬兩計各省月解共止銀十一萬五千兩分撥各營月餉以及採買米糧製造軍械等費實屬不敷雖准浙江來咨自本年六月爲始每月加協銀三萬兩至今並未解到陝西兵燹之後糧價物價無不倍昂各省協餉每踰數月始能到陝糧臺匱乏不得已將委員採買製造轉運諸費挪新掩舊敷衍至今以致各州縣採買米糧動借地

丁迄未還款自該司於上年閏五月辦理轉運並本年四月接辦後路糧臺以來總共收過湖北解到銀六萬兩又代買製造物料抵作協餉銀十四萬一千六百餘兩湖南解到銀七萬兩又撥給安肅道蔣凝學製辦軍械抵作協餉銀三萬兩江西解到銀二萬兩江蘇江海關解到銀十二萬兩浙江解到銀三十萬兩江甯解到銀三十二萬兩覈算各省欠解之項尙有一百六十餘萬之多又慶陽糧臺於同治三年六月間奉旨在於四川河南山東山西四省各協濟銀三十萬兩本年以來解者寥寥又於河東鹽課項下歲撥銀五十二萬兩以二十萬撥歸甯夏大營以三十二萬作爲慶陽之用查乙丑綱尙欠

解銀四萬兩丙寅綱全未解到刻下回逆肆擾慶涇一帶逼近
邠長北山鄜州宜君中部洛川等處亦有賊蹤窺伺而東路捻
匪復又竄入陝疆擾及潼華物糧價值異常騰貴現奉總督委
提餉銀軍火帳房棉衣等項臺存匱竭分撥無資該司責任精
臺萬分焦灼因將各省協甘協慶銀兩已到欠解各數開摺具

詳請

奏前來臣查甘肅各軍糧餉兩缺每遇緊急陝省雖處奇窘亦
必竭力籌撥從未稍存畛域之見無如倉庫空虛防剿喫緊兼
顧未遑而甘省危困情形尤甚於陝各省按月派定協餉即使
源源解濟已覺分潤無多若再不能如期陝甘大局何堪設想

督臣楊岳斌東西援剿單騎往來卒以糧缺餉匱之故徒增勞
悴未見功效比遂憂憤成疾嘔血不止昨據轉運局委員由蘭
州回陝備述楊岳斌焦苦情形臨行涕泣寄語若陝省不能速
運糧餉接濟惟有拌一身以謝

朝廷其言至爲愴痛然後路糧臺空無一錢陝庫又極窘乏何
能甦此涸轍謹將藩司所開各省欠解協甘協慶軍餉數目繕
列清單恭呈

御覽仰懇

皇上天恩嚴催各省按照欠數迅速分批委員兼程管解來陝
並

飭新調督臣左宗棠就近派員分赴各省守提以顧要需儻道途有梗阻之處亦須繞道而行萬勿藉詞耽延庶支危局所有據情轉奏請

旨飭催各省積欠甘餉緣由理合恭摺附驛具

奏伏乞

皇太后

皇上聖鑒訓示飭遵謹

奏

附請甘肅後路糧臺事務暫由林壽圖陳奏疏

再查甘肅後路糧臺前經督臣楊岳斌與臣會奏改設西安省

城派委藩司林壽圖一手經理以專責成所有糧臺催餉各務
由臣就近代奏先後奉

旨遵行在案現在臣既蒙

恩開缺回籍楊岳斌亦奉

旨准其開缺調理竊計新調督臣左宗棠當可於臘月抵陝將
來甘肅後路糧臺採買轉運事宜或仍設西安或另設他處應
由左宗棠體察情形自行酌量奏明辦理現准撫臣喬松年來
函已於九月二十日由皖起程計十月底准可到陝臣交卸後
所有甘肅糧臺事務請暫由林壽圖隨時陳奏或以後糧臺改
設亦即飭該藩司將從前經手支發製造採運各事造冊報銷

以清餉項而免輻輳是否有當謹附片陳明伏祈
聖鑒飭遵謹

奏

附請賞還林壽圖二品頂戴疏

再藩司林壽圖前於五月間聞譚軍譁潰經臣派赴涇州相機
辦理旋令折赴鳳翔隴州督辦糧運會同漢中鎮總兵蕭慶高
調護諸將籌畫軍事均協機宜逮七月底始回省城實屬著有
勞績可否願懇

天恩賞還該司二品頂戴之處出自

鴻慈是否有當伏祈

聖鑒飭遵謹

奏

附請將劉嶽曙等照舊保獎疏

再四川補用知府劉嶽曙前於收復漢南郡縣總理果後營全軍營務督隊指揮切中機宜經臣保奏以道員畱於四川儘先補用又藍翎四川卽補縣丞唐楚翹前因攻勦蔡啟二逆屢冒矢石轉戰有功經臣保奏免補本班以知縣仍歸四川儘先補用均欽奉

諭旨允准嗣准部咨查照章程除攻克城池擒斬要逆不准保免補本班劉嶽曙應俟補缺後以道員儘先補用唐楚翹俟補

缺後以知縣儘先補用各等因自應遵照部議惟查劉嶽曙係總理果後營全軍營務之員督軍援陝指揮得宜計其追剿賴逆尾隊以及收復漢中克復城固洋縣二城出力最多至唐楚翹於同治二年咨調來陝幫辦軍務新舊三年收復漢南郡縣均皆在事旋在西安所屬之殷家衛邵家堡樓觀臺南山等處帶隊隨同攻剿蔡啟二逆並剿趙村等處回匪屢冒矢石殺賊破巢所著勞績覈與部章攻克城池擒斬要逆俱尙相符合無

籲懇

天恩俯准將四川補用知府劉嶽曙免補本班仍以道員畱於四川儘先補用藍翎四川卽補縣丞唐楚翹免補本班以知縣

仍歸四川儘先補用以示鼓勵而昭激勸理合附片具陳伏祈
聖鑒飭遵謹

奏

附請將蕭存理保案照准疏

再同知銜花翎畱川補用知縣蕭存理先於攻克四川橫江案
內經四川督臣奏請以從九品畱川補用後因克復階州奏請
免選本班以縣丞畱川補用嗣於生擒曹逆案內經臣奏請免
補縣丞以知縣仍畱四川儘先補用並

賞戴藍翎迨陝境肅清復由知縣請加同知銜並換花翎均蒙
恩允准在案茲接部咨以該員前由文章請以從九品畱於四

川補用飭令補交三班分發銀兩未據補交所有續行請獎各案仍應俟補交銀兩後再行覈辦等因臣查該員蕭存理從戎日久屢次隨隊克復城池擒斬要逆洵屬出力之員現已轉飭補交從九三班分發銀兩其續後歷著勞績應得官階職銜翎枝可否請

旨查明原保各案以次照准註冊俾昭激勸之處出自鴻慈爲此附片陳明伏祈

聖鑒飭遵謹
奏

援例捐贖遣罪疏

同治五年十月二十九日

奏爲佐貳職員呈懇代父加倍捐贖遣罪謹摘敘緣事案由請
旨飭部覈辦恭摺仰祈

聖鑒事竊准戶部咨開新疆贖罪章程照道光二十三年御史
江鴻升奏定銀數三品以上捐銀六千兩仍遵同治三年欽奉
諭旨覈減五成其曾經具請贖罪不准之案加一倍捐輸開列
犯事案由奏請各等因飭局遵辦在案茲據捐餉局司道詳稱
據分發河南按察使經歷王廷棟以伊父王履謙發遣新疆行
抵陝西適值道途梗阻守候日久難以前進現在年屆六旬兩
鬢風溼舊疾舉發動履維艱值伊來省視日覩困苦心實不忍
情愿變鬻家產及借貸親友加倍捐銀六千兩爲父贖罪等情

具詳請

奏前來臣查已革都察院左副都御史王履謙辦團獲咎前奉諭旨係本籍紳士與地方官職司守土者有間發往新疆效力贖罪敬繹

聖諭責以臨難苟免咎實難辭惟查紹興失守該革員遇救得生時值浙省被圍無路得達適前閩浙總督慶瑞駐師建郡該革員因係兼轄之區就近親往求援遂路愆尤其在籍勸捐年餘餉糈賴以接濟曾經慶瑞奏明有案該革員年屆六旬出戍萬里在陝三載屢梗賊氛自以受

恩深重不能早抵戍所荷戈自贖焦憂成疾經臣派委藩司林

壽圖往驗積受風溼兩骹麻木實非支飾上年援照常例捐贖未蒙

俞允現值甘軍需餉窘迫萬分該革員之子王廷棟毀家措資捐銀六千兩覈與部定新章加倍之例相符揆其報效之忱無非出自

君親之念可否准予援贖謹摘敘案情請

旨飭部覈辦如蒙

聖恩允贖卽令交銀解赴軍營以濟要需除將犯事案由並贖罪原呈鈔錄分咨戶刑二部外所有佐貳人員呈懇代父加倍捐贖遣罪緣由理合恭摺具

奏伏乞

皇太后

皇上聖鑒訓示飭遵謹

奏

遵保截剿鳳隴竄回越境追擊出力員弁疏

同治五年十月二十九日

奏為遵

旨查明官軍截剿鳳隴竄回蹋平逆巢及越境攻剿尖骨山巨股踞匪破巢追擊三次出力員弁彙案保獎恭摺仰祈

聖鑒事竊臣前於同治五年五月初二日由驛具奏官軍截剿

竄擾鳳隴逆回追出陝疆情形欽奉

諭旨任事出力員弁准其存記彙案擇尤保獎勿稍濫冒等因
欽此旋於六月十七日具奏攻剿逆回大捷追擊出境情形欽
奉二十三日

上諭劉蓉奏官軍剿賊獲勝蹋平老巢追逐出陝各摺片逆回
盤踞隴州之故關一帶併力抗拒經陝省官軍攻克故關分途
追斬甚多其續由華亭竄至上關一帶另股回匪亦經劉厚基
會同譚玉龍擊敗將上下關賊巢攻燬竄陝回匪悉數追逐出
境所有出力員弁著劉蓉擇尤保奏陣亡將士查明請卹等因
欽此又於八月二十八日具奏彙報官軍越境勦還軍截擊
迭次獲勝並將尖骨山踞賊擊走破巢追剿情形欽奉

諭旨仍著督飭各軍分投攻剿毋令乘隙竄入陝境出力員弁
准其擇尤彙保等因欽此伏查逆回迭次竄擾陝疆所有迭派
擊剿之湘果左翼湘果中軍彝字營親兵營英毅營省標馬步
以及鎮西雄毅各營係屬陝軍其陸續調來會剿之靖安營捷
字營精騎營德字營以及吉林黑龍江馬隊係屬甘軍自應分
別時日之久暫出力之多寡斟酌等差以昭覈實惟營數既眾
則所保員弁不免稍多兼值月餉久懸捻回交熾正當驅策效
力之際不得不將各弁勇併加保獎以資撫循而勵士心亦不
敢稍涉冒濫輕假名器謹將三次實在出力員弁分別繕列清
單恭呈

御覽其隴防守城籌糧帶團助勦官紳及鳳翔各局採運軍糧
官紳亦併籲懇

恩施並賜鼓勵至迭次陣亡將士記名總兵毛福益等八十三
員名奮勇捐軀實堪憫惻謹另繕清單懇

恩飭部各照原保官階從優議給卹典以慰忠魂除將千把以
下出力弁勇咨部給獎外所有查明官軍三次勦賊越境追擊
出力員弁遵

旨彙案保獎緣由理合恭摺由驛具

奏伏祈

皇太后

皇上聖鑒訓示飭遵謹

奏

特參醴泉縣縱役浮收等弊疏

同治五年十一月初七日

奏爲特參縱役浮收致鄉民呈交農器復行飾詞誣墮銅禁生員之知縣請

旨交部嚴加議處以示懲儆恭摺仰祈

聖鑒事竊臣前於四月出省赴涇途次接據醴泉縣生員張依中等呈懇訊究暨民人張正來等具控縣差磕民反陷囹獄各情適甘回竄擾汧隴一帶臣駐紮乾州督勦卽委該署州周相焯傳訊據供差役催糧下鄉每斗磕錢至二三千之多並藉勢

拉牛折房砍伐墳樹強扯布疋估掛匾額因值天時亢旱生員
白朝純尙文及曹鳳鳴等赴縣呈報荒旱各鄉民紛紛隨繳農
器該縣鍾乃澄傳諭四月十五日審問突於十四日差役百餘
至店將白朝純等鎖拏到縣監禁稱有匿名揚帖欲科重罪是
以該士民等來轅呈請提訊等語當卽批飭藩臬兩司立飭西
安府速提研訊分別究辦現據詳覆差役浮收道倉糧錢雖數
目與所控未盡符合而蠹役之藉端磕索則已確鑿無疑况該
縣當兵燹凋敝之後閭閻困苦情形實難言狀臣往返經過親
歷目覩時值雨澤愆期麥收歉薄民間完納正供錢糧已屬筋
疲力盡乃該縣不加體卹轉使惡差擾累鄉村輒以匿名揚帖

將生員白朝純等收禁且並未訊有憑據豈有不先詳革衣頂輒擅監禁之理當卽諭令提禁解省聽候查辦詎該縣竟不遵照任西安府迭次嚴催一味推延逮八月間委員守提始將白朝純等從監內提出解省伏思呈遞旱荒干何例禁卽云呈繳農器亦因差役訛索所致該縣罔恤民瘼不將惡差懲究反以匿名揚帖謀叛重情誣墮生員民人濫行收監並錮禁至數月之久似此昏庸謬妄實屬藐視

王章喪盡天良查該令前署城固聲名已極平常未便更事姑容相應請

旨將醴泉縣知縣鍾乃澄交部嚴加議處以爲縱役殃民者戒

除飭司先將鍾乃澄撤任委員接署查明倉庫錢糧有無虧短
並提差役高康等訊擬另詳外所有特參知縣縱役催糧磕索
致激鄉民呈繳農器復圖掩飾銅禁生員人等緣由理合恭摺
具

奏伏祈

皇太后

皇上聖鑒飭遵謹

奏

附審明已革提督劉正高潰勇情形疏

再臣前奉四月二十三日

上諭楊岳斌奏請將羅得勝等革職訊辦等語羅得勝余炳忠所部各營潰散甚多不能約束著一併革職正中營本係革弁劉正高管帶此次拔赴隴州乃交與羅得勝代管而自居住西安難保非知情先避羅得勝劉正高均著交劉蓉就近嚴切訊究如有主使情弊卽著按照軍法從事毋稍輕縱等因欽此欽遵飭傳人證旋據劉正高稟來陝投到惟羅得勝未知何往隨咨明督臣委員拏解一面將劉正高發交藩臬兩司審辦去後茲據該司等提訊劉正高據供同治元年伊未管帶捷字營頭本年三月舊患潮溼筋骨疼痛病發並無醫藥面向譚玉龍說明於是月十三日由涇州起身十五日行抵醴泉病重住店並

未代爲照料正中營事務領用薪水至隴州營勇潰散伊在道
路並不知情其羅得勝管帶正中營係譚玉龍揀委非伊交管
等語當卽咨查譚玉龍覆稱劉正高前在雷正綰軍營派充七
營統領上年被參所部精選左營親兵尙未潰散嗣在涇州收
撫雷營潰卒蒙奏請

旨開復劉正高嚴議處分因未奉有革職明文是以仍派帶領
兵勇其正中營卽係劉正高舊部精選左營親兵向由羅得勝
管帶劉正高復收潰勇二營因其訓練勤熟續撥三營與之操
演後改捷字軍札委羅得勝爲正中營營官本年三月各營操
練已成劉正高面言請假數日隨值賊竄隴州當派馬步五營

往援報明令劉正高統帶旋經查知劉正高已赴西安一帶至隴州勇潰劉正高實不知情並據隴州湯敏亦稟捷字等營勇丁前在該州潰散劉正高尚未來防復提究詰供與各處查覆大略相同其無主使潰散暨知情先避似屬可信自應先行擬結免致久延等情具詳前來臣查革員劉正高既經兩司迭次推求告假前赴西安醫病係在派往隴州之先其羅得勝管帶正中營亦非該革員交管委無主使及知勇潰先避情事業已革職應毋庸議其羅得勝一員聞現在雷正綰營中患病刻難解陝除俟醫痊押解到日另訊辦理外所有審明已革提督劉正高並無主使及知情先避緣由理合附片陳明伏乞

聖鑒飭遵謹

奏

劉中丞奏議卷十九

四

劉中丞奏議卷十九終

劉中丞奏議卷二十目錄

甄別知府貪鄙不職以肅官箴疏

附請改獎陳胡兩主事保案疏

附請藩司援例展覲疏

籌辦陝省教堂議立條約疏

道員積勞病故請賜表章疏

附陳委員暫署鹽法道疏

附交卸撫篆會辦軍務疏

會奏官軍進搗華陰逆捻繞竄藍田情形疏

彙報逆捻回竄臨渭官軍追襲中伏挫衄情形疏

附覆奏未卽出省情形疏

附陳慶甯逆回東竄疏

附陳會辦軍務勢處兩難情形疏

附陳與喬松年意見不合情形疏

附陳喬松年貪利徇私情狀疏

附陳賊勢趨重地方現在整頓籌辦情形疏

附陳喬松年詭滑推延情形疏

附陳往復信函

附援師勦賊力戰大挫兇鋒疏

附陳湘軍到陝情形疏

附陳楚軍茫無主持情形疏

劉中丞奏議卷二十

湘鄉劉蓉著

甄別知府貪鄙不職以肅官箴疏

同治五年十一月初七日

奏為甄別貪鄙不職之候補知府請

旨革職以肅官箴恭摺仰祈

聖鑒事竊臣渥荷

恩施畀任陝撫正值髮捻回逆擾亂之後地方凋敝瘡痍滿目
自媿才識迂拘數載以來弗克登民衽席不特無以對
君父抑且無以謝羣黎默省五中時深負疚惟思安民必先察
吏迭奉

諭旨諄諄整飭吏治曾將庸劣之道府州縣等官凡數十餘員
節次劾參其有實心任事循聲卓著者亦就聞見所及出具切
實考語先後奏請

獎勵均奉

諭旨欽遵在案茲有前參降補府經歷縣丞之陸庭來赴臣衙
門遞稟稱伊前署臨潼縣事值候補知府秦自修在軍需局當
差其家人與楊生枝等同縣認識從此秦自修與之往來知楊
馬二家皆係臨潼殷實希冀假公濟私藉沾餘潤伊正延紳設
局支應軍火兵差適秦自修專丁持函並擬稟稟來臨內云可
圖生發又云祇須一紙到門兩處必來求情等語伊謂事必回

明各憲依照辦理不料其一片私心始終朦蔽一家被其陷害
迫聞改委接署秦自修又復星夜來函空中樓閣捏搆多端一
味虛誕詐僞彌縫前次函票之愆諉身無過之地在伊固咎無
可辭第事由秦自修作俑儻經當時查訪雖官職較尊而劣跡
昭著恐亦難邀漏網抱此不平之冤不得已稟控藩司詎該守
現在製造局糧臺兩處當差自謂才具出眾聲勢甚熾雖經藩
司批查抗不稟覆究何恃而不恐查秦自修由幕而官應明利
害乃持函票授意教人犯法實圖染指果爲見好起意已屬不
應况主謀於前又聽其負屈於後及至被劾僅以空言慰藉伏
念黜陟秉公有功必獎有犯必懲懇祈澈底訊究等情附黏照

錄秦自修致伊原信票彙當卽批飭藩臬兩司訊辦去後茲據該司等提訊秦自修據供陸庭來前署臨潼縣時伊與素好接其來書稱辦理車馬勸捐維艱有別圖生發之語適伊家丁周升回臨潼原籍帶給信件順將該縣避居省中富戶姓名敘入可否傳捐聽其自主屬實皆係熱腸爲友起見並無授計陷害情事至陸庭來交卸旋省伊曾借過銀錢復因告借不遂挾嫌稟訐訊之陸庭來據供前署臨潼查知地方糜爛車馬缺乏已邀紳士商議籌辦忽接秦自修專丁執持親筆信函并代擬票彙一紙信載馬楊二姓皆其熟悉祇須一紙到門兩處必來求情伊思秦自修係辦軍需局知府大員旣持票彙又云儻有慳

吝違抗稟局派捐發縣押交是必已將臨邑情形回明若不照辦一經貽誤恐干申飭惟原票係捐修貢院商之局紳仍照省城攤捐辦法借資民力改爲捐濟車馬嗣經藩司查知札府追票改委戴鼎元接署將伊撤任隨奏參以府經歷縣丞降補秦自修曾送伊母錢五十千並借銀三百六十兩今伊仰事俯畜絕無生路因思秦自修借捐富戶意圖從中染指種種主謀設計致伊誤墮術中傾陷全家情實難甘各等供由司具詳前來臣查秦自修在省候補當差臨潼富戶避居來省毫不干已何以熟知其家殷實代謀捐輸生發屢次專函授意陸庭來並擬票彙指使差拘捐戶且言祇須一紙到門兩處必來求情其設

謀訛索情形實與市僧無異查該員向幕甘肅陝西四川積習所染心術久虧始則主謀設計不遺餘力繼而多方掩飾曲意彌縫似此貪鄙詭詐迴出情理之外無怪近來御史章奏屢謂由幕而官者最爲巧猾知府乃方面大員有表率僚屬之責今該員行爲卑污蕩檢踰全不自愛殊忝厥職若不亟予懲創將來一膺實缺必致上下句通魚肉百姓尤爲閭閻之害相應據實參奏請

旨將候補知府秦自修卽行革職以肅官方而懲貪鄙至陸庭來因降官窮苦借貸未遂始行稟訴且當秦自修授意票傳富戶捐輸輒卽唯唯聽命實屬遇事昏庸不識大體惟所訴秦自

修授意尙非虛誣前已甄別降補府經歷縣丞請免重科所有甄劾貪鄙不職之候補知府緣由理合恭摺具奏伏乞

皇太后

皇上聖鑒訓示飭遵謹

奏

附請改獎陳胡兩主事保案疏

再查吏部主事陳進銜戶部主事胡印遠前因在籍辦團著有勞績經前撫臣瑛榮於收復紫陽縣城並漢陰石泉解圍出力案內保奏免補本班以員外郎用部議核與奏定章程不符維時該主事等俱已赴京供職臣覆奏請以主事儘先補用並請

賞加員外郎銜又禮部主事余煥文經臣奏調漢南軍營贊畫機宜深資得力亦經奏請以主事儘先補用加員外郎銜均已欽奉

諭旨允准現接吏部來咨京員軍營團練勞績祇准保升外官不准畱補京職及保舉遇缺儘先班次所請仍與章程不符自應另核請獎茲臣分別酌擬請將吏部主事陳進銜胡印遠二員均以同知直隸州知州分發歸候補班先補用禮部主事余煥文一員請

賞加五品銜以示鼓勵如蒙

聖恩俞允伏乞

飭部註冊施行爲此附片陳明伏乞

聖鑒謹

奏

附請藩司援例展覲疏

再據藩司林壽圖呈稱該司緣事鐫秩先奉

諭旨來京另候簡用旋於本年三月蒙

恩以三品頂戴補授陝西布政使例應奏懇

陛見時因初接糧臺規模甫定未便拘泥復自揣才力竭蹶奏
請以候補道呂儁孫幫辦數月以來轉輸採辦製造諸事會同
綜理幸免隕越該道已能措置裕如理應循例赴

闕展覲等因查慶陽糧臺前經楊岳斌與臣因時制宜奏請改設西安將來新任督臣左宗棠到甘或移置他處或另揀大員自能悉心斟酌該藩司自上年五月派司轉運本年四月接管糧臺逐款條分縷晰業將經手出入收放數目彙造清冊以備報銷現在髮捻竄擾華陰臣調集馬步各營期會同豫晉各軍合力堵剿殲諸潼華嶠函之間擬俟軍務稍靖再行飭令該藩司入都瞻覲

天顏理合附陳

聖鑒謹

奏

籌辦陝省教堂議立條約疏

同治五年十一月初七日

奏爲陝省兩處教堂業經分別籌辦均各交給清楚並與議立條約以弭釁端恭摺覆奏仰祈

聖鑒事竊照西安城固兩處教堂迭經籌議換地抵給未定當將先後商辦情形具奏奉

旨飭交總理各國事務衙門議覆欽奉

上諭陝西省城給還教堂一事迭經總理各國事務衙門咨行查辦自應趕緊辦結以符條約即使原基勢難給還另議抵給亦須地方相當令其情願方可通融辦理乃劉蓉於張姓住房是否係教堂基址並無確據而於從前教堂入官招變基址究

在何處又不能指出徒以空言抵制何能折服其心至於以高陵回寺換給該處遠在省外必非該主教所願是明知其不可而故與爲難轉令執持愈堅終成不了之局其城固教堂基址既允給還亦應卽爲了結總之此係按照條約必應辦理之事且已時厯五載若再一味延宕儻別生枝節轉致貽誤大局著劉蓉於接奉此旨後查照厯次奏咨各案迅速督屬妥爲辦結不准再事遷延至片內所陳各節亦係實在情形該署撫惟當妥慎籌辦以弭釁端而維大局等因欽此

臣遵查省城教堂先因所指張姓住宅展轉售賣已厯多年初無確據而西安爲漢回雜處之地日後恐難相安不得不熟籌遠慮是以曲折商辦

據實奏陳茲蒙

聖訓周詳自應恪遵迅速妥辦隨督藩臬兩司委員會同咸甯
長安二縣在於省城另購民房抵換既覓數處該教士高一志
始終堅持總非所指張宅不可若不設法撥還難免藉爲口實
查宅主翰林院編修張大柎已經物故僅遺數齡幼子該印委
各員祇得面見張大柎寡母孔氏告以前情再四婉勸將房讓
出給予價值另覓棲止幸孔氏等深明大義自以世受
國恩不敢固執惟祖輩原置去價銀八千五百兩迄今五世陸
續增添基地修葺房屋又費銀一萬有奇調查契載價銀尙與
所言相符第加入增添修費爲數較多值此庫項支絀焉能籌

茲鉅款公同商酌擬於原價八千五百兩之外垂憐孔氏兩世孤霜加銀一千五百兩共足萬兩之數訂允買定緘邀教士高一志於八月二十日來省帶同親往查看廳堂正廈門樓羣房統計一百五十八間該教士欣然樂從隨於司庫兵餉一五節省項下動支庫平銀一萬兩飭發給領卽催張姓書契遷移交割其城固縣教堂亦經委員隴州知州王居仁於九月二十七日馳抵該縣會傳城內鄉地鄰佑偕同傳教士王時中親赴大西門內查明碑記原地四畝六分四釐逐一丈量尺數四至栽立界石書寫交還原地字據該傳教士王時中情願承領亦書收字彼此註明任聽該教士自行修理以後兩無轆轤其收字

現經委員帶省面會高一志蓋用印信備案等情由司會詳請
奏前來臣覆查西安教堂既經籌價買給城固教堂又將原址
清還是兩處均已如其所願惟該教士既入省城應籌久遠相
安之法因飭委員與之反復定議以後除傳教事件應准與地
方官隨時籌商此外一切公事不得干預又省城回民良莠不
齊伊既自有其教該教士卽當示以區別不得並收城內城外
回民入教致啟漢民猜嫌又省城向來門禁綦嚴以防奸宄嗣
後傳教士與教民出入城門誠慮匪徒弊混應聽委員一律盤
查明確不得違抗至於日後添造醫院學房墳地置買租賃房
屋曾載條約果係民間情願交易聽其自便其房屋墳地如有

應交地糧稅契銀兩亦應照章過割按年完交現將所議章程
四條飭司轉行府縣與該教士互換印文存執遵辦以期永弭
釁端除將詳細情形及所定條約咨呈總理各國事務衙門查
核辦理外所有西安城固兩處教堂均已遵

旨辦結緣由理合恭摺具

奏伏乞

皇太后

皇上聖鑒飭遵謹

奏

道員積勞病故請賜表章疏

同治五年十一月初九日

奏爲道員積勞病故遺愛在民謹臚列政蹟懇

恩特賜表章宣付史館以勸循良恭摺奏祈

聖鑒事竊查鹽運使銜陝西鳳邠道黃輔辰貴州貴筑人由進士出身簽分吏部主事洊升考功司郎中

京察一等以知府用分發山西保升道員旋蒙

簡放陝西鳳邠鹽法道同治四年五月到任於本年十一月初

六日在任積勞病故臣維前漢文宣之世首與吏治其時如黃

霸龔遂輩盡心民事皆加爵增秩賜金以示優異光武當河北

甫定隴蜀未平首拔卓茂爲太傅用成中興盛業而兩漢循良

亦遂冠絕今古歷代國史專列一門臣起自草茅未窺中祕嘗

見故大學士阮元文集蒐輯陸隴其等二十餘人或以維持政體或以平反大獄或以講求水利農田或以辦理保甲團練不論官職之高卑但以吏事爲斷限考求事實彙爲

國朝循吏傳以備史館採擇誠以吏治關係國家安危失人則決裂破壞眾志以攜得人則幹旋彌縫邦本以固傳曰一夫得情千室鳴絃由此道也竊見該故道厯官中外二十餘年心術正大吏事精能其在吏部持平秉正不阿長官清介之操同僚共信其在本籍創辦團練周厯鄉村繕治城隍勸儲倉穀諸事備舉曾奉

文宗顯皇帝恩旨嘉獎其在山西停鐵錢之鼓鑄罷釐金之細

碎尤爲通達大體便利小民兩署冀甯道水利緝捕悉心區畫
後因告假回籍臣與遇於成都諮詢治術商推古今覺其遇事
講求卓有條貫心實敬之嗣臣奉

命撫陝慨念秦地荒蕪民食艱窘銳思興辦屯田因以書詢利
弊該故道爲陳十二難復采輯官私書爲營田輯要大旨在於
用民而不用兵與民興利而不與民爭利其立論皆衷於體要
及蒙

恩簡任鳳邠臣卽委以西安同州鳳翔延安乾州邠州鄜州七
府州屬營田事務卒能以所言者見諸施行當創辦之初議者
多以藉濟軍餉爲言該故道獨謂與其急求贍兵存奢望於閭

閭而餉需終歸無著不若寬以待民使民樂趨於隴畝而餉源
或可自充然欲使民樂於墾荒而無後累必使民得爲世業而
有餘資於是爲之正經界定限制緩錢糧定租額籌畫旣備詳
請臣縷晰具奏乃札飭各州縣次第舉行各牧令或忸於積習
或未得肯要該故道皆於公牘手自批荅詳悉指示又慮日久
懈弛詳定考課章程以資懲勸至本年八九月間臥病牀褥自
知不起念各州縣墾荒者漸次報滿徵收租穀弊竇滋多因力
疾續擬章程詳請咨部立案逮病篤稟請開缺猶以接辦營田
須擇不徇情面不事更張之員爲請其憂
國奉公念念不忘實出誠悃有非人所能及者計自去年六月

迄今不過暮年查出叛絕各產三十餘萬畝認墾者已十八萬
餘畝並有已屆一年期滿陸續呈交租糧者近值捻蹤西竄華
州渭南均賴營田租麥接濟軍食其辦理實著明效秦中自遭
兵燹諸事竭蹶如省城之育嬰堂種痘局以及省內外各書院
養濟院水道渠工由叛絕產中湊撥借資整頓全活者不一而
足使該故道始終其事更歷數年則民氣可冀復元諸廢可期
備舉不虞遽爾溘逝臣實惜之本年五月回逆竄擾秦疆臣飭
該故道督辦省城保甲會集官紳漢回剴切申諭編立十家牌
料民審戶使奸宄無從匿迹又以省城舊設義學廢弛日久該
故道親往查考塾師課讀勤者嘉獎惰者更易皆出於實心實

力不事虛飾竊維比年吏治廢弛仕風頽壞皆由士大夫利祿
情深公家計薄上以粉飾求治下以詐僞相蒙雖屬職分所當
爲猶藉文法以巧避况於職守之外別事經營苟非有利可圖
誰肯悉心求濟該故道所管鳳邪鹽法印務本屬無多獨能規
三秦遠大之圖爲百年經久之計任勞任怨矢慎矢勤惟裕
國以爲懷雖盡瘁所弗恤身沒之日家若寒生無一語之及私
僅遺經以教子此愚臣所爲撫膺愧歎且深爲秦民惋惜者也
伏維我

皇上興吏治以厚民生獎清修以勵臣節孜孜求治於今五年
竊謂如該故道清操惠政樸學實行允堪媲美前賢增光

聖代謹臚列生平政蹟仰求

皇上天恩特賜優詔褒卹准將該故道入陝西名宦祠並懇
敕下臣章宣付史館以備將來纂修循吏傳時採擇事實庶循
蹟不至湮沒頽風藉以激揚以垂

聖主中興之休聲而繼兩漢循良之盛軌愚昧之見是否有當
理合恭摺陳奏並將該故道所輯營田輯要三卷進呈

御覽伏乞

皇太后

皇上聖鑒施行謹

奏

附陳委員暫署鹽法道疏

再陝西鳳邠道員缺現經臣會商新任撫臣喬松年暫委候補道官銘署理惟該故道黃輔辰所辦營田事宜事繁體重一時難得悉心經理之員祇得暫委藩司林壽圖兼轄將來如仍歸鳳陝道衙門辦理應請由撫臣喬松年慎簡賢能具題請補以守成法而竟前功除暫行檄飭署理外理合附片陳明伏祈

聖鑒謹

奏

附交卸撫篆會辦軍務疏

再新任撫臣喬松年已於十一月初六日到省現定期初十日
接印任事臣於交卸後暫移省寓謹遵
諭旨與喬松年會辦軍務一俟捻氛稍靜境內安謐卽取道湖
北回籍就醫調理附片陳明伏乞

聖鑒謹

奏

會奏官軍進搗華陰逆捻繞竄藍田情形疏

同治五年十一月二十一

奏爲官軍進搗華陰逆捻繞竄藍田謹將現籌併力勦辦情形
恭摺會奏仰祈

聖鑒事竊臣於十月二十九日曾將彙報東西兩路防勦情形

請

旨催速霆軍入關會勦由驛馳陳在案嗣據記名提督劉厚基等稟報十月二十六日午刻華陰踞逆忽出馬步隊約三四千人分三路而來一股由大路迤北繞出我軍之後以一股設伏林中而以長鎗悍逆直撲營壘該提督等傳令各營偃旗息鼓自率親兵排列營外俟賊逼近以鎗礮連環轟擊斃賊多人邱時成復率馬隊由南城堡突出相持良久賊始徐折回老巢該提督等因林內伏賊密布未動不便追擊十一月初二日夜擊獲賊探據供逆首張總愚偵知官兵漸集於三十日宴集羣酋期於初間竄動或走鄠盩或趨商雒等語初三日該逆大隊湧

出劉厚基彭體道等力戰竟日未分勝負初四日卽分股先由蒲峪偷竄經派防雒南之劉玉興督率各營奮勇擊退殲斃悍賊數十名生擒二名奪獲戰馬四匹訊據供詞與前探大略相同維時臣所調邠防之鄆太愚楊得勝洪殿元等軍已陸續自省拔發初五日行次華州之西關外與劉厚基彭體道蕭德揚黃鼎等軍相距各二三十里中間賊蹤蔓延聲氣尙不相通初六日早探報該逆馬隊大股蜂擁而來鄆太愚等飭令各勇站立營壘靜以待之該逆四面環繞勢甚猖獗我軍憑壘施放鎗礮傷斃逆騎頗多延至日午賊氣稍衰我軍奮勇齊出斬馘極夥始將該逆擊退次日黎明該逆仍分股牽制劉厚基等軍使

不得從中邀截而以大股循渭河西上綿亙數十里三更以後盡萃於華州西關左右盤踞附近村堡將鄒太愚等軍層層圍裏初七日劉厚基彭體道等知該逆全數西竄星馳回援遂與鄒太愚等裏應外合併將踞賊擊敗該逆縱騎望西竄走蕭德揚黃鼎等慮其直犯省垣遂兼程夜渡渭河繞出賊前爲攔頭迎勦之計乃該逆驟如風雨前隊已於初六日未刻馳抵渭南直撲派防渭南城之蕭集山王九齡兩營當經蕭集山等出隊邀擊始退駐離營五里之麻茂村一帶初八日邊馬擾及灞橋於是各軍皆繞由咸陽渡河顧護省城該逆大股亦遂折竄藍田境內十一二三等日各軍陸續齊集省外臣查該逆竄踞

華陰已逾一月所調東路馬步各軍先後進剿皆爲賊氛隔斷彼此苦不得合兵分力薄以致屢爲所乘現探張總愚自率悍黨踞藍田屬之洩湖餘黨分布鞏川藍橋鹿走溝故景鋪等處蔓延仍數十里非合大軍整隊前進難與爭鋒因與臣松年會商分撥諸將以鄆太愚蕭德揚楊得勝洪殿元爲左路劉厚基黃鼎邱時成西們克西克爲右路張兩翼滾營前進並令彼此相距不得過二里或左路賊勢偏重右路卽爲策應右路賊勢偏重左路亦相應援復慮右路兵力較薄飛調邠防譚玉龍一軍益之又檄劉玉興何玲必黃加焜等由雒南扼紫窄峪口一帶截其前竄商州之路調隴防蕭德綱等三營紮駐水溝扼其

由狄寨繞竄省城之路而畱彭體道撫標各營駐紮東關兼護糧運布置既定鄆太愚等均於十六日由省拔發十七日進至藍田屬之新街鎮前數里距洩湖巨巢約十六七里正在紮營該逆卽湧出馬步數千蜂擁來撲鄆太愚蕭德揚楊得勝洪殿元等各率親兵馬隊及鎮西軍新募毫勇千人奮前接仗仍以全部趕築營壘鏖戰時許陣斬悍賊十餘人逆眾遂皆敗竄其南原孟家莊引駕迴一帶蔓延之賊亦皆退聚洩湖老巢臣等仍飭諸軍節節進逼但冀旬日之間該逆不遽竄走我軍得以併力一戰痛挫兇鋒或將逆黨逼入南山林壑澗谷之間使賊騎不得肆其馳騁卽不難爲全數殲除之計所有擒逆繞竄藍

田現飭諸軍併力勦辦情形理合恭摺由驛會奏伏祈

皇太后

皇上聖鑒訓示謹

奏

彙報逆捻回竄臨渭官軍追襲中伏挫衄情形疏

五年臘月廿五

奏為彙報捻逆由藍田回竄臨渭盤踞新豐經官軍奮力擊走

乘勝追襲中伏挫衄情形請

旨速撥援師來陝會勦以靖逆氛恭摺馳奏仰祈

聖鑒事竊臣前將捻逆繞竄藍田檄飭諸軍併力勦辦各情會

同撫臣喬松年恭摺馳報欽奉

上諭令臣等激厲將士奮力勦洗等因查該逆屬集藍田之洩湖一帶意圖久距經我軍連日整隊進逼步步爲營該逆每縱騎蜂擁來撲均經隨時擊退十一月二十五日各軍逼賊而壘相距不及一里逆巢突出馬步數千圍繞衝突鏖戰逾時我軍左右鈔截陣斬馬賊數十名始各敗退正擬併力進搗老巢該逆卽於是夜棄巢而遁先由藍田趨商雒山徑旋復折由厚子鎮逕竄渭南我軍分路追勦二十九三十兩日劉厚基蕭德揚黃鼎等在普化鎮一帶遇賊後隊回鬪麾軍奮擊迭獲小捷譚玉龍率所部繞由臨潼扼擊於渭南之麻李村亦有斬擒維時該逆大隊由渭南逕竄臨潼十二月初三日鄔太愚洪殿元率

隊東趨行至距臨潼二十里新豐地方猝與逆黨相遇列隊接戰自辰至未殺斃逆賊數百名生擒七八十名既而該逆後隊屬至將新豐附近村堡盤踞重重圍裏並開挖長壕以困之時分小股渡渭河北岸擾及高陵一帶維時蕭德揚劉厚基等追賊之師均從南原前進被賊隔斷查渭河冬涸而泥淖特深惟新豐一片沙灘實慮該逆涉淺竄渡擾及同郡完善之區臣與喬松年會商嚴飭諸軍奮力進搗新豐以解重圍而截凶焰初四日劉厚基楊得勝劉玉興等折回零口黃鼎西們克西克等折回楊村蕭德揚折回南原途次遇賊接仗皆獲勝捷距新豐止十餘里初五日逆眾分爲三路攻撲該三處營壘鏖戰竟日

始將該逆擊退共計斃賊四百餘名奪獲賊馬數十匹初八日
蕭德揚黃鼎劉厚基唐炯等往返函商以南原地勢稍高可以
俯瞰新豐而湘果一軍獨駐原上未免單薄因分黃鼎彝字營
由楊村拔上南原以取建瓴之勢劉厚基楊得勝譚玉龍邱時
成西們克西克劉玉興黃加焜等亦各率所部移紮原下互相
應援初九日黎明該逆馬步數千逕撲原下營壘各軍靜立以
待俟賊逼近用田雞劈山各礮照準轟擊傷斃賊匪多名黃鼎
復飭張玉文黃有忠率勇飛奔而下左右衝擊該逆甫退逆酋
張五黑見原上營壘無多親率悍黨三四千前來衝突張玉文
回頭拒戰陣斬騎馬賊數十名該逆步隊如牆而進騎賊左右

包鈔張玉文中矛落馬黃鼎急麾黃有忠徐占彪等大呼猛進賊勢披靡猶復死戰不退原下各軍分路上援鎗斃矛刺短兵相接殺賊又數十名該逆始紛紛潰敗計斃賊約數百名我軍亦有傷亡劉厚基楊得勝等復移營進紮余家寨該逆旋於濠外加挖長壕以拒援師初十一十二等日我軍滾營進逼該逆每出馬步悍賊拌命衝撲均經擊敗臣等慮原上兵單復飭蕭德綱率湘果左翼三營繞由藍田拔赴南原以厚其勢是時各軍距新豐外壕尙二三里壕外民堡皆被該逆盤踞我軍步步爲營更番進紮日夜攻襲直至十五日始抵外壕是夜該逆密伏悍賊於各壕內及兩旁廢堡之中圖俟我軍撲進卽從壕

丙突出我軍偵知其情延至十六日黎明始各率師猛進鄆太
愚等知援軍已集飭兵勇囊土填壕開堡大呼以火器長矛衝
突而出劉厚基黃鼎楊得勝蕭德揚劉玉興譚玉龍西們克西
克邱時成等各率所部四面衝殺喊聲震天該逆憑壕死拒鏖
戰不退各軍復分道邀截內外夾擊陣斬逆酋張總道連斃悍
賊逆勢不支奪路奔逃當將逆巢盡數攻燬追殺十餘里共計
斃賊八九百名奪獲器械無算我軍亦有傷亡該逆連夜西竄
圖趨鄂蓋一帶臣因密飭彭體道率撫標三營伏於距省十五
里之光太廟約俟張總愚黃旗隊到開礮狙擊復慮兵力太單
或爲逆黨所乘嚴飭諸將乘勝猛追勿許得舒喘息十七日邊

馬已及省城附近韓生冢一帶而另派馬步悍賊二三萬眾埋伏於瀆橋之十里坡上左右村堡十八日追師行抵瀆橋該逆回旗轉鬪我軍併力猛進殲斃逆眾二三百名奪馬二百餘匹追過瀆橋楊得勝率所部雄毅軍首先搶上十里坡蕭德揚劉厚基黃鼎劉玉興等督隊繼進忽然風雪晦冥咫尺不辨坡上逆黨回馬抗拒兩旁伏賊突出我軍業已深入勢難退卻賊縱萬騎左右衝撲蕭德揚等奮刃督軍力戰斬馘甚多逆黨知係統將環矛叢刺蕭德揚身帶二十餘傷力竭陣亡各軍奮勇轉戰數時斃賊甚夥無如鎗礮均被雪雨沾溼不能點放逆黨既眾馬步懸殊將我軍層層圍裏楊得勝蕭集山蕭長青蕭德綱

等均歿於陣傷亡員弁勇近三千人譚玉龍率師後至與劉厚基所部兩營力扼澧橋鄔太愚邱時成劉玉興西們克西克等奮力殺出重圍退駐臨潼黃鼎率六成隊伍衝至省城十九日該逆復率逆黨圍撲譚玉龍營壘經該軍奮勇抵禦始行擊退現在賊勢全數西趨鄂蓋查點各軍惟湘果雄毅英毅三軍傷亡較多已飭收集隊伍重整旗鎗以期再震聲威指日即可就緒並聞兩江督臣曾國藩派撥劉松山一軍來陝已近潼關俟其到省即可併力會剿以盪兇氛惟探甘肅逆回圍撲慶陽蔓延甯州一帶萬一竄擾陝邊實無兵可資堵截非速調大枝勁旅迅掃捻氛殊慮兩匪交熾難復圖功查鮑超一軍現赴湖

北已無人關之望欲圖奏調他軍又慮無餉可撥計惟陝甘督臣左宗棠所部與劉典新募之眾合計六千餘人此時已抵鄂省合無籲懇

天恩敕下左宗棠暫緩赴京入

覲卽親督所部由襄陽取道荆紫關務於來年正月以內到陝會勦以顧關隴大局至此追師失利皆由臣督催太急致各軍未能穩慎挫喪軍威追悔無及相應請

旨將臣交部嚴加議處漢中鎮總兵蕭德揚力戰捐軀深堪憫惻懇

恩開復提督原官仍照提督陣亡例

賜卹升用提督楊得勝記名提督蕭集山蕭長青布政使銜候選道蕭德綱均請按照現保職銜交部議卹以慰忠魂其餘傷亡員弁容俟詳細查明續行奏請所有捻逆敗竄官軍追剿失利請撥援軍入秦會剿各緣由理合由驛馳

奏伏乞

皇太后

皇上聖鑒訓示再臣此摺已函約喬松年會銜拜發二十二日擬稟送閱旋接覆函言該撫已於先日單銜具奏不必重複臣於十一月下旬擬力疾前赴藍田督剿曾借該撫印花備用此次繕發摺件卽用巡撫印信合併聲明謹

奏

附覆奏未卽出省情形疏

再臣於本日子刻接奉十二月十六日

上諭陝西賊股聞已襲陷臨潼擾至灞橋等處又附近西安省城之引駕迴牛犢杜曲等鎮及孝義鎮安等處俱有賊營陝省兵勇營數不少迭次諭令劉蓉出省督勦該前撫置若罔聞高臥省城養賊自重以致軍無統率任賊紛竄不知是何居心近半月以來奏報杳然殊深焦灼等因欽此跪讀之下惶悚莫名查臣於十一月初十日交卸撫篆其時捻氛近在灞橋杜曲一帶游弋十三四日探悉張總愚已踞洩湖爲老巢踞省城僅四

五十五里其時各軍陸續到省當卽飭令諸將由新豐鎮整隊滾
營前進二十六日賊由洩湖竄過藍田聞其勢將趨商雒臣遂
刻期十二月初二日力疾進駐藍田督率各軍追勦旋聞該逆
又折由厚子鎮竄往渭南因檄譚玉龍鄔太愚等軍由臨潼以
截其前飭蕭德揚劉厚基等由厚子鎮以躡其後初五日探聞
逆勢已趨臨潼其巨股盤踞新豐踞省城亦不過五六十里十
六日經諸軍奮力擊走又由近省一帶竄近鄔境捻蹤飄忽靡
定黨羽繁多旣已相距未遙祇宜就近調度視其趨向所重以
施隨時截勦之方未可專顧一路此臣所以未卽出省之由非
敢自耽安逸至臨潼並無襲陷之事孝義鎮安等處亦無賊蹤

竄擾之事理合據實陳明伏祈

聖鑒謹

奏

附陳慶甯逆回東竄疏

正封摺間接據總兵段登雲十九日稟報慶甯逆回已由艾蒿店上畛鎮紛紛東竄現抵槐樹莊將近中部宜君等境勢甚猖獗請速撥兵堵剿等語又接涇州委員劉校書稟報現據甯州逃出難民供稱回逆會議有於歲暮春初分竄陝省會合髮捻之語查慶陽一帶逆回圖與髮捻合股事在意中此時官軍新挫專圖捻逆尙無把握勢難兼遏回氛惟有叩懇

天恩速飭督臣左宗棠督師來陝既以維繫楚軍將渙之心亦冀潛消逆回方張之焰事關緊急理合附片馳陳伏乞

聖鑒謹

奏

瀝陳會辦軍務勢處兩難情形疏

同治五年十二月二十五日

奏為微臣會辦軍務勢處兩難謹瀝陳棘手情形密封馳奏仰

祈

聖鑒事竊維陳鞠師旅必資專闡之權宏濟艱難須得同志之侶苟事權之不屬則掣肘已多况心志之不孚則誤國尤大比歲東南巨患卒能次第削平皆由

朝廷任用疆臣督師以一事權之故其成效既彰彰可覩矣近
讀

寄諭命李鴻章出省督辦捻匪以曾國藩回任專理餉糈仰見
聖慮周詳深知該督撫夙同心膂必能共奏膚功

明主置處之宜海內實同欽佩臣以庸劣之材謬膺封疆之寄

不幸身嬰疾病恐誤地方會值陝境肅清陳請開缺既蒙

聖恩允准謂可稍息顛愚既而捻逆西趨陝疆事棘復承

諭旨畱陝會辦軍務艱難之際義不敢辭然已深知他日任事

之難屢思上章自陳俟平賊後始求卸篆願自揣材庸智淺恐

不能卒踐其言又自念以乞病退休人員贊襄軍事差不致人

忌嫉亦冀喬松年稍諒苦心或者不掣其肘尚可勉竭駑鈍薄效涓埃初不圖所遇之窮至於今日之極也喬松年陰險巧滑貪利徇私其性情心術迴與人殊到任以來既以軍事盡諉於臣時值強敵壓境該撫臣與諸將均不相習臣亦不敢稍涉推諉致誤事機然每與商量機宜皆依違不置可否當面則進圓融之語退後卽肆譏詐之談各營稟報軍情臣皆隨時批發隨時咨會而該撫臣從無一字咨至臣處臣所部楚軍萬四千人欠餉均踰一年甚至有十四五箇月者冬寒雪凍各軍請發餉銀製辦棉衣經臣錄稟咨商亦不見覆新豐之役糧運梗絕各軍日日忍飢移營進逼而該撫臣不念軍食維艱但責進剿不

力臣不得已涕泣裁書遍諭諸將奮圖一戰之功十六日各軍
賈勇猛進幸挫兇鋒擊賊西竄諸將奮力窮追致有十八日中
伏挫衄之事臣心正切愴痛乃據林壽圖面稱二十日喬松年
接見司道告以蕭德揚陣亡全軍敗沒撫掌大笑以爲快事聞
者莫不怪詫將卒尤切痛恨夫幸人之災樂人之禍已非君子
之心喬松年身任封疆坐視將弁兵勇歿於王事不但漠不關
心且復幸其災而樂其禍誠不知是何肺腸無怪乎各營將士
切齒痛心無復敵愾之氣矣喬松年每謂楚軍不能得力當調
皖軍查楚軍入陝以來擒曹燦章藍大順於漢郡殲蔡昌榮梁
成富於階州均屬著名渠魁全數撲滅至於掃除潰卒勦拒回

氛亦頗著有微勞該撫臣謂其全不得力似非平心之論如必
以此次挫衄指爲罪狀曾不知捻逆強橫僧格林沁督勦四年
而不見效曾國藩接辦歲餘亦未奏功該二臣忠勳夙著久爲
朝廷股肱心膂之臣然每與交鋒敗多勝少况臣驅飢軍以當
強敵無尺寸可恃之權獨能保其不挫乎現值逆燄猖獗臣旣
決無抽身引退之理而喬松年居心陰險又決非可與共事之
人勢處兩難心焦萬狀不得不將棘手情形瀝陳於我

聖主之前如蒙

皇上俯念陝疆危迫另

簡廉幹知兵大員接任撫篆

臣惟當竭力盡心勉效馳驅但無

掣肘之虞終圖討賊之效其或不然卽莫如盡撤楚卒由喬松
年另調他軍庶免眾怨沸騰自相水火不勝迫切待
命之至所有微臣會辦軍務勢處兩難緣由理合附驛馳陳伏

祈

皇太后

皇上聖鑒訓示飭遵謹

奏

附陳與喬松年意見不合情形疏

再喬松年與臣齟齬之故初不知其所由該撫臣以十一月初
六日抵省擇期初十日接篆初八日探報捻逆邊馬擾及灞橋

一帶距省約二十里其時各軍皆落賊後省邊別無兵勇臣當
派遊擊胡得成帶兵三百名出東關外四五里巡哨囑令早出
晚歸日日如此以鎮人心不期是日已將城門封閉該弁兵與
近省一帶避賊難民婦女老幼數萬人不得入城初九日城上
卽開大礮派民夫上城守堞臣皆不得與聞羣情惶駭因函告
喬松年省城總宜鎮定今賊蹤尙遠且各軍方躡其後豈敢竟
犯省城不宜遽閉城門更不得無故開放大礮派民守堞徒使
人心驚惶喬松年覆函言城門啟閉由署將軍穆隆阿作主不
得自由初十日臣卸篆卽向穆隆阿請發門鑰自出東門外看
視實無賊蹤難民萬餘始得扶攜進城臣請後臣約喬松年及藩

臬兩司同至穆隆阿署內面告情形請奏明將四門鎖鑰交付
臣手由臣照常啟閉如有失誤惟臣一人是問穆隆阿意不謂
然是夕黃鼎率彝字營趨赴省城城閉不得入露宿於外十一
日午刻始開城放進各弁勇自以黃夜趨赴飢寒交迫頗出怨
言由是有與縣差口角爭鬧之事十二三日各軍齊集省城臣
責以何不尾賊躡而繞道來省諸將僉言遙聞省城破聲震
撼恐城防危急是以星夜繞來等語喬松年每欲奏調皖軍臣
謂皖去秦太遠緩不濟急且司庫無餉可給不如湘淮各軍近
在豫境且無須由秦發餉又此時但能奮力一戰幸而克捷卽
不必定恃客軍亦省各州縣供給兵差之苦此殆喬松年等與

臣意見不合之由然皆爲公事起見謹復縷晰附陳伏乞

聖鑒謹

奏

附陳喬松年貪利徇私情狀疏

再臣言喬松年貪利徇私並非無據之詞該撫臣初到陝省卽向臣詢及陝撫衙門出息多寡臣告以在任三年祇支廉俸此外別無所有至向來節壽陋規雖多不敢收受該撫臣默然久之徐云我京城交遊多應酬大僅支廉俸殊不敷用奈何其後每語司道云劉署撫用度少自可不收規禮我則不能云云以諷諭之屬員承仰風旨送年節規禮者現已紛紛其所帶文武

隨員裕庚等三十八名皆居署內均札行軍需局提取薪水銀兩查裕庚爲司章奏彭毓棻爲繕摺件路玉階爲掌書記鄭襄爲司教讀月支薪水或五十兩或三十六兩二十四兩不等其他更不知所派何事每月提薪水銀共五百一十四兩計歲需庫款六千餘兩之多亦不計及將來作何報銷又有姻戚曹紹曾爲司帳目者札派製造局差使月提薪水三十六兩隨弁二名月支十二兩實在署內管帳並未赴局當差但借名目爲坐支薪水之計此皆有札文可據者現值司庫奇窘該撫臣提用庫款如取私囊實屬從前所未有又每向司道詢問陝省州縣缺分肥瘠聲言試用知縣李毓璘畱陝補用知縣鄭慶嵩定遠

廳司獄沈填皆吾世誼也當予美缺邠州知州韓軫吾姻戚也當調善地藩司以鄭慶嵩方奉部文催繳分發銀兩與例未符然竟委署武功也臣所甄別參劾人員該撫臣一一接見云吾久知爾等受屈當爲昭雪以慰悅之陝省吏治廢弛臣與藩司林壽圖極力整飭頗見轉機該撫臣蒞任僅踰一月風氣已爲大變恐將來政以賄成官常益壞理合據實密陳伏祈

聖鑒謹

奏

覆陳賊勢趨重地現在整頓籌辦情形疏同治六年正月初七日

奏爲遵

旨覆陳賊勢趨重地方及現在整頓籌辦情形恭摺具奏仰祈
聖鑒事竊臣於五年十二月二十五日曾將官軍追賊挫衄各
情形縷晰馳陳在案本月初三日欽奉十二月二十七日
諭旨張總愚賊股業已渡渭劉蓉因循貽誤幾於一籌莫展實
堪痛恨現在趨重何路著喬松年劉蓉悉心妥籌辦理該撫等
責無旁貸不得專借客兵坐視地方蹂躪致干重咎等因欽此
查張逆前由藍田竄踞新豐意圖就該處沙灘搶渡渭北旋經
官軍奮力擊剿敗趨西南竄往鄠盩一路迭據該二縣稟報逆
匪前隊竄擾啞柏槐芽各鎮而張總愚老巢仍踞鄠縣之秦渡
鎮花園鋪一帶距省城約五十里其游騎或鳧渡渭水擾及興

平武功醴泉等處然爲數均屬無多我軍自去臘十八日追剿
失利後經臣飭令諸將收集潰散逐加整頓計英毅軍三營存
千餘人現令歸併劉厚基統轄雄毅軍三營存千餘人現令歸
併鄒太愚統轄湘果軍九營存三千餘人現令併成六營派記
名提督蕭德見暫行總理挑選營官百長裁汰疲弱均已次第
就緒惟各軍月餉懸欠在一年以外而司庫支絀萬分僅於除
夕籌給十日之餉各營器械旗幟半多遺失不得不添製補發
亦往往苦於無費臣既交卸篆務已無籌餉之權欲圖激厲軍
心徒作仰屋之歎旦夕焦慮無計可施幸各將卒諒臣苦衷共
篤義憤但能稍資點綴即可再振聲威又值兩江督臣曾國藩

所派皖南鎮劉松山一軍已於去臘二十九日到省該鎮所部
皆湘人軍容甚整士氣益張臣比與悉心面商此時該逆游騎
四出然我軍但能逕搗老巢賊必收集一處各路游氛不攻自
息因囑令先率所部紮駐距省三十里之義井寨堅壁勿戰俟
初旬外陝軍整頓旗幟卽會同進攻花園鋪秦渡鎮老巢相與
併力大戰幸而克捷卽視賊所向分追躡截以策全功劉松山
深以爲然當於初三日率師開赴義井寨臣一面函達喬松年
告以情形旋接該撫臣覆函謂不必指定所向又檄劉厚基等
拔赴興平咸陽防堵諸將領無所適從復來臣寓請示臣以該
撫臣既有檄飭未便改調祇得函止劉松山暫緩前進又接鮑

超來咨定於十二月二十一日自鍾祥開拔由荆紫關入秦恐將來統帥更多意見難合則諸將觀聽惶惑於大局益滋貽誤相應請

旨敕下督臣左宗棠星馳來陝督辦以一事權臣雖疾病侵尋亦不敢置身局外期仍以間散人員聯絡軍心規畫形勢或能勉竭駑鈍終效涓埃所有現在籌辦緣由理合附驛馳陳伏乞

皇太后

皇上聖鑒訓示謹

奏

附陳喬松年詭滑推延情形疏

再查張總愚現率巨股踞秦渡鎮花園鋪一帶爲老巢而游騎
四出或渡渭河擾及興平武功扶風乾州醴泉等縣揆其狡謀
一則多方誤我牽制兵勢一則以我軍新挫圖乘間肆其擄掠
然據興武各縣稟報亦不過數十騎百餘騎非有大股巨賊也
故臣與劉松山熟商此時兵力宜合併一處先搗該逆老巢則
游氛自息俟其敗竄再行相機截剿不宜分兵四出徒墮賊計
比接喬松年來函謂劉松山一軍宜先向西行然後自北而南
庶可遏賊渡渭之謀臣不解所謂先向西行者係趨何地然後
北趨何地南趨何地何以遂能遏賊渡渭因函覆喬松年請其
詳細指示免諸軍迷於所向旋接覆函仍復渾淪其詞謂不必

按圖指授或有未宜轉使得以藉口等語並謂臣欲擊賊使之北竄該撫臣則恐其北竄而預堵之查此時官軍與賊所踞之地皆在渭河以南若使各軍西趨興武卽當引軍由咸陽渡渭河北岸上駛及其折而南趨又當轉回咸陽渡渭河南岸乃可與賊相遇是所謂先向西行再折而南者不過引軍赴北岸巡哨一次耳當我軍西趨之際游氛之在北岸者或遂折回老巢然及其折而南趨則該逆又將引而北渡誰能禁之而該撫臣謂先向西趨再折而南卽可遏賊北竄此則愚臣之所不解者也至謂臣欲擊使北竄則臣初無此說查該逆初趨華陰嗣竄臨潼現踞秦渡皆沿渭水南岸其蓄謀搶渡北岸蹂躪西同各

屬完善雖童穉猶能知之獨特渭水一帶限隔渭水現雖淺涸然向係濁流泥滓特深賊或鳧渡要不過數十百騎至張總愚大隊挈眷屬挾輜重非搭造浮橋決不能過故此時逆蹤所占地段究不能多此臣愚計所以欲由義井寨逕搗其巢冀得痛加勦洗則各處游氛自息截擊不難既以此說函復喬松年而該撫臣覆書不置一詞但謂劉松山一軍應聽其自行酌度伏思疆臣辦理軍務卽不能詳審賊勢密授機宜亦當明示趨赴何地擊勦使將卒有所遵循安有但指東西南北之虛位聽其自爲趨舍者况劉松山一軍千里遠來於地方形勢全不孰悉先應指示趨向乃喬松年一則謂不必按圖指授轉令有所藉

口一則謂聽其自行酌度是其居心巧滑故作游移以爲勝則
可以居功敗卽可以諉過該撫臣所以爲自全之計者則誠巧
且工矣會亦思

朝廷所以委任疆臣畀以軍事者何等重大獨安忍坐觀成敗
而不之顧乎臣以病休閒散人員祇因軍事羈畱迭奉

諭旨命與喬松年悉心籌商辦理不敢稍涉諉卸然每與該撫
臣商酌機宜輒依違不置可否事後卽竊竊私議巧肆擠排現
值鄰省援軍漸集而喬松年始終惟用此術詭滑推延巧爲藏
身之固事勢已棘不獨各軍將領茫然無所適從卽臣亦覺萬
分棘手五中焦灼不得不將近日規畫情形據實陳明並鈔錄

往復信函恭呈

御覽伏祈

聖鑒訓示飭遵謹

奏

附陳往復信函

謹將臣與喬松年商量進兵往復信函錄呈

御覽

正月初三日致喬松年書

頃探逆捻巨股踞秦渡張總愚踞花園鋪適壽卿來詢及進兵道路弟告以此時該逆既踞秦渡爲老巢其餘興咸醴泉一帶

游氛四溢大軍當由義井寨逕趨梁家橋搗其巢穴則邊馬游騎自必退聚一處因囑渠率所部先赴義井寨駐紮俟各軍齊集卽越梁家橋逕逼其壘整軍大戰幸而克捷則該逆必敗趨鄆盩走郿縣出寶雞一帶以越渭河再爲邀截之計壽卿意以爲然晡後接惠翰謂宜先向西行然後自南而北庶可遏賊渡渭之謀查渭水發源兩當至寶雞而河始闊大由寶雞而下經岐山扶風武功興平咸陽以達高陵迂迴幾及千里皆瀕渭河賊若結筏搭浮橋則處處可渡若涉淺逕過則必趨寶雞乃可縱騎挈輜重以行此時逆匪是否搭有浮橋弟處未接探報來示渾淪不知所謂先向西行者係趨何縣然後北趨何縣南趨

何點何以遂能遏賊渡渭之謀務望逐一詳細指示以豁愚蒙
且使各軍不致迷於所向實爲厚幸

鈔錄喬松年覆書

手示具悉尊意欲擊賊使之北竄再作截剿之計弟意則恐其
北竄擬預堵之是以卽請壽卿諸君子先向西行再折而南庶
可遏其北竄並派譚劉秦三營赴咸陽興平一帶緣渭河此時
水淺處處可渡渭北迭報見賊不必搭浮橋也寶雞誠爲渡渭
要地此時兵力實未能分赴該處如賊竟趨寶雞則亦仍在霞
翁意計之中亦尙不至十分背馳也壽卿西行應駐何地從何
地進兵渠老於兵事可不必爲之指授弟固於地方形勝未能

熟悉縱使熟悉亦似不必按圖指畫儻有未宜轉令有所藉口耳此覆

初四日再致喬松年書

覆翰捧誦反復仍不悟尊意所謂先向西趨再折而南庶可遏其北竄之語爲何所指竊意所謂西趨者當是由咸興上赴武功扶岐一帶然此時省邊官軍與逆賊所踞之地皆在渭河以南其賊騎之竄赴咸興乾醴者特游氛耳若使各軍西趨興武卽當由咸陽渡渭河北岸上駛及其折而南趨又當轉回咸陽渡河乃可與賊相遇是所謂先向西趨再折而南者不過引軍赴北岸游弋一回耳當我軍西趨之際游氛之在北岸者或遂

折回老巢及其折而南趨則該逆又將引而北渡誰能禁之尊
意謂由西而南即可遏賊北竄此愚蒙之所不悟者也至來函
謂弟意欲擊賊使之北竄再行截剿則弟前函初無此說閣下
何所據而云然耶渭河北岸西同鳳乾各屬在秦中較爲完善
之區該逆初趨華陰嗣竄臨潼現踞秦渡皆沿渭水南岸其蓄
謀搶渡以圖蹂躪腹地雖童穉猶能知之獨特渭水一帶限隔
使該逆不得狂逞故此時逆蹤右逼南山左阻渭河所占地段
究不能多即使遍加蹂躪要不越乎鄠盩郿三縣之間趁此時
縱兵擊剿度該逆尙未能肆其馳突此愚計所以欲由義井寨
逕搗其巢冀得痛加剿洗則游氛自息截擊不難安有謀擊使

北竄縱之於平行曠闊之地者雖至愚極闇當不至如是之謬矣至渭水現雖涸淺而向係濁流泥滓特深賊或以輕騎鳧渡要不過數十百騎至張總愚大隊挈眷屬挾輜重非搭造浮橋究不能過所以遲遲至今職是故也閣下謂此時水淺處處可渡然該逆卒尙未渡豈其戀戀於鄆蓋哉其情形可想見矣蓋聞蓋屋與武功交界之區亦有沙灘無泥滓可涉處弟向在蓋屋勦辦蔡啟兩逆曾檄武功劉令督紳團嚴防此岸請飭書檢卷查覈地名檄飭辦理爲要壽卿昨日拔營後弟函囑且勿遠離省邊緣不知尊意欲令趨赴何路尙未定局恐別有調度也弟連日感冒風寒不能出戶未及面聆盡籌力疾草此亦不詳

備惟裁酌之

又者頃聞外閒傳說西路逆回已闌入崔木鎮如其果然是已入陝境矣尊處如接有稟報應請卽檄譚秦各軍速往截剿否則轉瞬擾及腹地防不勝防且慮其竟與捻蹤合併望卽裁酌鈔錄喬松年覆書

手示具悉武功一路現飭查案照行惟此時武功已見賊蹤想乾州岐山已並稟尊處矣崔木鎮之賊據永壽縣稟稱已經退去然西北路不可不防譚秦劉三軍總須往彼耳劉壽卿如何進兵聽壽卿自行酌度爲宜專此布覆

援師剿賊力戰大挫兇鋒疏

同治六月正月初九日

奏爲援師勦賊力戰大挫兇鋒現催各軍繼進恭摺馳陳仰祈
聖鑒事竊臣於正月初七日會將皖南鎮劉松山老湘營各軍
開赴義井寨旋令就近暫紮情形馳奏在案初八日接據劉松
山等牘稱初三日進紮距省十五里之魚化鎮初四五等日迭
有馬賊數百來撲均經擊退稍有斬獲張逆大股仍屯踞秦渡
鎮花園鋪梁家橋一帶據生擒賊供該逆計圖大舉來犯決一
死戰等語當飭各營嚴備以待初六日早探報大隊賊股涌來
劉松山等立即派定隊伍相機迎戰辰初馬隊數百飛馳而來
將近營盤因飭各營畱四成隊固守營壘派七成隊出營里許
排列陣勢以老湘一四五六等旗列前三三旗及和字營列左

八十兩旗列右七九副前等旗居中以備衝鋒厚字營及敬字營列後壽字營馬隊及順字營左右馬隊張兩翼排列彼此商定無論前左右三面有大股來敵後路隊伍總宜穩持不動正布定閒馬賊數千四遠包圍而步賊萬餘結成十餘隊蜂擁撲近矛捍林立鎗礮亦多劉松山等立飭一四五六等旗奮力迎擊煙塵蔽野塵戰踰時賊勢稍卻旋復加派馬步大隊分三面冒煙猛撲勢極兇悍劉松山等指揮中左右三面各營鎗礮連環刀矛奮進該逆仍復冒死不退劉松山隨又分飭七九副前等旗從大陣中分三面衝出十盪十決賊漸退開是時賊騎向遠包鈔已出我軍之後編修張錫嶸自率淮勇百餘人奮力衝

擊陷入賊陣身帶十餘傷登時殞命該逆乘勢復分馬賊衝撲
營盤幸各營早已預備均經擊退其大股悍黨仍拌命猛撲我
陣各勇壯氣百倍猛力抵敵該逆旋敗旋撲者七八次各勇奮
猛倍常再接再厲戰約數時之久賊屍狼藉逆勢不支漸引而
退該總兵等見賊氣將衰於是號鼓雷鳴呼聲震地各率隊伍
衝擊賊遂大敗追奔八九里斬馘甚夥該逆遁還秦渡一帶
戍刻收隊歸營是役自辰至戌惡戰終日共計斃賊一千三四
百名帶傷逃去者不計其數生擒百餘立就陣前正法奪獲騾
馬七十餘匹旗幟一百三十面擡鎗七件小鎗一件其餘刀矛
軍械甚夥查點老湘營勇丁陣亡十八名受傷九十六名敬字

三營陣亡十九名受傷三十六名和厚兩營陣亡十三名受傷
三十二名厚字營營官陳福萬受傷較重容俟查明繕摺彙報
等情前來伏查劉松山等率師遠來喘息未定卽能激厲士卒
惡戰終日痛挫兇鋒洵堪丕振軍威現探張逆敗後卽將咸陽
興平武功醴泉扶風各處游騎收集回巢憤圖大舉報復牛東
一帶賊騎充斥劉松山函催撥營助戰以期痛加剿洗臣查渭
河北岸游氛旣經該逆調回老巢則喬松年所欲派赴西路之
師更可無庸前往現擬派撥劉厚基鄆太愚黃鼎等各率所部
併力前進以壯聲威而摧兇焰至翰林院編修張錫嘯千里赴
援壯志未展遽卽奮勇捐軀深堪憫惻劉松山稱其自到軍營

嘗著草履與士卒同甘苦文學之臣乃能堅苦自奮如此臣實
惜之相應叩懇

天恩交部優加議卹以慰忠魂所有援師勦賊力戰大挫兇鋒
現擬派兵繼進緣由理合恭摺由驛馳陳伏乞

皇太后

皇上聖鑒訓示再此次摺件仍係借上次備用巡撫關防印花
繕發合併聲明謹

奏

附陳湘軍到陝情形疏

再查劉松山所統步隊約十七營馬隊三起其本部名老湘營

者十二營又壽春鎮李祥和帶和厚兩營皆屬湘軍編修張錫
嶸所帶敬字三營係屬淮軍均於去臘二十三、四日行抵潼關
二十九日劉松山率師到省來見備述所部湘中子弟聞臣軍
失利之信均皆奮躍而來思爲臣報雪仇恥已於二十五日在
潼關先行度臘二十六日卽拔隊兼程來省現擬卽日開赴前
敵等語臣以該軍遠來疲乏囑令休息兩三日再行前進乃喬
松年以其爲湘軍而惡之每加褻貶謂湘軍不如淮軍先存隔
膜之見查張錫嶸前由雲南學政丁艱過蜀臣時在四川藩司
任內見其爲人樸質耐苦志操過人函薦兩江督臣曾國藩處
學習營務曾國藩旋令募淮勇三營訓練成軍與劉松山同禁

一處此次到陝劉松山每贊該編修訓練之勤張錫嶸亦甚贊
劉松山治軍之整是該二員初無不治之處臣以張錫嶸初募
淮軍未經戰陳每囑劉松山力爲護持並誠張錫嶸依附湘軍
勿得恃銳輕進該二員亦皆深以爲然乃喬松年接次傳見淮
營都司李良田以示親厚李良田旋向外閒聲言我軍主將係
翰林曾任學臺豈可由劉鎮節制况捻逆但畏淮軍不畏湘軍
等語初五日張錫嶸來至臣寓當卽告以此語囑令傳諭營弁
併力同心勿懷湘淮之見不期該編修卽於初六日奮勇捐軀
實堪愴惻現在淮軍三營無員統帶不得不令歸併老湘營由
劉松山拊循調度甚慮旁人挑剔彼此或生岐異卽難冀其得

力擬以後察看情形如不相安卽函告曾國藩將此軍調回徐州或另派妥員接管理合附片陳明伏乞

聖鑒謹

奏

附陳楚軍茫無主持情形疏

再楚軍自去臘十八日挫衄之後月餉久懸飢寒交迫死者無葬埋之費傷者無醫藥之資各軍將領日來臣寓泣訴臣既屢次函告喬松年求爲飭局發給銀兩並不見覆二十八日臣親赴撫署告以情形該撫臣言此事當問藩司囑臣自與林壽圖商酌林壽圖以未奉札飭亦難擅專至除夕始發十日之餉然

旗幟號衣器械之類迄今尚未製辦給發何論餉糈現值張逆
被老湘軍擊敗之後忿圖大舉劉松山自慮兵力尚薄眾寡難
敵函囑臣催速各軍踵進以期併力痛剿臣比傳劉厚基鄒太
愚黃鼎等飭令迅卽整備前征乃據劉厚基面稱喬松年正在
催赴咸陽興平一帶該員等稟請速發器械旗幟備用而該撫
臣飭令不許更待辦齊卽速遄征否則必加參辦劉厚基等無
可如何又來臣處分詎查張逆巨巢既踞秦渡其各路游氛又
均收回南岸自應就近痛擊不當置兵於北岸無賊之處而軍
械不全旗幟不整是以其卒予敵安望克敵制勝之功喬松年
於兵事大不諳悉於賊勢軍情太無體察隨意指揮視同兒戲

臣實憂之前經奏乞

天恩迅飭左宗棠來陝督辦軍務不知能否仰邀
俞允然計左宗棠卽能速來逮到陝已在二月中旬現在軍情
緊急茫無主持實堪焦灼萬一事機再誤劉松山一軍復爲逆
眾所乘則陝局不堪涉想不得不據實陳明伏祈

聖鑒訓示謹

奏

劉中丞奏議卷二十終